

Lumanti Daboo

लुमन्ति दबू

दौपै ल्या: ७



लुमन्ति दबू

नेपालभाषा केन्द्रीय विभाग

यलधवाखा, यल

ने.सं. १९३८

नेवाः अर्गनाइजेसन अफ अमेरिकाया नेपाः देय् प्रतिनिधि व
लुमन्ति दबूया नायः भाजु किरण केन रजितया अध्यक्षताय् पिदनेत्यंगु
“लुमन्ति दबू ल्याः ७” सुथालाक्क पिदनेमा धकाः भिन्तुना देछानाच्वना ।

ज्यासना पुचः

मय्जु बबिता श्रेष्ठ	नायः
भाजु पुष्कर विक्रम प्रजापति	न्हापांम्ह न्वक्
भाजु सुशील लाल श्रेष्ठ	लिपांम्ह न्वक्
भाजु महिन्द्र प्रधान	मू छ्याञ्जे
भाजु दिभाकर धौमडेल	छ्याञ्जे
भाजु राजेश लाल श्रेष्ठ	दाँभरी
भाजु यज्ञ मान शाक्य	मू दुजः
भाजु उदय श्रेष्ठ	मू दुजः
मय्जु मीना प्रधान	मू दुजः
भाजु किरण केन रजित	नेपाः देय् प्रतिनिधि



NEWAH ORGANIZATION OF AMERICA



नवाह अर्गनाइजेसन अफ अमेरिका

NEWAH ORGANIZATION OF AMERICA

A tax Exempt, 501(c)(3) Non-Profit Organization

Newah Organization of America (NOA)

Phone : 703-477-6920 | Fax : 703-372-2952

E-mail : noa2001usa@gmail.com

Website : www.newah.org

Address : 9435 Lorton Market St, Suite 101, Lorton, Virginia 22079, USA

लुमन्ति दबू

Lumanti Daboo

लुमन्ति दबू

द ट

ने.सं. ११३८

ल्या: ७

मू-सम्पादक

किरण केन रंजित

कार्यकारी सम्पादक

राजितबहादुर श्रेष्ठ

सम्पादक

निर्मला श्रेष्ठ, राकेश महर्जन व वीणा महर्जन

व्यवस्थापक

सिल्भा प्रधान, कविना नक:मि, करुणा प्रधान,
श्रीधर डाखुसी श्रेष्ठ, दर्शनवीर शाक्य, अर्विन्द्रमान सिंह,
संजीवमान वैद्य, कविन श्रेष्ठ, पुष्पनारायण श्रेष्ठ

पिकाक:

लुमन्ति दबू

त्रिभुवन विश्वविद्यालय
नेपालभाषा केन्द्रीय विभाग
पाटन संयुक्त क्याम्पस, यल ।

थाकू

डट्स प्रिन्टिङ्ग हाउस, पिन्धेँ, यल ।

Tel: 5524490, dotsprinting@gmail.com

ग्वहालि मू: २००/- तका



त्रिभुवन विश्वविद्यालय
TRIBHUVAN UNIVERSITY
मानविकी तथा सामाजिक शास्त्र संकाय
FACULTY OF HUMANITIES AND SOCIAL SCIENCES

फोन नं. : २२६०४९४
Ph: 5260494

नेपालभाषा केन्द्रीय विभाग
CENTRAL DEPARTMENT OF NEPALBHASHA

पत्र संख्या:



चैन लाकौल स्मृति भवन
पाटन संयुक्त क्याम्पस परिसर
पाटन बोक, ललितपुर

नेसं ११३८ बछलागा १०
२०७५ वैशाख २७

भित्तुना

लुमन्ति दबूया खसालय मदिक्क पिदानाछ्वंगु लुमन्ति दबू ल्या: ७ पिदंगुलिं यक्व भित्तुना । छ्व दबू नेपालभाषा एम.ए. न्हूपिं व पुलापि विद्यार्थीतयगु मका: दबूकथं विकास जुइत मा:गु संगठनया विधान विधिवत दर्ता याना: मका:दबूकथं विकास जुया: संगठनया उतरोत्तर प्रगति यानावने फय्मा धैगु मनंतुना ।

डा.ओमकारेश्वर श्रेष्ठ
सहप्रा. तथा प्रमुख
नेपालभाषा केन्द्रीय विभाग ।



त्रिभुवन विश्वविद्यालय
Tribhuvan University

मानविकी तथा सामाजिक शास्त्र संकाय
Faculty of Humanities and Social Sciences

नेपालभाषा केन्द्रीय विभाग
Central Department of Nepalbhasha

चैन लाकौल स्मृति भवन
पाटन संयुक्त क्याम्पस परिसर
पाटनढोका, ललितपुर
फोन नं. ५२६०४९४

पत्र संख्या :

मिंतुना

त्रिभुवन विश्वविद्यालयया शिक्षा प्रणालीकथं थुगुसीनिसैं एम् ए नेपालभाषाय् नं सेमेष्टर प्रणाली लागु जुल, अथेहे नियमित कक्षापाखे विद्यावारिधीया व्यवस्था नं जुल । न्ह्याबलें थें थुगुसी नं लुमन्ति दबूपाखें ब्वमिपिनिगु ल्या अप्वय्केगु नितिं सक्रिय भूमिका म्हितल । थुकथं दबूपाखें नेपालभाषा केन्द्रीय विभागायात ग्वाहालि जुइगु थीथी ज्याभ्वःत जुयावयाच्वन । थ्वहे भवलय् नेपालभाषा ब्वमिपिन्त ग्वाहालि जुइकथं लुमन्ति दबू दँपौ दँय्दँस पिथनाच्वन । थुगुसी नं लुमन्ति दबू ल्याः ७ पिदंगु तसकं लसताया खँ खः ।

मेमेगु भाषाय्थें नेपालभाषाय् नं एम् ए ब्वने दुगु लसताया खँया नापं भी नेवाःतय्गु छगू गौरवया नं खँ खः । उकि एम् ए नेपालभाषा ब्वनीपिनिगु ल्याः म्हो मजुइकेया लागि लुमन्ति दबूपाखें न्ह्याबलें थें निरन्तर ग्वाहालि जुया हे च्वनी । वइगु पुस्तां नं छिकपिनिगु मुल्यांकन यानाः नियमित रुपं ल्याः पिकयाच्वनी धयागु भलसा कयाच्वना । नापं छिकपिनिगु पलाःपतिं उपलब्धी जुयाच्वनेमा धकाः यक्व यक्व भिन्तुना देछानाच्वना । सुभाय् ।

सृजना प्रधान

सहप्रा. सृजना प्रधान

निवर्तमान प्रमुख

नेपालभाषा केन्द्रीय विभाग

यलध्वाका, यल ।

भितुना

लुमन्ति दबू ल्याः ७ पिदंगुलिं लयुताः प्वंकाचवना । नेपालभाषा एम्.ए. तगिं
व्वनाच्वपिं विद्यार्थीपिनिगु छगू जक संस्था 'लुमन्ति दबू' सक्रिय जुयाच्वंतले
'केन्द्रीय विभाग' धिसिलानाचवनी । गुबले लुमन्ति दबू निस्कृय जुइ उबले
'केन्द्रीय विभाग' नं निस्कृय जुल धकाः थुइकेमाः ।

त्रि.वि. अन्तरगतया मेमेगु केन्द्रीय विभाग व नेपालभाषा केन्द्रीय विभागया
मुख्य भिन्नता धइगु नेपालभाषा केन्द्रीय विभाग नेवाः मात्रया भावात्मक स्वापू
दुगु विभाग खः । थौं आपालं क्याम्पसया शिक्षण समिति अन्तरगत नेपालभाषा
व्वपिं मदयावन, नेपालभाषा विषय हे लिक्नाछवय् धुंकल । अथेजुगुलिं नं
नेपालभाषा केन्द्रीय विभागयात म्वाकातय्त लुमन्ति दबू सक्रिय जुयातुं
चवनेमाः ।

लुमन्ति दबू ल्याः ७ पिदंगुलि छिकपिं लुमन्ति दबूया पदाधिकारीपिंलिसे
सकल दुजःपिन्त दुनुगलनिसें सुभाय् बियाचवना ।



सहप्रा. तुलसीलाल सिंह

प्रमुख सल्लाहकार

लुमन्ति दबू

सम्पादकीय

हलिमय छगू हे जक संस्था दु गन नेपालभाषाया एम. ए. ब्वनेदइ । उगु संथा नेपालय् च्वंगु त्रिभुवन विश्वविद्यालयअन्तर्गत नेपालभाषा केन्द्रीय विभाग खः । सुं नं नेपाःमि विदेशय् च्वनाः नं नेपालभाषा ब्वनेगु इच्छा दुसा वा सुं नेपालीमुलया विदेशी नागरिक नेपालभाषा ब्वनेगु बिचाः यातधाःसा थुगु विभागं याय्माःगु फुक्क ग्वाहालि यानावयाच्वंगु दु । थ्वहे विभागअन्तर्गत नेपालभाषा एम्.ए. ब्वनेधुकुपिं व ब्वनाच्वपिं विद्यार्थीपनिगु संस्था खः - लुमन्ति दबू । लुमन्ति दबू पलिस्था जुसांनिसें विभागयात ग्वाहालि जुइकथं विशेषत नेपालभाषाया विद्यार्थीत अप्वय्केत आपालं ज्या जुयावयाच्वंगु दु । थुगुसी विभागलिसें क्वातुक्क स्वापु तयाः थीथी संस्थाया ग्वसालय् जुगु सफू ब्वज्याय् दबूपाखें सक्रिय सहभागिता क्यन । अथे हे नेपालभाषा, लिपि, साहित्य, संस्कृति, सम्पदा अध्ययन अनुसन्धानया निंतिं नेवाःतय्गु प्राचीन वस्ती चित्लांग, तिस्तुंग व पालुंगया अध्ययन भ्रमण जुल ।

लुमन्ति दबूया ग्वसालय् नेपालभाषाया विद्यार्थीपिन्त प्रोत्साहन व ग्वाहालि जुइकथं थीथी सफू व लुमन्ति दबू पत्रिका पिथनेगु ज्या नं जुयावयाच्वंगु दु । थ्वहे भवलय् लुमन्ति दबूया ग्वसालय् थुगुसी नेसं ११३८ या लसताय् लुमन्ति दबू ल्याः ७ साहित्यिक च्वसुलगायत, भाषा, तजिलजि, सम्पदासम्बन्धी आपालं च्वसुत दुथ्याकाः पिथनेखंगु लसताया खँ खः । विशेषयानाः थुगु ल्याखय् नेपालभाषा एम्.ए.या लोकवार्ता विषयअन्तर्गत शैक्षिकसत्र २०७१/७२ या विद्यार्थीपिन्सं पाल्या, तानसेनया क्षेत्रगत अध्ययन अनुसन्धान यानाः विभागय्

न्त्यव्वःगु प्रतिवेदनया सारसंक्षेप दुथ्याःगु दु । अथे हे नेपालभाषा केन्द्रीय विभागय् अभिलेखीकरण जुयाच्चंगु आधारय् नेपालभाषा एम्.ए. या न्हापांगु दँ निसंया विद्यार्थीपिनिगु नां व फोन नम्बर नं दुथ्याःगु दु । उकिं नेपालभाषाया विद्यार्थी व मेमेपिं भाषा, संस्कृतिप्रेमीपिनिगु निंतिं थुगु लुमन्ति दबू ल्याः ७ संग्रहणीय जुइ । थज्याःगु अमूल्य पत्रिका पिथनेत नेपाःलगायत विदेश, विशेषतः अमेरिकाय् च्वनादीपिं नेवाः पासापिन्सं आपालं ग्वाहालि याःगु दु । बिदेशय् च्वनाः नं मातृभाषा, संस्कृति, संस्कारयात थकाय्त नेवाःतय्सं आपालं ग्वाहालि यानाच्चंगु दु धैगुया थ्व दसु जुयाव्यूगु दु । पत्रिका पिथनेत च्वसु, विज्ञापन बियाः ग्वाहालि यानादीपिन्त दबूपाखें न्ह्याक्व सुभाय् देछासां म्हो जुइ । थज्याःगु ग्वाहालि लिपा लिपा नं निरन्तर जुइ धैगु विश्वास याना ।

किरण केन रंजित

नायः, लुमन्ति दबू

लुमन्ति दबू च्याकःगु ज्यासना पुचः



किरण केन रंजित
नायः



रामेश्वर श्रेष्ठ
निवर्तमान नायः



विजय वज्राचार्य
न्यक्



संजीव मान वैद्य
छथाञ्जे



सिल्पा प्रधान
ल्यू-छथाञ्जे



कबिन श्रेष्ठ
दाँभरी



कबिना नकःमि
ल्यू-दाँभरी



बिना महर्जन
मू दुजः



दर्शनवीर शाक्य
मू दुजः



राकेश महर्जन
मू दुजः



अर्विन्द्रमान सिंह
मू दुजः



करुणा प्रधान
मू दुजः



श्रीधर डाखुसी (श्रेष्ठ)
मू दुजः



पुष्पनारायण श्रेष्ठ
मू दुजः

**लुमन्ति दबू च्याकःगु ज्यासना पुचःया
प्रमुख सल्लाहकारपिं**



सहप्रा. डा. ओमकारेश्वर श्रेष्ठ



सहप्रा. तुलसीलाल सिंह

शिक्षक प्रतिनिधि



उपप्रा. राजितवहादुर श्रेष्ठ

सल्लाहकारपिं



हिराकाजी महर्जन सहप्रा. मोहनकृष्ण श्रेष्ठ

प्रकाश शाक्य

सुनिता राजभण्डारी



बाबुराजा महर्जन



भरत महर्जन



हरिशंकर मानन्धर

धलः

विधा/शिर्षक	चवमि	पौल्याः
चिनाखँ/हाइकु/सायरी		
हाइकु	रेणु श्रेष्ठ	३५
अय् मनू !	सुनिता राजभण्डारी, जुन	७१
आन्तरिक उपनिवेशया बूथ लाकां	विमल ताम्राकार	७६
बाखं		
मतिना	नानीमैया श्रेष्ठ	३९
मौन चिल्लाय्	मोतिलक्ष्मी शाक्य	६४
चवखँ		
“नेपाली विहार” छगू म्हसीका	उपप्रा. ईश्वरीमैया श्रेष्ठ	५
भाव प्याखं	शि.स. शरद कसाः	१८
अभिनव गुप्त	उपप्रा. रा जितवहादुर श्रेष्ठ	२२
पूर्वीय काव्यशास्त्र	आ.शि. लसता सिंह	२७
भारखः	तेजमाया महर्जन	४४
प्राचीन नेपालभाषा काव्यया इतिहास ...	शान्त महर्जन	४६
ज्याथा पञ्चदानगुथिया सनाःघासा	मोहनदेवी महर्जन	५२
शास्त्रीय प्याखनय् घंगला	आ.शि. जीवनकुमार महर्जन	५६
नेवाःभाय्या ऐतिहासिकता	प्रकाश शाक्य	६१
चित्लांग, तिस्तुंग, पालुंगया छत्वा खँ ...	कृष्णा श्रेष्ठ	६८
काव्य हेतु	कविना नेपाली (नकर्मि)	७२

विधा/शिर्षक	चवमि	पौल्याः
-------------	------	---------

पाल्पा विशेष :

पाल्पाया म्हसिका	८३
पाल्पाया नखःचखः	अमिर महर्जन	८७
सुकुन्दा दय्केगु प्रविधि	अर्विन्द्रमान सिं	९४
पाल्पाय् भगवती जात्रा	विजय वज्राचार्य	१०३
पाल्पाया लोकबाखं	विणा महर्जन	१०८
पाल्पाया नसात्वँसा	दर्शनवीर शाक्य	११४
पाल्पाया वास्तुशास्त्र	जसना राजभण्डारी	१२३
पाल्पाया लोकोपचार	केशरी प्रधान	१२८
पाल्पाया अन्धविश्वास	राकेश महर्जन	१३६
पाल्पाया अमरनारायण देगः	रानीशोभा महर्जन	१४४
पाल्पाया नेवाः संस्कार	उमेश्वरमान प्रधान	१५२
तिसा मालेगु जात्रा	वीरमाया महर्जन	१५६
बोडेय् मेय् प्वाःखनेगु जात्रा	पूर्ण मानन्धर	१६०
पचली भैरवया बाखं	श्रृजना महर्जन	१६३
बुलु गांया सीसंस्कार	सुजल वज्राचार्य	१६८


भाषा विज्ञान

कुगु, तुगु, दुगु, फुगु ऱ्हस्व जुइ	सहप्रा. काशीनाथ तमोट	१
नेपालभाषाय् चा या छ्यलाबुला	रविन श्रेष्ठ	३२
यँया खँग्वःनाप पाःगु भौँतया छुं खँग्वः	हरिशंकर मानन्धर	७७

समीक्षा

सरल व सुगमताया कवि माधव मूल	इन्द्र माली	११
नचुयाबीपिं मनूत : मिसा समस्या	श्रद्धाचारी तिमिला	३६
“डा. नम्रता” बाखंया छत्वाचा म्हसिका	उपप्रा. निर्मला श्रेष्ठ	४२

कुगु तुगु दुगु फुगु ह्रस्व जुइ



सहप्रा. काशीनाथ तमोट

नेपालभाषाया छ्यलाबुला चकना: वनाच्चंगु दु । थौकन्हय् बुखँपौ, पत्रपत्रिका, सफू च्वज्याय् जक मखु इन्टर्नेट अनलाइन पौ, ब्लागय् नं थ्व छ्यः । नेपालभाषाया वाक्य संरचनाय् -कुगु, -तुगु, दुगु व फुगु खँग्वः आपालं छ्यलेमाः । उकिया छ्यमिपिसं व दीर्घ जुइ धकाः भ्रम जुयाः -कूगु, -तूगु, दूगु, फूगुकथं छ्यलावयाच्चंगु दु । उकिया हुनि (कारण) सीकेबह जू । उकिया लागिं नेपालभाषाया धातु रूप व अपूर्ण भूतकालिक प्रत्यय 'व' लोप जुयाः थिथि रूप काःगु खँ ध्वाथुइकेमाः । गथे -

माग्वः	धातु (क्रियार्थक)	पूर्व व-युक्त रूप	ज्वःलाःवना	च्वज्या रूप
अकारान्त	न (नये)	नव/नवगु	नअगु	नःगु
आकारान्त	का (काये)	काव/कावगु	काआगु	काःगु
इकारान्त	वि (विये)	विव/विवगु	विउगु	वउगु/व्युगु
उकारान्त	जु (जुये)	जुव/जुवगु	जुउगु	जूगु
ए=यकारान्त	क्य (क्यये)	क्यव/क्यवगु	क्यअगु	क्यःगु
ओ=वकारान्त	ख (खये)	खव/खवगु	खअगु	खःगु

धलः १ - अपूर्ण भूतकालया प्रत्यय व-या ब्वलँ

थन 'व' प्रत्यय क्वय्वियाकथं ब्वलन -

१. न्हापा न्ह्यपुलां नेपालभाषाया इलय् 'व' प्रत्ययं हे अपूर्ण भूतकाल थुइकीगु खः । लिपुलां इलय् अभ् थौकन्हय् 'गु' प्रत्यय स्वाःवल ।
२. व प्रत्ययं अकारनाप अ, आकारनाप आ, इकार व उकारनाप उ, ए=यकारनाप य्अ-या कारणं अ, ओ=वकारनाप व्अ-या कारणं अ रुपय् हिल । व अ, आ, य, वकारय् ह्युगु कमजोर अ, आ, तनाः तःहा चिं (: विसर्ग) जूवन । इकार व उकारय् सन्धि जुल - इया य् जुयाः उ- नाप

स्वाःवन यु-कथं । उकारय् उ-उ स्वानाः दीर्घ ऊ जुल । उकार दीर्घ जूगुलिं इकार नं दीर्घ जुइमाः थें च्वं, तर इ-या य्-कथं सन्धि जूगुलिं दीर्घ जुइमाःगु कारण खनेमन्त ।

३. नेपालभाषाय् भारोप भाषाय्थें ए, ओ दीर्घ मखु । थ्व नेपालभाषाय् ह्रस्व (चीहा सः) खः । थ्व खँ क्यनेत नेपालभाषाय् ए य-कथं, ओ व-कथं ब्वलन । य, व च्वःसां व नेपालभाषाया ए, ओ माग्वः (स्वरवर्ण) हे खः । ए, ओ रूपय् च्वःसा थथे जुइ -

के (केये)	केव/केवगु	केएगु	केःगु
खो (खोये)	खोव/खोवगु	खोओगु	खोःगु

नेपालभाषाया खँग्वः ब्वलंगु ल्याखं अथे च्वइमखु, अझ सः नं अस्वाभाविक खनेदु ।

४. ले-अन्त्य क्रियाय् व-या पलिसा न्हापा ल दुगु खः । गथे -

न्हि (न्हिले)	न्हिल/न्हिलगु	न्हिउगु	न्हिउगु/न्ह्युगु
सु (सुले)	सुल/सुलगु	सुउगु	सूगु

नेपालभाषाय् के-अन्त्य हःपा (प्रेरणार्थक) क्रिया च्वके, ल्वाके आदिया न्हापाया अपूर्ण भूतकालया व-युक्त रूप व उकिया आःया रूप थथे खः ।

पुलांगु रूप	हिला रूप	छ्यलेमाःगु रूप
च्वकव	च्वकउगु	च्वकुगु
ल्वाकव	ल्वाकउगु	ल्वाकुगु
न्हिलकव	न्हिइकउगु	न्हिकुगु/न्हीकुगु
न्ह्यकव	न्ह्यइकउगु	न्ह्यइकुगु/न्ह्य्वकुगु
ल्हेयकव	ल्ह्यय्कउगु	ल्ह्यय्कुगु
खोयकव	ख्वय्कउगु	ख्वय्कुगु

धलः २ - के-हःपा अपूर्ण भूतकालया प्रत्यय -कुगुया न्ह्यव रूप

क्वय् व-प्रत्ययसम्बन्धी थिथि खँ थुकथं न्ह्यथने फु -

१. हनेबहपिं यँमि चित्तधर 'हृदय' (नेसं १०२६-११०२) व वैकुण्ठप्रसाद लाकौल (नेसं १०२६-११२७)जुपिसं न्ह्याबलें च्वकःगु, याकःगु धकाः न्ववानादीगु

जिं न्यनागु दु । आः नं यँ-यलया पुलांगु पुस्तां थये न्वंवाःनि । थन व तःहा सः (दीर्घ, :) जूवन ।

२. धलः १ स्वयंबले उकारय् जूगु, खूगु आदि तःहा रूप खनाः च्वकगु, ल्वाकगु आदि रूप नं च्वकूगु, ल्वाकूगु आदि दीर्घ जुइ धकाः ताय्कल, गुगु पाय्छि मखु ।
३. ले-अन्त्य क्रियाय् न्हापा व-या पलिसा ल दुगु खः ।

चव्य न्त्यथना धलः १ व धलः २ या दसुं नेपालभाषाय् आपालं छ्यलीगु के-प्रत्यय, ते-प्रत्यय, क्रियार्थक दये, फये व अकरण खये क्रियाया अपूर्ण भूतकाल रूप क्वय्वियाकथं जुइगु यच्चुक सीदु ।

क्रियार्थक	खँवः	व-युक्त रूप	हिला रूप	छ्यला रूप
प्रत्यय के	नके	नकव/नकवगु	नकउगु/नकःगु	नकुगु
प्रत्यय ते	सःते	सःतव/सःतवगु	सःतउगु/सःतःगु	सःतुगु
दये	दये	दव/दवगु	दउगु/दःगु	दुगु
फये	फये	फव/फवगु	फउगु/फःगु	फुगु
(म)खये	(म)खये	(म)खव/(म) खवगु	(म)खउगु/(म)खःगु	(म)खुगु

धलः ३ - अकारान्त धातुया अपूर्ण भूतकालया रूप

सःते (सःत-ये), द-ये, फ-ये, ख-ये अकारान्त धातु-युक्त क्रिया जूगुलिं सःतुगु, दुगु, फुगु, मखुगु, अपूर्ण भूतकालया रूप ढस्व जूगु खः ।



नेवाः अर्गनाइजेसन अफ अमेरिकाया नेपाः देय् प्रतिनिधि व लुमन्ति दबूया नायः भाजु किरण केन रंजितया अध्यक्षताय् पदनेत्यंगु
“लुमन्ति दबू ल्याः ७”
 सुथालाक्क पदनेमा धकाः भिन्तुना देछानाच्चना ।

SARITA DANGOL
 Laurel, Maryland
 USA

“नेपाली विहार” छगू म्हसीका



उपप्रा. ईश्वरीमैयां श्रेष्ठ

पृष्ठभूमि

नेपालभाषा साहित्यया इतिहासयात आःतक नं स्वंगू हे ब्वय् ब्वथला अध्ययन याय्गु चलन दु । प्राचीनकाल (नेसं ६२५-९६७), माध्यमिककाल (९६७-१०६१) व आधुनिककाल (१०६१ - आःतक्क) । न्यासः दँ मयाक न्ह्योनिसें अस्तित्वय् दुगु नेपालभाषा साहित्यया इतिहासयात थौतक नं स्वंगू हे ब्वय् ब्वथला अध्ययन याय्गु चलन दु धकाः धयाच्चनेगुया अर्थ आधुनिककाल धकाः नालातःगु नेपालभाषा साहित्यया इतिहास आधुनिककालया लागीं पुलाः वनेमफुगु सत्यतथ्य खँयात उलाव्यू । अथेजुगुया कारण विश्व साहित्यय् वा नेपाःदुनेया हे मेगु भाय् गुगु भाय्यात राष्ट्रं नं गाक्क संरक्षण बियातःगु खः, खस नेपाली भाषाया साहित्यया इतिहासय् आधुनिककालं फपुला वनेधुंकूगु खं क्यं । यद्यपि खस भाषा नेपालीयात राष्ट्रं संरक्षण, संबर्द्धन याःथें नेपालभाषायात याःगु खनेमदु । थौतक्क नेपालभाषाया संरक्षण व विकास याय्गु लँपुइ राष्ट्रियस्तरसिबें व्यक्तिगतरुपं हे जक न्ह्याःगु खनेदु । यदि राष्ट्रं थःगु देय् दुनेया थीथी भाय्यात नं उलि हे संरक्षण व संबर्द्धन याय्गु नीति दय्कूगु जूसा नेपालभाषा साहित्यं नं आपालं मू पुला, न्ह्यावना तःजिगु थाय् काय्धुंकीगु खः । थ्व धयागु मात्र नेपालभाषाया अथवा नेवाःतय्गु जक गौरवया विषय मजुसे नेपाः देय्यागु हे गौरवया विषय जुइगु खः । तर इतिहासया थीथी थाकुगु, अःपुगु काल पार यानाः थौं वःगु संघीय व्यवस्थाया इलय् नं नेपालीभाषां थें देय्या मेमेगु भाषायात उलि थाय् मब्यूगु अनुभूति जू । यद्यपि ईव्यः यक्वं हिलेधुंकूगु दु, नेपालभाषाया सन्दर्भय् नं न्हापायागु कालय् थें थःगु मांभाषां च्वया सजाय् फय्माःगु ई मखु, थःगु मांभाय्या सफू च्वयाः व्यवस्थाया मिखाय् धू जुइमाःगु व्यवस्थाया ई नं मखु । अथेसां नेवाःभाय्यागु थीथी ख्यः गुलि विकास जुइमाःगु खः जुइ फयाच्चंगु मदु धैगु खँ सीदु । ईव्यःयागु हिउपा नापनापं थौं मातृभाषा

अनुरागी जक जुयाः मांभाय्या सेवा जक यायगु अवस्था नं मजुल, धायत्यनागुया तात्पर्य छु धाःसा, यदि ल्हाःम्हुतु चूलाकीगु लँपु, मनूतय थःगु व्यक्तित्व विकास यायगु माध्यम नं जुइफूगु जूसा आःतक नं नेवाःभाय्यागु विकास मजगु बारे, नेवाःतय्सं नेवाःभाय्यात म्वाकातय्माः धयागु वहसयागु विषय मजुइफु । यदि थ्व अवस्थां पार जुइफूगु जूसा साहित्यया विकासं नं गति काइगु खः । मनं तुनाथें नेवाःभाय्ख्यःया विकास मजसां जु हे मजूतक ला धया निराश जुइगु अवस्था ला मदुथें च्वं । तर थुलिं हे गाः धकाः च्वनेगु नं न्ह्यावनेगु लँपुइ पंगः थनेथें जुइ । उकिं आशा व विश्वास याय, सम्बन्धित ख्यलं नेवाःभाय, साहित्ययात न्ह्यज्याकेगु ज्याय् निरन्तर रुपं न्ह्यां हे बनाव्चनी ।

परिचय

नेपालभाषा साहित्यया इतिहासय् माध्यमिककाल महत्वपूर्णगु काल खः । थ्व माध्यमिककालया शुरुवाट व विकास यायगु ज्याय् मूवंगु थाय् दुगु थीथी पत्रिका, सफू आदि मध्ये छगू ‘नेपाली विहार’ कविता मुना खः । ‘नेपाली विहार’ नेपालभाषा साहित्यय् दकले न्हापांगु तःम्ह कविपनिगु कविता मुना खः । थुकिया मुनामी व सम्पादक फत्तेबहादुर सिंह खः । नेसं १०५९ मिलापुन्हीबलय् न्हापां पिदंगु थ्व ‘नेपाली विहार’ नेपालभाषा व साहित्यया इतिहासय् छगू नालेबहःगु पलाः खः । थ्यंमथ्यं चय्दं (८०) न्ह्यो बेतियां पिदंगु द्वःछिगु प्रतिमध्ये उबले हे न्यासःगु विक्री वितरण जुयाः फुइधुंकूगु सफू खः थ्व । उबले ल्यंदुगु न्यासःगु सफू तत्कालीन व्यवस्थां जफत यानाः दुर्लभ जगू खः । थ्व पंक्तिकारया नं छगू अनुभव दु, पञ्चायत कालय् छम्हसिनं (?) थ्व न्ह्यःने तय्मज्यूगु सफू धकाः ब्यूगु खः । थ्यंमथ्यं स्वीन्हय्दं-स्वीच्यादं लिपा नेसं १०९६ ल्हुति पुन्हीबलय् निगूगु संस्करणकथं पिहाँवःगु थ्व सफू छगू प्रारम्भिक पद्य-संग्रह खः । थ्व मुनायात निगू ब्वय् ब्वथलातःगु दु । थुकी यलया मल्ल जुजु श्रीनिवास मल्लयागु छपु कविता प्राचीन कालयागु दुसा मेगु माध्यमिककालयापिं थीथी कविपनिगु पद्य दुथ्याः । न्हापांगु ब्वय् गुपु (९) व निगूगु ब्वय् च्यापु (८) यानाः भिन्हय्पु (१७) पद्य दुथ्याः । थुकी दुथ्याःपिं कविपिं व कविता क्वय् न्ह्यथनाकथं दु -

१. सिद्धिचरण श्रेष्ठ - राष्ट्रीय गान, वर्षा, गंगु खुसी ।
२. पूर्णबहादुर नेवा - धर्मया मर्म ।
३. फत्तेबहादुर सिंह - स्वां व कं, स्त्री शिक्षा, सफलताया नियम, प्रभाति (ब्यहांचुली), बांमलागु चाल ।

४. श्रीनिवास मल्ल - सुदामा चरित्र ।
५. सिद्धिदास अमात्य - कालचक्र ।
६. योगवीर सिंह - किरतियात, जिगु मनया उदगार(अशान्त हृदय नामं) ।
७. वैकुण्ठप्रसाद लाकौल - ह्वयत्यंगु स्वांयात, विनय(तारा नामं) ।
८. हरिकृष्ण - नेपालभाषा साहित्य ।
९. धर्म आदित्य धर्माचार्य - जन्मभूमि नेपाल ।
१०. सुप्रभात - रत्न
११. शुभ दिन प्रकाश - कीर्ति ।

भिन्छम्ह कविपनिगु भिन्छय्पु कवितामध्ये गुलिखे कविता नेपालभाषाया न्हापांगु पत्रिका 'बुद्धधर्म व नेपालभाषा' या उगुंथुगुं अंकं लिक्का: मुनात:गु ख: । थ्व कविता मुनाया संग्रह व सम्पादन यानादीम्ह फत्तेबहादुर सिंह (१०२२-११०३)या च्वासां नेपालभाषाया साहित्यया थीथी विधाया सफूत पिदंगु दु । नेपालभाषा काव्य साहित्यय् माध्यमिककालया न्ह्यलुवा महाकवि सिद्धिदासया छम्ह शिष्य वय्क: साहित्यकार जक मखु नेपालभाषा थकाय्गु निति त:दंतक थ: हे संस्थापक, व्यवस्थापक, सम्पादक आदि फुक्क जुया 'नेपालभाषा न्हिपौ' पिकयादीम्ह पत्रकार नं ख: । भाषारत्न (१०७६) उपाधिं विभूषित जुयादीम्ह वय्क:यागु थ:गु कविता जक मखु मेपिनिगु कविता नं मुंका गुगु 'नेपाल विहार' सफू पिकयादिल, थ्व सफू नं नेपालभाषा माध्यमिककालया साहित्ययात विकास याय्त तिव: जूवंगु दु ।

थ्व ब:चाधंगु सफुती दुथ्या:गु कवितायात थौंया मिखां स्वयंबल्य् उलि ग्यंगु मजुइफु । तर थ्यंमथ्यं चय्दं न्ह्य:या नेपा: व नेपालभाषा व साहित्यया सन्दर्भय् स्वयंबल्य् 'नेपाली विहार' छगू हनेबह:गु पला: ख: । छखे राणाकालयागु दमन नीतिं क्वत्यलात:गु, मेखे पं. निष्ठानन्द, सिद्धिदास, धर्मादित्य धर्माचार्य, जगतसुन्दर मल्ल, शुक्रराज शास्त्री आदिपिनिगु परिश्रम व कृतिं याना: नेपा:गा:या स:स्यूपिं नेवातय्गु समाजय् सामाजिक व राजनैतिक चेतनालिसें भाषिक सजगता नं दनावैच्चंगु ई । थ्व भाषिक चेतनायात ब्वलंकंगुली नेपालभाषाया दकले न्हापांम्ह पत्रकार धर्मादित्य धर्माचार्य व वय्कलं पिकयादीगु बुद्धधर्म व नेपालभाषा (नेसं १०४५-१०५०) या त:धंगु ल्हा: दु । वय्कलं थ्व पत्रिका मार्फतं नेवा:तय्गु समाजय् धार्मिक सुधारया लिसें भाषिक व साहित्यिक पुनर्जन्तान याय्त कुत: यानादीगु भवलय् योगवीर सिंह, वैकुण्ठप्रसाद लाकौल

थेतुं फत्तेबहादुर सिंहजुयात नं कविया रुपय् थःगु भाषा, साहित्य, संस्कृति व जातीय ममतां कृतकुलाः पिथने हल । नेसं १०४६ श्रीपञ्चमीखुन्हु कलकत्ताय नेपालभाषा साहित्य मण्डल स्वनेगु ज्यानिसें धर्माचार्यजुं नेपालभाषा पद्य संग्रह, गद्य संग्रह, व्याकरण व वर्णमाला पिकाय्गु क्वःछ्यूगु खः । नेसं १०४९ गुंलापुन्हीबलय् पिदंगु बुद्धधर्म व नेपालभाषा अंकय् 'नेपालभाषा पद्य संग्रह' धयागु वर्तमान पद्य गीत तथा ६० पौति तथा प्रकाश जुइन' (पौ १६) अनं ल्यूया अंकय् (नेसं १०४९, यंला व कौला पुन्ही) 'नेपालभाषा पद्य साहित्य' नांयागु स्तम्भय् 'नेपालभाषा पद्य संग्रह' धकाः नेपालभाषा थ्व सछि दँया थुखे दय्कूगु न्हूगु सिल व तुतः व में छन्द दुगु नं मदुगु नं मुंका छापय् यानागु दु ।' (पौ ३९) धकाः च्यातःगु दुसां व संग्रह पिदंगु खनेमदु । वरु धर्माचार्यजुं थःगु पत्रिकायात बुद्ध धर्म धैगु नामं बुद्धधर्म व नेपालभाषा नां छुनादिसेंलि (नेसं १०४७, बछला-गुंला अकनिसें) वहे पत्रिकाय् नेपालभाषां गद्य व पद्य नितां थ्याकाः उबलेया उत्साही लेखक कविपिन्त ग्वाकाः दिल । थ्व हे पुचलय् फत्तेबहादुर सिंजु नं थ्याः । उकिं वय्कःया 'नेपाली विहार' धर्माचार्यजुया अपूर्ण इच्छाया पूर्ति धाय्छि । कविकेशरी चित्तधर 'हृदय'जुं धयादीथें "(बुद्ध धर्म व नेपाल भाषा) पत्रिकां भीगु भाषा साहित्य मन्दिरया निगलं मू अंगः गद्य व पद्ययात गुलि क्वातुक दना थकल व खँ इतिहासं कनि ।" (भीगु साहित्य, निकोखुसि, पौ ११२)

धर्माचार्यजुया अपूर्ण इच्छाया पूर्तिकथं स्वयातःगु थुगु नेपाली विहार सफू दुने मुनाच्वंगु सिद्धिचरणया कविता 'वर्षा' या कारणं राणाशासन कालय् जेलया सजाय् फय्मालसा सम्पादकया भूमिकाया कारणं फत्तेबहादुर सिंहनं जेल सजाय् भोगे याय्माःगु खः । प्राचीनकालया छपु व माध्यमिक कालया थीथी कवितानापं नेपालभाषा काव्य साहित्यय् स्वच्छन्दवादया शुरुवात यानादीमह वैकुण्ठप्रसाद लाकौलया कविता दुथ्याःगु थ्व सफू नेपाली विहार तत्कालीन ईया नितिं छगू महत्वपूर्ण व तःजिगु सफू ला जु हे जुल, उकिया नापनापं नेपालभाषा साहित्यया लिपाया लँपु कीगु छगू माध्यम नं जुल । काव्यया ख्यलय् नेपाली विहार छगू युगया अवशेष खःसां भाषिक जागरणया इतिहासय् फत्तेबहादुर सिंजुया 'भूमिका', धर्माचार्यया बुद्ध धर्म व नेपालभाषा पत्रिकाय् पिदंगु 'नेपालभाषा व थ्वया साहित्य' (दँ ३, ल्याः १-२), 'नेपालभाषा आन्दोलन व साहित्य प्रचार' (दँ ५, ल्याः १ व २-६) व 'नेपाल भाषा पद्य साहित्य' (दँ ५,

ल्याः ४-५) यां ल्यू नेवाःसमाजयात इतःमतःकंक कुत्तुकुलेगु भर्त्सना धाय्ल्वः
 धकाः नांजाम्ह समीक्षक प्रा.डा. कमलप्रकाश मल्लजुया धापु दु । थ्व भूमिकाय्
 न्ह्यथनातःगु नेपालभाषाया बारे खँ नेपालभाषा ख्यलय् यक्व दँ लिपातक्क नं
 उलि हे सान्दर्भिक जुयाच्चंगु दु । अथेसां फत्तेबहादुर सिंजुया धापुयात दुवालाः
 धयातःगु नेपालभाषा भाषीतय् शिक्षित वर्ग थःगु भाय्या लागि छक्वः शिष्टगु
 विरोध प्रदर्शन यानालिं नैराश्यया सल्लाह बिया 'खासा चालं' थःगु भाय् व्वहां
 वंगुली 'सन्तोष याय्गु सिवाय् आयात मेगु छुं लँ मदुनि' धकाः सन्तोष काय्गु
 थौंया ई मखय् धुंकल ।

थुकथं नेपालभाषा साहित्यया माध्यमिककालय् बिस्कं हे तःजिगु मू दुगु
 'नेपाली विहार' खय्तःला दकले न्हापांगु तःम्ह कविपिनिगु कविता मुना जूसां
 थुकिया भूमिकां गद्य ख्यलय् तःधंगु भूमिका म्हितुगु दु धाय्मछिं मजू । उकिं
 ला योगवीर सिंहजुं छन्हु फत्तेबहादुर सिंहजुयात उगु भूमिकाया प्रशंसा यानाः
 धयादीगु दु - 'नेपालभाषाय् नं थुलि बांलाक गद्य च्वयेजी धकाः जिं विचाः हे
 मयानानि ।' अले थ्व धापू पाखें नं वय्कःयात तःधंगु हःपा प्राप्त जूगु खँ सीदु ।

'नेपाली विहार' कविता मुना सफू पिदंगुया पृष्ठभूमी नेपालय्
 राणाशासनयागु निरंकुशताया चरम परिस्थिती नं नेपाली विहार सम्पादन
 यानाः पिकाय्गु प्रेरणाया बारे व मेमेगु खँ फत्तेबहादुर सिंहया खंग्वःपाखें सीकेगु
 कुतः याय् ।

- 'जि मां मदयाः क्रिया च्वँच्वना थाय् सिरास बाज्या (स्व. महाकवि
 सिद्धिदास अमात्य) विचाः याय्थें भायाः धयादीगु खँ - बाबु, मां थें तःधंम्ह
 जगतय् मनूया सुं हे मदु । सुख दुःख धयागु भीगु जुयातुं च्वनी, उकी च्यूताः
 तया च्वनां मचाः । छंत बुइकूम्ह मां मन्त खः आः छ न्ह्याक्व खोसां व लिहाँ
 वइ मखुत । 'भी मां-भाय् नं मां हे खः । छं आः मां-भाय्या सेवा या छन्त दुःख
 जुइमखु ।' थ्व धापूयात नुगलय् तयाः मांभाय्प्रति तःजिगु सेवाभाव तयादीम्ह
 सिद्धिदास अमात्यया हःपालं हे फत्तेबहादुर सिंहजुं 'नेपाली विहार' सफू पिथनादीगु
 स्पष्ट जू । राणा शासनया निरंकुशताया इलय् थःगु मांभाय् नेपालभाषाया
 केवल कविता मुना नेपाली विहार पिकाःगु नं दोष बियाः वय्कःयागु सर्वश्व
 हरण यानाः जन्मकाःछिं कैदया सजाय् फय्माल । थ्व सफू पिकाःगु दोष बियाः
 सजाय् फय्माल धासेलि उबले थ्व सफू फत्तले पित मव्यू जुइ धैगु अःपुक हे
 थुइके फइ । थुजागु ग्याःचिकुया स्थिती नं छम्ह त्याय्म्हं व सफू थः व्वथाय्

संदूया खोलं लहानाचवंगु अप्पाया तःलय सुचुकातःगु तक्क नं लिपा प्रकाशय
वल धकाः सीकादीमह वयकः फत्तेबहादुर सिंह 'नेपाली विहार' सम्बन्धी मेगु
छगू लुमन्ति थुकथं न्ह्यथनादीगु दु ।

- 'भाजु जुद्धशम्सेरं (विसं १९९६ भाद्र महिनाय लैनचौरय्) छगू उद्योग
प्रदर्शन यानादिल । उकिया उद्घाटन नं वेकलं हे भाद्र २५ गते यानादीगु खः ।
व हे प्रदर्शनी छगू स्टल कयाः विभिन्न सफू नापं नेपाली विहार नं व्वयातयागु
खः । उकिया जिम्मा भूतपूर्व उपमन्त्री भाजु सूर्यबहादुर भारद्वाजं कया च्वनादीगु
खः । उगु प्रदर्शनी राष्ट्रपिता स्व. श्री ५ त्रिभुवन नं निरिक्षणय् बिज्यात । अन
व्वयातःगु सफू मध्ये नेपाली विहार सफू जिमिगु स्टलं न्याना यंका बिज्यात ।
थ्व छगू नं लुमंके बहगु घटना खः ।'

थुकथं ऐतिहासिक पृष्ठभूमि दुगु नेपाली विहार सफूया विशेषता धाय्गु
खःसा च्वय् न्ह्यथना थीथी खँ नापं नेपालभाषाया तःमह कविपिनिगु कविता मुनाः
पिकयातःगु नेपालभाषाया दकले न्हापांगु सफू ला जु हे जुल, थुकी च्वयातःगु
भूमिकाया नं आपालं प्रासांगिकता खनेदुगु खँ नं लुमंके बहः जू ।



नेवाः अर्गनाइजेसन अफ अमेरिकाया नेपाः देय् प्रतिनिधि व लुमन्ति दबूया
नायः भाजु किरण केन रंजितया अध्यक्षताय् पदनेत्यंगु

“लुमन्ति दबू ल्या ७”

सुथालाक्क पदनेमा धकाः भिन्तुना देछानाच्चना ।

SEASON SHRESTHA

President, World Newah Organization (WNO)

Past President, Newah Organization of America (NOA)

Baltimore, Maryland, USA

नेवाः अर्गनाइजेसन अफ अमेरिकाया नेपाः देय् प्रतिनिधि व
लुमन्ति दबूया नायः भाजु किरण केन रंजितया अध्यक्षताय् पदनेत्यंगु

“लुमन्ति दबू ल्या ७”

सुथालाक्क पदनेमा धकाः भिन्तुना देछानाच्चना ।


Samin Lama

Managing Director

Konjyo Soom Developers Company Pvt. Ltd.

Suryabinayak-6, Pandubazzar, Bhaktpur.

सरल व सुगमताया कवि माधव मूल



इन्द्र माली

नेपालभाषा काव्य सर्गतय् छगः न्हूगु नगु ने.सं. १०९१ दँय् खनेदत । व नगु बुलुसे मच्चं । मेगु नगुया प्रवाहसिवें भचा बिस्कं थःगु कक्षय् न्ह्यज्यानाः वनाच्चन । ने.सं. १११२ दँय् थ्यंवल्य् भचा साकार रूप खनेदत । मेपिसिवें पानाच्चंगु भू वांलाक, यचुक व ध्वाथुइक सिइदत । ने.सं १०९१ दँय् आलाउलाथें, खःथें, मखुथें खनेदय्कवःगु प्रवृत्ति नीछ्दँ लिपा छगू स्यलागु थःगु कथंया प्रवृत्तिया रूप्य् स्थापित याय्गु कुतः जुल । खला कविताय् दर्शन दुमथ्याःगु मखु, कविपिसं दर्शनयात अवलम्बन यानाः कविता मच्चःगु मखु, तर फुक्क धइथें अनुभूतियात दर्शनया लखय् प्याका उकियात तिसिना अभिव्यक्त याय्गु मुक्कं कुतः धाःसा माधव मूलया अभिव्यञ्जनाय् दुसुनाच्चंगु दु । बुद्धया बूगु देशय् भारती दार्शनिक कृष्णमूर्तिया दर्शनयात आत्मसात यानाः उकि हे अवलम्बित जुयाः थीथी इलय् नुगःदुने बुयावःगु अनुभूतियात कविताया रूप बियाः मांभासं थ्यंमथ्यं सःत्यापु कविता च्याः थकूगु खनेदु । साप हे म्हो कविता च्वइम्ह, कविताय् दर्शनयात अवलम्बित याइम्ह कविकथं भीसं म्हसीकेफु । दर्शनय् अवलम्बित जुयाः अनुभूतियात अभिव्यञ्जित याय् आपालं कुतः याय्माः, मेहनत याय्माः, अभ्यास याय्माः कवि मूलया अनुभूतियात आत्मसात याय्बल्य् कविया परिश्रमयात भीसं खंकेफु । थुकथं स्वयंबल्य् छम्ह परिश्रमी कवि धाःसां छुकथंया द्वनी थें मताः । कविं दर्शनयात आत्मसात याय् आपालं आपाः कुतः यानातःगु खनेदु । गुकियाना सहज भावनायात भचा मछिनिगु स्वाभाविक खः ।

खःला कवि मूलयागु न्हापांगु कविता संग्रह ने.सं.१११२ दँय् 'नकतिनिया कविता' पिदन । उकिं छगू लहर दना वय्माःगु खः, छगूकथं न्हूगु कवितां पिकयाव्यूगु स्पन्दन थें वय्माःगु खः । तर उकथं वःगु खनेमदु । बरु कवि मूलयात वयागु अनुभूतिया गाम्भीर्यता, सहज अभिव्यक्तिं याना ई.सं.

२००० दैय् 'एडिर्व्स च्वाइस एवार्ड'पाखे विभूषित जूगु बुखँ नेपाली भाषाया राष्ट्रिय दैनिक 'गोरखापत्र' ब्वनागु खः । उगु ज्याभवः दि इण्टरनेशनल लाइब्रेरी अफ कांग्रेसया ग्वसालय् जूगु खः । सन् २००० दैनिसं आःतक नेपाःया मेपिं कपिपिंत उगु सिरपालं विभूषित याःगु थौं तक बुखँ न्यने मदुनी । कवि मूलया नां 'म्हसीका धलः' दुने फणीन्द्ररत्न वज्राचार्य यथोचित थाय् बियाः छम्ह दार्शनिक कवि खः म्हसीका किया ब्यूगु दुसा नेपालभाषाया साहित्यया इतिहासय् उपस्थितिकथं नां छभवः जक दुथ्याकातःगु दु । तर नेपालभाषा परिषदया पिथनाय् ने.सं. ९८७ दैनिसं ने.सं. १०५०दँ तकया दुने भीगु काव्य साहित्यय् सच्छि व चाचू दैया दुने जूगु विकासक्रम न्ह्ययथनाः उकिं हःगु न्हू-न्हूगु मोड व प्रवृत्तियात क्यनेगु कुतः याय्फूपिं' (माधवलाल व मेपिं. सं, १९९६, न्ह्यखँ) पिपीप्यम्ह कवि मध्यय् छम्ह कविया रुपय् कवि माधव मूलःयात नं मेपिं कवि सरह कवियागु स्वपु कविता नाप दुथ्याकातःगु दु ।

भीसं कविताय् दर्शन मदुसा चि मदुगु सना थें जुइ नं धया वयाच्चना । भीगु भाषाया मेपिं कवितय् फणीन्द्ररत्न वज्राचार्यजु दार्शनिक कवि कथं गनं नं नालातःगु मदु । तर कवि मूलयात दार्शनिक कविकथं संकेत यानातःगु दु । कवि दर्शनपाखे अवलम्बन जुयाः धिसिमिसि जुइक पलाः तय्फूगुलिं वय्कलं थुकथं नालाकाःगु जुइमाः ।

खःला कवियागु अनुभूति आपालं सहज जू भीगु नुगलय् कविं थःगु भावयात दर्शनय् थुना सम्प्रेषित याना बी फू । भारतयाम्ह तसकं नांजाःम्ह कवि केदारनाथ सिंहया छपु कविताया भवः छकः स्वय् -

उसका हाथ

अपने हाथ में लेते हुए मैंने सोचा

दुनियाँ को

हाथ की तरह गर्म और सुन्दर होना चाहिए ।

थुगु कवितायात कयाः आलोचक नामवर सिंहं थुगु कविताय् प्रगीतात्मकता व्यक्त जुयाच्चंगुयात विश्लेषण यानातःगु दु । कविताया सौन्दर्य व शिल्पयात नं आत्मसात याना जक समालोचक नामवर सिंह थःगु धारणा वयातःगु अनुभूत जू ।

थ्व हे सन्दर्भय् दुबिना भीसं कवि मूलया थुगु कविता छकः स्वय् -
खः, जिं थःत स्वयाः

नापं थःगु घाः
 छभाः, जिं छंत लुमंकाः
 मन भचा सिचुका ।
 घाः गय् जुल व ला मस्यू
 अय्नुं, घाः ला थन हे दु
 घाः ला अथें नं जुल,
 छ नापं तापाना नं जुल,
 छ नापं तापानां नं जुल
 घाःया संसारय्
 घाःखू जक ल्यंदनि
 अय्नुं, स्याना हे च्वन ।

(जि, जि हे मखु छ मदय्कं पौ २२)

नामवर सिंहया धापूयात अवलम्बन याना स्वयंबलय् च्वय् हिन्दीया
 कविताय् प्रगीतात्मकता दुबिनाच्चंगु दुसा कवि मूलया थुगु कविताय् मद्दु धकाः
 धाय् फइमखु ।

भीगु काव्य साहित्यय् खने दयाच्चंगु न्हूगु कविताया प्रवृत्तियात हाचां
 गायाः न्हूगु प्रवृत्ति स्वनेगु ज्या आः तक बांलाक गुम्हं कविपाखे जूगु व स्यलाःगु
 सः थ्वयाच्चंगु भीसं आभास याय् मफुनी । भी सामान्य ब्वमिपिं बौद्धिकताया
 नामय् जयअगक-उयअगक, व निर्यात विम्ब व प्रतीकया चलः खने दयाच्चंगु
 दु । छकः जितः छपु कविता ब्वनेत बिल, उगु कविताय् प्रब्रजावसित, पाण्डुखोरी,
 एण्टिम्पाटर, युथानेशीया, क्वान जुइ, देशोकोटो, पाण्डुखोरी आदि आदि खँवः
 विम्ब व प्रतीक कथं छयलातल । उम्ह कवि महोदय नं उगु कविता न्हूगु
 कविता ख्यलय् छगू न्हूगु प्रयोग धका जितः धाल । आः स्व, आपत थू धाय्
 उगु फुक्क खँवः नापं थः अपरिचित मथु धाय् धाःसा वं हिस्याइगु जुल । अले
 थीथी सफू पुइका मालाः ब्वनीगु बाहेक मेगु लँपु मंत । वं छयलातःगु विम्ब
 व प्रतीक धाःगुया अर्थ मालेगु ज्या याना । थीथी विषयया सफू पुइकेत बाध्य
 जुइमाल । गुलि खँवःया अर्थ मालेत विज्ञानविद् पासापिनिगु ग्वाहालि कयाः ।
 स्ववाः ति थुकथं मेहनत याना ब्वना यंकाबलय् प्रब्रजावसितया अर्थ पथभ्रष्ट,
 पाण्डुखोरीया अर्थ पीतवस्त्रधारी, एण्टिम्पाटरया अर्थ धातुया छगू ग्रामया हे
 ३५० लाख डलर तूगु धातु, गुगु स्फुतनिक ब्वय्केत उर्जाकथं प्रयोग जुइगु

धातु, युथानेशीयाया अर्थ जि थें ताः इलं निसे म्हं मफयाच्वं पिं ल्वगितयूत अन्तिम ई थ्यंगु भाःपिया डाक्टरं विष बीत ग्वाहालि याइगु, क्वान जुइ धाय्वं नय् पित्याःपिं शिकारी खिचाया खोरय् छवयाः स्याइगु कोरियन दण्ड विधानया छगू देशोकोटो धाय्वं जापानी वाद्ययन्त्रयात धाइगु धकाः सिल । उगु कविताया ख्वाःपाः छ्याङ्ग खनेदत । जितः गुगुकथं नं उगु कविताया अर्थबोध मजुल, भाव सम्प्रेषण मजुल, विम्ब विधान व प्रतीक योजना सिर्फ क्लिष्ट व बोध अगम्य जक मखु, ऋचथउतष्व कथ्कदर्या जूगु जक ताय्का । अले उम्ह कवितायत उगु कवितायात कयाः धया थ्व बकबास अभिव्यक्ति जक खः । थज्याःगु अभिव्यक्ति कविता जुइमखु । थुगु प्रवृत्तियात निरन्तरता बिय्वं क्लिष्टता व जटिलताया विकास जुइ, जनताया म्हुतुं कविता लाका यंकेंगु ज्या जुइ । नापं गुम्ह कवि थःगु अनुभूतिप्रति इमान्दार व सचेत जुइफइमखु विम्ब व प्रतीक जक निर्यात यायूत स्वइ अज्याःपिसं खँग्वःया अर्थान्तर याना बौद्धिकताया नामय् भंगः जक लानाच्वनी । उकिं धयाः थज्याःगु प्रवृत्ति ज्वनावल धाःसा दकले न्हापां छंगु आलोचना याय् बाध्य जुइ नापं थज्याःगु प्रवृत्तियात जनसमक्ष यंका पर्दाफास याय्मालि सुनां नं सुनां नं ला अवश्य याइ । उम्ह कवि महोदय नं उगु कविता पिकाय्गु साहस मयात । भीगु न्हूगु कविता धाय्, समकालीन कविताय् शालिनता, मधुरता, बोधगम्य जूगु ब्वना आनन्द काय्वलय् भाकाभुक्कु कथं धाय् वा भवास्स धाय् भूपि नाप लाइगु, बासु शशी ध्वदुइगु, पोषण पाण्डेया सः खनेदइगु हिन्दूस्थानया व्यापारीतय्सं मेगु देय्या सामानयात मेड इन इण्डिया यानातःगु लुमनिगु । कविताय् नं थज्याःगु प्रवृत्ति विम्ब व प्रतीक दुथ्याकेंगु ज्या खनाच्वना । मेखे कृष्णभक्त श्रेष्ठ व मोहन कोइरालाया अभिव्यक्ति ध्वदुसां उकियात मौलिक प्रयोग भाःपित भी बाध्य । भी विवश । मेखे जनवादी सः थ्वयाच्वंगु दु । चीमि पक्षधारी सः थ्वयाच्वंगु दु । शिल्प व सौन्दर्य पक्ष भचा क्वामतूगु महसूस बाहेक उगु सः हे थौंया समकालीनताय् न्त्याय्धुंकूगु खनेदु । थज्याःगु परिवेशय् दुबिनाच्वनागु छगू त्या दशक दत । विवश व बाध्यतां याना जिं धयागु खः भचा खुसि सब्बु चान्हय् छगू निमेषया लागि प्रवाह दी उगु हे इलय् शान्तिकर गुभाजु म्वःल्हुयूत 'तारेमाम शरण' धकाः खुसिइ दुब्बावनी । भीगु न्हूगु कविता वा समकालीन कविता नं अथे हे म्वःल्हुइत वंगु नं निगू दशक दइन पिहां मवः, वयागु यकःति जूवन अर्थात् न्हूगु प्रवृत्ति सुना नं स्वना वयागु थाय् काय् मफु ।

तःत्वचं याना प्याहां जुइ मफु । पिहां वनेवं कन्हय् कन्हु मफइगु ।
उकिं पिने मवया, मजुया, फच्छिं फत्तले गनं मवना । सिर्फ इमरजेन्सी
वार्डय् व अस्पतालया वेडय् च्वनीगु त्वःताः मेगु मदु ला थें च्वनेधुंकल ।
थज्याःगु परिवेशय् यकःति जीवन हनाच्चनावलय् बिमल ताम्राकारया फोन
वइ । इमेल चाय्का स्वयत् इनाप यानादी । अले भूमिका नापं च्वयत् धयादी ।
इमेल चाय्का स्वयाः माधव मूलया “‘जि’ दुने - मदुम्ह जि” कविता मुना
जुयाच्चन । ब्वना यंकाः भचा नुगः सिचू थें, छु न्हूगु भाव सम्प्रेषण जू थें,
ब्वनेबलय् कष्टकर मज्जुगु, बांलाक पांथूगु अनुभूति व संवेदना जायाच्चंगु
भचा अनुभूत यात । मुसु वइगु जूगुलिं उकिं उलि दुविइ मफुत । कन्हय्
स्वय् धाधां निवाः फुत मुसु भन उप्वः वयाच्चन । डाक्टरयात क्यंवना ला
तुरन्त हे अस्पतालया इमर्जेन्सी भर्ना यात । छेंय् लिहां वय्मखन । छवाः नं
मयाक अस्पतालया वेडय् च्वनेमाल । तर जितः धाःसा कवितां सालाच्चन ।
गुबले छेंय् लिथ्यनीथें जुयाच्चन । निमोनियां थ्यूगु जुयाच्चन । भचा क्वलाय्वं
छेंय् वया । त्यापटप चाय्का कवि मूलया कविता ब्वनेगु कुतः याना । मिखां
ज्या बांलाक मब्यूसा ब्वनायंका कविया अभिव्यक्ति दुगु सरलता व सहजतां
नुगःयात थीफूगु वाःचाय्का ।

सदां थन थ्वयाच्चंगु सः विवश व बाध्य जुया न्यनाच्चनेमाःगु, व
सः न्त्याक्व हे फाकुसां, न्त्याक्व हे म्हाइपुक थ्वःसां न्यना हे च्वनेमाः । उकिं
शालीनकथं कवि थुकथं थःगु नुगःया अनुभूतियात सम्प्रेषण याइ ।

आः ला हथाय् जुइ नं धुंकल न्हूगु युगया

मनू दुने न्हूम्ह मनू

न्हूगु लकसया मतिइ

न्हूम्ह जि, न्हूगु कासाय् ।

(नःलिम्ह जि, न्हूगु कासाय् पौ ३४)

कवि मूलयात आपासिनं जे. कृष्णमूर्ति या प्रभावया किपालु लानाच्चंगु
न्त्यथनातःगु न्यनेदु । तर जिं जे. कृष्णमूर्ति या बिचाःयात गुबले दुवाला
मस्वयानि । उकिं गुकथं, गुगु रूप प्रभाव लानाच्चन व धाय्मफु । उकिं
उकियात कया छुं धाय् मफु, धाय् नं मस्वया ।

केवल जिं कविया भावयात आत्मसात याय् कुतः जक यानाच्चना ।
कविं तःछ्याना हे धाइ -

खः, जि थ्व लँ थाहां वनाच्चना
 सुयाके छुं सल्हाः मकासें
 लँ मदुथाय् लँ दयेकाः
 थन जिगु तुति मदयेफु
 म्ह छम्ह चुं दनेफु
 अयनं आः जि दी मखुत
 लँपख्याःतय्त म्वाका तये मफुत
 जीवनकाःछि मयाःसा
 सीधुंकाः जूसां व्वचायेके ।

(सदां न्ह्यानाच्चनीगु पलाः पौ ३१)

थुकथं व्वनायंकेबलय् कवि मूल नेपालभाषा ख्यलय् दकले न्हापां
 पिलूम्ह तत्वदर्शी कवि (एजर्षयकयउजभच उयभत) खः । कविया कोमल भाव
 अनुभूतियात सरस व सरल रूपं अभिव्यक्त जुयाच्चंगु खनेदु । कवितायात
 आत्मसात याय्त प्रस्रव वेदना थें व्वमि यानाच्चनेम्वाः । गथे नेपालभाषाया
 न्हू-कविता वाय् समकालीन कविताया नामय् पिदंगु नांजाःपिं कविपिनिगु
 कविता व्वनेबलय् जूवनी । कवियागु मेमेगु कविता व्वना यंकेबलय् समस्त
 हलिंयात चेतनां आत्मसात यायगु आग्रह खनेदु । चुं जुयाच्चंगुलि पूर्ण, त्वाःत्वाः
 दनाच्चंगुलि पूर्णता, व्यक्ति जीवनय् विचरण जुया हलिं पाखे उन्मुख सः हे
 थुगु कविता मुनाया मूसः खः । कविया अभिव्यक्तिइ चित्रणय् परिमित खँग्वलं
 व्यापकता अभिव्यक्त जुयाच्चंगु दु नापं सौन्दर्यप्रेम, जनचेतना, समाजचेतनाया
 लँपु लिना न्हूगु जीवन व आयामपाखे मुखरित जुयाच्चंगु अनुभूत यानावीफु ।

कविं थः म्वानाच्चनागु युगय् व्वलना वयाच्चंगु संशय, समाजय्
 विद्यमान जुयाच्चंगु मोह व ग्लानि, थौं खनेदयाच्चंगु अभाव व कुण्ठायात नं
 न्ह्यव्वया थःगु भाव प्रकटिकरण यानातःगु नं त्वःवनापूगु आभास यानावीफु ।
 थ्व नं कवियागु छगू विशेषता खः ।

कविया न्हापांगु पलाः 'नकतिनिया कविता' नीखुदँ लिपा पिदनाच्चंगु
 थुगु पलाखं कविया पलाः गुलि स्यलाः, गुलि दुग्यं धयागु यचुक खनेदु ।
 न्हापाया पलाः सिके थुगु पलाखय् कलात्मकता स्यलानाच्चंगु न्ह्याम्हेसितं
 अनुभूत याकावीफु । नापं थौंया मनूया जीवनय् घात प्रतिघात, द्वन्द अनैक्य
 (छगू जुइमफूगु भाव)या दथुइ छगू शाश्वत आनन्द प्राप्त लिपा वया जूगु

खनेदु । छायाःसां जीवनयात, परिवेशयात व थौया वातावरणयात तत्वदर्शी (Philosopher) मिखां स्वयाः उकियात कविं अभिव्यञ्जना यानातःगु अनुभूत जूवः ।

थौया परिवेशय् वया नं म्हिगःया जीवन, मूल्य व मान्यता, म्हिगःया संस्कारजन्य खँ पाछाना चयातःगु साहित्य थौया साहित्य जुइमखु । नापं थौया युगयात ल्वय्क भावाभिव्यक्ति याय्मफु सा अज्याःगु साहित्य थौयागु जुइफइमखु । अज्याःपिं साहित्यकारया रचना व्वना छुं ई ला छयाय्फइ, न्ह्यइपुकेफइ । तर थौया साहित्य धाय्फइमखु । थौया समकालीन साहित्य ख्यलय् नं पुलांगु मान्यता व मूयात कय्च्याना अनुशासित जुया चवसां, उगु ईया आदर्श न्ह्यव्वया व रस संवेदनायात पाछाया रचना यानातःगुयात समकालीन वा थौया साहित्य धाय्फइमखु । उकियात समकालीन इलय् अर्थात् थौकन्हय् हे रचना यानातःगु जूसां पुलांगु साहित्यकथं नालेगु जुइ ।





Ravindra Raj Tamrakar
Kabindra Raj Tamrakar
Proprietor
Pwasya
You can trust





Manufacture and wholeseller of Brass, copper, white metal and Tibetan goods of your order






PMC PWASYA METAL CRAFTS 

Tangal-12, Lalitpur, Nepal
Ph.No.: 5531394 (Workshop), 5553638 (Showroom)
Mobile No: 9851050910 (Kabi) 9841217330 (Rabi)
Email: info@monasterycraft.com
website: www.monasterycraft.com

लुमन्ति दबूया ग्वसालय् पिदनेत्यंगु
“लुमन्ति दबू ल्याः ७”
सुथांलाक्क पिदनेमा धकाः भिन्तुना देछानाचवना ।

बिकास गुभाञ्जु श्रेष्ठ
भक्तपुर नगरपालिका-१, दुधपाटी

भाव प्याखं



शि.स. शरद कसा:

नेपा: छगू चीधंगु राज्य जूसांतबि बहुजाति, बहुभाषा, बहुसंस्कृति दुगु थःगु हे कथंया रहन-सहन व थीथी धर्म-संस्कृति जायाचवंगु देश खः । थन दुपिं जातितय्के दुगु कलाकृतियात कया: अध्ययन यायबलय् थन ग्रामीण संस्कृति (Folk culture) व शहरीया संस्कृति (Urban culture) याना: नितजिया दु तर जंगली आदिवासी संस्कृति (Primitive culture) धा:सा थन खनेमदु । थुकी नं शहरीया संस्कृति व कलाया विषययात कया स्वयबलय् यें उपत्यकायात काय्फु । प्रसिद्ध प्याखंहुलामि राजेन्द्र श्रेष्ठया कथं थ्व उपत्यकाय् दुगु वास्तुकला सिन्धुघाटीया न्याद्रःदं पुलांगु वास्तुकलालिसे समरसता वा ज्वलज्वः जूगु सजीव माने या: ।

अथेहे याना: गुगुं जाति अथवा समाजय् आध्यात्मिक अथवा लौकिक याना: नितजिया कला खनेदु । थनया उत्कृष्ट कलाकृतिइ मूर्तिकलायात कायबलय् मौर्यकालीन एवं कुषाणकालीन निसें कया: लिच्छवी, गुप्त, मल्ल, शाहकालीन वा थौया पाश्चात्य पुलांगु (क्लासिक) व आधुनिक शैलीत जीवन्त दुगु आ: नं खंकेफु । चित्रकलायात कया: स्वयबलय् लिच्छवीकालीन पौभा: चित्रकलानिसें व धुंका: मुगलकालीन चित्रकला नापं पाश्चात्य शैलीया पुलांगु उत्कृष्ट शैली व आधुनिक (मोडर्न) शैली चित्रकला राणाकालीन निसें शुरु जूगु खनेदइ ।

नाट्य परम्परायात कायबलय् नितजिया रुपय् काय्फु :

- १) थःगु हे लागि यायगु कला (सेल्फ इन्जोइंग आर्ट)
- २) मेपिन्त क्यनेगु रंगमंचीया कला (पर्फर्मिङ्ग आर्ट)
१. थःगु हे आनन्दया लागि म्ये हालेगु, प्याखं हुलेगु (नन-पर्फर्मिङ्ग आर्ट): गथे ज्या यायबलय् म्ये हालेगु, मनोरञ्जनया लागि प्याखं हुलेगु व प्रार्थना वा

स्तुतिया नापं भाँकी वा पुचः मुनाः म्ये हालाः प्याखं हुलेगु म्ये अथवा प्याखं(नृत्य) थुकी लाइ ।

२. नाट्यकला (पर्फार्मिङ्ग आर्ट) गुगुं नं म्ये, नृत्य वा प्याखं, वाद्यवादन नापं नाटक लाछि, चुक, दबू वा देउराली आदि थासय् च्वना दर्शकतय्त क्यनेगुयात रंगमंचीय कला धाइ । थ्व नं निताजिया दु :-

क) पुजा क्रियात्मक तान्त्रिक रंगमंचीय कला (Ritual Performing Art) व

ख) लौकिक रंगमंचीय कला (Secular Performing Art)

यें उपत्यका दुने याइगु तान्त्रिक पुजा क्रियात्मक प्याखनय् गं प्याखंत लाःवइ । थ्व प्राचीन व मध्यकालीनया खः । थुपिं गं प्याखनय् प्राचीन शैलीया वाद्य-वादन, म्ये तथा भावनृत्य (चचा वर्णात्मक नृत्य), अथेहे युद्ध याइगु नृत्य, छगू दृश्यं मेगु दृश्यं परिणत जुइगु नृत्य व मूक अभिनय (Mime), सम्वाद (Dialogue) लाइ । थुपिं नाटकत याय्बलय् विशेषकथंया पुजाआजा यानाः जीवन्यास तयाः दय्कूगु ख्वाःपाः पुनाः विशेकथंया पुजाआजा यानाः स्थायी रुपय् वा चकंक दय्कातःगु खनेदु, गुकी जुजुपिनि राज्यारोहण, राज्यभिषेक वा द्यःपिनि नृत्य वा प्याखं क्यनेगु याइ ।

गथे कान्तिपुरया प्राचीन पचलीभैरव गंप्याखं, भद्रकाली गंप्याखं, न्यतया गंप्याखं, किपूया बागभैरव प्याखं, हलचोकया सवःभक्कूप्याखं नापं तोखाया गंप्याखं व मध्यकालीन इन्द्रजात्राय् क्यनीगु देवीप्याखं लाःवइ ।

ललितपुरया प्राचीन शैलीया हरिसिद्धिया देवीप्याखं, थेचोया गंप्याखं, खोनाया सिकाली गंप्याखं, फम्पि व दक्षिणकालीया गंप्याखं, मध्यकालीन शैलीया शाक्य-वज्राचार्यपिसं हुलीगु श्रीनिवास मल्लपाखें च्वयातःगु गंप्याखं अथे हे सिद्धिनरसिंह मल्लपाखें च्वयातःगु थीथी कथंया विष्णुपुराणया आधारय् हुइकीगु प्याखं अथवा श्रीनिवास मल्लं च्वयातःगु नीतिशास्त्र पञ्चतन्त्रयात कयाः दय्कातःगु प्रहसन शैलीया नाटक कान्तिप्याखं लाः वइ ।

भक्तपुरया प्राचीन प्याखंया रुपय् दुगु नवदुर्गाप्याखं, अथे हे मध्यकालीन देवीप्याखं अर्थात् महाकालीप्याखं, नापं बोडेया नीलबाराहीप्याखं व थिमि, नगदेय्या देवी प्याखं(महाकाली प्याखं) लाःवइ ।

थ्वयानापं वज्राचार्यपिनिपाखें अहोरात्र विशेष गुह्य पुजा-आजा यानाः गुह्य रुपय् याइगु गणप्याखं (चचा प्याखं) आदि नं लाःवइ ।

थुपिं प्राचीन शैलीया प्याखं वा नाटकय् लाःवइ । थुपिं प्याखं हुइपिं वा नाटक याइपिं पात्रतयसं विशेषकथंया पुजा-आजा नापं दिक्षित जुयाः योग तथा तन्त्र चर्याय् आजीवन च्वनाच्चंगु दइ । थुपिं प्याखं वा नाटकयात प्राचीन वाद्य वा म्ये साथ वा तिवः बियाच्चंगु दइ । गथे म्येपाखे स्तुतिगान (चचा म्ये) व वाद्य-वादनपाखे पञ्चताल गुकी ताः, बबु, पोंगा, पँय्ताः, खिं, दमोखिं, कोताः, धाः आदि लाःवइ । संवाद धाःसा संक्षिप्त जक दइ ।

अथे हे लौकिक रंगमञ्चीय कला (Secular Theatrical Art) दुने खः प्याखं लाःवइ । थ्व प्याखं याय्बलय् म्हो ई अवधिया लागि दय्कूगु चकंगु रंगमञ्च वा दबू (टेम्पोररी स्टेज) या रुपय् दइ, गन राजनैतिक भाषण, हनाबनाया ज्याभवः, सांस्कृतिक ज्याभवः नं याय्गु सामाजिक मनोरञ्जनात्मक खः प्याखं वा नाटकत क्यनेगु याइ । थजाःगु नाटकत क्यनीबलय् नृत्य व गायन छयलाः अभिनय याःगु लुइके फइ । न्हापा थजाःगु नाट्य परम्परा दुने फुक्कं मिसा वा मिजं पात्रत मिजंतय्सं हे अभिनय याइ । थुपिं कलाकारतय्सं विशेष कथंया आजीवन चर्याय् च्वनेम्वाः । फुक्क जनजातिया वर्गपिसं ब्वति काय्दइ । तर अफसोच थ्व परम्परा त्वाःदःगु दु । थुपिं नाटक याय्बलय् गुगुं बन्देज मदु । आधुनिकताया रुपय् गुगुं नं बाजा, म्येया धुनत अले बाखंचु वा कथा वस्तु छयले फइ । थ्व खः प्याखंया परम्परां यानाः प्रत्येक दँ न्हूगु नाटक सृजना याय्गु परम्परा च्वं वंगु खः । गुकी दछिया दुने जुइगु साःगु-मसाःगु घटनायात कयाः उकिया समाधानया निंतिं सुभाब समेत दुथ्याकाः नाटकीय ढंगं समाजयात क्यनाः जनतायात सुसूचित याय्गु माध्यम जुयाः ज्ञान बीगु याइ । गुकिं उगु इलय्या सर्वसाधारण जनता अनपढ जूसां नं बौद्धिक चेतना एवं विवेकशील जुइत नं ग्वाहालि जूवं ।

थ्व उपत्यकाया नाट्य परम्परा दक्षिण एशियाली शैली दुनेलाःगु खंकेफइ । विशेष यानाः भरत नाट्य शास्त्रयात हे नाट्यवेदया रुपय् मानेयाइ व थ्व हे शास्त्र कथं इन्द्रजात्रा पर्व सत्यं असत्ययात विजययाःगु कथं हनीगु व उगु हे इलय् पर्फर्मिङ्ग आर्ट फेस्टिभलया रुपय् क्यनीगु नृत्य वा नाट्यत क्यनीगु परम्परा थ्व हे उपत्यकाय् जक दुगु खंकेफइ । तर छगू विडम्बनाया खँ छु दु धाःसा, भीथाय्यापिं आधुनिक विद्वान् व राजनेतातय्सं थ्व खँयात महत्व बी मखु व थःथःपिनिगु अहम्तापूर्वक न्हूगु परम्परा चलेयाःगु जुयाच्चनी ।

नेपाःया रंगमञ्चीय कला वा मल्लकालीन नाटकनिसें शाहकालीन जुजु राजेन्द्रवीर विक्रम शाहपाखें च्वःगु महासत्त्व पाख्यान तक अध्ययन यानाः स्वतधाःसा थन भरत नाट्य शास्त्रयात मानेमयासे थःगु हे कथंया प्रस्तुतिकरण याःगु खनेदइ । गन बिना सूत्रधार वा नटी छ्यलाः नाटकयात न्त्यःने न्त्यज्याकूगु खनेदइ व फुक्कं पात्रत रंगमञ्चय् हे वयाः थःपिनिगु पात्र परिचय बियाच्वंगु दइ । दुश्य अथवा अङ्ग्य परिवर्तन याय्बलय् नाटेश्वर वा देगलय् दुपिं थीथी देवी-द्यपिं चित्रित पर्दा वा गाछि छ्यली । तर खः प्याखनय् अजाःगु गुगुं पर्दा छ्यलातःगु खनेमदु ।

हरिसिद्धिया जलप्याखं गीति नाट्ययात स्वय्बलय् विदेशी विद्वान्तय्गु धापू कथं थ्व गीतिनाटक क्यनीबलय् युनानया नाट्य परम्परा लिसे ज्वःलाःवःगु खनेदइ । भरत नाट्य शास्त्रय् दइगु हस्तमुद्रा वा अङ्गमुद्रात स्वयाः अभ् उव्वः विकसित रुपय रणजीत मल्लया पालाय् शुभङ्कर धइम्हेसिनं च्वःगु हस्त मुक्तावलीइ खंकेफइ । अथे हे संगीतपाखे नं थीथी मल्ल जुजुपिसं रचनायाःगु गथे जगज्योतिर्मल्लपाखें च्वयातःगु संगीत सार संग्रह अथे हे संगीत चूडामणी प्रताप मल्लपाखें च्वयातःगु संगीत शास्त्रया सफूत काय्फइ । थ्व संगीत शास्त्र परम्परा दुने दाफा म्ये भजन आदि लाःवइ । थ्व उपत्यकाया देगः, त्वाःत्वाल्य् भजन मण्डलीतय्सं न्त्यव्वयाच्वंगु दइ । आःनं प्रत्येक दँय् यल लाय्कूया दबुली जुजु सिद्धिनरसिंह मल्लपाखें च्वयातःगु थीथी रागय् न्यनाच्वंगु म्येत 'म्युजिक कन्सर्ट'या रुपय् हालेगु परम्परा दु । ● ● ●



R.B. Diamond Jewellers Pvt. Ltd.
Since 1997

GPO Box 11581, R.B. Diamond House, Pyukha, New Road, Kathmandu, Nepal
Tel: +977-1-4253336, 4222291, 4241977, 4233113 | Fax: +977-1-4233114
Email: info@rbdiamond.com | Website: www.rbdiamond.com

अभिनव गुप्त



उपप्रा. राजितवहादुर श्रेष्ठ

परिचय

अभिनव गुप्त मध्यकालीन भारतया तःधंपिं च्वमिपिं मध्ये छम्ह खः । वय्कः तिव्र प्रतिभावान् प्रकांड पंडित नं खः । गुप्तया आपालं सफू दु । वय्कःया हे गुलिखे सफुतिं वय्कःया पूर्वज, मांअबु व मेपिं नातेदार, गुरुपिनिगु बारे सीकेफु । अभिनव गुप्तं पूर्वजपिनिगु संक्षिप्त परिचय परात्रिंशिकाया टीका व ईश्वरप्रत्यभिज्ञावि वृतिविमर्शिणीया अन्तय् च्यातःगु दु (काश्मीर संस्कृत सीरीज पृ. २७८-८०) । परात्रिंशिकाया टिकाय् च्यातःकथं वय्कःया पूर्वज अभिगुप्तया छें गंगा व यमुनाया दथुइ लाःगु छगू थाय् अन्तर्वेदी (उत्तर प्रदेशया कन्नौज) धैगु थासय् लाः । लिपा अभिगुप्त काश्मीरया राजा ललितादित्यया आमंत्रणय् काश्मीर वनाः अन हे छें दय्काच्चन । अर्नालि लिपा अभिनव गुप्तया परिवारय् वराह गुप्तया जन्म जुल । थ्वहे वराह गुप्त अभिनव गुप्तया बाज्या खः । वराह गुप्तया काय् चुरवलपाखें ईसं ९५० या जःखः अभिनवया जन्म जूगु खः । अभिनव गुप्तया मांया नां विमला गुप्त व किजाया नां मनोरथ गुप्त खः । वया कका नं छम्ह दु, वया नां खः वामन गुप्त । अथेहे तापाबाज्या यशोराग गुप्त नं छम्ह तधंम्ह व्यक्तिया रुपय् अभिनव गुप्तं थःगु अभिनव भारती धैगु सफुतिइ उल्लेख यानातःगु दु ।

शिक्षा :

अभिनव गुप्तं विभिन्न आचार्यपिनिगु चरणय् च्वनाः शिक्षा प्राप्ति व प्रतिभा विकास यानादीगु दु । थः अबु थें हे वय्कः नं छम्ह शिवभक्त जुयाच्चन । थः शैवमार्गी जूसां ज्ञानया निंतिं वय्कलं बौद्ध अरहत व वैष्णव सिद्धान्तया पंडितपिं नं गुरु दय्कादिल । काव्यशास्त्रया गुरु इन्दुराज व नाट्यशास्त्रया गुरु भट्टटोत, दर्शनशास्त्रया उत्पलाचार्य खःसा सिद्धिचेल, लक्ष्मण गुप्तपिं नं वय्कःया गुरुया रुपय् खनेदु ।

पदवी :

शैवदर्शन व प्रत्यभिज्ञान क्षेत्रय् वय्कःया विशेष दखल दुगुलिं परम-
माहेश्वराचार्य थें जाःगु उच्च पदं वय्कःयात विभूषित यानातःगु दु ।

कृति :

वय्कलं च्वयादीगु विभिन्न विषयया सफूपाखें वय्कःया विद्वतता
पिज्वयाच्चंगु दु । वय्कःया फुक्क सफूत अध्ययन यायबले पूर्व लेखकपिनिगु
सफूया टिका वा व्याख्या यायगुलिइ वय्कः आपाः अभ्यस्त धैगु क्यं । वय्कलं
विभिन्न विषयस च्वयातःगु सफूया व्याख्या वा टिका यानादीगु दु । गथेकि -

तन्त्र : तन्त्रालोक अभिनव गुप्तया तःजिगु रचना खः । तन्त्रलोकयात
तन्त्रशास्त्रया विश्वकोशया रुपय् माने यानातःगु दु । थुकी आगमतन्त्रया विवेचना
यानातःगु दुसा परात्रिंशिकाविवरण, तन्त्रालोकसार नं दुथ्याकातःगु दु ।

स्तोत्र : भैरवस्तव, क्रमस्तोत्र थें जाःगु तःजिगु सफू रचना यानादीगु
दुसा बोधपंचाशिका थें जाःगु चिचिधंगु सफूत नं रचना यानादीगु दु ।

काव्यशास्त्र तथा नाट्यशास्त्र : काव्यशास्त्र व नाट्यशास्त्रय् वय्कलं
मौलिक सफू च्वयादीगु खनेमदु । अथेखःसां वय्कलं न्हापा च्वयातःगु काव्यशास्त्र
तथा नाट्यशास्त्रया धाःसा टिका च्वयादीगु दु । काव्यशास्त्रय् रसवादया
विरोधय् पिहांवःगु अलंकारवादं थाय् कयाच्चंगु इलय् आनन्दवर्धनं रसवादया
हे विकासक्रमकथं ध्वनिवाद प्रतिपादन यात । थ्वहे सफू ध्वन्यालोकया
ध्वन्यालोकलोचन टीका च्वयाः ध्वनिवादयात अभ् लोकह्वाकेगु ज्या अभिनव
गुप्त पाखें यानादिल । अथेहे नाट्यशास्त्रया प्रवर्तक भरतया रससुत्रयात अभ्
अप्वः व्याख्या याय्त अभिनवभारती सफू नं च्वयादिल । वय्कःया थुपिं निगुलिं
सफू समीक्षा-कौशल, साहित्यसौन्दर्य तथा उत्कृष्ट शैलीया नमूना खः । उकिं
थुपिं निगू सफूपाखें वय्कः थौतकं लोकह्वानाच्चंगु दु ।

ईश्वर-प्रत्यभिज्ञाविमर्शिनी, मालिनिविजय वार्तिक, परमार्थसार,
शैवाद्वैतदर्शन थें जाःगु आपालं दर्शनसम्बन्धी नं वय्कःया सफूत दु । वय्कलं
थःगु जीवनय् विभिन्न विषयया ४१ गू सफू च्वयादीगु दुसा थौतकया दुने ३५
गू जक लुयावःगु दु ।

रससूत्रया व्याख्याकार :

नाटक प्रदर्शन जुइबलय् स्वंगू पक्षया भूमिका दइ -

१) पात्र वा अनुकार्य, २) रंगकर्मी वा अनुकर्ता ३) समाज वा दर्शक ।

प्याखं क्यनीबले सु व्यक्तियात लक्षित याना: क्यनी व हे वास्तविक पात्र जुइ गथेकि रंगमञ्चय् रामायण प्याखं क्यन धा:सा द्वापर युगयाम्ह वास्तविक राम हे मूपात्र वा अनुकार्य जुइ । द्वापर युगयाम्ह रामया प्रतिनिधि जुया: प्याखं क्यनीम्ह रंगकर्मी वा अनुकर्ता जुइसा टिकट पुला: प्याखं स्वयाच्चीपिं दर्शक जुइ ।

इसापूर्व न्हापांगु सदीयाम्ह काव्यशास्त्री भरतं थ:गु नाट्यशास्त्र सफुतिइ रसउत्पत्तिया विषयस च्यादीगु रससूत्र -‘विभावानुभावव्यभिचारी-संयोगाद्रसनिष्पत्ति:’य् विभाग, अनुभाव व संचारी वा व्यभिचारीभावया संयोगं रस निष्पत्ति जुइ धैगु खँ न्ह्यथनादिल तर रसया अनुभव अनुकार्य वा रंगकर्मी वा समाज मध्ये सुनां याइ धैगु विषयस मौन जुल । लिपा थ्व हे रससूत्रय् दुथ्यानाच्चंगु संयोग व निष्पत्तिया बारे विवाद जुया: विभिन्न विद्वानपिसं थ:थ:गु धंगं व्याख्या विश्लेषण याय्गु ज्या जुल । आपालं विद्वानपिसं व्याख्या या:सां प्यम्हसिनं या:गु व्याख्या वा सिद्धान्त (वाद) जक लोकंत्वा: -

भट्टलोल्लटया उत्पत्तिवाद : उत्पत्तिवाद वा आरोपवादया उद्भावक भट्टलोल्लटया विचा:कथं रससूत्रय् उल्लेख जूगु ‘संयोग’या अर्थ सम्बन्ध व ‘निष्पत्ति’या अर्थ उत्पत्ति ख:सा विभावादि कारण व रस कार्य ख: । थुगु आरोपवाद वा उत्पत्तिवादकथं प्याखनय् ऐतिहासिक पात्रत राम व मेमेपिसं हे रसया अनुभूति याइ । रंगकर्मी विभिन्न भेषभुषां हाउभाउ याना: ऐतिहासिक पात्रया अभिनय याइ । थुगु वादकथं रंगकर्मीयात पुलांम्ह पात्रया आरोप जक याइगुलिं रंगकर्मीयाके वा दर्शकयाके रसया अनुभूति न्यून जुइ (सिंह, मिति मदु: १७३) । मुख्य रस ला पुलांम्ह पात्र राम आदियाके उत्पत्ति जुइगुलिं थुगु वादयात उत्पत्तिवाद धका: नं धा:गु ख: । भट्टलोल्लटया थ्व सिद्धान्त विवादमुक्त जुइमफुत । थुकिया विरुद्धय् आचार्य शंकुकं मेगु मत स्थापना यात ।

शंकुकया अनुमितिवाद : अनुमितिवादया उद्भावक आचार्य शंकुकं भरतया ‘निष्पत्ति’या अर्थ अनुमिति व संयोगया अर्थ अनुमाप्य-अनुमापक अले विभावादियात अनुमापक व रसयात अनुमाप्यया रूपय् मानेयात । शंकुकं नं रसया स्थिति मूलनायक वा अनुकार्ययाके हे जुइ तर अनुकार्यया आरोप रंगकर्मीयात याइगु मखुकि ऐतिहासिक पात्रया रूपय् रंगकर्मी बांलाक अभिनय याइगुलिं दर्शकं धात्थेंम्ह राम आदि मूख्यपात्र धका: अनुमान जक याइगु ख: । गथे कि चित्रय् सर्प खन धा:सा धात्थेंम्ह हे सर्प थें भान जुइ । थुकथं अनुमानया आधारय् रंगकर्मी व दर्शकं रसानुभूति याइ । थुगु मत नं विवादरहित जुइमफुत

छायाः सा अनुमानया आधारय रसानुभूति जुइमखु । अनुमानं ज्ञान जक वृद्धि जुइ अनुभूति जुइमखु । उकिं थुगु मतयात नं खण्डन यानाः भट्टनायकं भुक्तिवादया स्थापना यात ।

भट्टनायकया भुक्तिवाद : भुक्तिवादया उद्भावक भट्टनायकं 'संयोग'या अर्थ भोज्यभोजक सम्बन्ध व 'निष्पत्ति'या अर्थ भुक्ति वा भोगया रूपय कयादिल । थुगु सिद्धान्तकथं अनुकर्तायाके स्थायीभाव दइसा दर्शकयाके रसया स्थिति दइ (शर्मा, २०६१:४९) । ऐतिहासिक पात्रया अभिनय याइबले साधारणीकरण जुयाः स्वयाचर्चिपिं दर्शकतयसं रस भोग याइगु खः । रस भोग याइगुलिं थुगु वादयात भुक्तिवाद वा भोगवाद नं धायगु याः । दर्शकयात आपाः महत्व वियातःगुलिं थुगु वाद आपालं लोकंत्वाःसां थुगु मतयात नं अभिनव गुप्तं खण्डन यानाः अभिव्यक्तिवादया स्थापना यात ।

अभिनव गुप्तया अभिव्यक्तिवाद : भरतया रससूत्रया प्यम्हम्ह व दकले प्रतिभाशाली व्याख्याताया रूपय अभिनव गुप्तयात कायगु याः । गुप्त थःगु अभिनव भारती व ध्वन्यालोकलोचन निगुलिं सफुतिइ गम्भीरतापूर्वक रसया बारे चर्चा याःगु दु (शर्मा, २०६१:४९) । अभिनव गुप्त च्वय न्ह्यथनापिं स्वम्हं विद्वानपिनिगु सिद्धान्तयात छसिकथं न्ह्यथना लिपा थःगु तर्क तःगु खः । स्वम्हं विद्वानपिंसं चर्चा यानातःगु सफू आःतकं लुयामवःनि अथेनं अभिनव गुप्तं स्वम्हेसिगु तर्कयात छसिकथं तयाव्यूगुलिं काव्यशास्त्रय गुप्तया सफू आपालं महत्वपूर्ण जू ।

अभिनव गुप्तं भरतया रससूत्रय छयलातःगु 'निष्पत्ति'या अर्थ अभिव्यक्ति वा व्यञ्जना व 'संयोगात्'या अर्थ व्यङ्ग्य-व्यञ्जक सम्बन्ध धकाः नालाकाःगु दु । गुप्तया मतकथं रस व्यङ्ग्य खःसा, विभावादि व्यञ्जक खः, अले रस अभिव्यक्ति जुइ । थुगु सिद्धान्तकथं दर्शकयाके न्ह्याबलें स्थायीभाव दयाचवनी अले विभावादीया कारणं रस अभिव्यक्त जुइ । भुक्तिवादय थें तुं हे साधारणिकरण जुयाः हे दर्शकं रस अनुभूति याइगु खँय अभिनव नं सहमत जूगु खनेदु तर स्थायी भाव, रस नितां दर्शकयाके हे दइगु व रस भोग याइगु वस्तु मखु थ्व ला अनुभूति जक याइगु खः धकाः भुक्तिवादया खण्डन यात । थुकथं दर्शकयात हे प्रमुख स्थान वियाः रससूत्रया व्याख्या याःगुलिं शिष्यत क्षेमेन्द्र लगायत फुकक हे धैथें विद्वानत अभिनव गुप्तया सिद्धान्त नाप सहमत जूगु खनेदु ।

मृत्यु :

अभिनव गुप्तया गृहस्थी जीवनबारे गनं छुं हे उल्लेख मज्जुगुलिं वय्कः छम्ह आजीवन ब्रह्मचारी खः ला धैगु अनुमान यायेछिं (सुवेदी, २०३७: २५४) । मचाबले हे गुप्तया मां मदुगु व अबु नं सन्यासी जुयावंगुलिं अभिनव गुप्तं मचानिसें हे दुःख भोगे याय्माल । दुःख भोगे यायां अन्तिम अवस्थाय् ईसं १०२५ या जःखः भिंनिसः शिष्यपिनिगु दथुइ भैरवस्तोत्र पाठ यायां श्रीनगरं १३ मील दक्षिण-पश्चिमपाखेया बहुरुपा धैगु थासय् च्वंगु छगू गुफाय् दुहाँ भाल अले अन हे सिद्ध जुल (काणे, ईस १९७७:३०२) । टिकाकारया रुपय् स्थापित जूम्ह अभिनव गुप्त संस्कृत काव्यशास्त्रया छम्ह गुबलें ल्वःमंके मज्यूम्ह प्रचण्ड विद्वान खः ।

लिधंसा

उपाध्याय, केशवप्रसाद (विसं २०३६) पूर्वीय साहित्य-सिद्धान्त । काठमाडौं: पाठ्यक्रम विकास केन्द्र ।

काणे, पी.वी. (ईसं १९७७) संस्कृत काव्यशास्त्रका इतिहास । दिल्ली: मोतीलाल बनारीदास, (डा. इंद्रचंद्र शास्त्री अनुवादक) ।

काश्मीर संस्कृत सीरीज, संख्या १८, पृ. २७८-८० ।

शर्मा मोहनराज व खगेन्द्रप्रसाद लुइटेल् (विसं २०६१) पूर्वीय र पाश्चात्य साहित्य सिद्धान्त । काठमाडौं: विद्यार्थी पुस्तक भण्डार ।

सिंह, राज किशोर (मिति मदु) काव्य शास्त्र । लखनउः प्रकाशन केन्द्र ।

सुवेदी, हंसपुरे (विसं २०३७) संस्कृत वाङ्मयः साक्षिप्त अध्ययन । काठमाडौं: त्रि.वि.पा. विकास केन्द्र ।



नेवाः अर्गनाइजेसन अफ अमेरिकाया नेपाः देय् प्रतिनिधि व लुमन्ति दबूया
नायः भाजु किरण केन रंजितया अध्यक्षताय् पदनेत्यंगु
“लुमन्ति दबू ल्याः ७”
सुथालाक्क पदनेमा धकाः भिन्तुना देछानाच्चना ।

Ram Lal Shrestha

Immediate Past President of Newha Organization of America (NOA)
7425 Morrison Dr, Greenbelt, Mayland 20770, USA.

पूर्वीय काव्यशास्त्र



आ.शि. लसता सिंह

१) नृत्यखं

सामान्यरूपं धाय्वलय् छम्ह कविं समाजयात हित जुइकथं च्वयातःगु रचनायात काव्य धाइ । कवि धयाम्ह छम्ह तसकं सःस्यूम्ह वा विद्वानया रूप्य नालातःगु दु । उकिं तसकं सःस्यूम्ह विद्वानं समाजयात हित जुइगु कथं च्वइ । समाजयात बांलाःगु लँपुइ यंकेगु लागि च्वइगुयात हे काव्य धाइ । काव्य सिर्जना साधारण अशिक्षित मनुखं याय्फैमखु धैगु अलंकारवादीशास्त्रीतय्गु मत दु (श्रेष्ठ; ११३६:१२०) । काव्य धाय्वलय् कवितायात जक मकासे गद्य, पद्य, चम्पु शैलीं च्वयातःगु फुक्क रचनायात थुइकी (शर्मा ; २०६३:१) । तर थौकन्हय् काव्य धाय्वलय् पद्य साहित्ययात जक नालेगु याःगु खनेदु । काव्य व साहित्य धाय्वलय् निगुलिं फरक शब्द जूसां थुकिया अर्थ छगू हे खनेदु । काव्य खँग्वःया अर्थ संकुचित जुजुं वनसा साहित्यया व्यापक जुल । काव्य खँग्वःयात साहित्य खँग्वलय् दकले न्हापा छयलेगु यानादीम्ह भर्तृहरि खः । भर्तृहरि इस्वी ६५० या जःखःयाम्ह धकाः नालातःगु दु (थापा; २०६६, ३-४) । संस्कृत खँग्वः 'सहित' य् 'यत' प्रत्यय स्वानाः साहित्य जूगु खः (श्रेष्ठ; २०६२:१) । सहित धाय्वलय् स+हित खः । थुकिया शाब्दिक अर्थ सकल मनूया हित जुइकेत भिंकेत कविं वा च्वमिं थःगु कल्पनाशक्ति छयलाः च्वयातःगु रचना खः । काव्य धाय्वलय् कविं मनूया हितया निम्ति च्वइगु, मनूतय्त भिंगु लं यंकीगु खःसा साहित्यं नं मनूतय्त भिंकेगु नितिं च्वइ । उकिं साहित्य व काव्य छगू हे खः । काव्य वा साहित्यया परिभाषा दकले न्हापां प्रस्तुत याम्ह भामह खः (श्रेष्ठ; २०६३:१) ।

२) काव्यसम्बन्धी विद्वान्पिनिगु मत

आचार्य भामह

‘शब्दार्थौ सहितौ काव्यम्’ (अधिकारी; २०६७:६)

[शब्द व अर्थ मिले जुयाः काव्य जुइ] (बज्राचार्य; २०६९:१)

आचार्य दण्डी

‘शरीरं तावादिष्टार्थव्यवच्छिन्ना पदावलि’

[‘इष्ट’ अर्थ दुगु शब्दया पुचः काव्यया शरीर खः] (बज्राचार्य; २०६९:१)

आचार्य वामन

‘काव्यशब्दोऽयं गुणाऽलङ्कारसंस्कृतयोः शब्दार्थयोर्वर्तते ।’ (श्रेष्ठ; २०६७:७)

[गुण व अलंकारया संस्कारित शब्दार्थयात साहित्य धाइ] (बज्राचार्य; २०६९:१)

आचार्य रुद्रत

‘तुन शब्दाथौ काव्यम्’ (अधिकारी; २०६७:१०)

[शब्द व अर्थ हे काव्य खः ।]

आचार्य राजशेखर

“शब्दार्थयोर्यथावत्स सहभावेन साहित्यम्”

[गुण दुगु वाक्य हे काव्य खः]

आ. कुन्तक

‘शब्दाथौ सहितौ वक्रकविव्यापार शालिनि ।

वन्द्ये व्यवस्थितौ काव्यं तद्विदाह्लादकारिणि ॥ ”

[शब्द व अर्थ तयाः न्त्याइपुक च्यातःगु साहित्य खः गुकी शब्द व अर्थ
थवंथवय् थुलि सन्तुलित जुइकि गुगुं नं छगू म्हो वा अप्वः जुइमखु ॥”

वा

[आवश्यक स्वयां म्हो वा अप्वः मज्जूगु यइपुसेच्चंगु व स्पर्धामय् जूगु
शब्दार्थयात साहित्य धाइ ।]

आ. मम्मट

‘तददोषौ शब्दाथौ सगुणावनलङ्कृती पुनः क्वापि ।’ (श्रेष्ठ; २०६७:८)

[दोष मदुगु गुणं जाःगु शब्दार्थयात, यद्यपि उकी गनं अलंकार शुन्य जुसां
काव्य जुइ] (बज्राचार्य; २०६९:२)

आ. हेमचन्द्र

‘अदोषौ सगुणौ सालङ्कारौ च शब्दाथौ काव्यम् ।’ (अधिकारी; २०६७:११)

[दोष मदूगु गुण दुगु अलङ्कारयुक्त शब्दार्थ काव्य खः ।] (शर्मा; २०६२:४)

आ. विश्वनाथ

वाक्यं रसात्मकं काव्यम् ' (अधिकारी; २०६७:६)

[रसात्मक वाक्य काव्य ख:]

आ. अभिनव गुप्त

‘कवतीयं काव्यं’

[कविया कर्म काव्य ख:] (सिंह; :२-३)

आ. जगन्नाथ

‘रमणीयार्थप्रतिपादक : शब्द : काव्यम्’

[रमणीय अर्थ वीफूगु शब्द हे काव्य ख:] (अधिकारी; २०६७:६)

अथे हे मेदिनी कोषय् काव्यया परिभाषा थुकथं बियातःगु दु ‘कवि के द्वारा जो कार्य सम्पन्न हो उसे काव्य कहते हैं” (सिंह; :२) ।

थ्व परिभाषाकथं कविपाखें जुइगु न्ह्यागु नं च्वज्यायात काव्य धाइ ।

सामान्य रुपं पाश्चात्य साहित्य धाय्बल्य् यूरोप अमेरिका आदि पश्चिमी साहित्ययात धाय्गुयाःसां पूर्वीय साहित्य धाय्बल्य् पूर्व एशियाया साहित्ययात धाय्गु याः । पूर्वीय साहित्यया मूलश्रोत संस्कृत खः (उपाध्याय; २०६१:१) । विश्वया दकले पुलांगु भाषा ग्रीक, ल्याटिन व संस्कृत भाषायात नालातःगु दु । उकी मध्ये नं दकले पुलांगु भाषाकथं संस्कृत भाषायात कयातःगु दु । संस्कृत भाषायात देवभाषा कथं नालातःगु दु । वैदिक कालय् संस्कृत भाषा बोलीचाली व्यवहार व धार्मिक ज्याख्यलय् छ्यलीगु भाषा खः (आचार्य; २०६७:७) । थुकथं पूर्वीय साहित्य नं संस्कृत भासं हे सृजना जुयाच्चंगु खनेदु ।

संस्कृत भासं काव्यया नीति नियम च्यातःगु सफूयात संस्कृत काव्यशास्त्र धाइ । थ्व सैद्धान्तिक नियम कथं च्यातःगु दइ वा काव्य (साहित्य) गथे यानाः निर्माण यायगु धइगु सिद्धान्त बियाः च्यातःगु सफू खः । अझ स्पष्ट रुपं धाय्बल्य् काव्य च्वय्बल्य् काव्यदुने दय्माःगु गुण, दोष, प्रयोजन, स्वरुप, हेतु आदि बारे च्यातःगु सफूयात संस्कृत काव्यशास्त्र धाइ ।

पूर्वीय रसवादी आचार्यपनिगु विचाःकथं रस बिनां काव्य सिर्जना जुइमखु धइगु धारणा दु । रस संस्कृत काव्यया आत्मा खः (थापा; २०६६:३) ।

संस्कृत काव्यशास्त्रया उत्पत्ति इपू १ शदीनिसें ३ शदीदुने जूगु खनेदु । संस्कृत काव्यशास्त्रया दकले न्हापांम्ह काव्यशास्त्रीकथं आचार्य भरतयात नालातःगु दु । अथे हे संस्कृत काव्यशास्त्रया न्हापांगु सफू आचार्य भरतं च्यादीगु 'नाट्यशास्त्र' खः । थुकिया सिद्धान्त रसवाद खः । थ्व सफू जम्मा ३६ अध्याय व ५०० श्लोक दु । अथे हे सङ्गीत, अलङ्कार, छन्दशास्त्र, रस आदिया बारे थ्व सफुतिइ चर्चा यानातःगु दु (उपाध्याय; २०६१:६) । थ्व नाटकसम्बन्धि जक च्यातःगु दकले न्हापांगु सैद्धान्तिक समालोचना खः ।

'नाट्यशास्त्र' धुंकाः पिदंगु ग्रन्थ 'काव्यालङ्कार' खः । थुकिया च्वमि आचार्य भामह खः । थुकी ६ अध्याय व ४०० श्लोक दु । काव्य दोषयात गुकथं चिकेगु धइगु उपाय नं थ्व सफुतिइ स्यनातःगु दु (उपाध्याय; २०६१:७) ।

भामह धुंकाः पिदंम्ह शास्त्री (आचार्य) दण्डी खः । दण्डीया प्रख्यात ग्रन्थ 'काव्यादर्श' खः । थुकि ३ अध्याय दु । दण्डीयात अलङ्कारवादी च्वमिकथं नालातःगु दु । थ्व सफुतिइ अलङ्कारया अर्थ, वर्गीकरण आदिया बारे च्यातःगु दु (शर्मा; २०६३:५६) ।

दण्डी धुंकाः पिदंम्ह आचार्य वामन खः । वामन रीतिवादया संस्थापक खः (शर्मा; २०६३:७२) । वामनया प्रख्यात ग्रन्थ 'काव्यालङ्कारसुत्र' खः । थुकी ५ अध्याय दु । थ्व सफू दुने काव्य प्रयोजन, रीति, गुण, दोष, अलङ्कार व शब्द शुद्धिया विचाः यानातःगु दु ।

वामन धुंका पूर्वीय काव्यशास्त्र च्वयगु ल्हाः न्ह्याकावपि अभिनव गुप्त, मम्मट, राजशेखर, कुन्तक, विश्वनाथ क्षेमेन्द्र, जगन्नाथ आदि आचार्यपिं खः ।

पूर्वीय शास्त्रया प्रवर्तक व वय्कःपिनिगु सिद्धान्त सफूया बारे थुकथं दु ।

१	सिद्धान्त रसवाद	प्रवर्तक भरत	ई ई पू १ शदी	सफू नाट्यशास्त्र	समर्थक आनन्दवर्धन, अभिनव गुप्त, भट्टनायक
२	अलंकारवाद	भामह	ई पू ६ शदी	काव्यालङ्कार	दण्डी, उद्भट, रुद्रत, जयदेव
३	रीतिवाद	वामन	ई पू ८ शदी	काव्यालङ्कार सुत्र	×××

४	ध्वनिवाद	आनन्दवर्धन	ई पू ९ शदी	ध्वन्यालोक	अभिवन गुप्त, मम्मट, विश्वनाथ
५	वक्रोक्तिवाद	कुन्तक	ई पू ११ शदी	वक्रोक्तिर्कजिवितम्	×××
६	औचित्यवाद	क्षेमेन्द्र	ई पू ११ शदी	औचित्यविचार विमर्श	फुक्कं

३. लिखँ

समाजयात हित जुइकथं कविं चयातःगु रचनायात काव्य धायगु याः । काव्ययात साहित्य नं धाः । काव्य खँग्वःयात साहित्य खँग्वलय् दकले न्हापां छयलेगु यानादीम्ह भर्तृहरि खः । काव्यया परिभाषा दकले न्हापां बियादीम्ह आचार्य भामह खः । संस्कृत भासं काव्यया नीति नियम वा सिद्धान्त चयातःगु सफूयात पूर्वीय काव्यशास्त्र धायगु चलन दु । पूर्वीय काव्यशास्त्रया दकले न्हापांम्ह आचार्यकथं आचार्य भरतयात नालातःगु दु । अथे हे वय्कलं चयादीगु नाट्यशास्त्र सफूयात न्हापांगु सफूकथं नालातःगु दु । पूर्वीय आचार्यपिनिगु सिद्धान्तसम्बन्धी थीथी सफूत पिदंगु दुसा वय्कःपिनि सिद्धान्तकथं आचार्य भरतं रसवादयात जोड बियातःगु दु । अथे हे आचार्य भामहं अलंकारवाद, आचार्य वामनं रीतिवाद, आचार्य आनन्दवर्धनं ध्वनिवाद, आचार्य कुन्तकं वक्रोक्तिवाद व आचार्य क्षेमेन्द्रं औचित्यवादयात जोड बियातःगु दु ।

लिधंसा

अधिकारी, हेमाङ्गराज (वि.सं. २०६७) *पूर्वीय समालोचना सिद्धान्त* । ललितपुरः साभा प्रकाशन ।

आचार्य, कृष्णाप्रसाद व ईश्वरीप्रसाद गैर (वि.सं. २०६७) *नेपाली साहित्यको इतिहास तथा संस्कृत र पाश्चात्य साहित्यको रुपरेखा* । किर्तिपुरः क्षितिज प्रकाशन ।

उपाध्याय, केशवप्रसाद (वि.सं. २०६१) *पूर्वीय साहित्य सिद्धान्त* । ललितपुरः साभा प्रकाशन ।

थापा, मोहन हिमांशु (वि.सं. २०६६) *साहित्य परिचय* । ललितपुरः साभा प्रकाशन ।

बज्राचार्य, चन्द्रमान (वि.सं. २०६९) *साहित्यिक सिद्धान्त* । यैः स्वदेश प्रकाशन ।

सिंह, राज किशोर (मिति मद्) *काव्यशास्त्र* । लखनऊः प्रकाशन केन्द्र ।

शर्मा, मोहनराज व खगेन्द्रप्रसाद लुइटेल (वि.सं. २०६३) *पूर्वीय र पाश्चात्य साहित्य सिद्धान्त* ।

काठमाण्डौः विद्यार्थी पुस्तक भण्डार ।

श्रेष्ठ, ईश्वरकुमार (वि.सं. २०६२) *पूर्वीय एवम पाश्चात्य साहित्य समालोचना : प्रमुख मान्यता वाद र प्रणाली* । ललितपुरः साभा प्रकाशन ।

श्रेष्ठ, राजित (ने.सं. ११३६) 'काव्यगुण' *नेपालभाषा जर्नल*, ७:१२०-१२४ ।

नेपालभाषाय् 'चा' या छ्यलाबुला



रविन श्रेष्ठ

नेपालभाषा अर्थात् नेवाःभाय् नेवाःतसें ल्हाइगु भाय् खः । नेपालभाषायात थीथीकथं नामाकरण यानातःगु दु । आपालं नेवाःतसें नेवाःभाय् धाइ । गुलिसिनं नेवारभाषा धाय्गु याः । औपचारिककथं व सःस्यूपिंसं नेपालभाषा धाइ । गैरनेवाःतय्सं हिस्याय्भनं नेवारी धाय्गु याः । नेपालभाषा थीथी थासय् थीथीकथं ल्हाय्गु यानाः वयाच्चंगु दु । थाय्कथं नेवाःभाय् भचाभचा पाः ।

नेपालभाषाया थीथी विशेषता दु । थुकीमध्ये छगः आखःया छगू खँग्वः जुइगु अर्थात् एकाक्षरी जुइगु पहः नं दु । हाकनं व हे एकाक्षर मेगु खँग्वःलिसे स्वाःवनधाःसा मेगु हे अर्थ जूवनी । थुकथं 'चा' छगः आखलं छगू अर्थयुक्त रुप कालधाःसा व आखः मखुसे छगू रुप जुइ । गुबलें व चा-या स्वतन्त्र रुप मदयाः मेगु रुपनाप स्वानाः जक अर्थ पिज्वइगु जुलधाःसा बद्धरुप धाइ । गथे चाकु, चासु, चागः, चाघः, चाले, चाय् थुगु दसू स्वय्बलय् गनं चा-या स्वतन्त्र अर्थ दु । चागः, चाघः । चायागु ग्वःचा जुयाः चागः जुल । चायागु लः तय्गु घः जुयाः चाघः जुल तर चाकु, चासु स्वय्बलय् चा-या जक स्वतन्त्र अर्थ मदु । कु व सु नाप मिले यानाः स्वाय्माः अले जक अर्थ पिलुइ । चाले, चाय्, चाके क्रिया स्वय्बलय् नं चा-या जक स्वतन्त्र अर्थ मदु । प्रसंगया खँ खाचा, खिचा थुज्वःगु हे खँग्वः खः । थुकी खा-या जक नं स्वतन्त्र अर्थ दु । चा-या जक नं स्वतन्त्र अर्थ दु । नापं तयाः स्वय्बलय् चीधीचाम्ह खा अर्थ जुइ । अथे हे खिचा स्वलधाःसा थथे हे फरक अर्थ पिज्वइ । खि धाय्बलय् छुं नसा नयाः शरीरं पचे यानाः ल्यंगु प्यनं पिहां वइगु फोहरगु वस्तु खः अले खिचा खँग्वः स्वय्बलय् छेंय् लहिनाः तइम्ह अथवा मनूतय् वस्ती दइम्ह जनावर धइगु अर्थ जुइ । खि व चा व्यागलं तयाः स्वय्बलय् छताजिया जनावर धइगु सीमदु ।

नापं तयाः स्वयंबल्य् जनावर धइगु अर्थ थुइ । उकिं चा-या स्वतन्त्र रुप नं दु, बद्धरुप जक नं जूवं ।

चा-या अर्थ

चा (१) जमिनय् दुगु बुँज्या यानाः अन्न सय्काः नय्त मदय्क मगाःगु प्राकृतिक वस्तु । खुसिबाः वयाः बुँइ च्वंगु चा दक्व चुइकायन ।

चा (२) छताजिया ई थुइकीगु न्हिनय् धुंकाः वइगु ई । चान्हय् खिउँसे च्वनी । कृष्णाष्टमीखुन्हु चा च्वनी ।

चा (३) छुं वस्तु चाय्गु ज्या या धकाः उजं बीगु क्रियारुप । आम कापः छकू चा ।

थ्व हे चा रुपयात मेगु रुपनाप स्वानाबिल धाःसा मेगु हे अर्थ पिज्वय्यः, गथे काय्चा, म्ह्याय्चा । थन काय् व म्ह्याय्या सामान्य अर्थ थःम्ह हे मिजंम्ह सन्तान व मिसाम्ह सन्तान जुइ । व हे काय् व म्ह्याय् खँग्वलय् चा लिताँसा तलधाःसा काय्चा व म्ह्याय्चा जुइ । अले थःम्ह हे तिरिमय्जुया कोखं जन्म जूम्ह सन्तान मजुसे दाजु-तताजुया कोखं अथवा किजा-भौया कोखं बूम्ह सन्तान जुइ । थन काय्चा अथवा म्ह्याय्चा अर्थ चीधं थुइकाः अथवा क्वयंकाः धाःगु मखु । थुकथं थःथिति खँग्वलय् गनं अनिवार्य रुपं 'चा' तय् हे माः गनं ऐच्छिक रुपं जक तःसां गाः । काय्चा म्ह्याय्चा भिंचा खँग्वलय् अनिवार्य रुपं चा ल्युने स्वाय् हे माः । गनं धाःसा ऐच्छिक रुपय् तःसां ज्यू मतःसां ज्यू गथे छय् छय्चा, छुइ छुइचा, भाइ भाइचा, मै मैचा इत्यादि ।

थःस्वयां थकालिपिं अथवा थःम्हसिनं यः ताय्काः धाइथाय् नं 'चा' स्वानाः सम्बोधन याइ । गथे-

दाइ - दाइचा । थःगु हे परिवारया दाजु जूसा दाइ अथवा दाजु हे धाइ । कारक रुपावलीइ यनीबलय् धाःसा न्हापा व आः छुं भती पाः । न्हापा जूसा दाजुं धाइ, आः जूबलय् दाइचां धाइ । ईकथं परिवर्तनं यानाः आः चा तय्माःगु जुल । भचा-भचा, भःचा-भःचा, भतीचा-भतीचा, भती-भती

थन न्हय्ब्वयातःगु प्यंगू दसुइ न्हापांगु निगुली चा मदय्क हे मगाः । लिपांगु निगुली चा दुसां ज्यू मदुसां ज्यू । थुकथं चा धइगु अनिवार्य रुप मखु । परिस्थिति स्वयाः तय्माले नं म्वाःले नं फु ।

गणनीय विशेषणं अगणनीय विशेषण जुड्थाय् चा-या प्रयोग

‘निगः’ थ्व गणनाबोधक विशेषण खः । गथे गुचा निगः, ध्यवा निगः, जाकि निगः इत्यादि । थुकी ‘चा’ लितँसा तल धाय्व अर्थ परिवर्तन जुइ । जाकि निगःया थासय् जाकि निगःचा यात धाय्व अगणनीय विशेषण जुइ । निगःचाया अर्थ निगः मखु निगःसिकं आपाः हे खः, तर ल्याःख्याय् मछिंक अतिकं कम मात्रा जक धइगु अर्थ खः ।

जक-या समान अर्थय् चा-या प्रयोग

सुं मनूया ज्यामि तयाः छुं तधंगु ज्या याकाच्चंगु, तधंगु ज्या सिधय्केत ज्यामित आपाः हे माः । ज्यामित मालाहय् मफयाः अथवा छुं कारण ज्यामित मदु । दुपिं नं निम्हजक । थुबलय् सुं छम्ह वयाः थथे धाय्फु अपाय्खागु छें दनेत नं निम्हचा ज्यामि तयाः गुबले छें दने सिधइगु । निम्ह विशेषणय् चा स्वाय्हाय्वं निम्हचा जुइ । थन निम्हचा-या अर्थ निम्हजक धाःगु खः । उकिं निम्हजक निम्हचा ज्यामि तयां मगाः । आपाः हे तय्माः धइगु अर्थ खः ।

क्वथंकाः अथवा हेला यानाः धाइथाय्

कानुनीरुपं सारा नेपालीत सकलें समान खः । थजात क्वजात धकाः सुनानं सुयातं भेदभाव याय् मदु अथे नं भाषाय् जातभातया प्रभाव आःतकं दनि । श्रेष्ठ, प्रधान, महाजु, राजभण्डारी, शाक्य, वज्राचार्य इत्यादि थजातया मनूत खः । ल्यपिं ज्यापु, गथु, दुँइ, नाय्, प्वः, गायां इत्यादि क्वय्या मनूत जुल । उज्वःपिंत ‘चा’ तयाः सम्बोधन याइ, ‘चा’ तयाः व्यवहार याइ, गथे ज्यापुचा, नाय्चा, प्वःचा, सँय्चा । थुकथं सामाजिक व्यवहारय् ‘चा’ तयाः भाषिक व्यवहार याः । थन चा-या अर्थ हेला भाव खः । * * *

नेवाः अर्गनाइजेसन अफ अमेरिकाया
नेपाः देय् प्रतिनिधि व लुमन्ति दबूया नायः
भाजु किरण केन रजितया अध्यक्षताय् पिदनेयगु
“लुमन्ति दबू ल्या ७”
सुथालाक्क पिदनेमा धकाः
भिन्तुना देछानाच्चवना ।
Udaya Shrestha
Romee Shrestha
Urusha Shrestha
Elenda Shrestha
Alex Shrestha
Laurel, Maryland
USA

हाइकु



रेणु श्रेष्ठ

- | | |
|---|--|
| १. नःलि सडक
अषाढया मसान्तं
छैजः चातवाः | ५. देय्या रक्षकं
केरा प्वःथें प्वलेयः
मैचिया लँच |
| २. देय्या चलन
खाः दु सकतां दु हँ
डिग्री समाधी.....! | ६. संस्कारी भम्चा
ससुद्यः वासं च्वंम्ह
घालय् ध्वइथें |
| ३. थःगु हे ला हिं
थ्यकल वृद्धाश्रम
त्वःफ्यू म्हगस | ७. मचाछें बालं
थौया बायो-चुनौती
वंशय् मत च्याः |
| ४. छपासः कीगः
न्हिलासु हे पिज्वल
वल ग्वःफय् | ८. नारी चरित्र
तुयुगु भ्व्या दाग
हुयां मवंगु |



लुमन्ति दबूया ग्वसालय् पिदनेत्यंगु
“लुमन्ति दबू ल्याः ७”
सुथांलाक्क पिदनेमा धकाः भिन्तुना देछानाचवना ।

माधव महर्जन
श्री दक्षिणकाली ईद्टा उद्योग
हरिसिद्धि, ललितपुर । ५८४१३४४१८६

नचुयावंपिं मनूत : मिसा समस्या



श्रद्धाचारी तिमिला

भाषा, साहित्यया ख्यलय नांजाःम्ह जगदिश चित्रकार ज्यू खः । वय्कलं च्यादीगु “नचुयावंपिं मनूत” उपन्यास छगू धाथें ईयात त्वःगु यथार्थवादीं जाःगु थीथी घटनाया न्हाय्कं थें खः । वय्कःया व सरलशैली साहित्य व उखान टुक्का छायाप्यगु साहित्य ब्वने तसकं न्ह्याइपु ताः । थुगु उपन्यासय् ब्यातःगु थीथी घटना व थीथी पात्रपिन्त जीवन्त रुपं समस्या पिडीतकथं ब्यातः समाजय् धर्म, कला संस्कृति ब्यागुली वय्कः छम्ह सफल उपन्यासकार धाय्त्वः ।

नचुयावंपिं मनूत उपन्यासदुने नेवाःसमाजया नसात्वसा, भेषभुषा, जीवनशैली, संस्कार, संस्कृति ब्यातल । नापं इहिपा संस्कारदुने भौमचा मालेगु, भव्य न्यायेकेगु, भौमचा दुत काय्गु, काय् व भौयात कोथा वीगु आदि इत्यादि नं ब्यातःगु खनेदु । थुकी दुनेया धाथेंया मोलिकता, सैद्धान्तिकताया लँपुइ दुने छम्ह मिसां जीवनभर भोगे यानावयाच्वंगु समस्या, पीडा, पीडां जाःगु संघर्षमय त्वाथलय् म्हाय, भौ, कला, मां जुयाः सहयाना जुया यानावयाच्वंगु ज्वलन्त, जोमलाःगु घटनां जाःगु थ्व छगू सेल्लाःगु उपन्यास खः । खय्तला थ्व उपन्यास वय्कलं तःदं बिकाः च्यादिल । अभ् थुकिया पूर्ण रुप बिइतला जुगजुगया राजनैतिक, सामाजिक परिवर्तनया लिच्वः प्युप्युं, धाय्गुखःसा २००७ सालया क्रान्तिया लिच्वः समाजय् गुकथं कल तर परिवर्तनया भवल्य् छम्ह निम्ह वर्ग गरिवी व समस्या जाःगु, परिवार उपन्यासया ख्वाःपाःकथं मू पात्र नानीछोरी व सीलानं छुनं प्रजातन्त्रया लिच्वः लाय्मफुगु छगू बाध्यात्मक, अन्याय सहयाना च्वनेमाःगु उगु जीवनशैलीकथं खनेदु । नचुयावंपिं मनूत उपन्यास जुगजुग लिपा प्रजातन्त्रया नाप राजनीति क्रान्तिया थीथी त्वाथःत पुला नं थुकि २०३५, २०३६ सला प्रजातान्त्रिक पञ्चायती प्रजातन्त्र तक्क नं छम्ह पिडीत समाजया सेल्लाम्ह नैतिकवान, कर्तव्य वहन यानाच्वंम्ह मिसा प्रति न्याय्या प्रसाद मथः धैगु ज्वलन्त प्रमाण समाजया नानीछोरी थःगु जीवन दुने हनवया सहयाना वयाच्वंगु थीथी घटना ब्याच्वं । खला उपन्यासदुने छगू तःहाकःगु ईब्यःयात

हे कया थीथी समस्यां जाःगु घटनात न्ह्यव्वःगु विशेषता नं खनेदु । थुकी दुने नेवाःसमाजया, व नं गरिबी, समस्या मूलक यय्कं वा मय्कं नं सामाजिक व देछाया राजनैतिक पिडां जाःगु छगू पुस्ताया ज्वलन्त बाखं खः । थ्व पीडा म्हिंगः, थौं व कन्हय् नं कमजोर, असहाय, अशिक्षा यानाः गरिबीया मुल्य च्वनाः सहयाय्माःगु बाध्यता खः ।

छम्ह नेवाः मिसा, छम्ह म्हाय्मचां थःगु कर्तव्य स्वरुप बौया आज्ञा पालन यानाः थःम्हं ख्वाः हे मखंनिम्ह, म्हमस्यूम्ह, न्वंतक तुइ मननीम्ह वया छैं, बुँ, लजगाः शिक्षा व बानी व्यहोरा गज्याःगु धैगु छुं हे वाःमचाय्कं मां, बौ, समाजया इज्जतया नितिं थःगु जीवनया पासा थः भाःत, माजु व मस्तय्त छु कथं नं दुःखया लिच्वः मकंसे कर्तव्य स्वरुप कर्तव्य पालन याना जीवन सरल रुपिं हनाच्वंगुलिं नानीछोरीया जीवनी नारित्वया प्रमाण मयासे मगाः । थ्व नचुया वंपिं मनूत उपन्यासयात छगू विशेष कथं यथार्थवादीपरक वय्क फुगु हे च्वमिया श्रृजना क्षमताया वः खः । छम्ह मिसाया मनोभावयात दुवाला क्यने फुगु हे वय्कः जगदिश चित्रकारज्यूया सफलता खः । वय्कःया उपन्यास प्रति न्हापांगु पलाःखाय् समाजया दुने मिसां हनावयाच्वंगु समस्याया खिपः सात्तु सासां वय्कलं न्हाचः, आः व कन्हेया ईयात नं व्वयाः वनाच्वंगु सेल्लाःगु दसु खः ।

छम्ह मिसा बहुपात्र जीवन हनेमाःगुला खहे खत । म्हाय् कला, भौ, मले, चमा, भोत, नीनी, तता इत्यादी कथंला दहे दु । थ्व उपन्यास दुने नानीछोरी चिकीचाकूगु छकू बुँया बुँज्याय् जीवन हनाच्वंम्ह तःसिया दया मायाय् म्वाय्माःम्ह जुया नं थःगु मानविय स्वतन्त्रताय् छुनं बांमलाःगु किचलं मकय्क स्वतन्त्र रुपय् संघर्षया पलाः न्ह्याकु न्ह्याकु पुस्ता पुस्ताया इज्जत तयाच्वंम्ह परिवारया दुजः खः । साहसी नानीछोरी । शिक्षाया रुपय् स्कूल, कलेजया प्रमाणपत्रं विभूषिम्ह मखया नं समाजया ख्यलय्, संघर्षया दथ्वी तःधंगु अभिलाषा व आकांक्षा मदु, छछाः नय्गु, छजू पुनेगु व सुरक्षित छैंया दुने थःगु खुसी जीवन हनेगुलि सफलम्ह बहादुरी नानीछोरी खः । जीवन थःगु दायित्व पूर्वकेगुलि त्यान्हुल, म्हाल धाइम्ह व मखु । वरु विशेषकथं न्ह्यानाच्वंगु उपन्यासया पलाखय् खय्तला छम्ह मिसाया इच्छा, आकांक्षा व स्वर्ग रुपि सुखी जीवन हनेगु दुनुगया भाव कथं सुखीमय जीवनय् साक्क नय्गु, बांलाक्क च्वनेगु तिसा वसतं तिया पुना सकसिनं हः हः धाय्क तःजी पहलं जुइगुला सु जक मिसा वा मनूया भावना दइमखु तर थ्व उपन्यासया मू पात्र नानीछोरीया जीवनय् उज्यागु अवस्था गबले नं थाय् काःगु खनेमदु ।

छगू वास्तविकतां मत्वःतुगु समस्या पुरुष प्रधान समाजया दबुलिइ, थः व थः भाःतया इच्छा पुरा याय्गुया नितिं, थःगु जीवनया हे ख्यलय् मयासे जीवनया अन्तिम संस्कारया नितिं, सीतधाःसा केवल काय् नं हे जक “मी” तय्माः धैगु भावना काय् बुइके धाधां व म्ह्याय् जक बुइकेमाःगु बाध्यता थ्व उपन्यासय् बांलाक्क खनेदु । म्ह्याय् बुइकुली थःगु छुं दोष मदुसां काय् बुइके मफया छम्ह समाजया दोषीया रुपय् वं धाइ “छुयाय् जिं वय्कःयात काय् छम्ह बुइका बिइ मफुत” धैगु साहसी रुपि निर्दोष जाःगु अधैर्यता नं प्वंकातःगु धाथें मेगु नापं ज्वःमलाःगु समस्या खः ।

मेगु कथं नानीछोरी सहाय्यमाःगु लैपु धइगु सत्ता, सरकार, राजनीतिया गलत नीतिया कारणं स्वनिगःदथ्वी थासं थासय् अनियन्त्रित असन्तुलित आप्रवासनया ल्वचं ग्रस्त जुयाः वयाच्चंगु खः । लिच्वःकथं आदिवासी नेवाःत बुलुहुं विस्थापित जुजुं वनाच्चंगुलिं व कुल भूमिं पितिका च्वनेमाःम्ह छम्ह नानीछोरी नं खः । ● ● ●



B. K. Vishal Enterprises
 Imadol-16, Krishna Mandir, Lalitpur
 Tel. No.: 5200802, 5202351
 Res.: 5261477, Fax: 5200802
 Email : balkajimaharjan1@gmail.com

Bal Kaji Maharjan
 9851071454



बढी
 हिमालले / सुरक्षित
 घर बनाउँछ ।

DEAL IN Himat, Panchakanya & Jagdamba Iron, Nepali & Indian Cement
 all kinds of Construction Materials, G. I. & PVC Pipe & Fitting,
 Sanitary Ware & Paint etc.

Himal Iron, Maruti & Brij Cement Distributors

लुमन्ति दबूपाखें पिदंगु “लुमन्ति दबू ल्याः ७”
 सुथालय्मा धइगु कामनालिसें २०७५ न्हँदया भिन्तुना

Indra Bir Maharjan
 Proprietor

 **SHANTI PHARMA**

Pulchowk, Bus Qmop, Lalitpur
 GPO Box : 9103, Kathmandu
 Tel : 5520929, 5546777
 E-mail : lax_nani@hotmail.com

Residence
 Bhola Dhoka, Sukra Path
 Lalitpur, Nepal
 Mobile No. 9851050983
 Tel : 5525143, 5535718

मतिना



नानीमैया श्रेष्ठ

थ्व स्वीदँति न्ह्यःयागु खँ खः । छन्हु जि जा थुथुं समाचार न्यनाः च्वनागु, समाचारया भ्वल्य् थुजाःगु समाचार धालकि थौं न्हिनय् गुहेश्वरी जंगलय् मिजं व मिसा निम्ह नापं सिनाच्चंगु लास लुयावल । गुँइ ला सा भ्वाः मस्तय्सं सा भ्वयाच्चंगु इलय् खंगु जुयाच्चन ।

उपिं न्ह्यवइगु वासः नयाः सिनाच्चंगु जुयाच्चन । इपिं निम्हेसिया विचय् मतिना जूगु जुयाच्चन । मिसाम्ह जात क्वय्याम्ह जूगुलिं मिजंया छेंजनं अनुमति मब्यूगु जुयाच्चन । अले छें त्वःताः निम्हं भारतय् विस्सुं वने धकाः वःगु जुयाच्चन । विमानस्थलय् थंकाः टिकट काय्गु भ्वल्य् निम्हय्सिया इहिपा मजुनि । अले प्रमाण क्यनेमफुत । अले इमिति विमानस्थलय् पन । अय्जुया उपाय मदुगुलिं इपिं सिनावंगु जुल । इमिसं सीन्ह्यः पत्र थथे च्वयातःगु जुयाच्चन, जिपिं निम्ह थुगु जुनी नापं च्वनेमखंसा मेगु जुनी नापं च्वने दय्मा, उकें निम्हसिगु नं लास छगू हे दिपय् नापं तयाः उनांब्यु ।

थ्वया बारे जितः बांलाक न्यनेमास्तिवया अन हे त्वालय् च्वंमह जिम्ह भ्वतया केहँयाके न्यना । वं थुकथं कन - जिमिगु त्वालय् अप्पा भट्टा साहु सन्तुलाल धनिया काय् शरण छम्ह ल्याय्मह जुइ धुंकूम्ह, बौयागु ज्याय् ग्वाहालि यानाच्चंम्ह । अन हे त्वाःया विष्णु धयाम्ह जात क्वय्याम्ह धनि मजुम्हसिया म्हाय् सरु धयाम्ह ल्यासेम्ह नापं निम्ह विचय् यःत्यः जूगु जुयाच्चन । खँ कनाच्चंम्ह भ्वतं जितः धालकि स्वयादिसं नानी, भी जातया यक्व सवाल दु । उकिं थ्व खँय् शरणया मांबौनं सियाः त्वफिकेत यक्व स्वल । तर गनं खँ न्यं धकाः । इमिगु यःत्यः जूगु सियाः त्वालय् च्वपिं जलाखला विचय् खँल्हाबला जुल ।

छन्हु तुयुमैचां कयः म्वाजुयात धाल- सिला म्वाजु छं छन्त साहुया

काय् शरण व विष्णुचिया म्हयाय् सरु नापं मतिना जुयाचन हं । कयो म्वाजुं धाल - धाथें खःला व मिसानापं जक इहिपायात धासा शरणचापिन्त गुठी बाहेक याइ । उबलय् हे शरणया मां लँय् वल, तुयुमै धाल - शरण मां लँय् वल । कयो म्वाजुं धाल - आसे न्हिं जिं वयाके छक मस्यू पहलं न्यने न्हां ।

कयो म्वाजुं धाल - गन वने त्यना हरिमै, अँ ! पसः छक वनेत्यना भवत धाल । कयो भवत अँ ! मै छंगु काय्या ब्याहा न्याःलाकि छु । हरिमै नं धाल - मखु भवत । हानं कयो भवतं धाल कि मस्तय् खँल्लानाचंगु कि विष्णुचिया म्थ्याय् सरुचा नापं व्याहा याइगु धकाः धयाचंगुलिं न्यनागु, तँचाय् मते न्हि मै धाल । अले हरिमैनं धाल - उमिगु जात भीत ज्यूला । मखु मसिया न्यनागु धाल । वहे भवलय् जि वने भवत धयाः हरिमै वन ।

तर हरिमैया मनय् लँधुछिं धौबजि वाल । थौं काय्याके थ्व खँ न्यनेगु विचाः यात । काय् छेंय् दुहां वय्का जा नकुनकुं काय्याके न्हिने कयो भवतं धाःगु खँ न्यन । छ छु विष्णुया म्थ्याय् सरुचा नाप जुयाचनगु ला । वला भीत जात मिलेमजू । छं मस्यूला, बाबु धाल । तर बाबुं लिसः बिल, थौंकन्हय् जातया सवाल मदु थःयात यलकि ज्यू नि धाय्खतं दनावन ।

माम्हेसिया मन मचन, मनय् खँल्लात, इलय् व्यलय् मेमेपिं जलाखलापिन्सं का स्वःथें खँ हिकाः ल्हाःगु लुमन । वहे छम्ह काय्, म्थ्याय् जक स्वम्ह दु । हरिमाया साप हे नुगमछिका थःत शरणया बौम्हेसित खँ कन । शरणचाला विष्णुचिया म्थ्याय् सरुचा नाप जुयाचंगु जुयाचन । बौम्ह छकलं तंपिकया न्थ्याक्व हे यःत्यः जुसां छुते याय् माल धाल । जितः नं उखुन्हु हाकुचां ख्याय्थें धाःगु अथे जात मज्यूपिनि नाप व्याहा जुल कि हाःखाः छुटे याइ, गुठी नं दुकाइ मखु चलन दु धाल । जि मथुया न्हिलाचन । जितः हे धाःगु जुयाचन खनी ।

वया कन्हय् खुन्हुनिसें मांम्ह हरिमाया म्ह सुखमदया इलय् व्यलय् वेहोस थें जुइगु जुल । म्थ्याय्पिं इतमत कनाः किजा शरणयात यक्व सम्भे यानाः न्वात । तर वं वास्ता हे मयाः । डाक्टरया वासलं नं मथिल । थ्व खँ सिया लछि ति लिपा वं प्राण त्वःतावन । बौम्ह साप हे जागे जुल । काय्म्हेसित यक्व सम्भे यानाः न्वात । अय् नं मस्यु पहलं जुल । तर काय्म्ह वास्ता मयाः ।

बौम्ह तंपिकया छैन पिहां हुं धकाः ब्वःबिल । थ्व खँ शरणं वनाः सरुयात धाल । सरु भी निम्ह थन मच्वंसे तापाक्क वनेनु धाल । भारत देशय् वनेगु सल्लाह जुल । छन्हु निन्हु लिपा निम्ह गुन्ता ज्वनाः विमान स्थलय् वन ।

थ्व खँ सरुया मापिन्स स्यूथें । विमान स्थलय् टिकट काय् त्यंबलय् निम्हसिया विचय् नाता प्रमाण क्यने मफुत, व्याहा नं मजुनि । अले इमित पन । अन निम्हं निरास पहलं गुहेश्वरी जंगलय् वने न्ह्यः न्ह्यवइगु वासः न्यानाः म्वाय्गु सिबें सीगु हे निर्णय यानाः वन । पत्र छगू च्वया नापं फय्तुना सिनाच्चन ।

थुखे शरणया बौ नं भोकय् यानाः व्वःव्यूसां लिबाक्क तक छेंय् मवःगुलिं । न्यकं मालास्वत, मदुगुलिं थानाय् खवर बिल । प्रहरीतय्सं गुहेश्वरी जंगलय् छगू जोडी लास खना प्रहरीयात खवर यात । थ्व खँ न्यनाः मिजया छेंजःपिं मिसाया छेंजःपिं थःथः मनू मुंका अन थ्यंकल । इमिगु विचय् वाद विवाद तःच्चः जुल । मिसायापिसं पत्र अनुसार निम्ह छगू हे दिपय् उइगु धालसा मिजया थःपिसं थ्व जुइमखु धकाः चर्का चर्की जुल । थ्व हे हुलय् मिजया लास व्वाका अलग्ग दिपय् उत । नापं च्वंगु दिपय् हे उके मखु धाःगु । तर मिसाया थःपिन्सं जोडदार नकसां हालाः नापंच्वंगु दिपय् उत हँ ।

थथे थुमिगु मतिना क्वातुगुलिं ज्यानया हे परवाह मयात । मतिनाय् जातभातया खँ वइमखु धैगु दसु त्वःताःवन । ● ● ●

नेवाः अर्गनाइजेसन अफ अमेरिकाया नेपाः देय् प्रतिनिधि व लुमन्ति दबूया नायः भाजु किरण केन रंजितया अध्यक्षताय् पिदनेत्यंगु
“लुमन्ति दबू ल्या ७”
 सुर्थालाक्क पिदनेमा धकाः भिन्तुना देछानाच्चना ।

भुवन बुढाथोकी
 च्याम्हा सिंह, भक्तपुर

नेवाः अर्गनाइजेसन अफ अमेरिकाया नेपाः देय् प्रतिनिधि व लुमन्ति दबूया नायः भाजु किरण केन रंजितया अध्यक्षताय् पिदनं त्यंगु **“लुमन्ति दबू” ल्या ७** सुर्थालाक्क पिदनेमा धकाः भिन्तुना देछानाच्चना ।



शार्इन

बहुउद्देश्यीय सहकारी संस्था लि.

Shine Multi Purpose Co-operative Ltd.

कुमारीपाटी, ललितपुर । फोन : ०१६५२४०८५, ५००८६०८, ५००८५५७

‘डा. नम्रता’ बाखंया छत्वाचा म्हसिका



उपप्रा. निर्मला श्रेष्ठ

शशिकला मानन्धरजुया बाखं “डा. नम्रता” खः । थ्व बाखनय् नेपाःया नेवाः मिसाया समस्या व दीनहीन स्थितिया चित्रण यानातःगु दु । मिसाया समस्यायात न्ह्यब्वया थौकन्हेयापिं मिसात निरंकुश सहयाना भाःतया चिप नया जक च्वनिमखु । मिसातय् नं साहस दु थःगु तुतिं थः दने फु धैगु सन्देश बियाः थ्व बाखं न्ह्यब्वयातःगु खः । थ्व बाखनय् न्हूगु चेतना लहर व जागरण हय्त मिसातय्त उत्साहया नापं बल व्यूगु दु ।


“डा. नम्रता” बाखंया मू पात्र डा. नम्रता खः । सहायक पात्रया रूपय् नम्रताया पासा छबिन्द्र खः । डा. नम्रता व छबिन्द्र निम्हया प्रेम प्रसंग न्ह्यब्वया समाजया परिस्थिति छर्लङ्ग न्ह्यब्वसें समस्यायात मिसाजातं नं अपुक्क समाधान याय्फु, मिसात धैपिं नं हिम्मतवान साहसी व थःगु तुतिइ थः दनेफु धैगु सन्देश बियातःगु खः ।

थ्व बाखंया भाषाशैली सरल व यथार्थपन दु । छम्ह मिसां थःगु तुतिं दनेफु धैगु आत्मबल पिब्वयातःगु दु । सहायक पात्रया रूपय् नम्रताया प्रेमी छबिन्द्र जातीय संस्कारयात दोष बियाः आत्मीय प्रेम दुम्ह नम्रतायात हाकुतिना धोका बिल । थथे थःत धोका बियाच्चम्ह छबिन्द्रयात नं थःम्हं अनेक ज्ञान बिया छ छम्ह मांबौया सपुत काय्मचा खः धासें उदार नुगलं मिसा जातिं धाय्फूगु प्रतिबिम्ब दु । थःयात धोका ब्यूम्ह छबिन्द्र एयरपोर्टय् काःवम्हसिया डा. नम्रता नापलाःगु इलय् मुस्कान (न्हिलाखाः) हे बनावटी खनेदु । नक्कलपनया न्हिलाखाः खनेदु । उलिजक मखु दुनुगलनिसें हर्षखुसी मजुसे आपद मनय् खँ ल्हाःम्ह थें जूगु क्यनातःगु तसकं सान्दर्भिकता दु ।

छबिन्द्रया थ्व बाखनय् थःप्रति थः विश्वास मदु धैगु क्यना समाजया मिजंया अर्थात् प्रेम प्रेमीया दुने बाचा यात हाकुतिना रुढीवादी सामाजिक

परम्पराय् च्वंगु खनेदु । मिजं पात्रया इमान्दारीता क्यना: मिसा पात्रयात धोका विया नं अभ् थः (छबिन्द्र) मिजंपात्रया भावना चोखोगु माया दु आःतक्क प्रेमिका हे यः धैगु खँ न्ह्यव्वयातःगु दु । मिजं पात्रं अभ् नं सतीक च्वनेगु कुतः याःगु दु । छबिन्द्रया जीवन पासा छँ मांअबु चूलाकाव्यूम्ह सुजाता दु । सुजाता थःगु जातयाम्ह, समाजय् क्यने मिलेजूम्ह व मांअबुया थः याकःकाय् जुया अलग्ग छँ पिहाँ वय्गु मनसुवा मदुम्ह छबिन्द्र खः । छबिन्द्र सुजाता इहिपा याय्धुंकाः नं डा. नम्रता थःत यो अभ् नापं च्वनेगु विचाः यानाः छबिन्द्र नम्रतायाथाय् वयाच्चनिगु न्ह्यव्वया शशिकलाजु भीगु समाज व व्यवहारयात न्ह्यव्वःगु अति सान्दर्भिक जु । तर अन्तय् सुजाता छबिन्द्रया तिरीमय्जु दय्क नं डा. नम्रता नाप नापं च्वनेगु छबिन्द्रया इच्छा व्यक्त याःगु अवस्थाय् डा. नम्रता धाःगु खँ मिसाजाति दक्वसिनं धाय्फय्के माःगु खँ खः । व्याहायाय् धुंकुम्ह मिजं मेम्ह मिसायाथाय् आर्थिक प्रलोभन व स्वार्थी मायाया जालय् ब्यंकेगु अनेक प्रियाया खँयात हाकुतिना छ्वया थः याकःचा नं म्वाय्फु दनेफु, मिसातय्सं मिसायात दुःख बीमज्यू, मिजंया माया मोह प्रलोभनय् दुवेजुइ मज्यू धैगु खँ न्ह्यव्वयातःगु अति हे मननशील खँ खः । मिजं पात्रया नापं मिसापात्र निम्हस्या विचाः याय्माः । भीगु समाजय् दक्व मिसा मिजंनं ध्यान तय्माःगु खः । ● ● ●


नेवाः अर्गनाइजेसन अफ अमेरिकाया
नेपाः देय् प्रतिनिधि व लुमन्ति दबूया नायः
भाजु किरण केन रंजितया अध्यक्षताय् पिदने
त्यंगु “लुमन्ति दबू ल्याः ७”
सुथालाक्क पिदनेमा धकाः भिन्तुना देछानाच्चना ।



गोल्डेन रोज बहुउद्देश्यीय सहकारी संस्था लि.
Golden Rose Multipurpose Co-operative Ltd
Pulchow-3, Lalitpur, Tel: 01-5009138, 5009139



ललितपुर उप-महानगरपालिका
पुल्चोक, ललितपुर



**ललितपुर उप-महानगरपालिकाको
नगरवासीहरूमा अनुरोध**

- यल उप-महानगरपालिका भित्र घर, टहरा निर्माण गर्दा नक्सा पास गरी निर्माण गरौं ।
- मालपोत, घर जग्गा, घर बहाल, व्यवसाय, सवारी कर नियमित चुल्सा गरी दण्ड जरिवानाबाट मुक्त बनेौं ।
- उद्योग, व्यवसाय, कल-कारखाना, घरबाट निस्कने फोहर वर्गिकरण गर्ने गरौं ।
- पुरातात्विक महत्त्वका मठ, मन्दिर कला, संस्कृतिको संरक्षण गरौं ।
- पर्यटकीय पाहुनाहरूलाई सम्मान गरौं ।
- कुनै पनि खाद्य पदार्थमा अखाद्य वस्तु मिसावट नगरौं ।
- मासु व्यवसायीहरूको पसलमा जाली वा शिशा लगाएर मात्र मासु विक्री वितरण गरौं ।
- सडक घेटी मिचेर घसल नगरौं ।
- बाल-बालिकाहरूलाई श्रममा नलग्नाऔं, बालश्रम मुक्त नगर बनौं ।

भारखः



तेजमाया महर्जन

नेवाःत थीथी तजिलजि अले नखःचखतं तःमि धकाः हलिन्यंक नांजाः ।
नेवाः तजिलजि व नखःचखः भीगु संस्कृतिया छगू धरोहर खः । नेवाःतय्सं
दच्छियंकं थीथी नखःचखः हनावयाच्चंगु दु । गुलिं तःजिक हनीसा गुलिं चीसकं
हनी । अथे हे गुलिं पाहां सःताः हनीसा गुलिं पाहां मसःतूसे हनी । भारखः
चीहनीगु नखः खः । थ्व नखः सिनाज्या क्वचाय्का म्हाय्मस्त सःताः नकेगु
जुयाः म्हाय्मचा नखःकथं नं काय्गु याः । थ्व नखः थाय्कथं हनीगु पाः । थ्व
नखः नेवाः समाजय् गुलिसियां हनेमाःसा गुलिसियां हनेम्वाः । थुगु नखः बुलुहुं
बुलुहुं न्हावनाच्चंगु दु । विशेषयानाः बुंज्यानाप स्वापू दुगु नखः जूगुलिं बुंज्या
याइपिं नेवाः समुदायं थुगु नखः हनाः वयाच्चंगु खनेदु । स्वनिगःया दक्षिण पश्चिम
लागा (सतुंगः, बोसिगां, तप्ख्यः, मच्छेगां, बलम्बु, ल्ह्वंखाः नःगां, थक्वाः)य् थौतक
नं हनाः वयाच्चंगु दनि । म्हाय्मचात सःताः नकेगु नं याःनि । किपू, पांगाय्
थुगु नखः हंसां थौकन्हे म्हाय्मचात सःता नकेगु मयाय् धुंकल । अन च्वपिनि
थुगु नखः भारकु नामं हनी । सिंरमितय् न्हापा हनेगु याःसा आः वयाः न्हावने
धुंकल । सिनाज्याबलय् म्हाय्मचात थःछेय् वयाः वा पीत ग्वाहालि याःवइगु
जुयाः सःताः नकेगु यानातःगु खः । ज्याया इलय् म्हाय्मस्तय् बांलाक्क
नकेत्वंके याय् मफइगु जुयाः सःता नकेगु यानातःगु जुइमाः ।

भारखः/भारकु नामं स्वनिगःया दक्षिण पश्चिम लागाय् धाय्गु यानाः
वयाच्चंगु थुगु नखः थाकुक्का याय्माःगु सिनाज्या क्वचाय्कं न्याय्कीगु जूगुलिं
भासु लनेगु वा आराम काय्गु नखःया रुपय् काय्छिं । सिनाज्यां यानाः छेय्
फोहर जुयाच्चनीगु इलय् सिनाज्या क्वचाय्का छेय् सरसफाइ याय्माःगु कारणं
थ्व नखः हनाः वयाच्चंगु खनेदु ।

थुगु नखःयात गनं सिनामनि ब्यंकेगु धकाः नं धायगु याः । दुखं कःपिनि दूब्यंकेगु, मचाबूपिनि, मचाबू ब्यंकेगु याःथें सिनाज्यां लिमलानाचर्चपिनि सिनाज्या क्वचाय्काः उगु ज्यापाखें ब्यंकेगु हे सिनामनि ब्यंकेगु खः । उकिं थुगु नखः सिनाज्यां जुयाच्चंगु फोहरपाखें मुक्त जुइगु वा शुद्ध याय्गु तातुना हनाः वयाच्चंगु खनेदु ।

बुँ ग्वखः दुगु खः वःखः बुँइ वा पीक्वचाय् धुंकाः वा क्वचाःगु दिंखुनु म्वःलहुयाः वसः हियाः आराम काइ । वा पीक्वचाःगु दिंया कन्हेखुनुनिसें स्वनहुतक द्यः पुज्याइ मखु, म्वःलहुइ मखु, वसः हीमखु । प्यन्हुया दिंखुनु छें, छखां बँ थिलाः, भारा सिलाः, म्वःलहुयाः नीसी यानाः नीलः हयाः नीवस्तं पुनां द्यःत निस्त (नित्य) पुजा याइ । थ्व दिंखुनु प्यता घासा ज्वरे यानाः मांबौ मदय् धुंकुगु छेंजःपिनि सिकब्बः तयातिनि छेंजःपिनि नइ । प्यता घासा धाय्बल्य् ला, अचार, बुवः, वाउँचा आदि खः । थः मनतुनाकथं अप्वः घासा दय्कुसां प्यता घासां कम दय्के मज्यू । प्यता घासाय् वाउँचा मदय्कं मगाःगु घासा खः । सिकब्बः तय्त प्यता घासा मदय्कं मगाःगु जुयाः प्यता घासा ज्वरे याय्गु यानातःगु जुइफु । थ्व नखः खुनु प्यता घासा ज्वरे यानाः वः छुना म्थ्याय्मचातय्त साक्कभिंक नकाः नखः क्वचाय्की । नेवाःतय्गु थ्व हे नखःचखः, जात्रा आदी थौं वयाः भीगु संस्कृति जुयाव्यूगु दु । अले थुकी हे भीगु गौरव दु ।



लुमन्ति दबूया ग्वसाल्य्
पिदनेत्यंगु “लुमन्ति
दबू ल्याः ७”
सुथालाक्क
पिदनेमा धकाः
भिन्तुना देछानाचवना ।



“लुमन्ति दबू ल्याः ७” सुथालाक्क पिदनेमा भिन्तुना
दलुचा लय्पौ
सम्पादक तथा प्रकाशक रमा कर्णजित

प्राचीन नेपालभाषा काव्यया इतिहास व विशेषता



शान्त महर्जन

नेपालभाषाया साहित्यिक इतिहासकथं ने.सं. ६२५ निसं ९६७ तकयाः ईयात प्राचीनकाल धकाः धाइ । ने.सं. ६२५ निसं ८८८ तक ईयात न्ह्यच्चःगु प्राचीनकाल व ने.सं. ८८८ निसं ९६७ तकःया ईयात लिच्चःगु प्राचीनकाल धकाः धाइ (तुलाधर; ११२०:६४) । प्राचीनकालय् साहित्य स्वंगू किसिमं विकास जुगु खनेदु । व स्वंगू म्ये, नाटक व बाखं खः । थ्व स्वंगूमध्ये दकले अप्वः विकास जुगु म्ये खः । थ्व इलय् अप्वः यानाः धार्मिकपक्षयात कयाः म्ये च्यातःगु दु (सिं; ११३७:१०१) । गथेकि, द्यःपिनिगु भेषभुषा, मुद्रा आदिया म्ये । ई हिलाः वंलिसे म्ये च्वःगु प्रकृति नं पानावन । न्हापा खालि भक्तिभाव जकः खनेदइथाय् आः प्रेम, मतिनाया रचना जुगु खनेदु । अथे हे, देशवर्ण, राजवर्ण, देशया परिस्थितिया, जुजुया गुणगाण, सामाजिक, आर्थिक व राजनैतिक ध्याचूम्ये नापनापं पारिवारिक स्थिति आदिया म्ये च्याहःगु खनेदु ।

प्राचीनकालय् नेपालभाषाया न्हापांगु म्ये यलया तिभय जुजुपाले अज्ञातपिन्सं ने.सं. ६९२ प्रणमति जुगमति म्ये व ने.सं. ६९४ अमल सहस्रनाम म्येयात नालातःगु दु (तुलाधर; ११३२:२) । प्रणमति जुगमति म्ये तिभय जुजुपिं थःथःहे त्वानाच्चंगु इलय् जुजुपिं मिलेजुइमाः, इमितं शत्रुपाखें सर्तक जुइमाल धकाः संन्देश बियाः च्यातःगु खनेदुसा, अमल सहस्रनाम म्येय् बुंगद्यःयात साक्षी तःया मेपिं जुजुपिसं सहयोग यानातःगु गुण मसिगु धकाः च्यातःगु खनेदु । नेपालभाषाया दकले न्हापांम्ह आदिकवि कथं जुजु महेन्द्र मल्ल (६८० निसं ६९४) यात नालातःगु दु (वैद्य; ११२२:१७) । जुजु महेन्द्र मल्लपाखें च्यातःगु म्ये “कपटि नं माया क्यनाः” व “मेवः मदु जित छिं” लुयाः वःसां थुकि तिथिमिति उल्लेख मजुगुलिं न्हापांगु म्येया रुपं नालातःगु मदु । प्राचीनकालय् नेपालभाषा काव्य साहित्य अप्वः यानाः मल्ल जुजुपिनिगु सृजना खनेदु । थ्व कारणं यानाः

मल्लकालयात नेपालभाषाया इतिहासय् स्वर्णयुग नं धाइ (तुलाधर; ११३२:१) । मल्ल जुजु जक मखु थुगु इलय् लानि (रानी)पिं नापनापं सर्वसाधारण जनतां नं म्ये च्यातःगु खनेदु (सिं; ११३७:१०१-१०२) ।

उगु इलय् च्यातःगु स्वयंभूले जुजु व सर्वसाधारणपिन्सं थःगु पहलं च्यातःगु खनेदु । गथेकि, जुजुपिन्सं च्चइबलय् अप्वःयानाः द्यया भक्तिभाव जाःगु म्ये, थःथःमहं आत्म प्रसंसा यानाः च्यातःगु दुसा अले, रानीपिसं थःत जुगु अन्याय, अत्याचार बारे थमहं भोगे यानातःगु म्ये दुःख व वेदना प्वंकाः च्यातःगु दु (सिं; ११३७:१०२) । सर्वसाधारणं अप्वःयानाः राजभक्ति म्ये च्यातःगु दु । सर्वसाधारणं च्यातःगु लुयाः वःसां इमिगु नां उल्लेख यानातःगु खनेदु । थःगु नांया पलेसा उगु इलय्या जुजुया नां व तिथिमिति च्यातःगु म्ये खनेदु ।

यलय् तिभय जुजुपिनिगु पालय् ने.सं. ६८० पाखे जुजु विष्णु सिंहया स्वम्ह कार्यापिं नरसिंह, पुरन्द्रसिंह व उद्धवसिंहदेव स्वम्ह जानाः यलराज्य यानाच्चंगु इलय् स्वम्हसिया नामं तिभय जुजुपिनिगु ई धाःगु खः । थुगु म्येय् उगु ईया राजनैतिक, धार्मिक, नैतिक, सास्कृतिक नापनापं सर्वसाधारण जनताया राजभक्ति व जुजुपिनिगु प्रजाप्रतिया माया अभिव्यक्ति खनेदु । थौं स्वयाः ४०० वर्ष न्त्यः मनूतय्गु भावना थौया ईया मनूतय्गु थें लोभ, मोह, पाप आदि खनेदयाच्चंगु भाव काव्यय् खनेदु । थःत स्वजातिय राष्ट्रयात अहित जुइगु ज्या मजुइमा धयागु भावनां रचना जुगु खनेदु ।

प्राचीन काव्यया विशेषता

१) प्राचीनकालय् मल्ल जुजु व रानीतय्गु काव्य च्यातःगु ।

प्राचीनकालय् सर्वसाधारणं काव्य च्चःसां थःगु नां मच्चसैं जुजुपिनिगु नां च्यय्गु चलन दु । अथेजुयाः प्राचीनकालय् अप्वःयानाः काव्य मल्ल जुजु अले रानीपिन्सं च्यातःगु खनेदु ।

२) सर्वसाधारणं थःगु नां मच्चःसां व इलय् याम्ह सासक व तिथिमिति तयातःगु दु ।

प्राचीनकालय् जुजुं लुं धाइला, मयय्क्क च्वलधासाः देशं पितनी धकाः सर्वसाधारणं काव्य च्यातःगु दःसां इमिसं थःगु नां धाःसा सुचुकीगु खनेदु । अथेजुसां व इलय्या शासक व तिथिमिति तयाः काव्य च्यातःगु खनेदु ।

- ३) निःस्वार्थ भावनां चवया तःगु
प्राचीनकालय् सर्वसाधारणतय्गु भावना निःस्वार्थ दु । सुयात नं चित्त दुःखे
याय्गु, मनय् छुं हे पाप मदय्क निःस्वार्थ भावनां काव्य चवयातःगु खनेदु ।
- ४) जुजु व प्रजाया सम्बन्ध
थुगु इया काव्य व्वनेबलय् जुजुं प्रजायात अति माया याःगु अले प्रजां
जुजुयात माने यानाच्चंगु खनेदु ।
- ५) धार्मिक, सामाजिक, मतिनाया म्ये
थ्व इलय् काव्य यक्व यानाः धार्मिक, सामाजिक, मतिनाया वर्णन यानाः
चवयातःगु खनेदु । वहे प्रकृतिया वर्णन यानाः चवयातःगु काव्यया म्ये व
कवितात नं खनेदु ।
- ६) पौराणिक वा लोकवाखंया लिधंसाय् म्ये
थ्व प्राचीनकालय् चवयातःगु म्ये पौराणिक व लोकवाखंया आधारय्
चवयातःगु खनेदु । वाखंम्ये धाःसा काल्पनिक रुपं चवयातःगु खनेदु ।
- ७) आत्मपरक शैली
थ्व इलय् जुजु व प्रजातय्गु माया दःसां जुजु पाखें दुःख बीबलय् थःगु
मनया भाव काव्यया माध्यमं प्वंकाः चवयातःगु काव्य खनेदु ।
- ८) शासकया व्यवस्था बारे चवयातःगु
थ्व प्राचीनकालय् चवयातःगु काव्य व्वनेबलय् शासकतय्गु शासकीय
व्यवस्था बारे चवयातःगु खनेदु ।
- ९) मल्ल जुजुपिसं आत्मप्रसंसा व लानिपिन्सं थःगु पीडा व वेदनाया म्ये
चवयातःगु
थ्व प्राचीनकालय् चवयातःगु काव्य म्ये मल्ल जुजुपिसं थःथःमहसित
आत्मप्रशंसा यानाः चवयातःगु खनेदुसा लानि (रानी) पिन्सं थःगु हे पीडा
व वेदना प्वंकाः चवयातःगु काव्य म्ये खनेदु ।
- १०) शब्दांक छ्यलीगु
कविं थःगु म्येय् तिथिमिति च्वइबलय् शब्दांक नं छ्यलेगु याः । गथेकि
सल(७), किसि(८) रङ्ग(५) आदि ।
- ११) काव्य न्यंकेत
थ्व इलय् काव्य, कविता वा म्ये चवयाः त्यंकेत मखु, सकसित न्यंकेगु
उद्देश्यं च्वइगु खः ।

१२) लयबद्ध

थ्व प्राचीनकालय् च्वयातःगु काव्यय् शासकया वर्णन व थःगु पीडा व वेदनायात
लय तथाः च्वयातःगु खनेदु ।

प्रणमति जुगमति

प्रणमति जुगमति म्ये यलया तिभय जुजु पालय् च्वयातःगु म्ये खः ।
थुकिया च्वमि अज्ञात खनेदु । थ्व म्ये जुजुपिनिगु नां तिथिमिति नापं स्पष्ट जूगु
दकले न्हापांगु पुलांगु म्ये खः । थ्व म्ये ने.सं. ६९२ पाखे च्वयातःगु खनेदु ।
थ्व म्ये पूर्वकक व्वनाः स्वय्बले, थुकिया च्वमिं कलात्मक ढंगं भावयात शसक्त
रूपं प्रस्तुत यानातःगु खनेदु । नापनापं तत्कालिन सामाजिक, राजनैतिक व
साहित्यिक स्थितिया जः ह्वलेगु ज्या नं यानातःगु दु ।

यलय् तिभय जुजुपिनिगु पालय् थःथः मिलेजुयाः राज्य याय्माःथाय्
जुजुपिं थःथः मिलेमजूगु खनाः च्वमि थःथः अथे घात, अन्तरघात याय् मज्यू ।
थः दाजुकिजापिनि जियाः भिनावंगु खनाः नुगः स्याकेमज्यू, यदि थज्याःगु भाव
नुगलय् ब्वलन धाःसा थःथः हे ल्वानाच्चने माली, थःथः ल्वानाच्चन धाःसा (वन
मदयाः सिंह न्हनाः वं थें सिंह मदया वनया शोभा मदयाः वं थें) थःगु बुंया
शोभा बुलुयाः वनी । थःथे थःगु अनुचित व्यवहारं थःगु आन्द्राभुरी न्हनाः थःत
कमजोर याइ धाःसा मेपिन्सं नं ल्वाके फइ । अथे हे, थः स्वयां तःधिपिन्त
मानेयानाः चीधिपिन्त माया यानाः थःथः मिले जुयाः च्वनेमाः धकाः कविं थःगु
देश भक्ति, राजभक्ति व राजाप्रति मतिना यानाच्चंगु खनेदु । अथे हे खःगु
याःम्हेसित मखुगु ज्या याय्मज्यू । विवेक, विचार यानाः छु पाय्छि, छु पाय्छि
मखु धकाः थुइकेमाः । बैद्यं रोगीयात ल्वय् लंकेत, थीथी वासः बियाः लंकाबी,
तर थःगु दशा भिनाच्चंगुलिं जक ल्वय् लाःगु धकाः भाःपिया वैद्ययात ल्वःमंकीथें
राज्ययात अपजस जक बीमज्यू धकाः कविं धयातःगु दु । थ्व म्येया मूलभाव
थःथः ल्वाय्मज्यू अले थःथः ल्वानाच्चन धाःसा मेपिन्सं फाइदा काइ । उकिं
मिले जुयाः च्वनेमाः ।

प्रणमति जुगमतिया विशेषता

प्रणमति जुगमति म्ये यलया तिभय जुजुपिनिगु पालय् च्वयातःगु खः ।
थ्व म्येया च्वमि अज्ञात खनेदु (तुलाधर; ११३२:२) । दकले न्हापा जुजुपिनिगु नां
तिथिमिति नापं स्पष्ट जुगु पुलांगु म्ये खः । थ्व म्येयात पूर्वक व्वनाः स्वय्बलय्

थुकिया रचनाकारया भाव व कला निगू पक्षं शसक्त खनेदु । नापं तत्कालिन सामाजिक राजनैतिक सास्कृतिक साहित्यिक स्थितिया जः ह्वलेगु ज्या थ्व म्ये याःगु खनेदु ।

दकले न्हापां ला मनूतयगु अनैतिकता, अधर्म, इर्ष्या आदि थें जाःगु अवगुणत न्ह्यब्वयगु ज्या थ्व म्येय् यानातःगु दु । मनूतयके खनेदयाच्वंगु थज्याःगु अनैतिकता, अधर्म, इर्ष्या आदियात न्हंकाः समाजयात सद्भावपाखे न्ह्याकेगु हे थःगु कर्तव्य खः धकाः असत्य, अधर्म याइपिनिगु सर्वनास जुइमा धकाः तत्कालिन परम्पराकथं ख्याच्वः बीगु नापं अर्ति उपदेश बीगु याःगु दु । समाजयात सद्मार्गपाखे उन्मुख यायगु तातुनाः थ्व म्येया च्वमिं तत्कालिन परम्परा थें काव्यया अन्त्यय् द्यःयाके मुक्ति व मोक्ष प्राप्त जुइमा, थःपिन्त प्रतिपाल यानातःपिं जुजुपिन्त शत्रुनाश याय्फैगु शक्ति प्राप्त जुइमा धकाः वर फवनातःगु दु । थ्व च्वमिया थःगु देशप्रेमनापं तत्कालिन जुजुप्रति दुगु आस्था, विश्वास, भक्तिया प्रतीक खः ।

प्राचीन इलय् कविपिन्सं थःगु सिर्जना क्वचाय्काः थ्यासफुतिइ थाय् ल्यनधाःसा तत्कालिन घटनाया टिपोट च्वयगु परम्परा दु । थुगु प्रणमति जुगमति म्ये क्वचाय् धुंकाः इन्द्रजात्राया छत्वाःचा चित्रण यानातःगु दु । थुकी न्ह्यथनातःकथं थुगु इलय् इन्द्रजात्रा छगू राष्ट्रिय पर्व कथं हे खनेदु । फःया घेनाः दबू दय्काः इन्द्रया बहान किसियात छत्र कुइकाः द्यः ब्वयगु, मत च्याकेगु अले फयां फक्व तिसा वसतं पुनाः जात्रा स्वःवनेगु चलन दुगु खनेदु ।

थुकथं नेपालभाषाया प्राचीन म्ये केवल भाषिक साहित्यिक दृष्टिं जक मखु, सांस्कृतिक अध्ययन, अनुसन्धानया दृष्टिं नं उतिकं महत्वपूर्ण जुयाच्वंगु खनेदु ।

अमल सहस्रनाम

अमल सहस्रनाम म्ये यलया तिभयजुजुपिनिगु इलय्था स्वपु मध्ये छपु खः । थुगु म्येया च्वमि नं अज्ञात । थुगु म्ये ने.सं. ६९४ च्वयातःगु खनेदु (सिं; ११३७:१०२) । थुगु म्ये राजभक्ति पाखे च्वयातःगु खनेदु । बुंगद्यःया गुण न्ह्यथनाः वय्कःया प्रार्थना यानाः म्ये न्ह्याकातःगु दु । बुंगद्यःयात संबोधन यानाः यलया तिभय जुजुपिन्सं शत्रु पक्षयात क्वथले फ्यमा धकाः खर्गसिद्धिया वरदान बियाः बिज्याःम्ह धकाः प्रार्थना यानातःगु दु ।

यलया तिभय जुजुपिं व जनता मिलेजुयाः चवने धैगु थासे स्वयाः प्यन्हुया दुने क्वाथः (किल्ला) दय्का धकाः थःगु बहादुरी क्यनाः चवयातःगु म्ये खः । तिभय जुजुपिनिगु पालय् स्वयाः न्ह्यः नेपालय् सुनानं स्वयाः प्यन्हुया दुने थज्याःगु ज्या जूगु मदुनि धकाः मेपिनिगु राज्य स्वयाः बल्ला धकाः उल्लेख यानातःगु दु । अथे हे निन्हुया दुने मालिगाँ, होलोच्च निगू गाँ च्याकातःगु बहादुर नं न्ह्यव्वयातःगु दु । थुकथं खप देय्यात यानातःगु गुण इमिसं मसिल धैगु खं नं उल्लेख यानातःगु दु ।

खप देशं त्वःफिकेमाःगु सको, चाँगु, भोट व पनौती राज्य थः जुजुपिनिगु बल, बुद्धि व उपायं लित कयाबिल । आःवया यल देय्या गुण मस्यूम्ह गथे पाशय् च्वंम्ह किसि छुं जालं बचे याःगु वं ल्वःमंकल । थुकथं हे यलया जुजुपिन्सं याःगु गुण ल्वःमंकूगु खनाः नुगः मछिं धकाः थःगु राज्ययात बेवास्ता यात धकाः धयातःगु दु । मेपिनिगु खं न्यनाः आपाः अहंकार जुगुलिं उमिगु गति व्वय्का यंकूम्ह कापरेया थें दुरगति जुइ धकाः उल्लेख यानातःगु दु ।

थुगु म्ये पञ्चतन्त्रया बाखंयात उपमाकथं छ्यलातःगु खनेदु । गथेकि, पाशन केड हस्ति छुन रापरपा थ्य, विपतिस राषलपा गथे मसेर (पाशय् लाःम्ह किसियात छुं विभिन्न बुद्धि जुक्तिं बचे यात व गुण फुक्क ल्वःमंकल) । राजहंश नेम्हसेन कापरे बोयकाथ्यं पररपिव महेमान श्वहुने (लःहँयतय्सं काउलियात स्वर्ग यंकुबलय् काउलिं घमण्ड यानाः न्वःवाना थः सीमाल) । थ्व म्ये खासयानाः क्वाथःया बारे चवयातःगु खःसा खप उपकार बारे चवयातःगु दु ।

लिधंसा

तुलाधर, प्रेमशान्ति (नेसं ११२०) *नेपालभाषा साहित्यया इतिहास* । येंः नेपालभाषा एकेदमि ।

तुलाधर, प्रेमशान्ति (नेसं ११३२) “नेपालभाषा साहित्य छगू म्हासिका” *लुमन्ति दबू* १:१-५ ।

सिं, लसता (नेसं ११३७) “प्राचीनकालया स्वम्ह म्येच्चमि रानीपिं” *नेपाल भाषा पौ* (जर्नल) ८: १०१-१०६ ।

वैद्य, जनकलाल (नेसं ११२२) *नेपालभाषा प्राचीन काव्य सिर्जना* । येंः नेपाल राजकीय प्रज्ञा प्रतिष्ठान ।



ज्याथा पञ्चदानगुथिया सना:घासा



मोहनदेवी महर्जन

१. न्ह्यखँ

यें महानगरदुनेया परम्परागत स्वीनिगू त्वा: व कुम्हा:तय्गु न्यागू त्वा:या गुथिमध्ये ज्याथात्वा:या पञ्चदानगुथि छगू ऐतिहासिक मुख्यगु गुथि ख: । थुगु गुथिया आकर्षण धैगु सना:घासा ख: ।

२. सना:घासा

ज्याथाय् बियाछ्वयात:पिं म्थ्याय्मस्त, भिनामस्तपाखें थ:थितिपिन्थाय् मेगु छुं मव्यूसां सना:घासा इनाबीगु चलन दु । उकिं याना: ज्याथापञ्चदानगुथिया घासातमध्ये सना:घासा मूख्य घासा ख: । थज्या:गु महत्वपूर्ण सना:घासा अचार दय्केत मदय्क मगा:गु फकं येंय् जक मुना: मगाना मेथासं नं मुंकेमा:गु अवस्था दु ।

२.१ फकं का:वनेगु : पञ्चदान बीत भुजा थुइगु गुन्हु न्ह्य: वा गुंपुन्हिधुंका: वइगु गुंलागा: तृतीयाखुन्हु माक्व फकं पा:ला:पिन्सं चूलाकेमा: । न्हापा-न्हापा सना:घासा फिइत मा:गु फकं पा:ला:या थ:थिति, पासाभाइ, ज:ला ख:लापाखें गन गुथाय् दु धैगु सीका: मनू छ्वया: काय्के छ्वइगु ख: । लगभग २५-३० पाथि न्ह्यंगु ४०-४२ ग्व: त्यपय् सना:घासा फिइत माक्व फकं न्ह्यखुन्हु हे कयाहयातइ । तर आ:या अवस्थाय् बुंज्या याय्गु व जग्गाया अभाव नापनापं बुंज्या याइपिं नं म्हो जुजुं वनाच्चंगुलिं फकंया उब्जनी नं म्हो जुइगु स्वभाविक ख: । यें न्यंक फकं मूना: सना:घासा फिउसां मगाइगु अवस्था व:गुलिं दँय्दसं वामचाय्क म्हो जुजुं वंगु खनेदु । उकिं थौंक्न्हय् लगभग १४-१५ ग्व: त्यपया ल्याखं जक सना:घासा फिना: वयाच्चंगु दु । त्यप म्हासय् याय्मज्यू धका: स्वंग: पुलांगु त्यप

जक फिना: मेगु २०० लि. या ड्रमय् फिडगु यानाच्वंगु दु । थुलिया लागि नं येंय् फकं मुने मफया भण्डै ४०-४५ दँ न्ह्यःनिसें खपय् वना: फकं कयावयाच्वंगु खः । थथे तःदँ न्ह्यःनिसें दँय्दसं फकं का:वनाच्वंगुलिं खप:या ज्यापुतय्सं येंया कुम्हा:तय्सं फकं का:वइ धका: अलग्ग हे फकं पिनातइगु जुयाच्वन । थथे च्यान्हु न्ह्यः फकं स्वया: व:थाय् फकं का:वनेत पा:ला: प्यम्ह व भलिं पा:ला: प्यम्ह अनिवार्य रूपं वनेमा: । मेपिं दुजःपिं न्ह्यान्ह्यापिं थःगु पा:वइबलय् फकं काय्थाय् सीकेत वंसां ज्यू । थुकथं फकं कयाहया: ज्याथाय् द्यःलुविइ तय्हइ । फकं काय्त् ग्वाहालि या:पिं दुजःपिन्त पा:लापिं मिलेजुया: इच्छाकथं त्वसाधासा तया: बजि नकलकि क्वचाइ ।

२.३ सना:घासा फिडगु विधि : सना:घासा फिडत माक्व फकंया व्यवस्था याय्धुंका: कन्हय्खुन्हु वा गुंलागा चौथीखुन्हु सना:घासा फिड । थ्वखुन्हु अनिवार्य रूपं नायःपिं निम्ह, सुवा: प्यम्ह, छवथ्वँ सुलिं निम्ह, भलिं पा:ला: प्यम्ह व पा:ला: प्यम्ह च्वनेमा: । मेपिं फकं सफा याय्त्, फकं त्वाल्हाय्त् माक्व मनूया व्यवस्था पा:ला:पिंपाखें याय्मा: । फकं सफा याय्गु धका: लखें सिलेगु मखु सफा कापतं यच्चुक हुया: याय्गु खः ।

सना:घासा फिडत मा:गु ज्वलं

फकं - २०००-२५०० काँय् (छगू टिप)

प:का चुं - छमुरी

हलू चुं - छमुरी

छवथ्वँ - २०० लिटर

सफा याइपिनि सफा याइ, फकं त्वाथलिपिनि सःस्यूपिन्सं वा नायःपिन्सं ब्यूगु नमुनाकथं त्वाथलाच्वनी । थथे ज्या याय्त् पा:ला:ल्या: छेंजः जक मगा:सा थःथितिपिं वया: ग्वाहालि या:वइ । नमुनाकथं (१ फुट) त्वाथःगु फकंयात सुवा:तय्सं मसलाया मात्रा मिलेयाना: वाली । छवथ्वँ सुलिं सना:घासा फिडत माक्व छवथ्वँ न्ह्यःने तयाबी । पा:लाखं प:काचुं व हलुचुं व्याग्लं-व्याग्लं थलय् तयाबी । थुपिं मसलात सना:घासा वाले सिमधतले थपेयानातुं च्वनी । तःग्वःगु बाताय् त्वाथलातःगु फकं, छवथ्वँ, प:काचुं व हलूचुंया मात्रा मिलेयाना: सना:घासा वाली । वाले सिधःलिसे ल्ह्यइपिन्सं

ल्ट्ययाः सनाःघासा फिइथाय् द्यःछैय् यंकावी । अले अन फिइपिं सुवाःतय्सं
त्यपय् क्वफानाच्चनी । थथे सनाःघासा फिइत ग्वाहालि याइपिं ४५-५०
म्ह सुथंनिसें सिमधतले यानाच्चनी । ज्या याःपिन्त पाःलाखं सुथंनिसें
नसात्वंसाया व्यवस्था याइ । सुथसिया कौलानिसें ज्यःनाः याकी । ज्या
सिमधःसा बजि तकं इच्छाकथं ल्वसाघासा तयाः ताःलाकेमाः । बजि नके
न्त्यः गुरुपिं व नायःपिन्त गुरु, नायः भाग धकाः खमुली छथल छथल
फकं हः तय्केछवइ । फकंया दं जक सनाः फिइगु जुगुलिं फकं हः
स्वकंचा पाय्त् ज्यू धकाः थथे बियाछवइगु खः । तर थौकन्हय् फकंहः
ख्वपय् हे त्वःता थकी । उकिं थ्व नियम न्हनावने धुंकल । बजि नकेगु
धकाः न्हापा-न्हापा छुचुमरी आलुघासा तयाः नकी । थौकन्हय् लाः,
अचार, आलुघासा तयाः नकी । पाःलाःपिनि थलबल व थाय् सुचुपिचु
याय् क्वचालकि थ्वखुन्हुया ज्या क्वचाइ । अथे हे थ्वहे दिनय् ईस्वया
नायःपिन्सं दच्छियं पञ्चदानगुथिनाप स्वापु दुगु भ्वय्यात माक्व थ्वकि
जाकि इनावी । पञ्चदानगुथि ज्वःछि यंकेमाःगु थ्वँ, कताथ्वँ, पञ्चदान
बीत भुजा थुइत माक्व जाकि नं सनाःघासा फिइ खुन्हु इनेगु यानातःगु
खनेदु । थ्व दक्वं २०५० साल न्त्यःया ज्याभवः खः । थ्व गुथिया आयस्ता
तयातःगु जग्गाया बालि पूवइगु वां व्यवस्था जुगु जाकि खः । थ्वकि इनेगु
ज्या थुकथं जुयाच्वंगु खनेदु ।

(क) पाःलाःयात

- कताथ्वँ थुइत फःचां गुफा
- चतुर्थी (चथाः) खुन्हुयात फःचां निफा
- पाः धुंकेत फःचां निफा

(ख) छवथ्वँ सुलितय्त

- मूभवय् खुन्हुयात फःचां प्यफा

(ग) भलितय्त

- पाः धुंके खुन्हुयात फःचां निफा

(घ) मूभलितय्त

- पाः धुंकेखुन्हुयात व मत काय्खुन्हुयात फःचां निफा

(ङ) भुजा थुइत

- फःचां ख्वीफा (स्वमुरी)

थुकथं थ्वं थुइत व पञ्चदान वीत भुजा थुइत माःगु जाकि वा थ्वकिया व्यवस्था यानातःगु खनेदु । आःवया च्वय् न्ह्यथनाकथंया चलन न्हनावने धुंकल । आवश्यकताकथं गबलें गबलें गुथिया धेवां न्याय्गु न्हूगु नियम लागु यानातःगु दु ।

२.४ सनाःघासा दुल्हाय्गु

सनाःघासा फिनाः प्यन्हु लिपा गुंलागा कृष्णजनमाष्टमीखुन्हु सनाःघासा दुल्हाय्गु ज्या जुइ । थुकिया लागि नायःत निम्ह, सुवाःत प्यम्ह व पाःलाःत प्यम्ह च्वनाः सनाःघासा दुल्हाइ । दुल्हाय्गु धैगु प्यन्हुन्ह्यः त्यपय् जाय्क तःगु फकं प्यन्हु लिपाः क्वलानाः बागः त्यप बाकि जुयाच्वनिगुलिं छगः त्यपय् च्वंगु सनाःघासा लिक्का मेगुली जाय्क दुल्हाइगु खः । दुल्हाय्बलय् निगः त्यपया छगः जक जुइ । थथे दक्वं दुल्हाय् क्वचालकि पाःलाखं सुवाः व नायःपिन्त ज्यःनाः याकाछ्वइ । अलेतिनि सनाःघासा फिइगु दक्वं ज्या क्वचाइ ।



लुमन्ति दबूया ग्वसालय् पिदनेत्यंगु “लुमन्ति दबू ल्याः ७”
सुथांलाक्क पिदनेमा धकाः भिन्तुना देछानाच्वना ।



होसन्ना र कान्तिपुर इन्डु

बलिचो निम्नगिर्को आधार



कान्तिपुर इन्डु

बलिचो ललितपुर

होसन्ना इन्डु फ्याक्ट्री
 हरिदिग्वि वडा नं. ८ ललितपुर
 अफिस : ५५५२५७५
 लिफस : ५५५२८६३
 राम अवाले : ८८५५०८५८६८

कान्तिपुर इन्डु फ्याक्ट्री
 बलिचो ललितपुर
 अफिस : ५५५००८८
 लिफस : ५५५०८६३
 लुमन्ति अवाले : ८८५५०८५८६८

फ्याक्स : ८८५५०८६८ ईमेल : shyamsports@enel.com.np

लुमन्ति दबूया ग्वसालय् पिदनेत्यंगु “लुमन्ति दबू ल्याः ७”
सुथांलाक्क पिदनेमा धकाः भिन्तुना देछानाच्वना ।



ललितपुर उद्योग वाणिज्य संघ

मंगलबजार, पाटन दरबार स्क्वायर
 पो.ब.नं. २६, यल, नेपाः

फोन : ८७७-१-५५२१७४०, ५५३०६६३, फ्याक्स : ५५३०६६१
 E-mail : lcci@ntc.net.np, lcci2023@gmail.com
 URL : www.lcci.org.np, facebook.com/lcci.org.np

शास्त्रीय प्याखनय घंगला



आ.शि. जीवनकुमार महर्जन

विश्वय् पुलांगु साहित्यिक विधामध्ये प्याखं नं छगू खः । नेपाःया प्याखं परम्परा नं न्हूगु मखु ताःहाक । प्याखनं उगु इलय् जनजीवनय् क्वातुक हा ज्वने धुंकल धैगु खँ नेवाःतय्गु थीथी त्वाल्य् दुगु दबुलिं स्पष्ट यानाच्चंगु दु । मध्यकालय् नेवाः समाजय् तान्त्रिक शक्तिया छ्यलाबुला अप्वःया वन । चा, सिँ, ल्वहं, धातुया मूर्तिइ चःया प्राण प्रतिष्ठा यानाः देवत्व दुबिके ज्यूसा मनूयाके नं देवत्व दुबिके ज्यू धैगु प्रयोगात्मक पद्धतिया सिद्धान्तया शुरुवात उगु ईया सिद्धतय्सं यात । गुकिं यानाः भक्ति प्याखंया जन्म जुल जुइ । थुकथं देवदेवी दुबिका पूजा आराधना यानाः चःपिनिगु हे अनुकरण याय्त स्वःगुलिं हे साय्द थुज्वःगु प्याखंया विकास जूगु जुइमाः । मध्यकालय् नेपालमण्डल दुने यक्व हे देवदेवीपिनिगु प्याखंत दय्केगु ज्या जुल ।

शास्त्रीय प्याखं परम्पराय् थीथी देवदेवी प्याखं, अजिमाया प्याखं, आदि ख्वाःपाः पुयाः हुइगु प्याखं खः । थुगु प्याखंत तान्त्रिक शक्तिलिसे स्वापू दुगु प्याखंत खः । छुं नं प्याखं स्यनेत नासःचः पूजा व मेगु थीथी पूजाआजा याय्माःगु परम्परा नेवाः समाजय् दु । ख्वाःपाः पुयाः हुइगु प्याखनय् नासःचःया पूजा लिपा मेगु विशेष पूजा याय्माः व खः घंगला पूजा । घंगला देवत्वया प्रतीक खः । गुम्ह देवीया प्याखं हुइकेगु खः उम्ह देवदेवीथाय् वनाः घंगलाय् चः सालेगु याइ । उकिं देवप्रतिष्ठा हे घंगलाय् याइ । छुंनं अष्टमातृका प्याखं वा देवदेवीया प्याखनय् प्याखंम्वलं घंगला न्ह्याय् धुनेवं खाय्गु शुरु जुइ । त्वःतलकि खाय्गु नं दी । थुकिया अर्थ घंगला न्ह्यातकि घंगलाय् दुगु देवत्व उम्ह प्याखंम्वःयाके दुबी । घंगला त्वःतलकि उम्ह प्याखंम्वःयाके च्वंगु देवत्व नं लिहां वनीगु खः । उकिं ख्वाःपाः पुयाः हुइकिगु प्याखनय् घंगलाया थःगु हे विस्कं पहः दु । घंगलाय् चः सालेगु पलेसा यदि प्याखंम्वःयाके हे चः साःसा

देवत्व लित मकाःतले खानाः हे च्वने माली । तान्त्रिक लागाय् देवत्व प्राप्त
जुलकि खायमाःगु परम्परा दु । उकिं प्याखंम्बःयाके देवत्व मसाःसे घंगलाय्
जक सालेगु यानातःगु जुइमाः । प्याखंम्बः गुबले घः जुया प्याखं हुइ उबले जक
घंगला न्हाय्गु याइ ।

मध्यकालय् घंगलाय् सिद्धि प्राप्ति याय्गु विधियात लिपिबद्ध यानातःगु
दु गुकियात भीसं घाघरसिद्धि विधि, घाघलसिद्धि विधि, घुर्घुरीबन्धनसिद्धि विधि,
गुर्घुरीबन्धनसिद्धि विधि, घर्घरासिद्धि विधि, घर्घरीसिद्धि विधि आदिया नामं
म्हसीके फु । चीगःगु गंयात संस्कृतभाषाय् घर्घरा, घर्घर्य धाइ । घाघरसिद्धि
विधिया बारे मध्यकालय् लिपिबद्ध जुयाच्चंगु सफूत गुलिं चीहालं च्वयातःगु
दुसा गुलिं ताःहाकलं च्वयातःगु दु । चीहाकलं च्वयातःगुलिइ थथे याय्गु
अथे याय्गु धकाः निर्देशन वाक्यजक च्वयातःगु दु ताःहाकलं च्वयातःगुलिइ
मन्त्रनापं निर्देशन वाक्य च्वयातःगु दु । राष्ट्रिय अभिलेखालय स्थित लगत नं
१/१५८१ स दुगु घाघरसिद्धि विधि नांया मध्यकालीन छगू थ्यासफू गुगु शास्त्रीय
प्याखनय् प्याखंम्बःतय्त माःगु घंगलाय् देवत्व प्रतिष्ठा याय्त च्वयातःगु खः ।
थुगु सफुती थथे च्वयातःगु दु ।

? ॐ नमः श्रीनाटेश्वराय नमः ॥ ॥

ततो घाघरसिद्धि विधान ॥ ॥ ॥

मुल नाटेश्वर पूजन पूर्वोक्त क्रमेण नाटेश्वर पूजय्त् ॥ ॥ ॥

पुष्पभाजन, न्यास ॥ ताल ॥ खिं ॥ बहुलि ॥ आचोरागा ॥

संप्रदाय बोय ॥

पूर्वोक्त क्रमेण, तार आदिन, समस्तं संप्रदाय पूजा याय ॥

स्वस्व मन्त्रेन, वलि ॥

धूप ॥ दीप ॥ नैवद्य ॥ जाप ॥ स्तोत्रं ॥ ॥ ॥

थ्वते धुनडाव ॥ ॥

गवय छाय ॥ पशुतर्पण याय ॥ ॥

ततो प्याखनमो उभा आदिनं पतवासन,

स्वस्तिक चोयाव स्वस्तिकस स्वने,

एका प्लकान, गाले निर्व्वछन याय ॥

अर्घपात्र लंखन हाय ॥

मितं फं ताडचा सगोनन त्वाय ॥ ॥
 घाघर आदिनं विशर्जन याय ॥ ॥
 प्याखनमोया लाहातस, चेतन, स्तिक चोय ॥
 गाछेकार, गाछे, लवल्हाय ॥
 ताल ॥ बहुलि ॥ खिं ॥
 दक्षिणा तस्यं उभापनि लवल्हाय ॥ ॥
 घाघर भुल्हाय, त्वुदोन, आचोरागा बिय ॥ ॥
 मूलमन्त्र पदलपाव बिय ॥
 दक्षिणा तस्यं प्याखनमो बिय ॥ ॥
 थ्वते धुनकाव ॥
 चन्दन ॥ सिन्धुर ॥ सगोन ॥ स्वान बिय ॥
 गाछे पेडन ॥ सेफं आरतिन गाल ॥ ताय होले ॥ ॥
 प्रतिष्ठा, सूत्रया प्याखन जुक्व हुयके ॥
 प्रवेश जुक्व खाडन, हुय माल ॥ ॥
 ततो आचार्य पूजा ॥
 दक्षिणा याचके ॥
 वाचन ॥ वलि थोय ॥ ॥
 देवसके स्वान कोकायव स्वान बिय, समय बिय ॥ ॥
 छे वाडाव, स्व ३ स्व माडल थेले ॥
 लंखन के बो ३ ॥ मितं बिय ॥
 स्व ३ प्याखन स्यडा थायस देवल्हाय ॥ ॥
 समय चेपन थिएके ॥ ॥
 घाघर तोय ॥
 इति घाघरसिद्धिविधिः समाप्तां ॥ शुभं ॥
 नाटेश्वर प्रीतिरस्तु ॥ शुभं ॥ ॥

थौकन्हय्या भाषाय् हिला

नासःद्यःयात नमस्कार याय् । आः घाघरसिद्धि विधान । नासःद्यःयात
 पूजा यानाः स्वांछासं प्याखं मुद्राय् च्वनाः ताः, खिं, ख्वाय्मालि, आचोरागा
 (काःरु) आदि दक्वं ब्वय्गु । छसिकथं ताः आदि दक्वयात मन्त्र ब्वं ब्वं पूजा

याय्गु । धुपाँय्, मत, जाकिं पूजा यानाः स्तोत्र ब्वनेगु । थुलि याय् धुनेवं ग्वय् छाय्गु, पशु वलि बिइगु । प्याखंम्बः, गुरुं प्वताचं स्वस्तिक च्वय्गु । स्वस्तिकय् ईका पःकां गालाः द्यःने छाय्गु । अर्घपात्रं लः हाः याय्गु । मत, फं, ताःचां, सगं बियाः घंगला विसर्जन याय् । प्याखंम्बःया ल्हातय् सिन्हलं स्वस्तिक च्वय् । गाछेकारं गाछे लः ल्हाय् । ताः, खिं, ख्वाय्मालिइ दक्षिणा तस्यं गुरुयात लःल्हाय्गु । घंगला, बाजं थाय्थें यानाः क्यनाः, त्वुदोनरु, आचोरागा (काःरु) बिय् । मूलमन्त्र ब्वने । दक्षिणा तस्यं प्याखंम्बलं बिइ । थ्व धुंकाः श्रीखण्ड, सिन्दुर, सगं स्वां बिइ । गाछे प्यनी । सिँयागु फं आरति याय् । ताय् ह्वले । प्रतिष्ठा सूत्रया प्याखं दक्वं हुय्के । प्रवेश जुक्व खानाः हुइ माल । आः आचार्य पूजा । दक्षिणा तय् । छुं वाचन (पाठ) याय् । वलि थय् । द्यःयाके च्वंगु स्वां क्वकयाः स्वां बिय् । समय बिय् । छेंय् वनाः स्वकः मन्दः थिले । स्वकःतक लखं हाः यानाः मत बिय् । प्याखं स्यंगु थासय् स्वकः द्यःल्हाय् । समय चिपं थिय्के । घंगला त्वय् । घाघरसिद्धि विधि क्वचाइ । शुभं

मध्यकालीन थुगु सफुती घंगलाय् सिद्धि प्राप्तिया मन्त्र बियातःगु मदु । निर्देशन वाक्य जक बियातःगु दु । घंगला प्याखंलिसे स्वापू दुगु वस्तु जूगुलिं थुगु सफुलिइ नं दकलय् न्हापां नासःद्यःया स्तुतियासैं घाघरसिद्धि विधि च्वय्गु न्ह्याकातःगु दु । घंगलाय् सिद्धि प्राप्त याय्गु विधि च्वयातःगु थुगु सफू बःचाधंगु जूसां घंगलाय् सिद्धि प्राप्तिया विधि विधान अःपुक न्ह्यब्वयातःगु दु । प्याखंयात हिंसि दय्क नासलं लिकेत नासःद्यःया पूजा याय्माःगु परम्परा नेवाः समाजय् थौतक नं ल्यनाच्चंगु दनि । प्राचीन शास्त्रीय प्याखं संगीतयुक्त जुइ । संगीतयुक्त जुइत बाद्य, गेय् नाटय दक्वं ल्वाक ज्यानाच्चनी । थुगु सिद्धि प्राप्तिया सफुती नं प्याखं संगीतयुक्त यानाः हिंसिं बिलिबिलं जाय्केगुनिर्तिं मुद्राय् च्वनाः ताः, खिं, ख्वाय्मालि, आचोरागा (काःरु) ब्वयाः पूजा याय्माःगु परम्परा खनेदु । प्याखंम्बः, बाजं नापनापं प्याखंलिसे स्वापू दुगु दक्वं ज्वलंत नं पूजा याय्माःगु थुगु सफुतिं क्यनाच्चंगु दु । प्याखंम्बः, गुरुं प्वताय् नं स्वस्तिक च्वयाः उकी ईका पःकां गालाः द्यःने छाय्गु, अर्घपात्रं लः हाः यानाः च्वख याय्गु, मत बियाः, फं लुनाः, ताःचां सालाः सगं बिइगु थें ज्वःगु मध्यकालीन नेवाः संस्कृतिनापं उगु इलय् छयलीगु बाजं आदिया बारे सय्केत सीकेत थुगु सफुतिं ग्वहालि यानाच्चंगु दु । अथेहे प्याखंम्बलं याय्माःगु कर्तव्य व गुरुयात

याय्माःगु सम्मानया वारे नं थुगु सफुलिइ न्ह्यथनातःगु दु । उकिं घाघरसिद्धि सफू पुलांगु शास्त्रीय प्याखंया प्याखंम्बःतय्सं घंगला न्ह्याय् न्ह्यः याय्माःगु तान्त्रिक पूजाया वर्णन खः ।

नेवाः समाजं न्ह्याका वयाच्चंगु थीथी देवदेवी प्याखं, अजिमाया प्याखं, लाखे प्याखं घंगला न्ह्याय्माःगु परम्परा दनि । नेवालमण्डलया थीथी अजिमा प्याखनय् घंगलाय् छः सालाः प्याखं हुइकेगु चलन थौतक नं ल्यं दनि । ख्वपया नवदुर्गा प्याखनय् गंछिद्यःया घंगला नासःछः थाय् न्ह्यःने तयाः पूजा यानाः देवत्व सालेगु याइ । थूकथं स्वय् बलय् देवत्वया प्राण प्रतिष्ठा नाप नापं नासलं लिकेत तान्त्रिक शक्तिया ज्वलं रूपय् छ्यलातःगु खनेदु । उकिं घंगलां शास्त्रीय प्याखनय् महत्वपूर्ण थाय् कयातःगु दु ।

लिधंसा

वज्राचार्य, आशाकाजी (नेसं ११०२) *मल्लकालीन गं प्याखं* । यलः आशाकाजी वज्राचार्य ।

वज्राचार्य, चुन्दा (नेसं ११०५) *मल्लकालया छुं संस्कृति* । यैः काशीनाथ, तमोट ।

श्रेष्ठ, पुरुषोत्तमलोचन (नेसं ११२३) *भक्तपुरको नवदुर्गा गण* । भक्तपुरः बबिता श्रेष्ठ ।

श्रेष्ठ, माणिकलाल (नेसं ११२०) “प्याखं (नाटक) साहित्य : छुं चर्चा” *नासः दबू* । पृष्ठ ११-१४ ।



नेवाः अर्गनाइजेसन अफ अमेरिकाया नेपाः देय् प्रतिनिधि व लुमन्ति दबूया

नायः भाजु किरण केन रंजितया अध्यक्षताय् पिदनेत्यंगु

“लुमन्ति दबू ल्याः ७”

सुथालाक्क पिदनेमा धकाः भिन्तुना देछानाच्चना ।

**SUJAY SHRESTHA
PREETI SHRESTHA
YASHILA SHRESTHA
Gaithersburg, Maryland, USA**

नेवाःभाय्या ऐतिहासिकता



प्रकाश शाक्य

नेवाः जातितय्गु देय् नेपाः देय् खः । अथे थुमिसं ल्हाइगु भाय्यात नेवाः भाय् धाइगु खः । नेपाः खँग्वः नेपाल खँग्वःया चीहाकःगु रुप खः । खय्तला विश्वया अति पुलांगु प्यंगू-न्यागू देय्मध्ये नेपाः देय् नं लाः धाइ । डिल्लीरमण रेग्मीया कथं नेवाःजाति नेपालय् जक मखु भारतया दक्व भागय् नं म्वानाच्चंगु मध्ये छगू पुलांगु जाति खः । थुमिगु सभ्यता भारतया छुं पुलांगु सहर मध्ये नं पुलां धकाः च्यातःगु दु । डेभिड गेल्लरं नेवाःजातिया खँय् थथे च्यातःगु दु कि धात्यों यदि सुं तसकं ल्यूनेतक लिहांवना धाय्गु खःसा नेवातय्गु इतिहास आदिम समाजया युग प्रारम्भ जूबलय् हे जुइमाः ।

पूर्वय् च्वंपिनिगु दक्व भाषाया जननी अर्थात् मूल भाषा संस्कृत खः । थथे जूसां नं अलगअलग परिवेसय् भाषाया विकास जुजुं वंगुया कारणं दक्व भाषाया अस्तित्व थःथःगु कथंया जुल । थथे हे नेपाः देय् च्वंपिं नेवाःजातितय्गु भाय्यात नेवाःभाय् धकाः नामाकरण जुल । इतिहासया पानाय् थ्व भाय्यात पर्यावाचीकथं नेपालभाषा, नेवार भाषा, नेवारी भाषा धकाः नं सम्बोधन याः नातःगु दु । ने.सं. ८९० सं मल्ल शासकतय् पदच्युत याय् न्हयः नेवाः भाय् नेपालया राज्य भाषा खः ।

विश्वया (आतक दयाच्चंगु) अति पुलांगु भाय् मध्ये नेवाः भाय् नं छगू खः । थथे धाःगुया छगू कारण थ्व खः कि थ्व भाय्ले न्ह, म्ह, ल्ह थें जागु खँग्वःत छयलाच्चंगुलिं खः । थज्यागु आखःया खँय् नन्दीस अधिकारीया थथे धापू दु - हिन्दि भाषाय् प्राचीन युगय् 'ऐ' व 'ओ' थेंजागु संयुक्त स्रोत प्रचलित ज्वी धुंकल । 'ऋ' व 'लृ' या प्रयोग समाप्त जुल । न्ह, म्ह, ल्ह थें जाःगु संयुक्त आखः व्यञ्जन न, म, ल थें जागु ले परिवर्तन जुल ।

सुनितकुमार चटर्जी थ्व क्षेत्रया भाषाभाषीयात भाषाकथं वर्गीकरण

याय्वल्य् नेवाभाय्यात थथे याना वर्गीकरण यानातःगु दु - थ्व क्षेत्रया दक्व भाय्यात Sino-Tibetan भाय् धाइ । थुकिया नं टिबेतन-बर्मा व सियामिज - चिनियाँ याना निगू कचा दु । तिबेतन बर्मा भाय्ले नं निगु कचा दुगु मध्ये मगर, गुरुङ, मुल्मी, सुनुवार, किराती, लेप्चा थें नेवाःभाय् नं हिमाली भाषिका पुचःलय् ला ।

भारोपेलि-चीन भाषाय् तिबेत-बर्मा भाय् तसकं महत्वपूर्ण पुचः खः । मंगोलियन जाति दक्वसियां थ्व भाय् ल्हाइ । थ्व भाय् छगू महत्वपूर्ण गु खँ एकाक्षरी (Monosyllabic)खः अर्थात् छगः आखःलय् छगू अर्थ दइ । एकाक्षरी आखः दुगु भाय् प्राचीन कालनिसें वयाच्चंगु खः धयागु धापू दु । थुकि न्ह्यःतँसा व लिताँसा तयाः मेमेगु खँग्वः दय्का यंकी । थ्व भाषाय् मेमेगु विशेषता थ्व खःकी छगू खँग्वःया अर्थ यक्व दइ, भाववाचक नाम दइमखु, व हे छगू खँग्वः यात संज्ञा, विशेषण व क्रिया नं याय्जिउ । व्याकरण पाखें लिङ्ग (Gender) दइमखु । अले थुकिं अप्वः नासिका वर्ण दइ । थ्व पुचलय् वाक्य कर्ता, कर्म, क्रिया यानाः छसिकथं वइ । सिल्भा लेभिं नेवाः भाय् पुलांगु कि तिबेतेन भाय् पुलांगु खँय् थथे धयातःगु दु - तिब्बती भाय् नापं थुमिगु भाय् लनाः स्वयंवलय् नेवाः भाय् अभ् पुलांगु खः धकाः हजसन अनुमान यानातःगु दु ।

डिल्लीरमण रेग्मीं थौं नं १७०० वर्ष न्ह्यः संस्कृतं चयातःगु कौतिल्य अर्थशास्त्रय् नेपाल खँग्वः न्ह्यथनातःगुलिं थ्व संस्कृत खँग्वः खःला धका शंका यात । तर बाबुराम आचार्य नेवाः भाय् आर्य भाषा थें च्वंसां सङ्ख्या वाचक शब्द व क्रियापद नापं थ्वया आर्य भाषा नापं छुं सम्बन्ध मदु । शब्दकोस व व्याकरणया नियम नं अलग हे दु धका धाल । थुगु कथं नेपाः देय् थें हे नेवाः भाय् नं बिस्कं अस्तित्व दुगु छगू अति पुलांगु भाय् खः ।

थौकन्हय् नेवाः भाय्लय् ट्यूपा वःगु कारणया खँय् कमलप्रकाश मल्लया थज्याःगु खँ दु - नेवाःतयेगु भाय्या मू खँग्वः, खँ ल्हाय्गु पहः आदि फुक्कं चीन-सें भाय्या खलः जुसां न्हापांनिसें इमिगु समाजय् जुजु, पुरोहित, भिक्षु, वन्दे, आचाजु, जोशी व कायस्थपिसं शिक्षा-दिक्षा, धर्म-कर्म, च्वयेगु-ब्वनेगु ज्याय् थ्व हे भाय्यात मछ्यःसे संस्कृतया प्रयोग यागुलिं थ्व भाषाय् संस्कृतया प्रभाव लाःवंगु जक मखुकि थ्व भाषाया अपहेलना थें जुया गुलि विकास जुइगु संभवगु खः उलि मजुल ।

काशीनाथ तमोटं थ्व भाषाय् मेमेगु भाय्या खँग्वःत ल्वाकज्यानाः

वःगुयात कयाः थथे धयातःगु दुकि छगू बल्लाःगु अनुमानकथं आःयागु नेवाः भाषाय् छयलावयाच्वंगु ५० प्रतिशत खँग्वः संस्कृत वा मेगु आर्य भाषाया तद्भव तत्सम् खँग्वः पाखें वःगु खः ।

भाषा शास्त्रीपिसं थज्याःगु छगू अनुसन्धान यानाः तयातःगु दुकि छुं नं भाय्लय् सामान्यतयाः १,००० वर्षया दुने व भाय्या ८५ प्रतिशत जक सुरक्षित जुयाः १५ प्रतिशत लोप जुइ । थ्व धाःगुया अर्थ व भाय्लय् मेमेगु भाय्या १५ प्रतिशत खँग्वःत न्हूगु जुयाः दुहांवइ । १,००० वर्षया १५ प्रतिशत व काशीनाथ तमोटं नेवाः भाय्लय् मेमेगु भाय्या खँग्वःत पचास प्रतिशत दुहां वयाच्वंगु दु धाःगुकथं नेवाः भाय् ३५०० दै पुलांगु खनेदु । थ्व सत्यगु हे खँ खः । छायाःसा नेवाःजातिया विकास मञ्जुश्री नापं स्वापू दु । अभिलेख विज्ञान कथं मञ्जुश्री नं थनयागु लः पितनाः छवयाः मानव वस्ती दय्कूगु धयागु ई.पू. १५००या नापनाप खः ।

थज्यागु महत्वपूर्ण ऐतिहासिकं जाःगु नेवाः जातिया नेवाः भाय्यात छखे राज्यं दमन याय्गु निति ज्वनाच्वंगु दुसा मेखे नेवाःतय्सं हे थ्व भाय् छयलेगु म्हो यानाहयाच्वंगु दु । छु थ्व भाय् छुं दशक लिपा धात्यें लोप जुइला ? भाषाशास्त्रीपिसं याःगु अध्ययन कथं भाषात लोप ज्वीगु मू कारणायात कयाः थथे वर्णन यानातःगु दु - सुं नं मस्तं थःगु मांभाय् छें नं ल्हाइ समाजय् नं ल्हाइसा व भाय् सच्छिदं मयाकं म्वाइ । मखु छें जक ल्हाइसा व भाय् ५० दै धुंकाः दैमखु यदि छें नं ल्हाइमखु पिने नं ल्हाइमखुसा व भाय् सीत धकाः सीकि । थ्व धापू कथं सहरय् च्वंपिं छुं नेवाःतय्गु छेंय् नेवाः भाय् सीधुंकल धाःसां जीउ । अथे जूगुलिं भाषा म्वाका तय्गु खःसा मस्तय्त् नेवाः भाय् ल्हाकेगु यानातय् माल । छायाःसा भाषा सित धाःसा जाति नं सी । थ्व खँ भीसं स्युगु हे खः ।



लुमन्ति दबूया ग्वसालय् पिदनेत्यंगु

“लुमन्ति दबू ल्याः ७”

सुथांलाक्क पिदनेमा धकाः भिन्तुना देछानाच्वना ।

लक्ष्मीनारायण शिल्पकार
प्रबन्धक

शुमेच्छा बचत तथा ऋण सहकारी संस्था लि.
भक्तपुर

मौन चिल्लाय



मोटिलक्ष्मी शाक्य

लक्ष्मीयात एअरपोर्टय् सीअफ याना: ल्याहां वयाच्वंपिं, लक्ष्मीया दाजु सविन व तताजु साहिराया नुग: मछिनाव:गु खँ ल्हानां व्या:गु हे मखु । बिछोड वेदनाया दु:खं नुग: स्व:पिं निम्हेसियां थवं थवय् न्ववाय्गु तक्क मन मवं । मूक भाषां जक नुग:खँ व्यक्त याना: एअरपोर्ट ल्याहां वयाच्वंपिं अपिं । छयं क्व:क्व:छुना ववं एअरपोर्टया त:ध्वाखां पिने ट्याक्सी छग: कया: स्वमं ट्याक्सीइ द्वाहां वन सुरुक्क । मां हेरादेवीया धा:सा म्थ्याय् हवाइजहाजय् च्चना: व्वयावंगु स्वस्वं नुग: स्वकु थाहां व: । गर्व छयं धध:स्वा: । ख्वा: नं मुसुमुसु का: । पिने सुं म्हस्यूपिं खनी ला, म्थ्याय्या विषयय् कया: सुयातं खँ थ्वकेदइ ला धयाथें सलांत्या भंग:यागु ग:प:थें छयं चाचा:हू । तर सविन ! गवले चच्छि थें धका: वायाच्वने मलपिं निम्ह दाजुकेहें । थौं न्यादँ न्यादँ मछि वायाच्वने मा:गु स्थिति व:गु । हाकुगुं पुलावने मलंम्ह मिसामचा । च्वापुगुं पुला: पिने देशय् वना: ज्या याय्त आँट यानावंम्ह लक्ष्मी । ध्यवाया लोभय् तारं साला यंकूम्ह केहें ... । लुममं गाडी दुने हे सविनया थितु थिइक भसुका: पिज्वइ । हेरादेवीया धा:सा म्थ्याय् व्वयाच्वंगु लुमलुमं लसतां मुसुमुसु कया: खँ थ्वकाच्वनी ।

‘भाग्य धयागु सा:प त:धं वावु । अथे सर्गतं सर्गतं व्वयावने धयागु यस्सें दइमखु । तक १ नं बल्लाकेमा: । छंगु हे खँ कया: ल्हायका स्व ! कायमचा जुया: नं छं अथे वनेगु मती मत: । थौंकन्हय् जकं न्थ्याम्ह पिने वना: कमाय् या:वनी । छं केहेंनं आँट यानावन । बां हे लात । आख: यक्व पास मदुम्ह जूसां कमम्ह मखु जि म्थ्याय् । ... गुलि गुलि आख: पासपिं ला अथे वने मदु । वने धाय्वं अथें अथें वने दइगु थाय् ख:ला व ?

मांया म्हुतु भ्वासिखँ पिज्व:लिसे सविनया नुगलय् चुपिं च्वास्स च्वास्स सुइ । सुया सुयागु खँय् लगे लगे जुया: आख: व्वनेगु हे त्व:ता: अरव देशय् वंम्ह लक्ष्मी । प्याहां वनेत हे जिद्दि या:म्ह केहेंया लागि बहलय् लाकेमा:गु थ:गु छें ।

सविनया नुगः हिहिलनावइ । साहिराया नुगलय् जक छु छु खँ स्वचानाच्वंगु दु मस्यू । निम्ह निखे स्वयाः मिखा क्वपीकाः ब्वांवनाच्वंगु ट्याक्सीया नापनापं नुगः दुनेया वेदना नं ब्वाकाच्वनी । फय्लिंचा सरीम्ह मांम्ह धाःसा थःगु इच्छा पूर्वंगुया लसताय् धाय्माल, लसतां काय्यात खँ थ्वकुथ्वकुं वनी ।

‘... बाबु ! आः लक्ष्मीलक्ष्मी ब्यावनाः गन धाःथाय् थ्यनेवं मेगु ‘ह्वाइजाःजय्’ (फय्खतय्) चवनावनी ? अन देशयागु ह्वाइजाःज नेपाःयागु ह्वाइजाःज स्वयाः नं तग्वः हँ मखु ला ? गपाय्ग्वःगु ह्वाइजाःज जुइ व हला ? यम्हयसा ! ‘अरिवि’ (अरव) धाःगु देशय् थौं हे थ्यनी थें मखु ला ? कि कन्हय् तिनि थ्यनीगु ? ... छं केहें अथे विदेश वंगु सिल धाय्वं भी थःथिति, वया पासापिं सकलें हे गजब चाइतिनि जुइ । ... वने धाय्वं अथें वने फइगु ज्या मखुनि सा ... ’

मां चय्चवय् धाःलिसे सविन खय्खय् धायावनी । मांयात चिचिमिचि च्याना दुनुगः हे तज्याक छकः खय् मास्तेवइ । ... लँ धुच्छि हाहां वःम्ह मां । प्यातरा प्यातरा हाला ववं हे अपिं थःगु भ्याःक्वय् थ्यनी । ट्याक्सीवालायात सुभाय् सहित ट्याक्सीया भाडा बी सविनं । केहेंनं प्वकावंगु प्वंगु छेंय् सविन नं साहिरां नं प्वंगु नुगः घानाः लुकुक धाय्क द्वाहां वनी । छें छ्खां भिंभां दंगु अनुभव जुइ । छेंय् दुने मात्र उपिं निम्हेसिया हे जक याकः संसार थें ताइ । ‘हेतेरि’ या निरासा सः थ्वइ । तर मां हेरादेवी ! म्थ्याय्यात हवाइजहाजय् तया ब्यकाः वयागु खँ सुयात कने सुयात कने धया थें, जःलाखःला सुं नापलाइगु आशां छयं चाचाःहिइकाः लिफःन्त्यफः स्वस्वं लुखा पिने हे चवनाः नुगलय् स्वां ह्वय्काच्वनी ।

जातभातय् ल्याःचाः तयेगु थौंया कानुनं मब्यू । अयनं तःधं जातयापिं मनूतय्सं, खासयाना, जातियताया गुमान च्वतुकक हुयाछवय् मफुनि । आः थन हेरादेवीया छेंयागु विषयया खँ हे ल्हाय्गु खःसा - साहिरापिनिगु जात हेरादेवीपिनिगु जात स्वयाः नं च्वय्यागु जातयाम्ह खः । शिक्षाय् नं सविन स्वयाः उप्चः शिक्षितम्ह । सुब्बा सरह जागिर नयाच्वंम्ह संभ्रान्त मिसा । सविनया जीवन पासाया रूपय् छें कत्ताय्त वःम्ह साहिरा । बौ म्थ्याय्-निम्ह माचा जक दुपिं उपिं न्हापा । सविनपिनिगु छेंय् हे बालं चवना वनेधुंकूपिं उपिं । उमिगु छेंय् बालं चवनाच्वंतल्ले हेरादेवीयागु मिखाय् साहिरा साप भलादमी । ज्ञानी । हिसिं लाःम्ह मिसा खः । सविनया तिरिमय्जुया रूपय् छेंय् द्वाहां वःसां निसें साहिराया म्हसीकाय् अनेक नीचनीचगु अपशब्द न्हिप्यं घाकाहल । साहिरा छम्ह नकचरी, लज्या मचाःम्ह छोत्ताम्ह मिसा जुल । मेपिं

मिजं छम्ह मिखां मखंम्ह । आखः सया नं मूर्ख मनू । 'साहिरा' धयागु नां तक्क नं कुंखिनाया नां जुल । 'स्वयं हे नं छु ख्वाः वय्क छुनातःगु मुस्मां नां जुइ व । 'साहिराचा' हँ । छि ... ! जिमि म्हाय्या नां जुलं 'लक्ष्मीलक्ष्मी' । गुलि बांलाःगु नां । ज्ञानलक्ष्मी ! ध्यानलक्ष्मी ! बुद्धलक्ष्मी ! छु छु जक लक्ष्मीत दु । तर जिमि म्हाय्या नां ला 'लक्ष्मीलक्ष्मी' । सुयां खुनु दु ला अज्याःगु नां । गुलि बांलाःगु नेवाः नां । आहा ... !

सविनयात जीवनपासा नालाः भौमचाया रूपय् मूलुखां द्वाहां वःसां निसें उमि निम्हं निम्हेसिया लिधंसा जुल । छेंया दथुअंगः धस्वाकेगु उमिगु मू कुतः जुल । निनाः बल्लाकेगु कुतलय् - सविनया ज्या थःगु छेंय् किराना पसः । न्हिच्छि अफिस वनीम्ह साहिरां छेंय् च्वनेबलय् नं छेंय् सुंक् च्वनाः नय्म्वःक, थः अलग्ग कुर्ता सुइगु टेलर पसः छगू चाय्कल । निम्हत्यपूया नं यःम्ह केहेंमय्जु भाःपातःम्ह लक्ष्मीलक्ष्मीयात वं व्वनेधातले आखः व्वंका तय्गु । अफ ला, वं जक इच्छा याःसा वं धाःथाय् ट्रेनिङ्ग छवया तय्गु उमिगु बिचाः । थौकन्हय् आर्थिक श्रोतया व्यवसायिक ट्रेनिङ्ग धयागु कम्प्युटर ट्रेनिङ्ग, ब्यूटिपार्लर ट्रेनिङ्ग, नर्सिङ्ग ट्रेनिङ्ग, ट्याण्डिकाफ्टय् कतांमरि दय्केगु, व्याग सुइगु, धकि बास्केट आदि थाय्गु, चायागु सामान दय्केगु आदि अनेक अनेक ज्या दु । मन दय्माः । कुतः याय् फय्केमाः । ... तर हेरादेवी ! भौयागु मुस्माली वःगु नां 'साहिरा' धयागु नां छतायात न्ह्यलुइकाः भौया ल्हातं जा नय्माःसा द्वांलाना सिनावने' धया थज्याःगु प्रण कयाः उखुन्हु निसें वया धर्म 'स्वयंपाक हापु' नय्त अलग्ग भुतू जुल । काय्या दर्जा 'कलाः पशु' जुल । अरबय् वंम्ह म्हाय्यामय्जु लक्ष्मीलक्ष्मी धाःसा लय्लय् पतिकं कुरि कुरि ध्यवा छवयाहइम्ह लक्ष्मी हे जुल । म्हाय्या बैश लखय् दाया थ्याच्च तिनि धकाः वं बिचाः याय् हे मफुत । म्हाय्या प्रतिया अहमताय् व महाअहंमि जुल ।

प्यम्ह माचाया जीवन नांचा । पुखुली न्ह्यात वा खुसिइ न्ह्यात अथवा महासमुन्द्रय् हे न्ह्यात खः । न्ह्याःवनाच्चन थःथःगु हे तालं । म्हुतु तेंतेंम्ह माजुं म्हुतुइ धौ फिकातःपिं, सविन व साहिरा, निम्हत्यपू धाःसा माजुया न्ह्यःने जीवित किपा ।

× × ×

स्वदं लिपा । लक्ष्मीलक्ष्मी नेपाः ल्याहां वइगु जुल । न्यादंया लागि विदेशय् वंम्ह लक्ष्मी, स्वदं हे ल्याहां वय्त्यंम्ह जुल । थन थःगु छेंय् धाःसा मां नापया बिलिखिं । पारिवारिक स्वापुतिइ वथं गयाच्चंगु स्थिति । केहेंयात कनेमाली धकाः धौबजि वाल सविनया । मांयात नं छु धाये छु धाय् जुल ।

धाधां हाहां हे केहेंमयजु छेक्वय् थ्यंक वल । एअरपोर्टय् लँस्वयाः काःवने न्ह्यः हे छेया भयाःक्वय् थ्यंम्ह केहेंमयजुया गाडी खनाः स्वम्ह माचाया नं छु याये छु याय् जुल । हथासं क्वाहां वनाः काचाकाचां केहेंयात लसकुस याःवन । आहा ! गज्याःम्ह हाइहाइम्ह केहेंमयजु गाडीं प्याहां वइगु जुइ । सविनया नुगः स्वकु थाहां वल, केहेंचा सकुशल ल्याहां वःगुलिं । धात्थें हे गाडीया खापा चाय्केवं केहेंमयजु गाडीं प्याहां वल । प्याहां वयाकथं नं ल्हाः निपां व्वय्काः भाराक्क धाय्क दाइयात कस्सिक घय्पुया कथनं हिहिललं खल । लक्ष्मीलक्ष्मीया पहः खनाः सविन जिल्ल जुल । छु गथे जुल धाय् हे मफुत । दुःखं ख्वःगु खः वा मिलनया लसतां लसता ख्ववि हाःगु खः सविनं सीके हे मफुत । पलख निम्हेसिया आलिंगन धुंकाः, लसतां मिखाय् ख्वविं लःलाःधाःम्ह सविनं, 'हय् लाति ! छेय् थ्यनेधुंकाः नं अथे नुगः मछिंकेमाः ला व, जिमिसं छंत एअरपोर्टय् काःवय् मफुत । का, उकिया लागि जिं माफि फ्वने । ... का स्व थन ! छंगु न्ह्यःने जिपिं सकलें दु । मां नं स्वःसा ! थन छंथाय् न्ह्यःने हे दु । छं तताजु खं ला !! छंत लसकुस याय्त नसला बीगुया लागि करुवा ज्वना छंथाय् न्ह्यःने दनाच्वंगु दु । वि । धस्वा । अथे नुगः मछिंकेत्यः ला ? थःगु छेय् धयागु फुइकेसाथं द्वाहां वनेगु का ! ... का नु तलय् ... ' धाधां केहेंयात आलिंगनं प्यनेत स्वल । का ! केहेंचिया ख्वाः चूलाय्वं ला सविन थारान्हुल । म्हसीके मफुकथं गंसीगु वइगु कवंखाः खनाः सविन अवाक्क जुल । स्वस्वं स्वस्वं सविनं लक्ष्मीलक्ष्मीया जीवन यात्रा ! लखय् चिकं लेहेंलेहें पुइकावःगुया आंकलन थुल । क्वाःलखं लुनाः म्ह मू हाल । ल्यूनेसं दनाच्वंम्ह साहिरां मे वान्यात । लक्ष्मीलक्ष्मी छे न्ह्यःनेया भज्यं ख्वाःगु भवाता जुयाच्वन ।

स्वदं तक्क होटेलय् भारा चिप सिलाः मुस्मांतय्गु चिपं प्वाः थनाः म्वानाच्वंम्ह लक्ष्मीलक्ष्मी । व स्वयं नं सुया चिप सुया चिप ... । गुबलें सुयात मजुइमाःगु नां काये मात्रं ग्यानापुस्से च्वंगु एइस (बम्मक) नांया भयानकगु ल्वय् व्यकुं च्यानाः अरब देशं ल्याहां वयाच्वंम्ह नःलि मिसामचा । महान् मांया महान्म्ह म्थ्याय् लक्ष्मीलक्ष्मी !

म्थ्याय्या स्थिति खना हेरादेवी न ख्वय्फत न लक्ष्मीयात थःगु आलिंगनय् घय्सुया हे काय्फत । वेदनां पम्हुइत्यंगु विरहाग्नि नुगलं, बल्लं बल्लं ख्वलु पिचाय्काः ख्वय्त स्वलं ख्ववि हे नं हाया मवःगु भाजंमिखाः त्वालां कनाः, सः पिज्वय्के हे मफया छाती ल्हाः तयाः भवाता जुयाः दनाच्वंम्ह हेरादेवी दनाच्वनं ! ... ।

नोट : टक१ = भाग्य, भाजंमिखाः = ख्ववि महाइगु मिखा, असत्य वेदना, लखय् दयां थ्याच्च = बुद्धि छिपय् मजुनिपिं ।

चित्लांग, तिस्तुंग, पालुंगया छत्वा खँ



कृष्णा श्रेष्ठ

चित्लांग, तिस्तुंग, पालुंग मकवानपुर जिल्लाया थाहा नगरपालिकादुने ला:गु थाय् खः । मकवानपुर उत्तर पाखे ६६ कि.मी. तहाक:गु महाभारत श्रृङ्खला व दक्षिणय् ९२ कि.मि. तहाक:गु चुरे पर्वत (सिवालिक पहाड) ला:गु जिल्ला व नेपा: देय् दुहाँवय्गु लँपुया रुपय् परिचित थाय् नं खः । थ्व जिल्लाया नां सेनवंशीय जुजु मुकुन्दसेनया नां अपभ्रंस जुया: माकन्दपुर अनं लिपा मकवानपुर जूगु धैगु जनश्रुति दु । चित्लांगया पुर्वय् फाखेल, पश्चिमय् तिस्तुंग, उत्तरय् तोप्लांग व थानकोट, दक्षिणय् मार्खु ला: ।

चन्द्रागिरी डाँडाया ल्यूने एक डेढ घण्टा कुहाँवल धाय्वं चित्लांग थ्यनी । फर्पिग जुया: वनेबलय् भचा चा:हिलेमा: । त्रिभुवन राजमार्ग दय्के न्ह्य: उपत्यकां तराई वनेगु दकले चीहाक:गु लँ नं खः चित्लांग । काठमाडौं - भीमफेदीया दथुइ अशोकं दय्कात:गु चैत्य दुगु जुया: 'चैत्य लँ' लिपा 'चैत्यलांग' अले चित्लांग जूगु धैगु जनश्रुति दु । प्राचीनकालय् चि हैगु लँ जुया: चिलं धाधां चित्लांग जूगु खः धैगु नं धैगु जनश्रुति दु । थन अप्व:याना: गोपाली, बलामी, सायमी, श्रेष्ठ, तामांग, देउला, महर्जन आदियागु वस्ती दुगु खनेदु । धार्मिक, सांस्कृतिक सम्पदात नं यक्व हे दु । व खः - चित्लांग चैत्य, तलेजु, भीमसेन, सातधारा, स्वच्छन्द भैरव, अष्टभैरव, नारायणहिटी, सरस्वती, गुर्जुधारा आदि । गोपालीतय्गु वस्तीच्वंगु छगू अभिलेखय् गोपालीत गबलेनिसें व:गु धैगु बारे च्वयात:गु दु ।

थन मू जात्रा पर्वत नं दु । गथेकि कार्तिक नाच, वाथ:प्याखं, मड्सिर पुन्ही, (योमरी पुन्ही), बुद्ध जयन्ती खः । स्वच्छन्द भैरव दुगु थासय् थ्व थाय्या मसान नं दुगुलिं थ्व भैरवयात मसानभैरव नं धाइ ।

प्राचीनकालनिसैं ब्यवस्थित वस्तीया विकाश जूगु थाय् गुकिया प्रमाणकथं तिस्तुंगया अंशुवर्माया शिलापत्र(अभिलेख)यात कयातःगु दु । थुकी स्वस्ति नैपालेभ्यः (नेपाःमिपिनिगु कल्याण जुइमा) धकाः उल्लेख यानातःगु दु । अथे हे वज्रवाराही उच्चमावि थहचोक तिस्तुंगय् च्वंगु वसन्तदेवया सं ४३४ या अभिलेखय् परमदैव धकाः च्यातःगु दु ।

थन गोत फार्म (goat farm) व गोत चीज (goat cheese) या उद्योग संचालन जुयाच्चंगुलिं चीजया नितिं थ्व थाय् प्रख्यात जू ।

कवि लक्ष्मीप्रसाद देवकोटा चित्लांगया लँय् स्वम्ह प्यम्ह भरियातय् भारी ज्वंकाः भारतीय भक्त छम्ह पशुपती चाःह्यूवःगु खनाः थःगु मनं प्रस्फुटित जूगु कविता यात्री कविता खः धैगु न्यनेदु । चित्लांग पर्यटकीय दृष्टिकोणं स्वयंबलय् नं यक्व हे न्ह्याइपुगु थाय खः । थ्व लँपु सतीगु जुयाः दकले न्हापां लरी कुबिकाहःगुलिं मधेशय् चर्चिपिन्सं लौरी नेपाल धाय्गु याः धैगु जनश्रुति नं दु ।

तिष्टुंगया वज्रवाराहीथाय् स्वदँय् छकः स्वन्हु द्यःखः जात्रा जुइ । गुकिं न्यागू खत वाराही, भैरव, इन्द्रायणी, गणेश, कुमारीद्यः दइ । द्यः जुइपिं विभिन्न समुहयापिं गथेकि वाराही देउला समुदाय, भैरव धामी, ज्यापू समूह, गणेश, कुमारी, इन्द्रायणी श्रेष्ठ समूहयापिं जुइगु खः ।

थ्व जात्राय् मेमेथाय् थें द्यःया मूर्ति खतय् मतसैं मनू हे द्यः जुयाः खतय् च्वनाः जात्रा याइगु चलन दु । थन धामीयाके मन्यसैं छुं हे ज्याखँ याय्मज्यू । न्ह्यागु याय्माःसां धामीयाके न्यनाः धामीं धाःकथं याय्माः । थनया वज्रवाराही द्यःया थासं छुं हे हय्मज्यू थें अनया वज्रवाराही मांया थासं छुं नं घाय्, सिमा कचात काय्गु (हय्गु) याय्मज्यू । हलकि वस्तुत नाश जुइगु, छुं नं बिघ्न जुइ धैगु लोकविश्वास दु । थन बलि पुजा याइबलय् छयं लित यंकेमज्यू । थथे छयंया रास गुलि दु उलि हे जाभुलाऊ धकाः जाया पहाड दय्काः द्यःथाय् न्ह्यःने तय्गु चलन दु ।

थनया दरवार लागाय् तलेजु भवानीया मन्दिर नं दु, नापं दुईमाजु द्यःया देगः नं दु । दुई अजिमायात दुईया रुपय् सुनानं माने मयानाः द्यः जुयाः थाहाँ वय्मफुगुलिं मोहनीबलय् कुमारी मांया रुपय् बलि पुजा याइगु चलन दु

धैगु कथन (जनश्रुति) नं दु ।

पालुंगयात तःतःपागु ल्वहं दुगु थाय् जुयाः पाःल्वं धाधां पालुंग जूवंगु खः धैगु अनुमान दु । पालुंगयात ७०० पालुंग धाइ, थुकीयात ७०० घर पालुंगया ७०० म्ह पालुंगे धाःगु खः धकाः अनुमान याय्माःगु खनेदु नं धाइ । थनया दरवारयात कोतथुम्की दरवार धाइ धैगु न्यनेदु । थन शंखमुल, अष्टभैरव, अष्टकुण्ड, पाण्डुकेश्वर महादेव आदि धार्मिक स्थलत दुगु थाय खः । थन २००, ३०० दँ पुलांगु छँत दु । अथे हे ताहाफल्वा अष्टभैरबया नापं नं फल्वाया बारे उल्लेख यानातःगु अभिलेखत नं खनेदु ।

थ्व थाय बहु भाषिक, बहुजातीय उकिनं तामांग जातीय बाहुल्यता दुगु थाय खः । थन तामांग भाय् ल्हाइपिं अप्वः । थन च्वीपिं ब्राह्मण, क्षेत्री, नेवाः, मगर, चेपांग फुकसिगु लजगा बुज्या हे खः ।

थथे नेपाःया धार्मिक, ऐतिहासिक, न्ह्याइपूगु थीथी थाय्यात संरक्षण याय्फःसा पर्यटकीय विकाशया लँपु चाली ।



नेवाः अर्गनाइजेसन अफ अमेरिकाया
नेपाः देय् प्रतिनिधि व लुमन्ति दबूया नायः
भाजु किरण केन रजितया अध्यक्षताय् पिदनेयगु
“लुमन्ति दबू ल्या ७”
सुथालाक्क पिदनेमा धकाः
भिन्तुना देछानाचवना ।

Bhuban Pikha
Bina Pikha
Bibhuti Pikha
Bibhusha Pikha

Germantown, Maryland,
USA

नेवाः अर्गनाइजेसन अफ अमेरिकाया
नेपाः देय् प्रतिनिधि व लुमन्ति दबूया नायः
भाजु किरण केन रजितया अध्यक्षताय् पिदनेयगु
“लुमन्ति दबू ल्या ७”
सुथालाक्क पिदनेमा धकाः
भिन्तुना देछानाचवना ।

Dwarika Shrestha
&
Nirmala Shrestha

Greenbelt, Maryland
USA

अय् मन् !



सुनिता राजभण्डारी, जुनु

अय् मन् ! छ मन् जुयाः छक्वः स्वयाबिउ थन
लुयावइ अखण्ड मानवताया धर्म नं थन
अय् मन् ! छ छः जुयाः छक्वः स्वयाबिउ थन
लुयावइ असङ्ख्य जीवनया दर्शन नं थन ॥

अय् मन् ! द्वेष क्लेश हाकुतिनाः छक्वः स्वयाबिउ थन
ह्वयावइ माया व विश्वासया अनगिन्ति सुमन थन
अय् मन् ! दुःमिखा चाय्काः छक्वः स्वयाबिउ थन
लुयावइ गुलि नं दु स्वर्ग धाःगु अनन्त भुवन थन ॥

अय् मन् ! नित्यथें जाःगु थ्व अनित्य संसारय्
जिगु जिगु धैगु छु यंकेगु दु धकाः थन
अय् मन् ! ख्ववि व न्हिलाया निन्हु मखा जीन्दगी
मात्र लुमन्ति छगू हे त्वःताः थकेगु मखा थन ॥



नेवाः अर्गनाइजेसन अफ अमेरिकाया नेपाः देय् प्रतिनिधि व लुमन्ति दबूया नायः
भाजु किरण केन रंजितया अध्यक्षताय् पिदनेत्यंगु “लुमन्ति दबू ल्या ७”
सुथालाक्क पिदनेमा धकाः भित्तुना देछानाच्चना ।

जीवन कुमार शाक्य
नेवाः जागरण मञ्च, जापान

काव्य हेतु



कविना नेपाली (नकर्मि)

न्त्यखँ

काव्य च्वइपिंत कवि वा साहित्यकार धाइ । कविं थःगु नुगलय् दूगु खँयात शिलशिलाबद्ध ढंगं च्वइगुयात हे काव्य धाइ । मानवसमाजय् प्राचीन इलय् काव्यया तःधंगु थाय् दु । उगु इलय् कवि वा साहित्यकार धैम्ह तसकं विद्वान् सःस्यूम्ह जूगुलिं उमिसं मखुगु, मभिंगु मज्यूगु गबले च्वइमखु, न्वंवाइमखु धैगु धारणा दु । अथेजुगुलिं लोकं माने यानातःम्ह कविं छु धाल व तसकं भिंगु जुइ अले वं छु च्वल व फुक्कं काव्य जुइ । तर लिपा १४औं शदीया विश्वनाथया साहित्य दर्पण सफूया प्रकाशन लिपा बुलुहुं काव्यया परिभाषा पाना वन । न्हापा कविं गद्य, पद्य वा चम्पु न्त्यागु हे शैलीं च्वःसां काव्य जुइ । तर आःवया थुकिया परिभाषा संकुचन जुजुं काव्य धाय्बलय् पद्ययात जक नालेगु यानाच्वन । ईकथं न्त्यागुया नं परिवर्तन जुइ, आःवया गद्य, पद्य व चम्पु फुक्कयात साहित्य धाय्गु यात, काव्य मधाल । थुकथं साहित्यया अर्थ विस्तार जुजुं वनसा काव्यया अर्थ संकुचित जुल । सकसित हित याइगु हे साहित्य खः । सकसित भिं याइम्ह कविं च्वइगु काव्य खः । थुकथं साहित्य व काव्य निगुलिं हे समाजयात हित वा भिं याइ ।

काव्य हेतु

मनूतय्गु सभ्यता नापनापं काव्य (साहित्य)या नं विकास जुजुं वःगु खनेदु । साहित्य धइगु सुं नं सामान्य मनूतय्सं सृजना याय्फइमखु । काव्य धैगु हे शक्ति दुपिं मनूतय्सं जक काव्य सृजना याय्फइ । सकल मनूतय्के काव्य सृजना याय्गु शक्ति दइमखु । द्यःया वरदानं, पूर्वजन्मया फलं, गुरुया शिक्षां, अभ्यास वा विभिन्न तन्त्रमन्त्रं शक्ति आर्जन जुइ । थुकथं साहित्य सृजना याय्त दृश्य वा अदृश्य थीथी कारणत दयाच्वनी । थ्वहे थीथी कारणं यानाः छम्ह साहित्यकार उत्कृष्ट साहित्य सृजना याइ । थथे उत्कृष्ट साहित्य सृजना याइगु मुख्य कारण हे काव्य हेतु खः ।

काव्य चयगु धैगु हे प्रतिभा तथा शक्ति मदयकं चय फइमखु । कवियाके छगू थज्याःगु शक्ति दइ गुकिं यानाः कविं थःगु नुगलय् दूगु खँ चयफइ । अले काव्यया सृजना जुइ । कवियाके काव्य निर्माण यायगु शक्ति उत्पन्न यायगु साधनया नां हे काव्य हेतु खः । खुगूगु शदीयाम्ह संस्कृत काव्यशास्त्री भामहनिसें थौंतक नं काव्य हेतुबारे अध्ययन अनुसन्धानया ज्या मदिकक न्ह्यानाच्वंगु दु । विभिन्न विद्वान्तयगु विचाःकथं साहित्यकारं प्रतिभा, व्युत्पत्ति व अभ्यास स्वता कारणं काव्य सृजना याइ ।

१) प्रतिभा : कवियाके सुलाच्वंगु प्रतिभां हे काव्य सृजना याइ । थ्व धापुयात आपा विद्वान्तयसं समर्थन याःगु दु । प्रतिभा दुपिं प्रतिभावान व्यक्तियात छुं नं स्यनेम्वाः, व अथें हे सइ । दसुकथं छम्ह मचा बुइवं ख्वइ । ख्वयगु मचाया प्रतिभा खः । व मचायात ख्वयगु सुनां स्यनीमखु । अथेनं व मचा ख्वइ । अथे हे सुं नं मनू साहित्यकार जुइत वयाके दुने प्रतिभा दय्माः, अले जक व व्यक्तिं साहित्य सृजना यायफइ । संस्कृत काव्यशास्त्री भामहं नं थःगु काव्यालंकार सफुती प्रतिभायात काव्यया कारण मानेयाःगु दु ।

गुरुपदेशादध्येतु शास्त्रं जडाधियोप्यलम् ।

काव्यं तु जायते जातु कस्यचित् प्रतिभावतः ॥

गुरुर्या उपदेशं ला न्हयाथेयाम्हं नं शास्त्रया अध्ययन यायफइ तर काव्यया कर्ताला प्रतिभावान मनू हे जक जुइफइ धकाः भामहं धाःगु दु ।

प्रतिभाया नं स्वता श्रोत दु ।

क) सहजा : पुर्व जन्मय् छम्ह मनूयाके छु गुण दु, थ्व जन्मय् नं वहे गुण दुसा उकियात सहजा (शक्ति) धाइ । पुर्वजन्मया संस्कारं उत्पन्न जुइगु प्रतिभायात सहजा (शक्ति) धाइ । सुनं व्यक्ति साहित्यकार जुइत व व्यक्ति पुर्व जन्मय् नं कवियागु गुण दुम्ह जुइमाः धकाः धाइ ।

ख) आहार्य : वर्तमान जन्मया संस्कारं उत्पन्न जूगु प्रतिभा आहार्य खः । छम्ह उत्कृष्ट साहित्यकार जुइत वयागु वंशाणुगत प्रतिभा दय्माः । साहित्यकार जक मखु मेमेगु ख्यलय् नं वंशाणुगत प्रतिभा दय्माः गथेकि - डाक्टरया मचा डाक्टर हे जुइगु, इन्जिनियरया मचा इन्जिनियर हे जुइगु । उकिं थुगु सिद्धान्त छुं भतिचा विज्ञान सम्मत खनेदु ।

ग) औपदेशकी : तन्त्रमन्त्रादि साधनं उत्पन्न जुइगु औपदेशिकी प्रतिभा खः । छम्ह साहित्यकार जुइत तन्त्रमन्त्रपाखें प्राप्त जुइगु अलौकिक शक्ति नं दय् हे माः धकाः धाइ । गथेकि छुं नं साहित्य चय न्ह्यः न्हापालाक मंगलाचरण च्वइ । मंगलाचरणपाखें च्वज्या सिद्ध यायगु अलौकिक शक्ति

प्राप्त जुइ धैगु विश्वास दु ।

काव्य शास्त्री राजशेखरया धापूकथं प्रतिभा निगू प्रकारया दु ।

क) कारयित्री प्रतिभा

ख) भावयित्री प्रतिभा

काव्य सृजना याकीगु प्रतिभायात कारयित्री प्रतिभा धाइ । कारयित्री प्रतिभा दुपिं कवि जुइ । समालोचक याइगु प्रतिभायात भावयित्री प्रतिभा धाइ ।

२) व्युत्पत्ति

साहित्यकारया गहन अध्ययन अनुसन्धानया कारणं जक उत्कृष्ट काव्य सृजना जुइ धैगु व्युत्पत्तिवादितय्गु धापु दु । व्युत्पत्ति धैगु बिउ(पुसा) पाखें उत्पत्ति जुगुयात धाइ । छुं नं वस्तु उत्पादन याय्त बिउ मा: । व वस्तु अथें उत्पत्ति जुइमखु । छम्ह बांला:म्ह साहित्यकार जुइत वं अध्ययन, मेहेनत याय्मा: । बिना मेहेनत छुं नं सृजना जुइमखु व उकिया औचित्य नं दइमखु । उकिं काव्य सृजना याय्त अध्ययन याय्मा: । व्युत्पत्तिवादितय्सं छम्ह उत्कृष्ट साहित्यकार जुइत गुरुपाखें सय्का:, सीका:, गहन अध्ययन याना: जक उत्कृष्ट साहित्य सृजना जुइ धका: धा:गु दु ।

३) अभ्यास

अभ्यास बिना सुं नं व्यक्ति बांला:म्ह व उत्कृष्ट साहित्यकार जुइमखु । साहित्यकारयाके प्रतिभा व अध्ययन जक दयां मगा:, अभ्यास मदय्कं साहित्य चव्य हे फइमखु धका: अभ्यासवादितय्सं धाइ । गथेकि महाभारतया छम्ह उत्कृष्ट पात्र एकलव्या गुरु हे मदुसां निरन्तर अभ्यासया कारणं व छम्ह तधंम्ह धनुर्धारी जुल । उकिं काव्य सृजनाया लागि प्रतिभा व व्युत्पत्ति जक दयां मगा:, गुबले तक सृजकं अभ्यास याइमखु उबले तक्क बांला:म्ह साहित्यकार जुइफइमखु ।

थुकथं छम्ह बांला:म्ह साहित्यकार जुइत प्रतिभावादितय्सं प्रतिभा हे मा: धाइ, व्युत्पत्तिवादितय्सं अध्ययन हे याय्मा: धाइसा अभ्यासवादितय्सं अभ्यासयात हे केन्द्रविन्दु ताय्की । तर समन्वयवादितय्सं धा:सा छम्ह उत्कृष्ट साहित्यकार जुइत प्रतिभा, अध्ययन व अभ्यास स्वतां दय्मा: धका: दावा याइ । थुकथं प्रतिभा, व्युत्पत्ति व अभ्यासया कारणं हे जक मनू उत्कृष्ट साहित्यकार जुइफइ ।



लुमन्ति दबूया ग्वसालय् पिदनेत्यंगु “लुमन्ति दबू ल्याः ७”
सुथालाक्क पिदनेमा धकाः भिन्तुना देछानाच्चना ।



शान्ति बहुउद्देशीय सहकारी संस्था लि.

का.म.न.पा. १४, कुलेश्वर

फोन नं. : ४२८७२००

Regd. No.: 10266/217

उत्पादक :

ईश्वर गोपाल श्रेष्ठ

प्रोप्राईटर

ईश्वर आयल इन्डस्ट्रीज

तीनथाना, नैकाप,
काठमाडौं नेपाल

आयातीत तोरीबाट उत्पादित

स्वादिष्ट भोजनको लागि
डबल फिल्टर्ड तोरीको तेल

नेवाः अर्गनाइजेसन अफ अमेरिकाया नेपाः देय् प्रतिनिधि व लुमन्ति दबूया नायः
भाजु किरण केन रंजितया अध्यक्षताय् पिदनेत्यंगु “लुमन्ति दबू ल्याः ७”
सुथालाक्क पिदनेमा धकाः भिन्तुना देछानाच्चना ।

**KASHI NATH TAMRAKAR
and Family**

10184 Wyandott Circle N, Thornton,
Colorado 80260, USA

लुमन्ति दबूया ग्वसालय् पिदनेत्यंगु “लुमन्ति दबू ल्याः ७”
सुथालाक्क पिदनेमा धकाः भिन्तुना देछानाच्चना ।

पुरुषोत्तम ग्वाछा

lk|G; kn

विद्या आर्जन ईङ्गलिस स्कूल

भेलुखेल, आदर्श बस स्टप, भक्तपुर

फोन : ६६१०७१३

आन्तरिक उपनिवेशया बूथ लाकां



बिमल ताम्राकार

सासः ल्हाक्व पतिकं

ग्वाल ज्यःगु व बूथ लाकांया

सार्की नकिंया च्वाम्हुगु च्चकां

नुगलय् च्वाक्क च्वाक्क सुइ ।

व बूथ लाकामं जिगु म्हतुप्वाल्य्

हि भःभः वयेक न्ह्याच्वन ।

जिगु भाय् तंका छ्वयेत स्वयाच्वन ।

व बूथ लाकामं जिगु क्यब, बुँ, छेँ, देगः, बहाः, बहिली

कवाज म्हित वयाच्वन

जिगु बाय् तंका छ्वयेत स्वयाच्वन ।

व बूथ लाकां न्ह्यपु न्ह्यपुइ

तिंतिन्ह्या न्हूवयाच्वन ।

ल्याय्म्हपिं देसय् छुं मदु धकाः

हलिंया गुगुं कुंलाचाय् च्यः जुयाः तनाच्वन ।

ल्यासेपिं देय्या भलसा मदु धकाः

हलिंया गुगुं कुंलाचाय् भ्वातिं जुयाः तनाच्वन ।

व बूथ लाकांया थ्वास्स थ्वास्स नँ वःगुयात

न्त्याम्हसिनं धुं, धुपाँय् थें नस्वाः धकाः स्वांफवःया म्ये चिउंसा

व म्येयात जिं भजन याना हालेमफु !

लुमन्ति दबूया ग्वसालय् पिदनेत्यंगु

“लुमन्ति दबू ल्याः ७”

सुथालाक्क पिदनेमा धकाः भिन्तुना देछानाच्वना ।

श्रेष्ठ दालमोठ उद्योग

येँया खाग्वःनाप पाःगु भौतया छुं खँग्वः



हरिशंकर मानन्धर

भाय् धइगु छगू हे जूसां अनेतने प्रभाव कथं हिलाः वा थाय् स्वया फरक जुइफु । ज्याखँ कथं न्हूगु खँग्वःत दय्फु । दुगु खँग्वःत तना वनेफु । भाय् थथे जुजुं विकास जुया वइगु खः । व हे कथं नेपालभाषाय् नं येँ व भौतरिखे लहाना वयाच्वंगु छुं छुं खँग्वः थन न्ह्यव्वय् । नेवाः भाय्या न्हापांगु आदि वा उदगम् थाय् दोलखा भाय् धाःसां विकासया आधार वा जग यमि भासंयात वियातःगु दु । अथे जुयाः थन येँया खँग्वःत नाप भौत व वया जःखःया न्हय्गू गांमध्ये धौख्यः बाहेक सकभनं ल्हाइगु भाषाय् पाःगु छुं खँग्वःत पिब्वयाच्वना ।

सतिक लाःगु देय् (शहर) व गां जुयाः नं थीथी भाय् छ्यलावयाच्वंगु दु । वता (पूर्व) रिखे दोलखाया खँग्वःत नेवाः भाय्या हे जूसां भौत व स्वनिगःया नेवाःतय्सं ध्वाथुइके थाकु । व हे दोलखा भाय् सिन्धुपाल्चोक जिल्लाया ताःथली व चौतारा जुयाः धौख्यः थ्यनिबलय् ध्वाथुइके अःपुया वःसां खँग्वःत पाः । भौतय् थ्यन धाय्वं ध्वाथुइके अःपुसां खँग्वःत पाः । पुलां पुस्तायात भचा अःपु जुइफु तर न्हू पुस्तायात थाकुइफु । अय्जुयाः थन व हे व हे तुं जूगु वा मपाःगु खँग्वः मबिसे पाःगु खँग्वः जक बीत्यना ।

खय्भासाया गोलभेडायात यमितय्सं ग्वलभ्यारा वा गोलभेरा धाइ । भोमितय्सं नं गोलभेरा हे धाइ । अथेसां धौख्यःमितसें धाइबलय् कालांकुलुं धाइ । थय्क स्वय्बलय् कालांकुलुं नेवाः खँग्वः हे धाय्गु पाय्छि जू थें च्वं ।

अथेहे कःनियात धौख्यःमितसें लाजा धाइ । लाजा धाइबलय् भौतय् व मेथाय् च्वपिं नेवाःतय्सं ला व जा निथी खँग्वः न्यने वा ताय्फु । थज्याःगु खँग्वःत मध्ये पाःगु छुं छुं खँग्वःत थन व्वय्त्यना ।

थन क्वय् अःपुकेया नितिं न्हापां म्हया व्व (अंगत), अले म्हया अवस्था, वयालि छै, छैया व्व वः जःखः, अनलि तिसा व वसःत, दकलय् लिपा तनावने धुंकूगु व थौकन्हय् मछचले धुंकूगु दापु-दासु खँग्वःत कथहं न्ह्यथना ।

(१) म्हया व्व :

थ्व पुचलय् छगः आखःग्वःया खँग्वलय् वा मेगु आखःग्वःनाप वइगु खँग्वलय् अकारयात आकार यानाः छयलेगु याः, गथे कि, सँ यात साँ । अथेतुं, आकारान्तयात अकारान्तय् हय्गु अले लीफुति तयाः नं यंकेगु याः गथे कि, म्हुतुप्वाःयात म्हुतुप्वः । खँग्वः हे पाकाः नं ल्हाय्गु याः गथे कि, गःपःयात कक्कु । भौतय् गःपः धाःगु गबलें न्यनेमदु । गनं गनं अनुस्वर वा शिरबिन्दु तयाः नं भोमि भाषाय् छयलेगु याः गथे कि, ग्वाय्यात ग्वाय् । क्वय् मेमेगु खँग्वःत यें व भौतय् जुयाच्चंगु छुं छुं छयला क्यनाच्चना ।

यँ	भौतय्	यँ	भौतय्
छयों, कपाः	कपः	न्हिपु	न्हेपु
न्हाय्पं	न्हेपं	सँ, सँगु	साँ, साँगु
न्यता	डतः	म्ह	म्हा
द्वला	दुला	कथु	काँथु
ख्वाः	ख्वः	वाकाः	वकः
थक्व	थाँक्व	च्वामुन्हाय्	चोमुन्हाय्
पतिं, पतिंचा	पातिं, पातिंचा	जँ, जनफा	जाँ, जाँर
आतापाति,	आतिकुति	जलसि	जँलासि
त्वाना	त्वःनः	हिनु	हिनः
ख्याँप्वाः	खिकुंप्वः	साहा	सहँ
गौचा	गुचागुलि	चिमिसँ	चिमिसों
बपिक्वय्	बापिक्वय्	जधु, दुवगःक्वय्	दुगाभू
नय्वा	धौवा	प्याथः ला	प्याचः ला
खायुप्वः	खाइप्वः	तेपु	तेपुचा
ल्हाः	लाहाः	जवः	जःपा
देवः, खःवः	देपा	ल्हुकुगाः	ल्हुकुगः
चसुप्वाः	चसप्वः	दा	दाँ
न्हासिकुति, फ्याफः	न्हाय्पति	बपि	बापि

भयुसँ	भुइसाँ	मिखाफुसँ	मिखाफुसाँ
म्हालापतिं	न्हालापातिं	वाकुधि	वाधि
सतवत,	सँप्वः	साँथु,	साँप्वः
आदि ...			

(२) म्हया अवस्था व उसाँय् :

उसाँय्यात उसाँ धका: उथेंउथें क्यनी सा म्ह खँग्वःयात अकारान्तं म्हा धका आकारान्तय् यंका: छयलाबुला यानावया च्वंगु दु । उसाँय् मदुम्ह धाय्मा:सा उसांमरुम्हा धका: धाय्गु याइ । अथे हे यक्व थासय् म्ह या म्हा जुयावइगु खः । क्वय् बियात: थें ब्वनेबलय् खनी :

यँ	भौतय्	यँ	भौतय्
बूम्ह	बूम्हा	दुरुत्वंम्ह	दुरुत्वंम्हा
ल्ट्वंम्ह	ल्ट्वंम्हा	गांसिम्ह	गांसिम्हा
कँलाय्म्ह	क्वेंकालिम्हा	ज्याथः	बुरा
ज्याथी	बुरी	तःधिम्ह	तःरिम्हा
चिधिम्ह	चिचाधिकम्हा	बल्लाम्ह	बल्लाम्हा
निर्धाम्ह	बःमलाम्हा	बाज्यःवंम्ह	बाज्यःवांम्हा
ल्याय्म्ह	ल्याय्म्हो	खँल्हाय्	खौल्हाय्
न तुने	नातोने, बास् काये	न्यासिवने	डयः वाने
सासःल्हाय्	साँसल्हाय् आदि ...		

(३) छँ, छँया ब्व व जःखः

भी बाय्चवनेगु थाय् छँयात भौतय् नं छँ हे धाइ । तर छँया थाय्या व वस्तुतय्गु नां धा:सा हिला: पानावनी । गथे कि, अंगःयात आंगः धाइ । छँ दनीगु अप्पायात अप्पा हे धाइसा मबूगु अप्पा वा कचिअपायात, अंगलय् अं आखःयात आकार यानाब्यु थें कचि यात काचि वा काँचि याना: काचिअपा धाइ, अथे हे पानावना: आँय्पायात भौतय् बुराबुरीतसें अउपा धाइ सा थौकन्हय् पौलअपा नं धा । अथेहे पा:गु छुं छुं खँग्वःत थथे दु ।

यँ	भौतय्	यँ	भौतय्
लं	लां	केब	किवा, केवा
अःत, अपा	अःग, अप्पा	अगः, अपाकुचा	अगःचा,
कोचाअपा	आँय्पा	पौल	अपा

अंगः	आंगः	लंब्व	लांबः भ य ा :
भयो, भयः	संभयाः	सांभयो	
तसि	तासि	पःखाः	पःखः
बँ	बाँ	मातं	मातां
बलचा	पौको, पौकोचा	अगु, भुतू	भुथु
पौ	पौलः	क्वलापौ,	क्वतापौ
कोलापु	पिलालखु	लाखःचा	लोखा
लुखा	त्वाथः, तगिं	ताकिं	सख्वा
साख्वः	च्वतय्	चुतय्	सुपौ
सुपौलः,	सुकुपौल	स्वाहाने, स्वान्ह	स्वाहां
बइगः	दंदे, बइगः	न्ह्यःने	हःने
जवय्	जपाय्	खवय्	देपाय्
थतक्वत	थाताकोता	कुने	कोने
ताःचा	तःचा	ताःफो	तःफो
तुनासिँ	त्वनसिँ	मत	मता
इताः	इतः	ओता (पूर्व)	वःकु,घो लुइपाखे
यियेता (पश्चिम)	तियता(?), घो बीपाखे	यता, येता	थार्थुदिशा, थाचोपाखे
यिता	कोथु दिशापाखे, आदि ...		

(४) तिसा व वसःत

पलांगु तिसावसःयात भचा हिलाः नां कायगु वा छयलेगु याः । न्हून्हुगु पोसाकया नां गथे कि कोट, पाइन्ट, कमिज, गन्जी आदि नांत निथासं छथि हे धाइ सा पुलांगु तिसावसःयात भाय् हिलाः वा हीकाः धाय्गु याइ, थुपिं थथे दु :

यँ	भाँतय् यँ	भाँतय्	
अजः	आजः	अंगु	आंगु
हिनाअंगु	हिडाआंगु	काता	काँता
ख्वाःहुसा	ख्वःफुसा	पर्सि, पतासि	प्रासी
प्वाकलं	प्वानं	लं, पुथुलं	नं, पुथुनं
गथि	गाछि	फुंग, फ्वंग	फुंगा, फोंगा
सुरुवाः	सुरुवः	लंच, लच्च, लंचा	लःच
मिहचा	महेचा	लाकां	लकां

मिसालं	मिसानं	सचिका	साँचिका
भोतो, भोत	प्वानं	इजार, पुतू	चिखि, पुथू
भान्तां लं, तपालं (लवेदा) तःपाःनं		सँपो	साँपो
सतुबतु	साँथुचा	हिलं, हिसा	हिलावसः
न्ह्योपाता	हँपाता	आदि ...	

(५) दापु-दासु

तना वने धुंकूगु जूसां वा आः छयलेम्वाःथें च्वंगु दापुदासु (नापतौल/ध्यवा) तयगु नां व मात्रा (थुलिउलि) धइगु परिमाण क्यनीगु नां तनाः थमवं धइगु तात्तुनाः क्वय् बियाचवना-

यँ	भाँतय्	यँ	भाँतय्
अय्तछि	अय्ताछि	बाल्ह	बाँल्हा, बाखि
पँल, पँल्ह	पँला, छखि	बगल्ह	बगला, न्यखि
लति	मिखाफुति, लाल	अँगुछि, क्वल्छि	आँगुछि, कोलाछि
छलंगु	छलांगु	म्हुगिछि	म्हुकूछि
तःहा, चिहा	तःहाक, चिच्याहाक,	चकाँछि	चक्छि, जःछि
धिब्छ	धेवाछगः, ध्याछः	न्यागः	डागः
भिगः	हिगः	न्याना	डाना
भितका, भिकर्का	हिकर्का	आदि ...	

मामां वनेबलय् यक्वं थज्याःगु खँग्वःत लुयावइ । थुकिं नेवाः भाय्या खँग्वः धुकू अप्वय्का वी । खँग्वः धुकूयात थुकिं तःमि याइ । म्वाःसां म्वाःसां मेमेगु भाय्या खँग्वः त्यासा काय् मालीमखु । सिकसिकं भीगु थाय्या नां मेमेपिसं तइब्यू थें स्व जक स्वयाः, न्यनाः भीगु भाय् तःमि जुइमखु । भीगु थाय्या थःगु हे पुलांगु नां दय्कदय्कं यँ, यल, ख्वप, व भाँतयात कथहं काठमाडौं वा कान्तिपुर, पाटन वा ललितपुर, भादगाउँ वा भक्तपुर अले बनेपा वा बण्डिकापुर नामं गौरव वा ग्यसु ताय्काच्वन धाःसा अले बुलुहुं भीसं थाय् नं त्वःतावन धाःसा नेवाःतय्गु नेपाः गन ल्यनी ?



लोकवार्ता : पाल्पा

शैक्षिक सत्र २०७१/७२

त्रिभुवन विश्वविद्यालय मानविकी तथा सामाजिक शास्त्र संकाय
नेपालभाषा स्नातकोत्तर तर्गिं न्हापांगु दै, न्यागूगु पत्र लोकवार्ताया
आंशिक पाठ्यक्रम अन्तर्गत क्षेत्रकार्य स्थलगत प्रतिवेदन न्ह्यःव्वय्त
शैक्षिक सत्र २०७१/०७२ या विद्यार्थी पुचलं नेपाया ऐतिहासिक,
सांस्कृतिक, सामाजिक व धार्मिक महत्वं जाःगु पाल्पा, तानसेनयात
ल्यल । थुगु अध्ययन ज्या ताःलाकेत नेपालभाषा केन्द्रीय विभागया
शिक्षक व विद्यार्थी पुचः वि.सं. २०७३ फागुन ३ निसं ६ गतेतक
तानसेन, पाल्पा शैक्षिक अध्ययन भ्रमण यात । भ्रमणय् ब्वतिकाःपिं-

शिक्षक पुचः

प्रा.डा. चन्द्रमान वज्राचार्य
सह प्रा. डा. ओमकारेश्वर श्रेष्ठ
उप प्रा. वज्रमुनि वज्राचार्य
उप प्रा. राजित बहादुर श्रेष्ठ
उप प्रा. निर्मला श्रेष्ठ
शि.स. शरद कसाः
आ.शि. जीवनकुमार महर्जन
आ.शि. दीपा महर्जन

विद्यार्थी पुचः

अमिर महर्जन
अर्विन्द्रमान सिं
विजय वज्राचार्य
वीणा महर्जन
दर्शनवीर शाक्य
जसना राजभण्डारी
केशरी प्रधान
राकेश महर्जन
रानीशोभा महर्जन
उमेश्वरमान प्रधान

पाल्पाया म्हसिका

नेपाः देय्या ५ नं प्रदेशया १४ गू जिल्लामध्ये पाल्पा जिल्ला छगू पहाडी जिल्ला खः । पाल्पा जिल्लाय् नं चाहिलेबहःगु पर्यटकीय नापं व्यापारिक केन्द्र तानसेन नगरपालिका बुटवलं ३९ कि.मी. अले यें नं ३१० कि.मी तापाक दु । पाल्पा जिल्लाया सदरमुकाम तानसेन आनन्ददायी मौसमया हुनिं थ्व नगरया महत्व अप्वया वनाच्चंगु दु । श्रीनगर डाँडाया मुल्य च्वंगु तानसेन नगरपालिका समुद्र सतहसिबें १,३७१ मिटर उचाइलय् दु । थुकिया भौगोलिक स्थिति विश्व मानचित्रय् २७ डिग्री ५० मिनेटनसें २७ डिग्री ५३ मिनेट उत्तर अक्षांश व ८३ डिग्री ३१ मिनेट निसें ८३ डिग्री ३५ मिनेट पूर्व देशान्तरय् लाः ।

प्राकृतिक सुन्दरता जाःगु तानसेन नगरय् नेवाः व मगर जातितय्गु बसोबास अप्वः दु । राणाकालय् तानसेनयात नेपालमण्डल धुंकाः महत्वपूर्ण राजनीतिक व प्रशासनिक अखडाया रूपय् कयातःगु दु । थाज्या व धातुकलाया नितिं प्रसिद्ध तानसेन मधेश व पहाडया दथुइ मू व्यापारिक थाय् नापं खः । मौसम सफा जूगु न्हि तानसेनं धवलागिरी, अन्नपूर्ण, मनास्लु, गौरीशंकर, व मेमेगु यक्व हिमशिखरया यइपुक लू स्वय्खनी । नेपाः देय् एकीकरण जुइ न्हयः तानसेन, पाल्पा छगू बिस्कं व शक्तिशाली राज्य कथं म्हसिका बियाच्चंगु खः । प्राकृतिक सौन्दर्य, शीप, कलापाखें तःमिगु ऐतिहासिक तानसेन नगर आधुनिकतापाखें वनेत जुरुमुरे जुयाच्चंगु दु । पुलांगु इलय् सेनवंशी राजातय्गु राजधानी तकं जुइधुंकूगु तानसेन नगर इतिहास मालेज्या व अन्वेषणयात पियाच्चंगु दु ।

न्हूगु संरचनाय् तानसेन

नेपाःया पाल्पा जिल्लाया तानसेन नागरपालिकाय् वि.सं. २०४८ सालय् ११ गू वडा दूगु अले लिपा ४ गू वडा तनाः १५ गू वडा दु अले २१.७२ वर्गकिलोमिटर क्षेत्रफल व ३१,१६१ म्ह जनसंख्या दु । न्हूगु मापदण्डकथं नगरपालिका दय्केत पहाडी जिल्लाया ३५,००० जनसंख्या माः । आः वया लिकलागु बाराडी, मदनपोखरा, तेलघा, बन्दपोखरा, बौघापोखराथोक, बौघागुम्हा, अर्गली गाभे यानाः न्हूगु तानसेन नगरपालिकाय् कालीगण्डकी खुसिनिसें तिनाउ खुसीतकया भूभाग दु । थौकन्हय् तानसेन नगरपालिकाय् १०९.८ वर्गकिलोमिटर क्षेत्रफल भूभाग दुसाः ५०,४०५ जनसंख्या दु । थ्व तानसेन नगरपालिका आः वया वडा ल्याः १४ गू जक दु ।

तानसेनया मू थाय्

अमरसिंह थापां सन् १८०७ ई.सं.य् दय्कूगु अमरनारायण देगः, सन् १९२७ य् खड्ग शमशेरं दय्कूगु व प्रताप शमशेर ज.व.रां जिर्णोद्धार याःगु तानसेन दरबार, खड्गशमशेरं दय्कूगु शीतलपाटी (गोलघर), ब्रिटीश भारतीय फौजयात बुकूगु लसताय् सन् १८१४य् उजीरसिंह थापां दय्कूगु भगवती देगः, पाल्पा जिल्लाया दक्कले पुलांगु बौद्ध विहार कथं नांजाःगु आनन्द विहार नापं महाचैत्य विहार, महाबोधी विहार, वीरेन्द्र क्यबः, पश्चिमा शैलीं दय्कूगु त्रिभुवन बहुमुखी क्याम्पसया प्रशासकीय भवन, पाल्पाली ढाका उद्योग, करुवा उद्योग, श्रीनगरडाँडा, परिलोक वन थ्व नगरया मू चाहिलेबहःगु सम्पदात खः । तानसेनं १६ किलोमिटर उत्तरय् कालीगण्डकी खुसि सिथय् खड्गशमशेरं थः यःम्ह लानी तेजकुमारी देवीया लुमन्तिइ दय्कूगु रानीघाट दरबार (रानीमहल/नेपाःया ताजमहल), ९ किलोमिटर पश्चिमय् कालभैरव व उगु देगलय् दुगु एसिया हे तधंगु लीया त्रिशुल छकः वनेमाःगु थाय् खः ।

तानसेनया नामाकरण

पाल्पा जिल्ला मूलतः मगःतय्गु थाय् खः । थ्व थाय्पा नां मगः भासं टान व सिंड स्वानाः जूगु खः । मगः भासाय् टानया अर्थ हाथा खःसा सिंड या अर्थ सिँ अले टानसिडया अर्थ हाथा दय्केगु सिँ धइगु थाय् खः । थ्वहे टानसिंड लिपा तानसेन जूवंगु (टानसिंड – तानसिन – तानसेन / ड – न, इ – ए)

खनेदु । थ्व थाय्या नां लिसे भारतया नांदम्ह शास्त्रीय संगीतज्ञ तासेनया नां नं स्वानाः धाय्गु याः । यद्यपि थ्वलिसे स्वापू छु नं खनेमदु ।

इतिहासय् तानसेन

इतिहास जानकार निर्मल श्रेष्ठया कथं विसं १८४४ य् महादत्त सेनं 'श्रीनगर सहर' दय्का बस्ती विस्तार याःगु खः । टुँडिखेलया म्हुतुनिसं नारायणद्यः जुया असनत्वाः, सितलपाटी, भगवतीत्वाः जुयाः कैलाशनगरतक दुगु थ्व पुलांगु बस्ती खः । सिल्खानटोल, टक्सार बुलुहुँ लिपा बस्ति न्यनावंगु त्वाः खः । पश्चिमया राजधानी नं थ्व हे जुल । इटालीया प्रसिद्ध विद्वान अले इतिहासकार प्रोफेसर जोशेफ टुचीया धापूकथं पाल्पा जिल्लाया अस्तित्व ईसाया न्यागू शताब्दीपाखे हे दय्धुंकूगु दु । उगु इलय् भारतवर्ष व चीन प्रदेशया तधंगु लागा मंगोलियाया आधिपत्यय् थ्व लागा न्ह्यानाच्चंगु खः । वय्कःया भनाइ कथं मंगोलियन शब्द वाल्वा पाखें पाल्पा जूवंगु खः । मंगोलियन वाल्वाया अर्थ सीप कला व कालीगढ खः ।

भारतय् मुगलतय्गु आक्रमण सह याय् मफयाः तुथारय सेन पैयागं विस्सू वयाः बुटवलया लँजुया रिसिङ (रिब्दीकोट, ८ फेक) य् च्वना थःगु स्वतन्त्र राज्य स्थापना यात । तानसेन वय् न्ह्यः सेनवंशीय जुजुपिं शिलाइथोकया न्ह्यने लाःगु पुरानकोटयात थःगु राजधानी दय्काः शासन याःगु इतिहासय् उल्लेख दु । वि.सं. १३६३ य् तुथारय् सेननिसं प्रारम्भ जुया पाल्पा राज्यया संस्थापक धाइम्ह रुद्र सेनं १५६६ य् पाल्पाय् राज्यया पलिस्था याःगु खः । गुकिया राजधानी तानसेन खः । भण्डै ४,९८ वर्षतक शासन याःपिं पाल्पाली सेन जुजुपिं मध्ये लिपांम्ह पृथ्वीपाल सेनया इलय् बहादुर शाह व भीमसेन थापाया रणनैतिक चार्तुयाई नं पाल्पा राज्य वि.सं. १८६१ य् नेपाल राज्यस दुथ्याकल । मुकुन्द सेन प्रथमया नेतृत्वय् पाल्पां काठमाडौं, धनकुटा व भोजपुरतक नं राज्य विस्तार याःगु खने दु ।

तानसेनय् नेवाः जाति

इतिहास स्वयेगु खःसा नेपाः गालं नेवाःत पिने बनेमाःगु तःताः कारण दु । नेवाःत गुथि, भ्वय् यक्वः न्याय्के माःगुलिं साहुतय्के कयातःगु त्यासा पुले मफयाः छें बुँ मियाः वंगु खः । अथेहे पृथ्वीनारायण शाहनं स्वनिगः त्याके

धुंका: या:गु अत्याचार गथे मल्ल जुजुपित ग्वाहालि या:गु आरोपय् सर्वस्व हरण, स्याय्गु, देसं पितनाछवय्गु कारणं चांचां हे नेपा: गालय् च्विं नेवा:त विस्थापित जुल । हाकनं रणबहादुर शाहया पालय् त: कैया महामारी वय्वं छखा: छैय् सुंयात नं ल्वचं कल धा:सा सकल परिवार हे देय् त्वता: वनेमा:गु । थुकिं याना: यक्व: हे मनूत यैं देय् त्व:ता: वनेमाल ।

पाल्पाय् नेवा:त सेनकालनिसें हे वंगु खनेदु । भाषा वंशावलीइ उल्लेख यानात:गु कथं नेपाल संवत् ६२२ पाखें रत्न मल्लया शासनकालय् कुकु नांया भोटे देवान आदि भोटेतय्सं यक्व दु:ख व्यूगु जुया: सेन जुजुयायाके सैनिक सहयोग कया: भोटेतय्त् स्या:गु उल्लेख दु । थ्व प्रसंगं नेपा:गा:या मल्ल जुजु व पाल्पाया सेन जुजुतय्गु बांलागु सम्बन्ध दुगु खनेदु । उगु इलय् हे नेवा:त व्यापार व्यवसाय व निर्माण ज्याया निंतिं पाल्पा वंगु ख: । थ्व खँ आ:या पाल्पा जिल्लाया भैरवस्थान गाविस व उकिया छ्छाखेरं दुगु नेवा:शैलीयागु छँ व छँया भ्या:, लुखा, थामय् कियात:गु काष्ठकलाया बांला:गु दसू नापं नेवा: संस्कृति, रीतिरिवाज, भेषभूषा, खानपानं पुष्टि याइ ।

महादत्त सेनया शासनकालय् पाल्पाया श्रीनगर शहर (आ:या तानसेन) पलिस्था याना: सेन राज्यया राजधानी आ:यागु तानसेनय् सारे या:गु खनेदु । व नगर दय्कूगु धका: उल्लेख जूगु शिलालेखय् नेवा:तय्गु नां अंकित दु । थ्व खँ नेवा:तय्गु बसोबास तानसेनय् सेनकालनिसें दुगु खनेदु । यैं नं पृथ्वीपाल सेनं सन् १२११ (वि.सं. १८६०) मा पाल्पा सामाकोट टक्सारया विष्णु महर्जन व बौभगरी महाजनयात टक्सार न्ह्याकी धका: च्वयात:गु पौ नं थ्व खँयात पुष्टि याइ कि थन टक्सार नेवा:तय्सं न्ह्याकाच्वंगु अले व थासय् नेवा:तय्गु बस्ती दु धका: । टक्सारय् हे भिद्य:या देगलय् गंखय् 'स्वस्ति श्री सम्बत् १८६४ साल मिति पौष बढि १३ रोज ७ दथु टोलको भजन गर्ने भाइले यो घण्ट श्री ५ भीमसेन प्रति समर्पण थामी सुभम् ।' धका: कीयात:गु हरफपाखें पाल्पाय् नेवा:तय्गु आगमन वि.सं. १८६४ सालय् सिबे न्ह्य:हे जुइधुंकागु खनेदु ।

अथेयाना वि.सं. १८८६ सालय् आश्विन सुदि ४ रोज ६ बख्तावर सिंह थापाया पालय् चौधरी अमालीं छँ पजनी मयाय्त्, थ:गु पक्का छँ दय्का पलिं चिनां नगर बांलाकेत तानसेनया महाजन व्यापारी नेवा:त मणीराज, मेहखान, साधुराम, मनीरत्न, तेजनारायण, चुकढीदेवी, नरसिंह (समर नरसिंह) आदिया नामय् दूगु लालमोहरं नेवा:तय्गु स्थायी बसोबास दुगु क्यनी ।

पाल्पाया नखःचखः



अमिर महर्जन

मृति

सांस्कृतिक रुपय् न्ह्यःने लाःपिं नेवाःतय् दच्छियंकं छुं नं छुं नखःचखः हनाच्चनी । पूखानिसें न्ह्यानावयाच्चंगु थज्याःगु नखःचखःया ल्युने छुं नं छुं धार्मिक जनविश्वास सुलाच्चंगु खनेदु । थः जःखःया प्राकृतिक, सामाजिक प्रभावकथं नं नखःचखः हनावयाच्चंगु दइ । न्हियान्हिथंया ज्याय् लिमलाःफमलाः छुं भतिचा मानसिक व शारीरिक आराम काय्गु निंतिं नं नखःचखः हनाच्चंगु दु । थःगु जीवनपद्धतिनापं तप्यंक ग्वाहालि याइगु प्रकृति, पशुपंक्षी, ब्यां, सर्प, आदि पूजा यानाः नं नखःचखः हनाच्चंगु दु । प्रत्येक नखःचखः नेवाःतय्गु आर्थिक, सामाजिक, भौगोलिक, मनोरञ्जन व स्वास्थ्यनाप प्रत्यक्ष स्वापू दु धइगु धारणा दु । ऋतुपतिकं सइगु सिसाबुसा नय्गुकथं नं नखःचखः हनाच्चंगु दु । थम्हं थःत तकं सम्मान याय्कथं म्हपुजा नखः हनाच्चंगु दु । थःगु जीवनय् छुं भतिचा न्ह्याइपुकेत अर्थात् मनोरञ्जन याय्त, धार्मिक विश्वासकथं मुक्ति प्राप्त याय्त, पापं मुक्त जुयाः धर्म लाकेत थीथी इलय् जात्रा, प्याखंत व्वय्गु, स्वय्गु यानाच्चंगु दु । थथे थःगु जीवनयात व्यवस्थितकथं न्ह्याकेत हनाच्चंगु नखःचखः, जात्रां नेवाःतय्त सांस्कृतिकरुपं जक न्ह्यःने लाकूगु मदु कि थुकिं नेवाःतय्गु कलाकौशल, शीप व जीवनपद्धति नं न्ह्यव्वय्त तःधंगु भूमिका म्हिताच्चंगु दु ।

१. पाल्पाया नखःचखः

सामाजिक, प्राकृतिक परिवेशकथं मनूतय् नखःचखः नं फरक फरक जुयाच्चनी । तानसेनया नेवाःत ख्वप, यैं, यल व विभिन्न थारु वनाः बसोबास यानाच्चपिं जूसां नं थनया सामाजिक, प्राकृतिक फरक परिवेश व वातावरणं

याना: थ: पूर्खा हनावयाच्चंगु नख:चख: नापनापं थ:गु हे मौलिक नख:चख: नं हनाच्चंगु दु । तानसेनय् नेवा:तय्सं हनावयाच्चंगु थीथी नख:चख: व जात्रा थुकथं दु :

१.१ गथांमुग: च:हे

नेवा:तय्गु नख:चख:मध्ये दकले न्हापां वइगु नख: गथांमुग: च:हे ख: । दिल्लीगा चतुर्दशीकुन्हु हनीगु थ्व नख:बलय् भूत, प्रेत वाय् यंकेगु धका: गथांमुग: वा घण्टाकर्ण दय्का: वाय्गु चलन दु । भूतप्रेतं थीमफय्क धका: लुं, वह:, सिज:, ली आदिया अंगू न्ह्याय्गु चलन नं दु ।

तानसेनय् गथांमुग: च:हे राणा शासनकालनिसें न्ह्यानावयाच्चंगु दु । थ्व दिंखुन्हु छैखापतिकं सुथय् भिन्ध: पूजा या:वनी । छ्वासय् स्वका तुति दय्का: न्हाय्पंकथियाम्ह गथांमुग: थनातइ । नापं लुं पना: जगा: काय्गु याइ । जगा: कयाच्चंहेसित ध्यवा मबिल धा:सा 'घण्टाकर्ण सरको नाति गयो' धका: हाय्केगु याइ । जगा: काइबलय् नांजा:म्ह कलाकार गंगा दाईनं च्याव्यगु लाखेयागु ख्वा:पा: हासाय् तिकी । लिपा बहनी जुल कि खुसिइ वाय्यंकी । व हे बहनी म्हाय् जिलाजं स:ता: समेवजि नका: नख: हनी ।

१.२ नागपंचमी

श्रावणशुक्ल पंचमीखुन्हु हनीगु थ्व नख:बलय् नागयात पूजा याना: थ:गु लुखाय् नागया तस्वीर तिकेगु याइ । तानसेनय् छगू किम्बदन्ती दु । छ्वा छैय् न्ह्याबलें नाग वया: दु:ख वीगु यानाच्चन । व छैय् च्वंहेसिनं नाग पंचमीखुन्हु थ:गु छैया लुखाय् नागया किपा तया: पूजा यानाबिल । उबलेनिसें नागं दु:ख मबिल धयागु बाखं दु । थ्व हे जनविश्वासं याना: ९५ प्रतिशत मग: व ब्राम्हण व ५ प्रतिशत नेवा:तय्सं नागया पूजा याना: नख: हनावयाच्चंगु दु ।

१.३ गुंपुन्हि व सापारु

गुंपुन्हियात छगू त:धंगु नख:कथं कयात:गु दु । थ्व न्हिखुन्हु ब्यांयात जा नकेगु चलन नं दु । ब्यांयात जा नकेगु धका: फकंयागु अचार, जा व क्वाति तया: छैया भ्यालय् लुखाय् तया: नकेगु याइ । ब्यांयात जा नकेगु धयागु ब्यांयात स्यावासी वीगु लागि ख: धाइ । छगू किम्बदन्तीकथं तानसेनय् छम्ह



पाल्याया साया: ।

घण्टाकर्ण दुगु जुयाच्चन । घण्टाकर्ण मस्त नय्गु व न्हाय्पं निपातय् गं घानाः
बस्तीइ च्वंपित हैरान यानाच्चन । छन्हु बहनी घण्टाकर्णया न्त्यःने ब्यां छम्ह
द्वारं द्वारं हालाच्चन । व हे द्वारं द्वारं हालाच्चंगुयात घण्टाकर्ण राम राम
धयाच्चंगु ताल । घण्टाकर्ण व ब्यांचां राम राम धयाच्चंगुलिं व ब्यांयात स्याय्गु
कुतः यात । लिपा व ब्यां तिं तिं न्हुयाः छगू दलदलय् वन । नापनापं घण्टाकर्ण
नं दलदलय् दुबिनाः सित । थथे छम्ह ब्यांचां घण्टाकर्णयात स्याःगुलिं हरेक
दँया गुंपुन्हिखुन्हु ब्यांयात जा नकाः नखः हनी ।

गुंपुन्हि बहनीखुन्हु भजन हालीपिसं भजन हालाः च्वनीसा सुयां छँय्
मनू मदुगु जूसा उगु छँया जःपिसं वर्षात् वा टेन्ट ल्यूने खिपतं चिनाः शहर
चाःहिलेगु याइ । अले ख्वपय् च्वंपिसं मिसाम्हसित धाःसा ताहामचा हय्गु याइ
न्हापा न्हापा । आः सापारुखुन्हु जक ताहामचा हय्गु याइ । यँ, यलं वयाः
च्वंःपिसं थथे याइमखु । सापारुखुन्हु गांया सुं मुली मन्त धाःसा पंयागु ख्वाःपाः
छगू साया दय्काः हाकुगु कम्मलं भुनाः ८-१०-१२ म्ह जानाः क्वबियाः देय्

चाःहिकेगु याइ । थ्व क्षेत्री, मगःपिंसं याइसा नेवाःतय्सं सा छम्ह वा मचायात
म्हासुगु कापतं भुंकाः नौ बुइकाः देय् चाःहिकेगु याइ । गुम्हेसिनं रामायण निर्गुण
कनाः वासा वा दक्व मुंकाः चाःहिलेगु यानाः सापारु हनी । थ्व मुख्य यानाः
शितलपाटी व दरबार न्ह्यःने चाःहिकी ।

१.४ यलपञ्चदान

तानसेनय् यलपञ्चदान यलं वयाच्चपिंसं हनेगु याइ । थ्व पञ्चदानया
निंतिं गुथि नं स्वनातःगु दु । व हे गुथिं दान काःवःपिं शाक्य, वज्राचार्यपिंत
पञ्चदान बियाः नखः हनी ।

१.५ गणेशचौथी

तानसेनय् नेवाःतय्सं माने याइगु नखःचखःमध्ये गणेशचौथी वा खुँद्यः
पूजा नं खः । थ्व नखःखुनु बहनी खिचा हालेधुंकाः सुकुन्दाय् मत च्याकाः
गणेशःया पूजा याःवनी । गणेशःया पूजा याय्त पालिजास्वां मदय्कं मगाः ।
पूजा सिधय्काः समेवजि नापं हलिमलि, तुसि, आम्सी नय्गु याइ । थ्व दिंखुन्हु
गुलि घासा तयाः नय्फत उलि हे मोहनी नखःबलय् नं नय्फइ धयागु धापू दु ।
पूजा याइबलय् तुसि, आम्सी, हलिमलि नापं पउँ जक तयाः याइ । लिपा व हे
पउँ, ध्यवा, तुसि, आम्सी पिने तयाबी । थ्व सुनां काल वयात पउँम्बः ध्यवा
तःपिनिगु दशा सरे जुइगु जनविश्वास दु । थ्व दिनय् छेंजःया थकाली चन्द्रमा
मखंक सुलाचवनीसा लिपा चन्द्रमा खनेमन्त कि जक पिहांवइ नापं आम्सी
छगः छगः नं घाय्गु चलन दुगुलिं यानाः खुँया दोष दइमखु धइगु धारणा दु ।

१.६ मोहनी

मोहनी नखः छगू राष्ट्रिय नखः खः । मोहनी नखः आश्विनशुक्ल
प्रतिपदानिसें सुरु जुइ । प्रतिपदा छुन्हु न्ह्यः जंगलय् वनाः चा कयाहइ ।
कन्हय्खुन्हु क्वः महानीबलय् छें पिने तयातःगु चा दुतयंकी । व चाय् फि भचा
नं ल्वाकछ्यानाः ब्वताय् तयाः कःनि, तछ्व साइत स्वयाः ह्वली । अले बातां
त्वपुयातइ । थथे ह्वलीगुयात नःलस्वां तय्गु धाइ । लिपा हरेक दिन व ह्वलातःगु
नःलि स्वांयात नीलः तयाः पूजा याइ । दुतियाखुन्हु बहनी चन्द्रमा स्वय्गु चलन
दु । थ्व स्वल कि भिं जुइ धाइ । थ्व तानसेनय् दक्वसिनं याइमखु । सीमित

जातिं जक याइ । थ्व चन्द्रमा स्वयंगुयात दुत्का चाँद धाइ ।

फूलपाती अर्थात् सप्तमीखुन्हु न्हापा राणातय्गु पालय् तिंख्यलय् क्वय् अमरगंज भैरव दुथाय् फूलपाती हयाः तयातइ । अले १२-१ बजे बाजं थानाः फूलपातीयात दुलिइ तयाः निशान छेंय् तय्यंकी । महाअष्टमी कूछिभ्वय्खुन्हु कर्णेलनापं फौज वयाः राजकीय सम्मान यानाः भगवती द्यःथाय् पूजा याइ । नेवाःतय्सं थःथाय् दुगु लबःयात सफा यानाः आगमय् थापना याइ । बहनी कालरात्री धकाः पूजा याइसा नेवाःतय्सं कूछिभ्वय् नइ । महानवमीखुन्हु हरेक देवदेवीयागु पूजा याःवनी । अले लिपातिनि थःगु छेंय् पूजा यानाः बहनी भ्वय् तयाः नखः हनी । न्हापा थ्व दिंखुन्हु बलि बीगु याःसा थौकन्हय् बलि बीगु मयाय् धुंकल । दशमी टिकाखुन्हु पूजा यानाः थापना यानातःगु ज्याभः क्वकयाः विसर्जन याइ । विसर्जन याइबलय् ज्याभः कयाः छेंया कजि वा छेलिइ स्वकः ह ह धकाः दिकी । लिपा पूजा यानातःगु सँला क्वकयाः पालु भचा अप्वः तयाः समेबजि नय्गु याइ । व हे न्हिखुन्हुनिसें थःसिबें थकालीपिंथाय् फलफूल ज्वनाः सिन्हः त्यूवनी । टिकाखुन्हु थापना यानातःगु नःलिस्वां, क्वखा, मोहनी सिन्हः तिकाः गच्छेकथं दक्षिणा बी । थथे यानाः एकादशीतक टिका तिनाः लिपा नःला स्वनातःगुयात बिहारय् प्वंकाः मोहनी नखः क्वचाय्की ।

१.७ स्वन्ति

स्वन्ति नखः कार्तिककृष्ण त्रयोदशीखुनुनिसें हनी । क्वःपुजा, खिचापुजा, लक्ष्मीपुजा, म्हपुजा व किजापुजा यानाः स्वन्ति नखः हनी । स्वन्ति नखः हनेत छेंय् चर्वापि मिस्तसैं लच्छि न्ह्यःनिसें तयारी यानाच्चनी । तानसेनयागु चलन वा बाध्यता धाय् अन स्वन्तिया लागि माःगु ज्वलंत बजारय् न्याय् मदुगुलिं थथे याय्माःगु खः । थ्व नखःखुनु घ्यः कुँ नं थनेगु याइ नापं चौरासी व्यञ्जनयागु घासा दय्काः लक्ष्मीपुजा याइ । लिपा म्हपुजा व किजापुजा यानाः कन्हय्खुन्हु लक्ष्मीपुजायागु प्रसाद वा लक्ष्मीपुजायागु स्वां क्वकयाः थः परिवार व म्थ्याय् जिलाजं सःताः समेबजि नयाः स्वन्ति नखः क्वचाय्की ।

१.८ योमरि पुन्हि

थ्व नखः मंसिर पुन्हिखुनु हनी । छन्हु न्ह्यः योमरि दय्कातइ । कन्हय्खुनु दय्कातःगु योमरि तयाः पुजा वनी । लिपा १६ गः योमरि, बायो मायो नापं

फुम्हेसें थीथी मूर्ति दय्काः न्हूगु वायागु भकारी तथाः स्वनी । योमरि स्वंगु प्यन्हु लिपा फुसा भिंखुगः योमरि तथाः मफुसा साधारण पुजा यानाः स्वनातःगु योमरि क्वकाइ । लिपा म्ह्याय् जिलाजं सःताः नखः हनी ।

१.५ सिथिनखः

सिथिनखःखुनु थीथी कथंया वः दय्काः नय्गु याइ । थ्व परिवारया जःपिं जक च्वनाः हनी । थ्व नखः हनेगु मू हुनि धैगु स्वन्ति सिधल कि प्यला तक तानसेन पिने वनाः व्यापार, व्यवसाय याःवनी । लिपा व्यापार यानाः लिहांवइ । व्यापार व्यवसाय यानाः प्यलातक छुं नं नखः हने मखंगुलिं थ्व नखःयात सिंतिं वःगु नखः धकाः थीथी परिकारयागु वः, चतांमरि दय्काः भव्य नयाः हनी । तानसेनय् थीथी थासं वयाच्चपिं दुगुलिं थन व हे थाय्कथं नखःचखः हनावयाच्चंगु दु । थ्व थीथी नखः नापं भगवती जात्रा, रोपाइँ जात्रा, बाघजात्रा, न्वांगी नय्गु (धौ, चिनी, हाम्वः व जाकि तथाः दय्कातःगु खाना), पाहांचःहे, बिस्काः जात्रा, लगं जात्रा आदि नं हनावयाच्चंगु दु ।

लिखँ

संस्कृति मानवीय पहिचान खः । थ्व हे मौलिक संस्कृतिं यानाः भी नेवाःयागु म्हसीका वियाच्चंगु दु । भीगु नखःचखः ईकथं दय्कातःगुलिं थुकीदुने वैज्ञानिकता नं खनेदु । उकिं नखःचखः मनोवैज्ञानिक, वैज्ञानिक, आर्थिक, सामाजिक, मनोरञ्जननाप स्वापू दु धकाः भीसं धाय्फु । मनूतय् लिमलाः फमलाः ज्या यानाच्चनी । गुकिं यानाः आराम याय्गु ई मदयाच्चनी । ईकथं नसात्वसा नयाः नखःचखः हन धाःसा शरीरयात पौष्टिक तत्व नं दइ । नापं आराम नं दइ । आराम निगू कथंया जुइमाः । शारीरिक व मानसिक आराम । मानसिक आराम ख्याः याय्गु, न्हिलेगु, लसता प्वकेगु खःसा शारीरिक आरामकथं ईकथं नसात्वसा नयाः याइ ।

तानसेनय् नेपाःयागु विभिन्न थासं नेवाःत वनाः च्वनाच्चंगु खनेदु । अथेजूगुलिं थनयागु सांस्कृतिक पहिचानय् एकरूपता खनेमदु । अथेखःसां थनयागु जात्रा पर्व हनेगुली धाःसा एकरूपता खनेदु । भगवती जात्रा, रोपाइँ जात्रा, बाघ जात्रा, अमरनारायण जात्रा थनयागु मुख्य जात्रा खः ।

तानसेनय् हनावयाच्चंगु नखःचखः नं बुलुहुँ हनावयाच्चंगु दु । थुकिया मू

हुनि धैगु अनयागु लजगा, अन थासय् वःगु ह्यूपाः नापं नखःचखःया महत्वबारे
जानकारी बीमफुगु खं यानाः खः । लजगायागु सिलसिलाय् विभिन्न थासय् वंगु
खनेदु । गुकिं यानाः नखःचखः नं ल्वःमंकाः वनाच्चंगु दु । अथेजगुलिं नखःचखःयात
परम्परार्थे मयासे ईकथं न्ह्याकायंकेगु संस्कृति दय्काबिल धाःसातिनि भी
नेवाःतय्गु नखःचखः ल्यनाच्चनीगु खनेदु ।

लिधंसा

तुलाधर, प्रेमशान्ति (ने.सं. १९२०) नेपालभाषा साहित्यया इतिहास । येँ : नेपालभाषा एकेदमि ।

बस्याल, टुलराज (ने.सं. १९२४) 'पाल्पा दर्शन' ।

श्रेष्ठ, पद्म (ने.सं. १९२५) नेवाः । येँ : स्यस्यः समाज ।

सिंह, दशरथमान (विसं २०७३) त्यो समय, त्यो परिवेश : मेरो जीवनयात्राको संस्मरण । काठमाडौं:

न्हूजः गुथि ।

खैल्हाबल्हा : बाबुरत्न शाक्य (४५ दै), टक्सार, तानसेन

कल्पना श्रेष्ठ (४८ दै), बसन्तपुर, तानसेन

शम्भु श्रेष्ठ (५० दै), बसन्तपुर, तानसेन

कृष्णप्रसाद शाक्य (८० दै), टक्सार, तानसेन

सुकुन्दा दय्केगु प्रविधि



अर्विन्द्रमान सिं

मूति

लोक धाय्वं छगू निश्चित थाय् व अनया समाज थुइकी । छुं जाति विशेषं स्थानीय तवरं लोकपरम्पराकथं सिर्जना याइगु कला लोककला खः । थुकी सङ्गीतकला, चित्रकला, नृत्यकला, काष्ठकला, धातुकला, शिल्पकला आदि विविध विधा दुथ्याः । तानसेन पाल्पाया छगू लोककला धातुया सुकुन्दा दय्केगु नं खः ।

१. लोककलादुने धातुकला

धातुकला स्वंगू कथंया दु । धाले यानाः, दायाः व धाले यानाः दायाः दय्कीगु । धातुकलाय् छः व छु नं कथंया थलबल दय्केत न्हापां सि (मैन)यागु दय्की । थःत गज्याःगु माःगु खः, अज्याःगु मैनया दय्की अले लिपा उकी चुलुसेच्वंगु चां/कुमिचां नःगु चां भुनी । हाकनं उकियात ह्याउंगु चाय् म्वः ल्वाकाछ्याना तःगुलिं भुनी । अले दुने दुगु मैन क्वाकाः ह्वः छह्वः दय्का पिने पिकाइ । मैन दक्व लिकाय् धुंकाः उगु खालि थासय् धातु नाय्का जाय्की । लिपा भुनातःगु पिनेयागु चा तछ्यानाः लिकाइ ।

दायाः दय्कीगु धातुकला गथेकी छः दय्केत न्हापा धातुया पत्रयात ल्यूनं दायाः/छ्यानाः थःत माःगु कथंया आकार बिइ । अले लिपा थथे छ्यानाः दय्कातःगु थीथी अंगयात लिसं तयाः स्वाना छः, थलबल तयार याइ । गुबलें दायाः/छ्यानाः दय्कूम्ह छःया सिंहासन धाःसा धाले यानाः नं दय्की । अथे हे धाले यानाः दय्कूम्ह छः जूसा वया सिंहासन दायाः/छ्यानाः दय्की । विशेषयानाः थुज्वःगु ज्यायात आपालं नेवाःतय्सं थःगु लजगाकथं न्ह्याकाच्वंगु दु । थौतक नं परम्परागतरुपं छः नापनापं धार्मिक रुपय् व मनूतय्गु दैनिक

रुपय् छयलीगु थलबल, कलः, पूजाभः, कोतः अन्ति, कलश, पानस, सुकुन्दा, पाला, गं, घः, करुवा, ताँफ, गिलास, देमा, बाता, कराइ, कसौडी, दाला, फोसि, तेप आदि दय्काच्चंगु दु ।

२. तानसेनय् सुकुन्दा दय्केगु प्रविधि

मनूया सभ्यतायात जीवन्त याय्गु ज्या उद्योग नं छगू खः । व्यापकरूपं उपभोगया नितिं उत्पादन याय्गु आवश्यकता बोध याय्सिबें न्ह्यः हे मनूतय्सं थःत माःगु उपभोग्य वस्तु उत्पादन याइ । घरेलु उद्योग गुलि बांलाक्क न्ह्याः वनेफत उलि हे समुदाय व समग्र देशया हे विकास जुइ । तानसेन, पाल्पाय् नेवाःतय्गु आगमन १८६४ संवत् सिबें न्ह्यःनिसे दुगु व टक्सार न्ह्याकूपिं नेवाःत जूगुलि थनया नेवाःत ताः इलनिसें धातुया ज्या यानाच्चपिं व थ्व ज्याय् तसकं सःपिं व स्यूपिं धकाः पुष्टि जूगु दु । नेवाःतय्गु धातुकला विशेष रूपं टानसेनया टक्सारय् ध्येबा दय्केगुली तक थ्यंगु दु । अबलेनिसें आःतक तानसेनया नेवाःतय्सं धातुया ज्या यानाः आःया पुस्तातक नं न्ह्याकाः हे च्वंगु दु । टक्सारय् ध्येबा, देगः, घः, थलबल दय्कीपिं थनया नेवाःतय्सं लिपाया इलय् तानसेयात करुवाया नितिं नं लोकंहवाकूगु खः । आःवया धाःसा करुवाया उलि छयलाबुला मज्गु जुयाः थनच्चपिं सकसिनं सुकुन्दा व भलर पानस दय्केगु यानाच्चंगु दु । करुवा व्वय्गु वा सुयात उपहार बीमाल धाःसा जक न्यानाय्केगु याःगुलिं थनया धातुया ज्या याइपिं नेवाःतय्सं आःवया दक्कले अप्वः सुकुन्दा दय्केगु यानाच्चंगु दु ।

२.१ सुकुन्दा दय्केत माःगु कच्चा पदार्थ

२.१.१ रांग (टिन)

रांग^१ (टिन) छगू रासायनिक तत्व खः । केँ दय्केत सिजः ४ भाग सा रांग १ भाग त्वाकछ्याइ । रांग गुलि अप्वः जुइ, केँ उलि हे कडा व तुयुसे च्वनी । रांग लिसं (निगू केँया वस्तु स्वाय्गु) तय्त छयली ।

१ टिन पेराडिक टेबलया १४ नं या लाइनय् दइ । थुनिया परमाणु ल्या ५० खः । वैज्ञानिक चिं क्ल खः । थ्व छगू संक्रमण धातु खः । रांगयात २३२ डिग्रीसेल्सियसय नाइ ।

२.१.२ सिजः

सिजः^२ थ्व छगू संक्रमण धातु खः । थ्वः ह्यांगू संतारसि रंगयागु जुइ ।
कै दय्केत सिजः व रांग ल्वाकछ्यानाः दय्की ।

२.१.३ जस्ता^३ (जिंक)

जस्ता छगू रसायनिक तत्व खः । थ्व छगू संक्रमण धातु खः । थ्व यच्चुगु
खरानी रंगयागु जुइ । म्हासुगु कै दय्केत रांग, सिजः नाप जस्ता ल्वाकछ्याइ ।

२.१.४ म्हः (सीसा)

म्हः^४ रासायनिक तत्व खः । म्हःयात नेपाली भाषां सीसा धाइ । थ्व
छगू संक्रमित धातु खः । म्हःया रंग वहः थें तुयुसे च्वंसां थुकियात फसं थीवं
थ्व खरानी रंगयागु जुइ ।

२.१.५ मैन (सी)

मैन हाया छैयात दाय्काः प्रशोधन यायधुंकाः तयार जुइ । कस्ति लिकाय्
धुंकाः ल्यंदनीगु हाछैपाखें मैन दय्कीगु खः । चः वा थलबल दय्केत न्हापां
मैनया प्रतिलिपि तयार याइ ।

२.१.६ कोइला

कोइला इन्धनकथं छ्यली । ऊर्जाया प्रमुखस्रोत कथं कोइलायात कयाःतगु
दु । छु नं कथंयागु सिं च्यानाः ल्यंदनीगु ह्यंग्वाःयात कोइला धाइ । मेगु छगू
खनिज कोइला धाइ वा रेल कोइला नं धाः गुकियात खानीं लिकाइ ।

२ अंग्रेजी भासं कपर धाइः । थ्व पेरिडिक टेबल्य् ११ नं या समुहल्य् दु । थुकिया परमाणु
ल्याः २९ खः । सिजःया वैज्ञानिक चिं ऋग खः । सिजः नाय्केत १०८४.६२ डिग्री सेल्सियस्य्
क्वाकेमाः ।

३ जस्तायात अंग्रेजी भाषां जिंक धाइ । थ्व पेरिडिक टेबल्य् १२ नं या समुह्य् दुसा थुकिया
परमाणु ल्याः ३० खः । अले जस्ताया वैज्ञानिक चिं श्ल खः । जस्ता नाय्केत ४२० डिग्री
सेल्सियस तापक्रम माः ।

४ सा अंग्रेजी भाषां लीड (Lead) धाइ । थ्व पेरिडिक टेबल्य् १४ नं या समुह्य् दइगु
खःसा थुकिया परमाणु ल्याः ८२ खः । म्हःया वैज्ञानिक चिं एद खः । म्हः नाय्केत ३२८
डिग्रीसेल्सियस तापक्रम माः ।

२.१.७ चुलुगु चा / कुमिचां नःगु चा

कुमिचां नयातःगु चा तसकं चुलुसेच्चनी । थ्व जंगलय् जक दइ । थुकियात गामय् च्वपिनिगु भाषां 'देबल माटो' वा 'धमिराले खाएको माटो' धकाः धाइ । मैनया थासायात न्हापां थ्व हे चां भुनीगु खः । बुट्टा कियातःगु मैनयागु थासाय् चिधंगु बुट्टाय् दुने दुने थ्यंक चां भुनेमाःगु जुया थ्व चां इलेगु याइ । थ्व चा तसकं हे चुलुसे व मसिनो जुइ ।

२.१.८ ह्याउँगु चा

ह्याउँगु चा ह्याउँसे, म्हासुसे च्वंगु जुइ ।पुलांगु छैय् बँ इलेत छ्यलीगु चा थ्व हे खः । थ्व चा चुलुगु चा सिबें भचा ख्वातुसे च्वनी । थ्व चा गने धुंकाः कडा जुइ । धातु धाले याय्बलय् चा तमज्याय्मा धकाः थ्व चां मैनयात भुनी ।

२.१.९ छ्याकः म्व

वा कलय् क्यलीबलय् वाय् दुगु जाकि व पिनेया ब्व अलग जुइ । व हे पिनेया ब्वयात म्व धाइ । सिंयागु थासायात चां जक भुनेबलय् तज्याइ धकाः चानापं थ्व म्व नं ल्वाकछ्याना भुनेगु याइ ।

२.२ सुकुन्दा दय्केत माःगु ज्याभः

२.२.१ मुगः

मुगः छुं नं वस्तुयात बलाघात वा छ्याय्त छ्यलीगु ज्याभः खः । थ्व ज्याभलय् म्वः व चु दइ । चुइ ज्वनाः म्वलं छ्याय्गु ज्या याइ । मुगः नँमुगः, सिँमुगः, लःमुगः, खतांमुगः, ख्वःमुगः आदि प्रकारया दइ ।

२.२.२ कतां

कतां नँया ज्याभः खः । थ्व त्याचिंक ताःहाकः जुइ । थुकिया हाकःया छखेपाखें जक च्वाउँसे वा पतचिंगु यानातःगु दइ । मेगु पाखें मुगलं छ्याना बुट्टा कीत थ्व ज्याभः छ्यली ।

२.२.३ घोंचा (घः)

थ्व छगू कथंया चाया थल खः । थ्व थलय् धातु तया नाय्की । थ्व थल

विशेषयानाः कँचां दय्की । कँचा गुलि गुलि मिं छुल उलि हे कडा जुइ । व हे जुयाः थ्व चाया थल दय्काः उकी धातु नाय्केगु ज्या याइ ।

२.२.४ काण्डेली

नँयागु चिम्तायात काण्डेली धाइ । थ्व वस्तुयात काकाः ज्वनेत दय्कातःगु ताःहाकःगु ज्याभः खः । निपू नँयात क्रसयाना छखे तःहाकः अले मेखे चीहाकः जुइ । चीहाकःथाय् नँयात चतुंका अर्धगोलाकार दय्कातःगु दइ । निगू नँ यानाः गोलाकार जुइ । चतुंगु थासय् ह्वः दय्काः रिपिट छ्यानातःगु दइ । तःहाकःथाय् निपाःल्हातं ज्वनीगु याइ । थ्व धातु नाय्काःतःगु घःयात भट्ठीं ल्हवनाहय्त छ्यली ।

२.२.५ चिम्ता

नँपातायात लथ्यानाः निगू चु छखे हे स्वकाः दय्कातःगुयात चिम्ता धाइ । ज्या कथं थुकिया हाकः व ब्या निर्धारण जुइ । सुकुन्दा दय्केबलय् कोइला ज्वनेत व चिचीधंगु घः ज्वनेत थ्व चिम्ता छ्यली । अले गाले यानातःगु घलय् मेगु धातु तने मालधाःसां नं थ्व ज्याभःया ग्वाहालि काइ ।

२.२.६ धगः

धगः छखे ज्वनेत नँया हाकः दइसा मेगु हाकलय् नँया गोलाकार गाःवंगु भाग दइ । थुकिया हाकः, गाः व गोलाइ माःकथं निर्धारण जुइ । थ्व धगः गाले यानातःगु धातुयात तुयाः थासाय् दुने प्वकेत छ्यली ।

२.२.७ वःचा

किट धातुयात छ्याकः छ्याकः यानाः दय्कातःगु ज्याभः वःचा खः । थुकिं छु नं धातु चुलेगु ज्या याइ । धाले यानाः लिकाःगु सुकुन्दायात चुलेत, बुट्टा बांलाकेत थ्व ज्याभः छ्यली ।

२.३ सुकुन्दा दय्केगु विधि

धातुकलाय् ढालेयानाः दय्केगु प्रविधिइ छुं नं वस्तु दय्केगु खः व थें च्वंगु थासा दय्केमाः । नेवाःतय्सं थासा अप्वःयानाः मैनया दय्कूगु खनेदु । सुकुन्दा दय्केत न्हापालाक्क मैनयात नाय्का छाने यानाः सफा याइ । मैनयात



सुकुन्दा दय्काच्चंगु थी थी लू ।

भचा भचा क्वाका: ग्वारा याना: दथुइ गा: वंकी । सुकुन्दाया चिकं तयगु थल दय्केमा:गु जुया: थ्व आकार वीधुंका: थुकियात छगू त्यालय् कताका: व त्या:यात चा:चा: हिइकी । थौकन्हय् थ्व मेसिनं चाहिकी । ता:हाक:गु कतां छपू क्वाका: थथे चाहलाच्चंगु थासाय् क्वा:गु कतानं विस्तारं थीका कुमा:नं चा:थल दय्कुथें थ:त मा:कथंया सुकुन्दाया म्हया आकार बी ।

आकार वीधुंकूगु थासाय् बुट्टा की । मेमेगु दिकेगु व्व:, ज्वनेगु चू, मत: च्याकेगु व्व:, सुकुन्दाया गणेद्य:, नाग आदि सियागु ल्हातं हे दय्का: बुट्टा की । थुपिं फुक्कं क्वा:गु मैनया भवलं थीका: थीका: लिसं तय्थें याना: स्वाइ । सुकुन्दा गज्या:गु बुट्टा पिकाय्गु धका: थन हे निर्धारण याय्मा: ।

बुट्टा कीधुंकूगु मैनया थासायात मेथिचां (धमिरां नयात:गु चा) रंग तयगु ब्रुसं रंग पा:थें चां इली । थ्व चा इलीगुया मू आजु धयागु चिचीधंगु बुट्टाया कापिकापि तक नं चा वनेमा व लिपा मेगु चां भुनीबलय् चिचीधंगु बुट्टा मस्यनेमा धका: ख: । थथे दुन नं पिनें नं ब्रुसं मेथिचां इलय् धुंका: मैनया थासायात फसं जक गंकी । गने धुंका: हाकनं छक: मेथिचा इली । थथे निक्व: तक मेथिचां इलेधुंका: मैनया सुकुन्दाय् च्वंगु बुट्टात सुरक्षित जुइ ।

अनं लिपा: ह्याउँचाय् छ्याक:मो भचा भचा ल्वाकछ्याना: मेथिचां निक्व:

तक इलेधुंकूगु मैनया सुकुन्दायात हाकनं छक्वः दुने नं पिनं नं सालुसेच्वंक भुनी । थुकियात छन्हु न्हिच्छि चच्छि अथे हे गंकेत त्वतातइ । गनेधुंकाः आःधाःसा ख्वातुक्क दुने नं पिनं नं न्हापा थें तुं भुनां न्हिच्छि चच्छि त्वःताःतइ ।

थथे गनेधुंकूगु थासायात अन्तिम रुप बीत गलय् (भट्टी) तयाः उइ । उइधुंकाः थुकियात काप्छेलिं ज्वनाः भट्टीं लिकाइ । थुकिया मैन दक्वः नायाः तरल जुइ । अले छकूचा प्वाः खना मैन दक्व लिकाइ । थुलि लिपा थुकियात हाकनं छक्वः गलय् अखतं प्वाः क्वय्लाकाः तइ । थथे यायबलय् ल्यंदनिगु फुकं मैन नायाः उगु प्वालं पिहाँवइ । थुलि लिपा सुकुन्दाया थासा तयार जुइ ।

धातु नाय्का क्वफाय्गु केँया धातु दय्केत न्हापां घोंचाय् (घः) १ भाग रांग (टिन), ४ निसें ६ भाग ताक सिजः तयाः नाय्की । धातु नाय्केत न्हापां छघौ ई काइसा लिपा उकी तनाः तनाः यंकेबलय् १५ मिनेट नायाः वनी । थथे यानाः दय्कूगु धातु तुयुसेच्वंगु बांलाःगु केँ (कांस) जुइ । १ भाग रांग (टिन), १ भाग जस्ता, ४ भाग सिजः तयाः नाय्केबलय् म्हासुनंगु धातु केँ तयार जुइ । रांगया भागय् म्हः नं त्वाकछ्याय्गु याइ । रांग, म्हः, जस्ता, सिजः नाय्काः तयार जुइगु धातु केँ कडा जुइ । बुट्टा कीमाःसां अपुइ । तर गुलि गुलि जस्ता व म्हः त्वाकछ्यात उलि उलि कमसलयागु केँ तयार जुइ । थःत गुगुकथंया धातु माःगु खः उकथंया घोंचाय् (घः) नाय्काः धवलं तरल धातुयात तुयाः चिग्वःगु घलय् प्वंकी । काप्छेलिं चिग्वःगु घःयात ज्वनाः थासाया प्वालं प्वंकाः तरल धातु थासाया दुने छवइ । तरल धातु दुने वनेवं हे धिक्का जुइधुंकी । अले थुकियात लखय् दुवे यानाः पिकयाः थासा तछ्याःसां ज्यू । छन्हु अथें तया कन्हय्खुनु जक चा तछ्याना लिकाइ ।

थासा तछ्यानाः लिकाय् धुंकूगु सुकुन्दायात सफा याइ । न्हापा वःचां चुयाः सफा याइसा आः धाःसा ग्राइन्डरं सफा याइ । बुट्टा स्यंसा हाकनं मुगः व कतांया भरं बुट्टा मिले याइ । माःगुकथंया माःगु थासय् हाकनं बुट्टा कीमाःसां हाकनं की । थथेयानाः सुकुन्दा तयार याइ ।

लिखँ

धातुकलाया करुवा/सुकुन्दा दय्केगुली तानसेनय् विशेष थाय् दु । अभ् तानसेनया धातुकलां पाल्पा जिल्लाया म्हसीका देय्न्यंक बीत ताःलाःगु दु । पाल्पाली ढाका, करुवाया नितिं तानसेन देय्न्यंकं लोकंहवाः । थथे देय्न्यंकं व

विदेशय् तकं लोकंह्वाःगु करुवा उद्योगया आयु धाःसा यक्व खनेमन्त । न्यू तानसेन करुवा उद्योग, पाल्पाली करुवा उद्योग व श्रीनगर पाल्पाली करुवा उद्योग यानाः तानसेनय् करुवा दय्कीपिं मुक्कं स्वखा छें जक ल्यं दनी । तर न्हूगु पुस्तां थ्व ज्यायात नाला कयाच्चंगु मदु । न्हूगु पुस्तां नालाः मकाःबलय् थ्व धातु उद्योग मेगु पुस्तातक थ्यनी मखुत । थ्व पुस्ता छगू धुंकाः पाल्पाया करुवा उद्योग नं मदइगु खनेदत । पाल्पाया न्हाय् करुवा उद्योग एकदम रुग्न अवस्थाय् लानाच्चंगु खनेदु । थ्व उद्योग संरक्षणया नितिं सरकारं छु नं क्वातुगु पलाः ल्त्वंगु खनेमदु ।

न्हूगु पुस्ता थ्व ज्याय् च्यूताः तःगु खनेमदु । याकःचां जक यानाः नं सुकुन्दा दय्के फइमखु । महिनाया २५/३० हजार पारिश्रमिक दइगु थुगु ज्या याइपिं मनूत हे खनेमदु । भचा फोहोर ज्या जुयाः मनूतय्सं थुकी मन क्वमस्वाकूगु खनेदु । छगू लटया ज्या २०/२२ दिन लगे जुइगु याः । छगू लटय् ५ गः सुकुन्दा, १ मिटरया १ जोडी झलर पानस तयार जुइ । गुकिया बजाः मू २ लाख तक वइ ।

पाल्पायात उद्योगया रूपय् म्हासिकाच्चंगु धैगु हे थज्याःगु हे धातु व कापःया उत्पादन खः । सरकारपाखें छुं नं कथंया टेवा मदयाः व ज्या याइपिं मनूत म्हो जुयाः पाल्पाली धातु व्यवसायीत बुलुहुं पलायन जुयावंगु खनेदु । उकिं नं कच्चापदार्थया समस्यां यानाः नं थ्व ज्या याइपिं म्हो जूगु खनेदु । न्हापा न्हापा जंगलपाखें कोइला काय्गु दुगुलिं ज्या याय्त तसकं अःपु । आःधाःसा विदेशं रेलकोइला हय्माःगु स्थिति दु । रेलकोइला नं इलय् थ्यनाच्चंगु खनेमदु । धातु दय्केगु नितिं कच्चापदार्थ रांग, म्हः, जस्ता व सिजः आवश्यक जू । थ्व कच्चा पदार्थया समस्या ज्यंकेत गांगामय् मनूत चाःहीका धातुया पुलां पुलांगु थलबल न्यानाहयाः उकियात गालेयानाः हाकनं न्हूगु धातुया सामानत दय्काच्चंगु खनेदु ।

न्हून्हु प्रविधि वय्धुकूगु दुसां तानसेनया नेवाःतय्सं पुलांगु हे प्रविधिं ज्या यानाच्चंगु खनेदु । गनं मेपिन्सं यानाच्चंगु न्हूगू प्रविधि खनधाःसा व हे प्रविधि उमित नं ज्या वइथें च्वं धकाः व सामान हयाः ज्या यानाच्चंगु खनेदु । अथेयानाः जक थ्व उद्योग न्ह्यानाच्चंगु खनेदु । सरकारया उद्योग मन्त्रालयपाखें न्हू प्रविधित स्यनाच्चंगु खनेमदु । थनच्चपिं नेवाःतय्सं ट्रेनिड बिलं नं छम्हेसिनं हे ट्रेनिड काःमवःगु खनेदु । मनूतय्गु थ्व ज्याय् मन क्वमसाःगुया मू कारण धैगु हे थ्व उद्योगं छुं नं सामान तयारी याय्त म्होतिं ३० न्हु ई काइ । थ्व ज्या यानाः

न्हियान्हिथं नयूत थाकुइगु व सामान तयार जुइधुंकाः नं इलय् हे मी फइ ला वा मफइ ला धकाः ग्याःचिकु दयाच्चनीगु हुनिं ध्व उद्योगय् तानसेनेया न्हूगु पुस्ता आकर्षित मजूगु अनुमान याय्छिं । सरकार व न्हूगु पुस्ताया छुं कथंया ग्वाहालि मदुसां तबि नेवाःतय्गु म्हसिका जुयाच्चंगु थुगु धातुकला उद्योग तानसेनय् आःतक नं सुस्त गतिं न्ह्यानाच्चंगु दु । थुकि सम्बन्धित थासं इलय् हे बिचाः मयात धाःसा तानसेनया धातु उद्योग छगू इतिहासय् जक ल्यानाच्चनीगु खनेदु ।

लिधंसा

अर्याल, माधव (विसं २०३७) 'नयाँ संरचनामा पात्पाली नगर' कान्तिपुर, (वि.सं. २०७० चैत्र २०)

कसाः, शरद, १९३०, जातिया म्हसिका, 'नेवाःलोकवार्ता' । यलः नेपालभाषा केन्द्रीय विभाग । तुलाधर, प्रेमशान्ति, १९२०, 'नेपालभाषा साहित्यया इतिहास' । यैः नेपालभाषा एकेदमि श्रेष्ठ, ओमकारेश्वर (नेसं १९२९) 'तानसेन नेवाः भाषिकाय् रुपायन पद्धति' । यलः नेपालमण्डल घःचाःधुकू, नेपालभाषा केन्द्रीय विभाग ।

श्रेष्ठ, ओमकारेश्वर (नेसं १९३०), लोकभाषा, 'नेवाःलोकवार्ता' । यलः नेपालभाषा केन्द्रीय विभाग ।

श्रेष्ठ, तेजप्रकाश (नेसं १९३०), लोकवार्ता, 'नेवाः लोकवार्ता' । यलः नेपालभाषा केन्द्रीय विभाग ।

श्रेष्ठ, निर्मल (नेसं १९३३) 'पाल्या नेवारहरूको आगमन' । (वि.सं. २०७० साउन २५)

सिंह, दशरथमान (वि.सं. २०७३) 'त्यो समय, त्यो परिवेश : मेरो जीवनयात्राको संस्मरण' । काठमाडौंः न्हूजः गुथि ।


सुचना विभाग (वि.सं. २०७३) 'नेपाल परिचय' । यैः सुचना विभाग, नेपाल सरकार ।

खँल्हाबल्हा

दिपेन्द्र बज्राचार्य (४५), टक्सार, तानसेन, २०७३ फागुन ४, थाय् : दिपेन्द्रया ज्यासः

मंगलप्रसाद बज्राचार्य (७०), टक्सार, तानसेन, २०७३ फागुन ५

पाल्पाय् भगवती जात्रा



विजय वज्राचार्य

मूति

पाल्पा, भगवती त्वालय् रणउज्जेश्वरी भगवतीया त्ववनापुसे च्वंगु देगः
दु । व देगलय् तयातःगु जगतमाता भगवतीया दँय् दसं भाद्रकृष्ण नवमीखुन्हु
भव्य सिंदुर जात्रा याइ । थ्व जात्राया राष्ट्रिय महत्व दु । छायाधाःसा थ्व जात्रा
नेपाल-अंग्रेज युद्धय् पाल्पा क्षेत्रया नेपाःमितय्गु विजय जुगुलिं लसताकथं
न्याय्काः वयाच्वंगु खः ।

१. भगवती जात्राया ऐतिहासिक पृष्ठभूमि

पाल्पाली प्रशासकया रुपय् कर्णेल उजीरसिंह थापाया नेतृत्वय् नेपालं
विसं १८७१ पौषनिसें १८७२ जेठ तकक जुगु अंग्रेजनापंया युद्धय् त्याकुगु खः ।
थुकिया लुमन्तिइ विसं १८७७ निसं निरन्तर दँय् दसं विजयउत्सव न्याय्केगु
यानाः वयाच्वंगु दु । पाल्पाया थुगु भगवती जात्रा अवलोकनया लागि गुल्मी,
अर्घाखाँची, पर्वत, कास्की, रुपन्देही लगायत थीथी जिल्लाया श्रद्धालु भक्तजनपिं
वय्गु याइ ।

१.१ भगवती देगया नामाकरण

उजीरसिंह थापां थःगु नांया न्हयःनेच्वंगु उजीर, थः मां रणकुमारी नांया
न्हयःनेच्वंगु रण व इश्वरी खँग्वः स्वानाः थ्व देगःया नां रणउज्जेश्वरी छुगु खः
धैगु धापु दु । अथे हे गुलिसिनं युद्धलिसे स्वाःम्ह भगवती जूगुलिं थःगु नांया
न्हयःने रण स्वानाः रणउज्जेश्वरी छुगु जुइमा धैगु नं अनुमान दु । देगः निर्माणया
आधार स्वय्गु खःसा युद्धया लुमन्ति स्वरुप रण खँग्वः स्वाःगु खँ स्पष्ट जू । देगः
न्हयःने च्वंगु मू घण्टाय् रणकुमारीया नां कियातःगुलिं उजीरसिंहं थः मांया नां

न्त्यःने तयाः भगवतीया नां छुगु तर्क नं पाय्छि हे जुइफु ।

१.२ भगवती जात्राया परम्परा

उजीर सिंह थापां नेपाल अंग्रेज युद्धय् भगवतीया शक्तिं थः त्याःसा स्वनिगःया ईन्द्रजात्रा व कुमारीजात्राथें पाल्पाय् नं भगवतीया सिंदूर जात्रा भव्य रुपं न्याय्केगु धकाः भाकल याःगु खः । थःगु भाकलकथं प्यागोडा शैलीया भव्य देगः दय्केबिल । लिसें भगवती व मेमेगु छःपिनि सुन्दर व आकर्षक धातुया मूर्ति प्रतिस्थापित यात । अले लिपा थःगु भाकलकथं सिंदूर जात्रा यानाः नगर चाःहुइकेगु परम्परा न्ह्याकल ।

१.३. रथयात्राया तयारी

दैय् दसं तःजिक न्याय्कीगु माता भगवतीया सिन्दुरे रथयात्रा परम्परागत रुपं न्याय्केत नेपाली सेनापाखें माताया प्रतिमूर्ति, देगः व देग परिसरदुने सरसफाइ याइ । स्थानीय श्रद्धालु भक्तजनपिन्सं रथ टल्के याइ, देगः समाः याय्गु, भिल्लीमिली मतः तइ । देगः परिसरदुने फूक्कथासय् तानसेन नगरपालिकां मतया व्यवस्था याइ । नेपाल प्रहरी तथा नेपाली सेनाया जवानतय्सं भगवती माताया प्रतिमूर्तिया सरसफाइ याइ, देगः व श्रद्धालु भक्तजनपिनिगु शान्ति सुरक्षाया व्यवस्था याइ । भाद्रकृष्ण अष्टमीया बहनीसिया ८:०० ताः इलय् निसें तान्त्रिक विधिकथं पुजा व पुजाया इलय् शंख, घण्टा, डमरु व पञ्चेबाजा थानाः श्रद्धालु भक्तजनपिन्सं प्यखेरिखें माताया जय जयकार याइ । भजनखलकं परम्परागत दाफा भजनकिर्तन यानाः चच्छि जाग्राम च्वनी । अले चान्हसिया ११ बजे परम्परानिसें चलेजुयावःगु बलिपुजा सिधय्धुंकाः विशेषरुपं समाः यानातःगु रथय् माताया चीधंगु प्रतिमूर्ति तयाः स्वकः तक देगः चाःहुइकी । जाग्राम पुजाया भूवलय् नेपाली सेनापाखें खुक्कः तक बढाइँ तोप न्याय्की ।

वया कन्हे भाद्रकृष्ण नवमीखुन्हु सुथनिसें तानसेन व लिक्क च्वंगु जिल्लां विशाल श्रद्धालु भक्तजनपिं पुजा याय्त, दर्शन याय्त व बलि बीत वइ । सिन्दुरे रथयात्राया लागि न्हापा न्हापा शाही नेपाली सेनाया पिपातय्सं रथ कुबिगु याइ, तर थौंकन्हय् धाःसा चिर्तुधारा गाविस घोरबन्दाया कुमाल जातिया मनूतय्सं रथ कुबी । वटुकतय्सं स्वस्ती वाचन याइ । नेपाली सेनापाखें माताया रथयात सलामी अर्पण यानाः बढाइँ तोप न्याय्की । अले भक्तजनपिन्सं माताया



पाल्पा, भगवती त्वालय् रणउज्जेश्वरी भगवतीया सुन्दर देगः ।

जयजयकार यानाः रथ ल्हवनाः श्री रणउज्जेश्वरी भजन खलया नेतृत्वय् दाफा भजन हालाः स्वकः तक देगः चाःहिकी । नेपाली सेना पाल्पा व्यारेकया कर्णेल व भगवती गुठी व्यवस्थापन समितिया नायोनं संयुक्त रुपं विधिवत कर्णेल पुजा यानाः मेय् बलि बियाः रथयात नगर परिक्रमा याइ ।

१.४ रथ नगर परिक्रमा

श्री रणउज्जेश्वरी भगवतीया सुन्दर, कलात्मक रथयात नगर परिक्रमा याइगु भुवलय् रथया न्ह्यःने ह्याउंगु, तुयु धजा चिनाताइपिं, डमरु थाय्गु समूह, लियो लियो पायो पायो धकाः ढोलक व भ्याली थाइपिं ल्याय्महत, नेपाली सेनाया टुकडी, श्री रणउज्जेश्वरी भगवती भजन खलः, विश्व हिन्दु महासंघया भजनमण्डली च्वनी । अथे हे रथया ल्यूने व्याण्ड बाजा, नेपाली सेनाया मेगु टुकडी, टोल विकास समिति, निजी व सरकारी स्कुलया विद्यार्थीत, शिक्षक, प्राध्यापक, साहु महाजन, श्रद्धालु भक्तजन व अन्तय् औपचारिक पोशाकय् निजामति राष्ट्रसेवक कर्मचारीपिं, अथे हे थी थी थासं वःपिं श्रद्धालु भक्तजनपिं च्वनी । थथे नगर परिक्रमा याइगु इलय् दकले न्हापां नेपाल सरकारपाखें

जिल्ला प्रशासन कार्यालयया प्रांगणय् प्रमुख जिल्ला अधिकारीं परम्परागत धार्मिक विधि बमोजिम बलि पुजा याइ । थथे सरकारी पुजा क्वचाय्का: मखन टोल, शितलपाटी, भगवती टोल जुया: बसन्तपुर, कैलाशनगर, तानसेनया च्वय् पाखेया त्वाल्य् चा:हुइके धुंका: हानं शितलपाटी जुया: असन, नारायण, भिमसेन टोल यंकी । लिपा नगरवासीपाखें तानसेन नगरपालिकाया नगरप्रमुख, वर्तमान अवस्थाय् कार्यकारी अधिकृतं पुजा व बलि बिइधुंका: नेपाली सेनाया जवानपिन्सं भगवती माताया रथ कुबिया सेनाया ब्यारेकदुने यंका: गणपतिपाखें पुजा व बलि बिया: मातायात सलामी अर्पण याना: ब्यारेकया पश्चिम लुखां रथ पिकाइ । थ्वधुंका: हानं कुमालजातिपिन्सं रथ कुबिया: बस स्टेशन, बडिज्ञान टोल, सिल्खान टोल, टक्सार जुया: नगरया अधिकांश वडाय् चा:हुइका हानं भगवती टोल, शितलपाटी मूलुखा जुया: अन्तय् भगवती देग:या परिसरय् प्रवेश याना: हानं रथयात स्वक:तक देग: चा:हुइका भगवती देगया प्रवेशद्वारया न्ह्य:ने नेपाली सेनां बढाई याना: औपचारिक रुपं भगवती रथयात्रा समापन याइ । बिर्सजन लिपा रथया धजा काय्फ:सा सुरक्षा, प्रगति, सुख शान्ति दइ धैगु जनविश्वास दुगुलिं श्रद्धालु भक्तजनपिन्सं धजा काय्त् तंछाडमछाड याइ । गुबलें बलें थथे तंछाड मछाड याइवल्य् ल्वापु नं जुइ । उकिं भगवती मन्दिर गुठी समितिं छुं दँ न्ह्य:निसें नेपाल प्रहरीजवानं घेराबन्दी याना: रथ व रथ कुवीपिन्त सुरक्षा प्रदान याय्गु अले श्रद्धालु भक्तजनपिन्त माता श्री रणउज्जेश्वरीया प्रसाद स्वरुप धजा प्यंगू भ्यालं इनेगु व्यवस्था या:गु दु ।

१.५ जात्राया समस्या

धार्मिक, ऐतिहासिक, सांस्कृतिक व सामाजिक महत्व दुगु थुगु रथयात्रात निरन्तर रुपं न्ह्याकेत आपालं पंग:त दु । उकिमध्ये आर्थिक अभाव नं छगू ख: धैगु जात्रालिसे सम्बन्धित निकायया धापु दु । जात्रा सञ्चालन याय्त् करीब रु. ३,००,००० निसें रु. ४,००,०००० तक खर्च जुइ । वर्तमान इलय् जिल्ला विकास समिति, तानसेन नगरपालिका, तानसेन गुठी, पाल्पा उद्योग वाणिज्य संघ, मालपोत कार्यालय, गुठीया जमीन रैकरय् परिवर्तन या:गु रकमया ब्याज, नेपाल सरकारपाखें बीगु आर्थिक सहयोग रकम व तानसेन पाल्पावासीपाखें याइगु आर्थिक सहयोग संकलनं भगवती जात्रा सञ्चालन जुयावयाच्चंगु दु । पाल्पाया भगवती माताया शोभायात्राया लागि तत्कालीन सरकारपाखें वि.स.

२०१५ सालनिसैं रु. १०००। तका जक उपलब्ध यानावयाच्वंगु खःसा २०७२ सालनिसैं रु. ५०००। तका उपलब्ध याःगु दु । थ्व बाहेक नेपाल सरकारपाखें छुं नं आर्थिक ग्वाहालि मजगु संचालक पक्षया दावी खः । आर्थिक अभावया कारणं परम्परागत चलन अनुसार जात्रा सञ्चालन याय्त व नित्य पुजा, थीथी इलय् जुइगु थीथी पर्व पूजा व देगः परिसरया मर्मत तथा सरसफाइ याय्त तसक्कं थाक्या च्वंगु दु ।

लिखँ

नेपाःदेय्या म्हसीका हे नेवाःतय्गु रहनसहन, जात्रा, नखःचखः तजिलजि खः । थुकिंयानाः हे नेपाःदेय्या नां हलिमय् बय्बय् जुयाच्वंगु दु । उकिं नेपाः धैगु हे नेवाः खः । थ्व नेवाःतय्गु रहनसहन, जात्रा, नखःचखः तजिलजि हे थःथिति नापलाय्गु, आत्मीयता अप्वकेगु छगू माध्यम नं खः । उकिं फुक्कं जानाः थ्व जात्रा, नखःचखः, तजिलजियात म्वाका तय्माः । नेवाः संस्कृति मन्तधाःसा नेवाःतय्गु अस्तित्व नं थ्व हलिमं तनावनी । थ्व खँ ल्वमंके मज्यू । नेवाःत छधी छप्पं जुयाः न्ह्याःवनेमाः । नखःचखाः, जात्रा, तजिलजियात त्वःते मज्यू । लिपा वइपिन्त नं स्यंस्यं वनेमाः । थथे जुलधाःसा नेवाःत दइ, नेवाः दत कि नेपाः नं दइ ।

लिधँसा

खँल्हाबल्हा

पुरन वज्राचार्य (५६), भगवती टोल, तानसेन ।

केदारलाल श्रेष्ठ (५३), भगवती टोल, तानसेन

पाल्पाया लोकबाखं



विणा महर्जन

मृति

लोकबाखं नं नेवा: लोकसाहित्यया छगू समृद्ध विधा खः । थथे लोकसाहित्यया प्रमुख विधाया रूपय् प्रचलित लोकबाखं कनेगु, न्यनेगु चलन नेवा: समुदायदुने आपालं दु । नेवा:समाजय् प्रचलित लोकबाखंत मनोरञ्जन व ज्ञानगुणया दृष्टिं जक महत्वपूर्ण मजुसे थुकिं तत्कालीन लोकजीवन, लोकपद्धति, मनोभाव, चालचलन आदियात नं व्वय्गु याइगुलिं थज्या:गु लोकबाखंया विशेष महत्व दु । छम्हेसिनं न्यना: मेम्हेसित कनीगु जूगुलिं लोकबाखंयात न्यँकंबाखं नं धाय्गु या: । न्हापा न्हापा च्वय्गु साधन मदु । अथेजूगुलिं बाखं च्वयातइ मखु । भी अजाअजिपिसं सुथय् बहनी दक्व मस्त मुंका: बाखं कनेगु याइ । थ्व न्यँकंबाखं जक जुइ । चिकुलाबलय् बहनी दक्व ज्या सिधय्का: मक: कुया: दक्व मस्त मुंका: थ:पिसं स:गु न्यनात:गु बाखं कनी धा:सा तांन्व:बलय् सिचुथाय् च्वना:, फल्चाय् च्वना: फुर्सदया इलय् कनेगु याइ । थ्व लोकबाखं न्यँकंबाखं जुया: थ्व न्त्यावले छगू हे जुइमखु । न्यनीम्हेसिनं न्यना: लुमंकात:गु गुलि खः अथे जक कनीगु जुइ । अथेजुया: थ्व लोकबाखं थाय्कथं, मनूकथं छगू हे बाखं नं कनीबलय् फरक फरक जुइ । बाखनय् छुं भतिचासां खँ पानाच्चनी । अथेजुया: व हे छपु बाखं यँय् छगू जूसा मेथाय् छुं भतिचा पानाच्चनी । अजाअजिपिसं कनीगु व न्यना: लिपाया पुस्तां कनीगु नं फरक जुइ । तर लोकबाखनं छुं भचा शिक्षा नं बियाच्चनी ।

१. पाल्पाया लोकबाखं

इतिहास स्वयंबलय् सेनवंशया इलंनिसें पाल्पाय् बस्ती दुगुख:सा विसं १८६१ निसें नेवा:तय्गु नं बस्ती अप्पयावन । नेवा:तय्गु मू बस्ती नेपा:गा: जूसां विभिन्न कारणं याना: नेवा:त नेपा:गालं पिने च्वंवांगु खनेदु । संस्कृतिविद्

तिलकप्रकाश कायस्थया धापूकथं स्वयंबल्य् थौं स्वयां २०० दँ न्ह्यः नेवाःत
स्वंगू कारण बसाईसराइ जूगु खनेदु । नेपाःगालं पाल्पाय् वीपिं नेवाःतय्सं हे नेवाः
लोकबाखंयात नं सुरक्षित यानातल ।

१.१ ध्वंचल्यचाया बाखं

छगू देशय् छम्ह मैचा दु । व थः मांअबुया याकः म्हाय् जुगुलिं साप हे सुखी
जुयाच्चनी । म्हाय् याकःचा जूगुलिं वया मांअबुं वयात पासा चलय् छम्ह न्यानावी ।
व चलयचाया नां ध्वंचलय् जुयाच्चनी । व मैचा न्यानावलें व ध्वंचलयचायात
ज्वनाः जंगलय् जःवनी । ई न्यानावनी । छन्हु व मैचाया मां ल्वचं कयाः सी ।
अले बौम्हसिनं मेम्ह कलाः हइ । चिरिमां व मैचायात माया याइमखु, यक्व ज्या
याकी, नकी धाःसा मखु । लिपा चिरिमांया नं छम्ह म्हाय् बुइ । तःधिकाः जुइवं
निम्ह तताकेहें न्याबलें थें व ध्वंचलयचा जःवनी । चिरिमां थः म्हाय्यात साःगु
भिंगु नकी । तताम्हेसित धाःसा दक्कसिनं नय्धुंकाः ल्यंपुत्यं जक नकी । अथेजूसां
व मैचा भं भं ल्हवनावइ । साःगु भिंगु नःम्ह केहेंम्ह स्वयां मैचा ल्हवनावःगु खनाः
चिरिमांया मनय् धौबजि वाली । अले चिरिमां थः म्हाय्यात ततानाप चलयचा
जःवनेबलय् तताम्हं छु छु नइ स्व धकाः धयाछुवइ । केहेंम्हसिनं थः मामं धाःथें
तताम्हेसिनं मखंक सुलाः ततां छु छु याइ धकाः स्वयाच्चनी । न्याबलें थें व मैचा
याकःचा जुइबलय् व ध्वंचलयचां साःसाःगु मरि ल्हवयाः व मैचायात बी । अले
केहेंम्हं छैय् वनाः थः मांयात व दक्क खँ कनी । व खँ न्यनाः चिरिमांम्हेसिया सह
याय् जीमखु । अले चिरिमांम्हेसिनं व चलयचा स्यानाः ला नय्गु बिचाः याइ । थ्व
खँ व चलयचां नं सी । चलयचां मैचायात थ्व खँ कनी । मैचा साप हे दुःखी जुइ ।
अले चलयचां मैचायात छिमि चिरिमां जितः स्यानाः ला नकेहइ । छं नय्मते ।
दक्क क्वय् क्यबय् ल्हाकाब्यू धकाः मैचायात खँ स्यनी । धात्यें छन्हु चिरिमांम्हेसिनं
व ध्वंचलयचा स्यानाः ला दय्की । व च्वलेचिया ला मैचायात नं न धकाः बी ।
मैचां ध्वंचलयचां धाःथें प्वाःस्याः धकाः ला नइमखु । दक्क क्वय् क्यबय् यंकाः
ल्हाकाबी । क्यबय् क्वय् ल्हाकूथाय् छमा योमरिया मा बुयावइ । योमरिमा तःमा
जुइवं लिपा योमरि नं सइ । मैचा व वया केहें न्याबलें व योमरिमाय् थहां वनाः
योमरि खानाः नइ । छन्हु न्याबलें थें व मैचां योमरि माय् थहां वनाः योमरि खानाः
नयाच्चनीबलय् लाखे लसिं वयाः जिमित नं योमरि ति ले मैचा धकाः फ्वंवइ ।
योमरि ब्यूवइबलय् लाखेलसिनं मैचायात पाछ्याय यंकी । व मैचायात लाखे लसिनं

ल्ल्वंकः नकातइ । छन्हु लाखे लसिनं मैचायात मरि छुना च्वं, जिपिं वा चुलाः वय्
धयाथकी । मैचा मरि छुनाच्वनी । उबलय् लाक्क छुं छम्ह वयाः मैचायात 'खँ
छता न्यने यःसा मरि छपा चुई' धकाः धाःवइ । छुं यक्व हालाच्वंगुलिं मैचां छुंयात
का नः धकाः मरि वांछवयाबी । छुं अले मैचायात लाखे लसिं वयात स्यानाः नय्त
चुपि ज्वय्कः वंगु धकाः कनी । छुं मैचायात लाखे लसिंथाय् दुगु हिरामोति जुहारात
दक्व ज्वनाः याकनं बिसिं हुं धकाः धाइ । धात्ये मैचा नं दक्व हिरामोति जुहारात
ज्वनाः थःगु छैय् बिस्युं वनी । मैचा छै थ्यनेवं वया चिरिमांयात याकनं खापा खं
वा, भ्यातुल धकाः सःताच्वनी । चिरिमां काचाकाचां भ्यालं स्वइ । मैचां यक्व
हिरामोति ज्वनावःगु खनी । चिरिमांम्ह तसकं लय्ताइ । अले मैचायात गनं कया
हयागु धकाः न्यनी । मैचां दक्व खँ कनी । चिरिमांम्हेसित थः म्थ्याय् नं छवय्
मास्तिवइ । अले चिरिमांम्ह थः म्थ्याय्यात नं योमरि खाकेछवइ । व हे इलय् हानं
लाखेलसिं वयाः जिमित नं योमरि ति ले धकाः पवंवइ । अले व केहेंम्ह लय्लय् तायाः
योमरि बीत सिमां कुहां वइ । लाखेलसिनं व केहेंम्हेसित नं पाछायाः यंकी । छन्हु
व केहेंम्हेसित नं लाखेलसिनं मरि छुना ति, मसला छ्याना ति धकाः ज्या बियाः
वा चुलावय् धकाः पिहांवनी । व हे इलय् हाकनं छुं वयाः 'खँ छता न्यने यःसा मरि
छपा चुई' धकाः धाःवइ । दक्व हिरामोती ज्वनाः छैय् वनेगु मतिइ तयाः च्वंबलय् छुं
हालाच्वंगु जुयाः व केहेंम्हेसित तं पिहांवइ । अले तमं गुलि हालाच्वंगु धकाः चिम्तां
कय्काछवइ । छुं अन हे सी । उगु हे इलय् लाखेलसिं छैय् दुहां वइ । दक्वसिया
मरि नयाः बहनी च्नी । केहेंम्हेसिया न्त्यः वयाच्वनीबलय् लाखे नं छकु ला च्चाईत
ध्यनाः नइ । केहेंम्हं आइया धकाः हाली । लाखे नं छुं जूगु मखु, कुसिं न्याःगु जुइ,
चँ चँ धकाः ह्यय्काः थ्यनी । हाकनं लसिनं छकू ला च्चाईत ध्यनाः नइ । हाकनं
आइया धकाः हाली । छुं नं जूगु मखु चँ चँ, कुसि न्याःगु धाइ । अथे यायां दक्व ला
नयाबी । अले क्वय् जक योमरिमाय् यंकाः खानाबी । उखे चिरिमांम्हेसिया थः म्थ्याय्
नं हिरामोती ज्वनाः वइ धकाः समाः यानाः म्थ्याय् वइगु लँ स्वयाच्वनी । उबलय्
हे छम्ह क्वः वयाः योमरिमाय् च्वनाः मांया समा समा म्थ्याय्या क्वय् क्वय् धकाः
हालाच्वनी । मांम्हेसिया तं पिहांवइ । थ्व क्वः गुलि जक हालाच्वंगु धकाः भ्यालय्
च्वनाः ख्यानाः छवइबलय् थः म्थ्याय्या क्वय् योमरिमाय् खानातःगु खनी । अले
मांम्ह ख्वयाच्वनी । थुखे मैचां यक्व हिरामोती ज्वनावःगुलिं सुखी जुयाच्वनी । थ्व
बाखं छपु शिक्षामूलक लोकबाखं खः । बांलाःगु ज्या याःसा बां हे लाइ, मखुगु ज्या
याःसा दुःख जुइ धकाः थ्व बाखनं शिक्षा बियाच्वंगु दु (विमला श्रेष्ठ, भगवती टोल) ।

१.२ तुयुम्ह सलया बाखं

थ्व खँ जुद्ध शमशेरया पालय्यागु खँ खः । न्हापा तानसेनय् छम्ह मनू क्रिया च्वनाच्वन । उम्ह मनू क्रिया च्वनाच्वंगु थासय् मुपिं छपुचः मनूत तुयुम्ह सलया खँ ल्हानाच्वंगु । उमिसं खँ ल्हानाच्वंबलय् धात्यें हे तक् तक् यानाः छम्ह सलः अन वल । सलं छुचं पिकयाः स्वल । सलया खँ ल्हानाच्वगु इलय् सल हे थ्यंकःवःबलय् क्रियापुत्र च्वनाच्वपिं छग्वारा जुइक ग्यात । लिपा जुद्ध शमशेरया मनूत वयाः दरबारपाखें छम्ह सल बिस्त्युं वंगु दु, खं ला धकाः न्यंबल खनि । सलःयात ख्याःकथं कयाः वया खँ हे न्यँकंवाखं जुयावंगु खः (रञ्जना श्रेष्ठ, भीमसेनटोल) ।

१.३ रुरुकन्या व ऋषिकेश मन्दिरया बाखं

पाल्पाया सदरमुकाम तानसेन बजारं ५ कोश तापाक्क छगू बजार दु । व थाय्यात रुरु बजार धाइगु खः । उत्तरपाखे कालीगण्डकी नदी, पश्चिमपाखे रिडी खुसि वयाः निगू खुसिया संगमस्थल थ्व थाय् खः । थ्व थाय् स्याङ्जा, गुल्मी व पाल्पाया संगम स्थल नं खः । अथेजूगलिं थ्व थाय्यात विशेष रुपं कयातःगु दु । रुरुया मेगु नां रिडी नं खः । थ्व हे थासय् देवदत्त नांयाम्ह छम्ह ब्राह्मणया जन्म जुल । लिपा व ब्राह्मण विद्वान जुयाः वेद वेदाङ्गय् पारङ्गत नं जुल । व हे ब्राह्मण थन खुसिया किनाराय् छगू आश्रम दय्काः तपस्या यानाच्वन । तपस्या यानाच्वंगु व थासय् यक्व सिमात नं दुगु जुयाच्वन । अथेजूगलिं अन यक्व चखुं बखुं नं दुगु, थीथी फलफूल नं दुगु न्ह्याइपुसे च्वंगु थाय् जूगलिं व वनय् तपस्वीया तपस्या पूवनीगु हे जुल । थथे तपस्या पूवनाः स्वर्गलोकय् इन्द्रया सिंहासन दगमगय् जूगु सियाः व तपस्वीया तपस्या भंग याय्त इन्द्रं इन्द्रलोकया तसकं हे बांलाःम्ह अप्सरा प्रम्लोचायात अन छवयाहल । व अप्सरां तपस्वीया तपस्या भंग याय्त अनेक कथंया जुक्ति नं म्हितल । तपस्वीया सेवा यानाच्वन । अथे जुजुं व तपस्वीयात अप्सरां थःगु वशय् लाकल । तपस्वीपाखें अप्सराया छम्ह मचा दत । व मचा दय्काः तिनि तपस्वीं न्हयलं चाःथें जुल । अले थः अप्सराया वशय् लाःगु वाःचाल ।

अनंलि व तपस्वी व थाय् हे त्वःताः मेगु थासय् तपस्या याय्त वन । गुगु थाय्यात भृगुथुम धाइ । लिपा अप्सरां नं थम्हं बुइकाम्ह म्ह्याय् त्वःताः स्वर्गलोकय् वन । मचायात त्वःताः मांम्ह अप्सरा स्वर्गलोकय् वंगुलिं व मचायात छम्ह रुरु नां दुम्ह मृग वयाः दुरु त्वंकेगु यात । व मृगं थःगु दुरु त्वंकाः व


मचायात तःधि यात । व हे मचां लिपा सांसारिक माया मोह दक्वं त्वःताः
 थः अबुं थें भगवान् विष्णुया आराधना यानाच्चन । थ्व खनाः विष्णु भगवान्
 तसकं लय्तायाः व रुरुयात दर्शन बियाः छु वर फ्वनीगु फ्वं धाल । व खं
 न्यनाः रुरुं निपा ल्हातं बिनित्ति यानाः जितः मेगु छुं वरदान म्वाः । छःपिनिगु
 थ्व हे दिव्य रुप न्ह्याबले थ्व हे थासय् दयाच्वनेमाः धकाः फ्वन । रुरुया
 थ्व तसकं निःस्वार्थ खं न्यनाः भगवान् विष्णु तसकं लय्ताल । अले रुरुयात
 वरदान व्युसें छंगु इच्छाकथं जि थन हे शिलामूर्ति जुयाः च्वने धकाः धाल ।
 मेगु छंगु नं वरदान व्युसें रुरुयात भगवान् विष्णुं छंगु थ्व नाशवान शरीर थ्व
 थासय् मदयावंसां छंगु हे नामं थ्व तसकं तःधंगु तीर्थ जुयाच्वनी । थ्व तीर्थय्
 म्वः ल्हुयाः सुनां जिगु (ऋषिकेश)या दर्शन याइ वया दक्वं पाप मुक्त जुयाः
 मोक्ष लाइ धकाः धाल ।

थ्व कथं व रुरु क्षेत्रय् आःतक नं तापाकं तापाकं दर्शनार्थी वयाः म्वःल्हुयाः
 ऋषिकेश भगवानया दर्शन याःवयाच्वंगु दनि (सिंह, १९१७-१७) ।

लिखं

लोकबाखं धइगु धार्मिक, सांस्कृतिक, भौगोलिक, भीगु संस्कार अथवा
 जुजुपिनि नाप स्वाकाः दय्कातःगु खनेदु । थ्व लोकबाखं गथे न्यन अथे हे कनेमाः
 धइगु मदु । थाय्वाय्कथं नं बाखनय् छुं भचा पानाच्वनी । भीगु धर्म, भीगु
 संस्कारकथं नं बाखं पानाच्वनी । ध्वंच्वलेचिया बाखं छपु हे जूसां पाल्पाया बाखं
 व येंय् कनीगु बाखं भचा भचा पाःगु खनेदु । येंय् कनीबलय् बाखनय् ध्वंच्वलेचां
 तताम्हेसित साःसाःगु नसा ल्हवयाः नकीगु व उगु नसा केहेंयात नं वीबलय्
 केहेंमं थःगु लुसिकापिइ सुचुकाः उकिया दसू छेंय् क्यनेय्कीगु खः । तर थन
 तप्यंक केहेंमं थ्व खं छेंय् वनाः मांम्हेसित धयाबिल धाय्काः क्वचाय्कातल । अथे
 हे, थ्व हे बाखनय् छुं वयाः खं छता न्यनेयःसा मरि छपाः चुइं धइगु खँत्वाः लिसें
 योमरि सिमाय् क्वः जुयाः 'मांया समा समा म्थ्याय्या क्वय् क्वय्' धकाः न्यकी ।
 छुंचां धाःगु खँत्वाः येंया बाखनय् नं दुथ्यानाच्वंगु दुसा क्वःया खँत्वाः धाःसा येंया
 नं गुलिं बाखनय् दु, गुलिं बाखनय् न्यनेमदु । थुकथं छपु हे बाखंया तुलनात्मक
 अध्ययन याय्बलय् बाखंया सार छंगु हे जुयाः नं दथुइ दथुइ वःगु छुं छुं ब्वय्
 हिलासू वयाच्वंगु खंकेफै ।

पाल्पाया मौलिक लोकबाखनय् नं धर्म व अलौकीकता स्वानाच्वंगु खंकेफइ ।



पाल्पाया सदरमुकाम तानसेन बजारं ५ कोश तापागु रुरु क्षेत्रय् च्वंगु देवदत्त व बांलाःम्ह अप्सरा प्रम्लोचा ।

पाल्पाय् वइम्ह तुयुम्ह सलया बाखंलिसें पाल्पाया धार्मिक आस्थां जाःगु थाय् रिडि क्षेत्रवारेया बाखं नं दु । लोकबाखं न्हापा न्हापा अजाअजिपिसं कनातःगु जुयाः थौतकं ल्यनाच्वन । थज्याःगु लोकबाखं न्हूगु पुस्तायात नं सकुशल लःल्हाय्फःसा जक ल्यनाच्वनी, मखुसा न्हनावनी ।

लिधंसा

जोशी, रास (नेसं ११३४) 'लोकवार्ता सभ्यताया न्हाय्कं व लः' लुमन्ति दबू, दँ ३, ल्याः ३, पृ. १७१-१७७ ।

तुलाधर, प्रेमशान्ति (नेसं ११३६) 'नेवाः लोकसाहित्य', नेवा लोकसाहित्य, ल्याः ३, पृ. ३-१६ ।

सिंह, कविन्द्रमान (विसं २०५४) पाल्पाको सेरोफेरो (संस्कृति) । यैः महेशमान सिंह ।

खँलाबल्हा

विमला श्रेष्ठ (५६), तानसेन भगवती टोल

रञ्जना श्रेष्ठ (४२), तानसेन भीमसेन टोल

पाल्पाया नसात्वँसा



दर्शनवीर शाक्य

मूति

नसात्वँसा छुं नं सभ्यताया म्हसीका खः । समाज न्ह्याकेगु निंतिं पूर्खा स्यनावंगु सभ्यता थ्व हे खः । उकिं पुर्खा ईव्यः स्वयाः छु इलय् छु नय्गु धैगु खँ माःमाःकथं न्ह्याइपुक्क अपुक्क हे स्यनावंगु दु । गुलिं नसा सामाजिकरूपं प्रेरित यानातःगु दुसा, गुलिं धार्मिक व भौगोलिकरूपं । न्ह्यागु हे उत्प्रेरणा दुसां मू उद्देश्य स्वच्छ जीवन हनेगु निंतिं हे खः । नसात्वँसा मानवसभ्यताय् थुकथं भ्यलय् पुनाच्वंगु दु कि हरेक ई वा हरेक जीवनया घटनायात नं नय्गुलिसे स्वाकाः हे जीवनयात हनाच्वंगु दइ । मूलतः नेवाःतय्सं जीवनया थीथी क्रियाकलापयात नसात्वँसाया माध्यमं हनाच्वंगु हे नेवाःसभ्यताया चिं खः । थ्व हे सभ्यताया चिंदुने नसात्वँसापाखें हे जातिगत वा भौगोलिक म्हसीका व्यूत ताःलानाच्वंगु दु ।

१. पाल्पाय् नसात्वँसा

थौया इलय् नसात्वँसाया ल्याखं पाल्पाय् सामान्यकथं हे दिनचर्या न्ह्यानाच्वंगु दु । छुंकथंया विशेष नसात्वँसां न्हिं शुरु जुयाच्वंगु मदु । सुथय् च्या, नास्ता, जा, न्हिनसिया खाजा, अले बहनी नं थःत यःगु कथं । न्हिं स्वछाः निसें प्यछाः नइ (सहलहः बेनुकुमारी श्रेष्ठ) ।

नेवाःभाषिकाकथं पाल्पाय् नसात्वँसाया नां न्ह्यव्वयातःगु दुसा पाल्पाय् छ्यलाच्वंगु नसात्वँसायात स्वताजि व्यय् व्यथले छिं ।

१.१ ईकथं नसा

पाल्पा नेवाःतय्गु छगू पुलांगु बस्ती खः । मौसमकथं थन नय्गु

त्वनेगु पाः । थन नं नेवाःतय्गु सभ्यताया चिं नेवाः नखःचखःबलय् नइगु नसाज्वलं नं क्यनाच्वंगु दु । ईकथं थनया नसात्वँसाय् विविधता दु । हरेक नखःचखःयात विशेष परिकार दय्का नय्गु थनया संस्कार दु । मौसमकथं दच्छिया भिनिनायात नेपाल संवतया ला कथं नालाः थ्वहे ला दुने लानाच्वंगु थीथी नखःचखः व उत्सवयात नालेबलय् थनया मूमू नखःचखः थुकथं दु (सहलहः सौन्दर्या शाक्य) ।

तछला (सिथि नखः)

सिथि नखः खुन्हु वः, चटांमरी, कःसु बारा दय्का नइ ।

दिल्ला (गथांमुगः)

गथांमुगःखुन्हु बहनी सुपंया ख्याः सालायंकेगु परम्परा दु । बहनी ला, बजि तयाः नइसा गुलिस्यां सँय्बजि (समय्बजि) नं नइ ।

गुंला (गुंपुन्हिं)

गुंपुन्हिंखुन्हु गुता बुवःया क्वाति दाय्काः त्वनी ।

जला (खुँ पुजा) (चथा)

जलाय् खुँ पुजा धकाः बहनी सुकुण्डा च्याकाः आकाशय् स्वयाः पुज्याइ । थथे पुज्याय् सिधय्का बुवः, कनि, मुस्या, बरां तयाः नय्गु याः । लिसें सँय्बजि नं नइ ।

कौला (मोहनी)

मोहनी नखलय् थन मूलरूपं सप्तमी अर्थात् फुलपातीया न्हिनिसें जक ला दुत हय्गु चलन दु । फुलपातीनिसें अष्टमी, नवमी व दशमी तक भव्य नइ । घटस्थापनाखुन्हु पिनातःगु नलस्वां दशमीखुन्हु क्वकयाः आगंधः पुज्याना नखः हनी ।

कछला (स्वन्ति)

कछलाया स्वन्ति नखलय् लक्ष्मीपुजा, म्हपुजा व किजापुजा यानाः स्वन्हु भव्य नइ । लक्ष्मीपुजा खुन्हु चय्प्यता घासा तयाः लक्ष्मीब्व तइ ।

थिला (योमरी पुन्हिं)

योमरी पुन्हिखुन्हु थीथी कथंया योमरी दय्का: नइ । चाकु, माय, खुवा:, कस्ति तया: योमरि दय्की ।

पोहेला (घय:चाकु सँल्ह)

घय:चाकु सँल्हखुन्हु घय:चाकु नइ । बजि व थीथी तरकारीलिसें हाकनं खिचडी (माय् जा) दय्का: नइ ।

सिल्ला (सिलाच:हे)

सिलाच:हेखुन्हु बुब:, लाभा नइ ।

१.२ विशेष नख: व नसा

पाल्पाय् नेवा:त थीथी भौगोलिक थासं व:पिं जुया: थ:गु मूल थासं व:पिं मनुखं थ:गु भौगोलिक नख:चख:लिसें जातिगत नख:चख: नं हनेगु या: । अक्षय तृतीयाखुन्हु साख:ति त्वनेगु या: । साख:लिसें सत्तु नं नइ । पाल्पाय् धा:सा थथे फुक्कं जातिं साख:ति दय्का त्वनेगु मया: । पाल्पाया स्यस्य:समुदायं साख:ति दय्का: मेमेगु समुदाययात त्वंकी । वैशाख १ गते थन बिस्काँट/बिस्काँठ (बिस्का जात्रा) नख: हनावयाच्चंगु दु । जात्राया नख:त्या स:ता: भव्य् नकी । गुँलाबल्य् पंचदान हनावयाच्चंगु दु । पंचदान नं ख्वप व यें पंचदान धका: हनावयाच्चंगु दुसा, यलपंचदान धका: बिस्कं हे हनाच्चंगु दु । थ्व नितानं हे दिनय् समुदायकथं यें, यल, ख्वपया शाक्य, वज्राचार्य, बुद्धाचार्यपिन्सं खीर दय्का नइ । येंया:बल्य् येंया जात्रा मदुसां उपाखा वनेगु चलन नं दु । लँ दुच्छि मत बिया: ज्ञानमाला भजन हाला: वनीसा उपाखा वनीपिन्त ला व अय्ला: बाहेकया खाना नकी । अथे हे सकिमिला पुन्हिखुन्हु नं न्हिच्छि द्यालाना: बहनी चन्द्रमा पुज्याना: छुस्यामुस्या: नइ । जा नइमखु । चिभ्या: नं नइमखु (सहलह: सौन्दर्या शाक्य) ।

पाल्पाया छगू बिस्कं म्हसीका दुगु जात्रा भगवतीजात्रा ख: । थुगु जात्राय् कृष्णाष्टमीखुन्हु जाग्राम च्वना: भजन याइ । चान्हय् जाग्राम च्वपिन्त सकसित छवय्ला नकी । छवय्ला नकेगु नितिं थन गुथि नं नीस्वनात:गु दु । जात्राय् व:पिन्त प्रसादकथं छवय्ला प्व:प्व:चिना इनाबी । येंनं पाल्पा व:पिसं थन

घोडाजात्रा नखः हनेगु याःसा, यलं वःपिसं बुँगद्यः रथय् तइगु दिनयात नखःकथं हनेगु याः (सहलहः सौन्दर्या शाक्य) ।

२. सामाजिक संस्कारया भव्य

सामाजिक संस्कारया भव्यकथं पाल्पाय् थीथी नेवाःसंस्कार न्हयानाच्वंगु दु । पाल्पाय् नेवाःसंस्कारकथं जन्मन्हिं, मचा जंक्व, व्याहा, चौरासि पुजा (ज्याथः जंकु) सकतां याइ । बाऱ्हाः तइगु भव्य याइ, तर वरे छुइगु भव्यधाःसा संस्थां याइगुलिं याय्म्वाः (सहलहः सौन्दर्या शाक्य) ।

मचायात जा नकेगु वा अन्नप्राशन छगू विशेष संस्कार खः । मिसामचा न्याला व मिजं मचा खुला दइवल्य थुगु संस्कार याइ । मचायात छेंया दकले थकालीम्ह मनुखं थाय्भु ज्वरे याइ । अथे हे मचायात हामा (दकले तःधिम्ह मनुखं) निसें अन्न नकाः कथं कुहां वनी । पाल्पाया अन्नप्राशन याकेगु भवल्य मचायात मल्ला फय्केगु नं याइ (सहलहः शान्ति मल्ल) ।^१ गुकिंयाना मचाया ख्वसः पिदनी । थाय्भु नय्धुंकाः छेंया थकालीं थाय्भु दुवातय् वाय्यंकी । थाय्भुइ नं विशेषयानाः खुता खुता परिकार तइ । चौचभि (फसिया थीथी घासा), खुताजी तरकारी, खुताजी अचार, खुताजी मरि, खुताजी फलफुल, मसप्वः, ग्वाः, धौ आदि तइ । तर अय्लाः म्वाः । उकथं हे चौरासीपुजा धकाः सुं नं मनू ८४ वर्ष दतकि ज्याजंक्वकथं पुजा याइ । थज्याःगु ज्याभवः याइगु इलय् थाय्भुया विशेष महत्व दुगु जुल (सहलहः बेनुकुमारी श्रेष्ठ) ।

पाल्पाया नसात्वंसाय् लप्ते नं अतिकं हे महत्वपूर्ण जू । पाल्पाय् लप्ते धाय्गु इलय् लप्ते छहः जक थुइगु खःसा लप्तेपाः धालकि भव्य नय्गु लप्ते व्व धकाः थुइकी । लप्तेपाः भव्य नय्गु इलय् जक मखुसे थाय्भु तय्गु, खोडी, बौटा दय्का थीथी प्रयोजनया नितिं ज्या काइ (सहलहः सहनशीला शाक्य) । लप्तेपाय् नं अतिकं हे कलात्मक ढंगं सुइगु याइ । थाय्भु दय्केबलय् धाःसा सामान्य भव्य नय्गु लप्तेपाः सिबें निदुगं स्वदुगं तप्पाक्क लप्ते सुइसा लप्ते कुँकुं लुइकाः तःपाक्क सुइगु याइ । लप्तेया कलात्मकता पाल्पाया भवजय् विशेषरूपं खनेदु ।

१ शान्ति मल्ल, (७८) बसन्तपुर, तानसेन । खँल्हाबल्हा २०७३-१२-२ । थाय् बसन्तपुर तानसेन ।

मोहनी व स्वन्तिइ धाःसा लप्ते सुयाः भव्य नइमखु । थ्व इलय् ततःपाःगु
केरा हल्य् माक्व भु पाय्कु चानाः उकिइ तुं भव्य नइ (सहलहः मनमोहन सिंह) ।

२.१ भव्य न्ह्यः

छुं नं तःधंगु सामाजिक ज्याभवलय् भव्य नकेगु चलन नेवाःतय् दु ।
लसता स्वयाः गथेकि जंक्व भव्य, व्याहा भव्य, चौरासीपुजा भव्य पाल्पाय् जुयातुं
चवनी । तर थथे भव्य याय् न्ह्यः नं छुंछुं कथंया विधित दु ।

छुं नं भव्य याय् न्ह्यः हे सकलें मुनाः सहलह याइ । भव्यया घासा,
लगत, क्वाः फुक्कं सहलह जुइ । थुकीयात भुतुलिइ च्वनिपिंत नकै खः धकाः
धाइ । भव्य छन्हु निन्हु न्ह्यः थुबलय् लुसि ध्यना सरसफाइ याइ । थुकीयात
लुसि ध्यने धकाः धाइ (सहलहः सौन्दर्या शाक्य) ।

भव्यया दकले मूव्व बजि खः । पाल्पाय् छसरा निसरा धकाः मधाःसे
भव्य नःपिं दनाः मवंतले नकेगु चलन दु । थन बुवःया यक्व घासा दु । उकथं
हे भोल दुगु घासा नं थन यक्व हे प्रचलनय् दुसा, भव्य नइबलय् नं मरि तय्गु
चलन दु । विशेषरूपं थन फिनि मरी तय्गु याः ।

२.२ भवजय् तइगु थीथी ब्वघासा

मिं क्वाः	मिं फ्वयाः मलसा तयाः दाय्कातःगु क्वाः ।
तुसि क्वाः	तुसिया मौसमकथं जक दय्की । तुसियात तानाः तरकारीकथं दय्की, बेसन तयाः ताकुकी ।
फसि क्वाः	फसिया तरकारी
भोले	बन्दा, भ्वरी, प्याज दुदुगु तरकारी तयाः दय्की ।
आम्लि ख्वला	न्याँ भुटे यानाः मुस्याः ग्वः, आम्लिख्वला, बेसन तयाः दय्की ।
आलु क्वाफ	आलुया क्वाफ ।
छ्वय्ला	छ्वयातःगु वा मनाः वालातःगु ला
न्याँखुना	म्येया छ्वय्गु दाय्काः न्याँतयाः ख्वय्कातःगु ति
तखला	म्येला छ्वय्गु तयाः गाक्क दाय्काः ख्वय्कातःगु ला
अचार	आलु, लैं, कय्गु व मसला तयाः दय्कातःगु अचार
पंचकोल	आलु, तामा (छ्वं), भुति, सेविं(सिमि), इस्कुस तयाः दय्कीगु क्वाः ।

भुतुवा सैं, भ्वरी, अँपि इत्यादि मना: पुकात:गु
वाउँचा दकले अन्तिमय्
धौ व फलफुल धौ व मौसमकथं दुगु सि ।

२.३ भ्वय् व थीथी संस्कार

भ्वजय् चिपनिप याय्मज्यु धैगु थनया लोकविश्वास नं दु । भ्वय् ज्वरेयाय् धुंका: थन समुदायकथं अले पुजागतरूपं नं निव्व वा स्वव्व: द्य:यात तइ । अक्सर भुतूव्व व द्य:व्व, तइ । भुतुलिइ भ्वय् ज्वरेयाय् धुंका: चि गा:, मगा: नं स्वइ । भुतुलिइ हे ज्वरेयाइपिसं न: स्वइ ।

भ्वय्या थीथी विशेषता वा संस्कारयात नालेगुख:सा भ्वय् नकेन्हय: हे थकाली वा मानेयाय् मा:पिंत ल्हा: सिकेगु चलन दु । भ्वय् नय् क्वचाय्का नं नुसिकेगु चलन दु (सहलह: सौन्दर्या शाक्य) ।

भ्वय् नकेगु इलय् छसरा निसरा धका: छुंकथंया निश्चितता मदु । भ्वय् न:पिनि प्वा: मजा:तले हे वा भ्वय् गात धका: मधा:तले हे थीथी घासा लिसा तइ । भ्वय् गात धका: धालकि भ्वजय् वाउँचा दकले लिपांगु घासाकथं तइ । थ्व धुंका:तिनि धौ, सिसाबुसा तइ । नुसिकेधुंका: वा कुलेत धका: सिंका: बी । सिंका बीधुंका:तिनि भ्वय् क्वचाइ । भ्वय् नय् क्वचाय्का: चिप तुफिं पुना: दोबातय् वाय्पंकी (सहलह: सौन्दर्या शाक्य) ।

३. भौगोलिक विशेषताया नसा

पाल्पाया भौगोलिक वातावरण यैलिसे ज्व:ला:गु जक मखुसे थनया थीथी त्वा:या नां नं ज्व:ला: । थन बसन्तपुर, मखं, असं, भिंघत्वा: धका: नां छुनात:गु दु । बिसं २००८, २००९ सालय् तक्क थन छुं नं कथंया तरकारी मस: । थन नइगु धैगु लैंचाना(लैंसू), फसि मुस्या, मी क्वा:, पालु, लाभा, बजि व म्येला अले अय्ला: । थुगु इलय् तक्क नं अय्ला: दुइस:म्ह भौमचा दतधा:सा वइत हे देय्या दकले बांला:म्ह मिसाकथं नाली (शाक्य, ११३५:५३-५४) । तानसेनया तरकारी नं निता हे जक आलु व प्याज । थन च्वपिं ज्यापुतय्सं मेमेगु वाउँचा तरकारी खेती याय्मस: । खानाया निंतिं बुटवलया भरय् च्वनेमा: । बुटवलपाखें हे मेमेगु तरकारी व केँ हइ (सहलह: सौन्दर्या शाक्य) । अथेख:सां थौया इलय् पाल्पाय् धा:सा थीथी नख:चख: हनेगु यानाच्चंगु दु । तानसेनय् नसात्वँसाया

स्वापू नेवा: सभ्यताया थीथी पक्ष गथेकि नख:चख: व रीतितिथिलिसे स्वानाच्वंगु मखुसे भौगोलिक रूपं नं थनया विशेष नसात खनेदु ।

३.१ रोठ :

पाल्पाया भैरवस्थानय् भैरव द्य:यात हे छायागु धका: छगू विशेष मरि छुइगु या: । घ्य:, कस्ति, छुचुं तया: न्हाया: चाकलाक्क क्यला: थ्व मरि छुइ । मरिइ हे भैरवया मिखा, न्हाय् व म्हुतु दय्का: थुगु मरिया छकू टुका चाना: द्य:छाना ल्यंदुगु प्रसादकथं बिइ ।

३.२ सिंका मरी :

सिंका मरी जाकिया दय्कीगु मरी ख: । थीथी रंग छयला: सिंकाथें साल्लुक्क दय्कातइगु मरी धा:सा चा:चा: तुइका: गंका तइ । रंगविरंगया थ्व मरी चिकनय् छुना: द्य:यात छाइ । थुगु हे मरी पुकात:गु टुका टुका याना: बजि नाप ल्वाकछयाना नइ ।

३.३ ख्वचि :

मनूत म्ह मफइवल्य् वा कमजार जुइगु इलय् मू निना: लप्ते हल्य् प्व:चिना हाया: नइ (सहलह: ज्ञानकाजी शाक्य) ।

३.४ सुकुटी :

म्येला पाना: सुकुगंका: छुया: वाला: नइ । भौगालिक मौसम व वातावरणया प्रभावं थन मेमेगु तरकारी यक्व मदुगुलिं पशुपालनय् भर च्वने मा: । थुकीया हे लिच्च:कथं सुकुटीइ खनेदु ।

३.५ चुकौनी :

चुकौनी छगू कथंया अचारथें जा:गु नसा ख: । आलु, धौ व थीथी मसला तया: दय्कीगु थुगु खाना पाल्पाया भौगोलिक विशेष पहिचानया नसा ख: ।

लिखँ

नसात्वँसा सकल जातिया सभ्यताया पहिचान ख: । नसात्वँसां हे



पाल्याया भैरवस्थानय् भैरव चःयात छायगु धकाः छगू विशेष मरि (रोठ) छुइगु याः ।
मरिइ हे भैरवया मिखा, न्हाय् व म्हुतु दय्काः चःयात छाइ ।

सकल जातिया पहिचान बियाचवनी । पाल्पाय् यक्व हे नेवाःजाति मिश्रीत कथं च्वनाच्वंगु जुगुलिं थन सांस्कृतिक पहिचानय् एकरूपता खंके थाकु । अथेनं थनया सांस्कृतिक विविधताय् धाःसा भौगोलिक जातिगत पहिचानलिसें संस्कृतिया ज्वलन्त दसू नसात्वँसापाखें नं लुयाच्वंगु दु । पाल्पा विविध भौगोलिक जातिगत मनूत मुनाच्वंगु थाय् खः । थनया नसात्वँसाय् विविधता व हनिगु नखःचखः अले संस्कारं क्यनाच्वंगु दु । भौगोलिक जातिगत विविधता दुसां नेवाःतय्गु संस्कार व परम्पराकथं थीथी नसाज्वलनं एकताया पहिचान न्ह्याकाच्वंगु दु ।

थीथी क्वाःघासा गर्थेकि तुसि क्वा, पंचकोल, भोलय् थीथी मौसमी नसात्वँसाया सदुपयोगया नमुना खः । नेवाःतय्सं छुं नं खाना सितिं मछुवसे वा म्हो नसाज्वलनं नं विशेष परिकार दय्केसः धैगु सभ्यताया चिं खः । मेमेगु अन्नवाली मदुगु कारणं पाल्पाय् सुलभ जुगु आलु व धौपाखें दय्कीगु चुकौनी पाल्पाया हे मौलिक पहिचानया नसा जुगु दु । भौगोलिक पहिचानया विस्कं

नसा दइ धैगु थ्व दसू खः । उकथं हे सुं मनू कमजोर जूसा मू हायाः नकेगु लोकोपचार खः । धार्मिक आस्थाया निंतिं मरियात छछलातःगु लोकसंस्कृतिया दसु खः ।

अन्नप्राशनया इलय् मचायात मल्ता फय्केगु नं चलन दुगु जुल । पाल्पाया चिकुगु थासय् मल्ता फय्केगु मस्तय्गु निंतिं प्रतिरोधात्मक शक्ति अप्वय्केगु खःसा म्हय् ताप नं अप्वय्केगु नसाकथं मल्तायात काइ । थ्व प्रचलन जातिगत रूपं पानाच्चंगु खनेदु । उकथं हे भ्वय् न्हयः नं छुं चिपनिप याय्मज्युगु, नुसिकेगु, द्यःब्व तय्गुली लोकविश्वास, थनया अतिकं कट्टरता खः । पाल्पाया नेवाःतय् भ्वय् जक नयां मगाः, भ्वजय् नं कलात्मकता माः धैगु लप्तेपाःया नमुनां क्यानाच्चंगु दु । भ्वय् नय्त छचलीगु लप्ते लोककलाया उत्कृष्ट दसु खः ।

लिधँसा

शाक्य ज्ञानकाजी (नेसं ११३५), महिमा न्हिपंया मर्म न्हयपुया । थिमिः दिनेश काजी वज्राचार्य
व अंजु वज्राचार्य ।

सिंह दशरथमान (विसं २०७३), त्यो समय त्यो परिवेश । यैः न्हजः गुथि ।

सहलह

बेनुकुमारी श्रेष्ठ (८०) बसन्तपुर, तानसेन । २०७३-१२-२ ।

मनमोहन सिंह (४८) तक्सार, तानसेन । २०७३-१२-३ ।

शान्ति मल्ल (७८) बसन्तपुर, तानसेन । २०७३-१२-२ ।

सहनशीला शाक्य (३८) तक्सार, तानसेन । २०७३-१२-३ ।

सौन्दर्या शाक्य (४५) तक्सार, तानसेन । २०७३-१२-२ ।

ज्ञानकाजी शाक्य (७४) महाराजगंज । २०७४-१-२२ ।

पाल्पाया वास्तुशास्त्र



जसना राजभण्डारी

मूति

वास्तुशास्त्रं भौतिक संरचना (छेँ, देगः, सतः, फल्चा, तुं, हिति आदि) गथे यानाः दय्केगु धकाः शिक्षा वी । वास्तुशास्त्रया पालना यानाः दय्कूगु छेँय् च्वनेबलय् सुख, शान्ति एवं समृद्धि जुइगु विश्वास दु । थुज्वःगु छेँय् च्वनेबलय् उत्साह, उमंग व उल्लासयागु अनुभूति जुइ । वास्तुशास्त्र छगू प्राचीन विज्ञान खः । थाय्बाय् अनुसार छेँ, देगः, फल्चा, सतः, देगः, हिति, तुं आदिया वास्तुशास्त्र पानाच्वनी । भौगोलिक कारणं यानाः नं वास्तुशास्त्र पानाच्वनी । छथाय्पा वास्तुशास्त्र मेथाय् लिसे ज्वः मलाय्फु ।

१. पाल्पाया नेवाःछेँया वास्तुशास्त्र

नेवाःतय्सं नालवयाच्वंगु वास्तुशास्त्रया थःगु हे मौलिकता दु । नेवाःतय्सं न्ह्यागुं दय्के न्ह्यः वास्तुशास्त्रकथं याय्माःगु नियम पालना याइ । पुलांगु शैलीया छेँत नेपाली कला व वास्तुशास्त्रया दृष्टिकोणं तसकं महत्वपूर्ण खनेदु । पुलांगु छेँया निर्माणशैली भ्याः, लुखा, पौ आदियात नेपाःया छगू ब्यागलंया वास्तुकलाया दसूकथ काय्गु यानाच्वंगु दु ।

पाल्पाय् छेँ दय्केत दकले न्हापा उगु थाय् तू-मतू स्वय्गु नितिं चा क्यनी । उगु थाय् मतूसा अन शान्ति यानाः जक छेँ दय्की, मखुसा मेगु हे थासय् वनाः दय्केमाः धइगु मान्यता दु । छेँ दनेत चा क्यना तुइ धुकालि जग पूजा याइ । पञ्चरत्न धातु तयाः जग पूजा याइ । पुजा याय् धुंकाः तिनि छेँया जग तय्गु सुरु याइ । जग ल्ह्वनेबलय् ल्ह्वं हे तइ । पाःलूगु थाय् जूगुलिं जग ल्ह्वनेबलय् ल्ह्वं हे तइगु खः । जग दने धुंकाः तिनि छेँ दनेगु सुरु याइ । राणाकालीन आपालं छेँय् आँय्पौ तयाः दनातःगु दु ।

पाल्पाया भौगोलिक वातावरण पाःगु हुनिं छें दय्केगु वास्तु मेमेगु थाय् सिबें पाः । पाल्पायागु चा येंया स्वयां बल्लाःगु खनेदु । अन चट्टानया द्यःने वस्ती दय्काः च्वनाच्वंगु दु । अनया छेंया जग एकदम बल्लाक दय्कातःगु दु । चट्टान द्यःने वस्ती दय्काच्वंगुलिं अनया छें तःखा मजू । आँय्पापौया छें दनातःगु दु । बूअप्पा मदुगु इलय् कच्ची अप्पा तयाः छें दनी । मखुसा छेंदुने पाखे कच्ची अप्पा तयाः अले पिनेपाखे बू अप्पा तयाः नं छें दनातःगु दु । छें दय्केबलय् जग बल्लाक तय्माः धइगु धारणां यानाः ५ फुट ६ फुट जग तयाः छें दय्कातःगु दु । जग तय्न्त्यः न्यागू धातु तयाः पुजा याइ । छें दनेबलय् सिं दुने व पिने चुकू तय्गु प्रणाली दु । अन नेवाःतय्गु गुलिं छें ढलान यानाः नं दय्कातःगु दु । छेंय् भ्याः तइबलय् गुलि जग्गाय् छें दनातःगु खः वा छेंकथं भ्याः तय्गु चलन दु । लुखाः तइबलय् दलानया दथुइ तइमखु । छेंया अंगः एकदम खातुकक दनातःगु दु । हरेक तल्ला पतिकं स्वाहानेया च्वसं खापा दु । स्वाहानेया च्वय् लाःगु खापायात तःखा धाइ । पाल्पाया वस्ती चट्टानय् दुगुलिं थनया लँ पाःलू थःजा-क्वजाः । सम्मगु लँ हे मदु । भच्चा सम्म थाय् वःसा हाकनं पाःलूगु थाय् वइ । उकिं अनयागु भौगोलिक कारणं यानाः छगू थासं स्वयंबलय् नित्तंजाः जूसां मेथासं स्वयंबलय् प्यतँजाः जुयाच्वनी । थ्व छगू पाल्पायागु छेंयागु विशेषता खः ।

न्हापा पाल्पाय् छें दय्केगु विस्कं तरिका दु । लिपा वयाः तिनि इन्जिनियर तयाः उमि सल्लाहकथं दय्केगु सुरु जुल । छें दय्के न्त्यः याइगु जग पुजा छेंया मुलिं याइ । लुखा तइबलय्, भ्याः तइबलय् नं पुजा यानाः तिनि तइ । पुजा याइबलय् साइत स्वयाः तिनि पुजा याइ । पुजा याइबलय् ताय्, ध्वजा तइ । धलिं प्रणालीं छें दनातःगु दु । स्वाहाने तइबलय् न्हय्गू त्वाथः तयाः दय्कातःगु दु । पाल्पाय् अप्पो चिकुइगु हुनिं भ्याः नं चिचीपाः । अटश भ्या, सँभ्याः तयातःगु दु । भ्याः तइबलय् बिजोडा ल्याखय् तइ । भ्याः क्वसं फ्यतुइ जीक थाय् छकू दय्कातःगु दु । जात्रा स्वय्गु, वसः पाय्गु, ला व मेमेगु खाद्यान्न पाय्गु नित्तिं छेंय् बार्दली नं पिकयातःगु दु । बुइगलय् कुँ वनेगु थाय् दय्कातःगु दु । अंगः ततःग्वः यानाः छें दनातःगु दु । धलिं तइबलय् न क्वय् क्वय् लाक्क तःतःपुगु धलिं तयाः च्वय्या तल्लाय् चिचिपुगु धलिं तयातःगु दु ।

२. छें दय्केबलय् छय्लीगु सामग्री

छें दय्केबलय् अन छु छु सामग्री उपलब्ध दु व हे सामग्री छय्ली । बूअप्पा



तानसेन बजारय् नेवा: वास्तुकला कथं दनात:गु छ्छा: छें ।

मदगु इलय् कच्ची अप्पा छ्छला: नं छें दनात:गु दु । दुनेपाखे कच्ची अप्पा तया: पिने बूअप्पा तया: न छें दय्कात:गु खंकेफु । छें दय्केबलय् चा, सिं, ल्वहं, नँया छ्छ, अप्पा आदि तया: दय्की ।

ल्वहं : जग तइबलय् ल्वहं तइ । जग बल्लाकेमा: धका: थथे ल्वहं तइगु ख: । कमजोर जुइगुलिं अप्पा तइमखु ।

अप्पा : छें दक्को अप्पां दनात:गु दु । अप्पो याना: बूअप्पां हे छें दनी तर बूअप्पा मदगु इलय् कच्ची अप्पा नं तया: छें दनात:गु दु ।

सिं : भ्या:, स्वाहाने, दराज, सनू (सन्दुक), खापा, धलिं, दलान, बार्दलि दक्को सिंया हे दय्कात:गु दु । मात:, स्वाहाने पिचुसे च्वंगु सिं छ्छला: दय्कात:गु दु ।

चा : छेंया फुक्क थासय् चां इलात:गु दु । प्लास्टर याय्गु ज्या चां यानात:गु दु । छेंया बँ चां हे दय्कात:गु दु ।

३. पाल्पाया छेंया विशेषता

पाल्पाय् अप्प:याना: पल्लिं चिनात:गु छें दु । पल्लि दुगु छेंया नापनापं गुम्बा

शैलीया नं छै दु । थःगु शैलीकथं छै दय्केगु चलन दु । छै धलिं तयाः दय्कातःगु दु । दकले क्वय्या तल्लायात छेली, व धुंकाःया तल्लाया ना मातँ, अनं च्वय्या तल्ला चोतँ दु । दकले च्वय्या तल्लाया नां बुइगल धयाः तयातःगु दु । बुइगल भव्य नकेगु निंतिं दय्कातःगु दु । हरेक तल्ला, क्वथाय् ग्वाखंप्वाः दु । अले छैया पिने न ग्वाखंप्वाः दु । ग्वाखंप्वाः मत च्याकेगु निंतिं दय्कातःगु खः । स्वाहाने, खापा, भ्याः दक्को सिँयागु दय्कातःगु दु । छैया अंगः ख्वातुक्क दय्कातःगु दु । ख्वातुगु अंगयात दराजया रुपय् नं सदुपयोग यानातःगु दु ।

यै स्वयां पाल्पाया छैत पाः । पाल्पाया छैया भ्याः, खापा फुक्कं यैया छैस्वयां पाः । अन मूलखाया तप्यंक न्त्यःने मू दलान तयमज्यू धइगु विश्वास दु । छै दय्केबल्य् सिँ तइबल्य् 'मठ पार्नुहुन्न' धाइ । थथे 'मठ लगे मजू' धयागु निखे गेट चुलिंचु लाकेमज्यू धइगु खः । भतिचा, एक इन्च सां पाकेमाः । निगू लुखा चुलिंचु लाकेमज्यू अथे चुलिंचु लातधाःसां मुं मदुसां सदां सः जक वयाच्चनी धइगु विश्वास दु । मठ तयबल्य् उकिं भचासां उखेथुखे यानातःगु खंकेफु । अथे हे, पाल्पाय् छैया दथु भ्याःया क्वसं सीधा थांक्वः लाकेमज्यू धइगु नं विश्वास दु । थुकिया ल्यूनेया कारण बारे मस्यूसां न्हापानिसें लाके मज्यू धयातःगुलिं छै दनेबल्य् स्वपाः भ्याः दुसा दथुइ च्वंगु भ्याः क्वय् थांक्वः (पिलर) तइमखु । पाल्पाया छै चा, अप्पां दय्कातःगु दु । स्वाहानेया सिँ दक्को चिकीसं दय्कातःगु दु । डाँडाय् वस्ती दय्कूगु कारणं पाल्पाया छै न्त्यःनं छतँजाः व ल्यूनं नितँजाः जूगु विशेषता खः । जग तइबल्य् नं त्वहं तयाः जक दय्की, अप्पा तइमखु । धलिं तइबल्य् सिँया द्यःने दली तयाः हानं दलीया द्यःने सिँ लानाः तयातःगु दु । दलीया निखे चुकू तयगु चलन दु । छैया मूलखां दुने हाकनं मेगु लुखा दुगु थनयागु विशेषता खः । थन पुलांगु शैलीया तचा माःता बाःता छ्यलातःगु दु । पाल्पाय् छुं नं पूजा याय् न्त्यः दकले न्हापां पिखालखु पूजा याइ । पिखालखु पूजा याय्धुंकाः तिनि मेमेपिं द्यः पूजा याइ । पिने पूजा यानाः दुहाँ वय्बल्य् नं पिखालखु पूजा यानाः तिनि दुहांवनी । थ्व पाल्पायागु विशेषता खः ।

लिखँ

नेवाःतय्सं नालाः वयाच्चंगु वास्तुशास्त्रया थःगु हे मौलिकता दु । वास्तुशास्त्र ज्ञानया आधारय् छै दय्कीगु तरिका सीका काय्फइ । पाल्पाय् थःगु हे तरिकां छै दय्काच्चंगु खःसा आः वयाः इन्जिनियरया ग्वाहालि कयाः छै दय्केगु सुरु जुल । पुलांगु वास्तुशैलीया छै बुलुहुं न्हनावनाच्चंगु खनेदु । थुकिया मू हुनि धयागु द्रूत गतिं

अप्वयाच्वंगु शहरीकरण व जनसंख्या वृद्धि खः । यैय् नं आपाः धयाथें परम्परागत नेवाःछें, म्हो जुजुं वनाः उकिया थासय् ढलानछें, दनेगु जुइधुंकल । पाल्पाय् पुलांगु छें, ल्यं दनि । पाल्पाय् २०० वर्ष पुलांगु ५०० खाः ति पुलांगु छें, ल्यं दनि ।

पाल्पाय् स्वनिगःया थीथी थासं नेवाःत बसाईसराइ जुयावःगु खनेदु । विभिन्न थासं बसाईसराइ जुयावःगु जूसां पिनें स्वयंबलय् नेवाःतय्गु पुलांगु छेंया आकार अथे अथे हे खनेदु । छें, दय्केवलय् छु सामग्री न्ह्यःने दु उकिं हे दय्केगु यानाच्वंगु खनेदु । गथे बूअप्पा मदुगु इलय् कच्ची अप्पा तयाः छें, दनातल । छें, दने न्ह्यः जग तइबलय् पुजा याइगु तरिका धाःसा नेवाःदथुइ नं समुदायकथं पाः । गुगुं समुदायं गुरुजु तयाः पुजा यानाच्वंगु दुसा गुगुं समुदायं धाःसा छेंया मूलीं हे पूजा याइगु जुयाच्वन । पाल्पाय् दक्वो छेंया भ्या चिपाः । लुखा नं चीधं । भौगोलिक कारणं यानाः अनया छें, तःखा मजू । चट्टान द्यःने वस्ती दुगुलिं छेंया क्वय् तल्लाया क्वसं नं मेगु तल्ला दु । छेंया हरेक क्वथाय् मत तय्गु नितिं ग्वाखंप्वाः तयातःगु दु । सँभ्याः, तिकिभ्याःत तयातःगु दु । बार्दली पिकयातःगु छें, दुसा छेंया पिने पिखालखु दय्कातःगु छेंपाखें नेवाः पहिचान पिब्वयाच्वंगु दु ।

लिधंसा

श्रेष्ठ, तेजप्रकाश (नेसं ११३०) 'नेवाः लोकवार्ता', नेवाः लोकवार्ता । यल नेपालभाषा केन्द्रीय विभाग, पृ. १-१९ ।

श्रेष्ठ, तेजप्रकाश (नेसं ११३०) 'वास्तु व ज्ञान', नेवाः लोकवार्ता । यल नेपालभाषा केन्द्रीय विभाग । यलः नेपालभाषा केन्द्रीय विभाग, पृ. २२९-२४० ।

जोशी, रास (नेसं ११३०) 'अन्धविश्वास', नेवाः लोकवार्ता । यल नेपालभाषा केन्द्रीय विभाग । यलः नेपालभाषा केन्द्रीय विभाग, पृ. २७२-२८१ ।

सिंह, दशरथमान (नेसं ११३६) त्यो समय, त्यो परिवेश : मेरो जीवनयात्राको संस्मरण । काठमाडौं: न्हूजः गुथि (वि.सं. २०७३) ।

खँल्हाबल्हा

त्रिरत्न लाल शाक्य, (५८ वर्ष, नायः, नेवाः देय् दबू तानसेन) तक्सार त्वाः, खँल्हाबल्हा २०७३ फागुण ४, थाय् : त्रिरत्न लाल शाक्यया पसः, तक्सार ।

सौन्दर्या शाक्य, (४५ वर्ष) तक्सार, तानसेन, खँल्हाबल्हा २०७३ फागुण ५, थाय् : सौन्दर्या शाक्यया छें ।

पाल्पाया लोकोपचार



केशरी प्रधान

मूति

पाल्पाय् दुगु लोकोपचार आपालं पुर्लापिं मनूत दुथाय् छैय् बांलाक न्ह्यानाचवंगु दुसा आधुनिक मनूतसें मया: थें नं खनेदु । तर बांलाक खं न्यनेबलय् ला धात्थें हे त्व:तूगु मखु, थुकिया प्रयोग जक म्हो जुयावंगु खनेदु ।

१. लोकोपचारया घटना

घटना १

भगवती त्वालय् च्वनादीम्ह न्यय्खुदं दुम्ह विमला श्रेष्ठजुं धयादीकथं ह्याउंमचात स्वाउंचाल धा:सा इमू दाय्का: कापतय् प्व:चिना: ग:पतय् घाका: तय्गु, मचातय् न्हाय्पं प्वा: खंकेबलय् नं हलू चिकं पाकेगु या: । अथे हे थ:थाय् लहिनातयाम्ह खायात गनं घा: जूसां हलुचिकं पाकेगु यानावयाचवंगु दु । स्वय् स्वाउंचा:सा (सेखं चा:सा) इमू, हलू, पालु, चि तया: ल: त्वनेगु । प्वा: गडबड जुया: अपच जुलधा:सा हलू, मी, चिकं ह्वानागु धौ नय्गु । पत्थर बढे जुलधा:सा लैसू तया: कोल: केँ नय्गु । मस्त सातुवनीबलय् द्य:मांथाय् क्यंवनेगु वा गुर्जुथाय् क्यंवनेगु नं चलन दु । पुनाह:सा नागयात पुइँ तया: पूजा यानाबी । शरीरं ही बा:वल (bleeding) धा:सा कुमारी द्य: पूजा याय्गु चलन दु ।

घटना २

भीमसेन त्वालय् च्वनादीम्ह पीछ्दं दुम्ह रञ्जना श्रेष्ठ अउकइ वइबलय् वह:या अंगुनं तग्वय्क गोल च्वया: दथुइ लाक्क थिया: अउकइयात 'छ तना हुँ कि कराइँ स्वया: तग्व: जुइक वा' धाय्गु यात धा:सा अउकइ लनावनी धइगु

विश्वास दु । कराई पाय्गवःगु अउकइ मिखाय् गथे न्ह्यनी, उकिं वं त्वःतावनी' धइगु विश्वास दु । अथे हे न्हासि वइबलय् हाकः पाकाः निगः मन्त्र व्नाः ईका, पःका वांछवयबलय् छथुं हे न्हासिवःगु दीगु लोकविश्वास नं दु । थ्व विषयस वय्कलं डाक्टरयाथाय् वनाः न्हासिवःगु मद्युम्ह छम्ह मनुखं थुकथं हे हाकः पानाः मन्त्र व्वंगु इलय् न्हासिवःगु द्यूगु खँ नं तनादिल ।

घटना ३

तानसेन, बसन्तपुर निवासी समाजसेवी निर्मल श्रेष्ठया कथं मस्त ख्वाउँचायाः बिरामी जुइबलय् कापलेया क्वय् चुलाः म्हयखा-पाया खरानी नाप नकल कि लनि धकाः धयादी । वय्कलं थःगु छेय् नं कछुवाया कंकाल व अथे मेमेपिं कीत मुंकातयादीगु दु । नःलास्वांया कुँ न्हासय् छवयाबिल धाःसा वा त्वंकल धाःसा नं सेखं चाःगु लनिगु कनादिल । अथे हे वय्कलं असुरोया लप्तेय् तयाः लः दाय्काः बाफ काय्गु याःसां सेखं क्वलाइ धयादिल । सेखं चाइबलय् कागतीया अचार नं नय्गु बांलाः धकाः नं कनादिल ।

घटना ४

जीना श्रेष्ठया कथं ८१ वर्ष दुम्ह पूर्णबहादुर श्रेष्ठयात ज्वनाकइ (जनीकइ) वःबलय् पुंयात सःताः सिंह च्चकाः इतुंबहालय् पूजा यानाः नागयात पुँइ हाय्कल । अले तुयु हाम्वः, तुयु सितु व सा दुरु तयाः कइलय् नं पाय्गु यात । उलिं मगानाः छाला विशेषज्ञ क्यनाः वासः नं पानाबिल । तर वय्कःया कइ मलन । सःसस्यूपिंथाय् क्यंवंबलय् थुकिया दोष डाक्टरयाथाय् क्यंवंगुलिं नाग कोप जुल धकाः धयाहल । वय्कःया कइ क्वमलात, अले वय्कःया ल्हाः नं कय्कुना वन, म्ह नं कय् कुनावन । वय्कः परलोक जूबलय् म्ह हे तमप्यं हँ । थुकथं ज्वनाकइ वइबलय् डाक्टर क्यनेमज्यूगु धारणा दुगु खँ जीनाजुं कनादिल । वय्कलं दसू कथं पूर्णबहादुरया हे छय्या खँ नं तनादिल । छय्यात नं ज्वनाकइ वःगु इलय् नागयात पुँइ हायाः पूजा यानाः तुयु हाम्वः, तुयु सितु, सा दुरु तयाः पाकाः सिंह च्चकाबिल । तर वय्कलं डाक्टर क्यनामदी । अले वय्कःया कइ क्वलानावन । भचा भचा स्याःथाय् वासः मपासे विभिन्न आसन यानाः ल्हाः म्ह संकेगु जुल । थौंकन्हय् वय्कः पूर्ण स्वस्थ जुयादी धइगु खँ जीना श्रेष्ठजुं कनादिल ।

घटना ५

वसला श्रेष्ठजुं भुजिंखां न्याइबल्य न्यां लाय्गु जालिं बुयाः ध्वात्तु ध्वानाः जालीयात स्वाहाने क्वय् तयावीवं लनी धयादिल । अथे हे मचाया प्वाथय् किमि दाःसा पालाबी च्वलाः त्वंकाः ल्यंगु पालाबी वयात तुं क्वखाय्का ब्यूसा क्वलानावनीगु खँ धयादिल । अथे हे, थः मस्त मचाबल्य हे सीगु, आपाः मम्बाइगु जुयाः मचा चीधिबल्य हे क्वजातयात मचा मियाछ्वय्गु खँ कनादिल । वय्कःया कथं मचा चीधिबल्य हे क्वजातयात मियाबीमाः अले वःगु ध्यवाया ची न्यानाः नयाबिल कि उम्ह मचा म्वानाच्चनीगु विश्वास दु । थ्व विश्वास आःतक नं न्त्याना हे च्वंगु दु । क्वजातयात मचा मीगु विषयस स्पष्ट यानादिसें वय्कलं मचा मिया धकाः यक्व ध्यवा कयाः मचा बिया हे छ्वय्गु मखु, छतका दां कयाः मचा वयात लःल्हाना बीगु अले व मचायात थम्हं हे कयाः लहिनाः ब्वलंकेगु खः ।

घटना ६

तानसेन नगरपालिकाया पार्कय् दुम्ह राधिका प्रधानजुं नं माल्पा छुयाच्चनावल्य न्ह्यःने च्वनाच्चम्ह मचायात ग्वारा ग्वारा दाःगु घ्यःचिकं लाःथाय् न्ह्यःनेसं दुगु गमलाया चा पाका बीवं लंगु खँ कनादिल । गमलाया चा काय्गु ईतक फ्वंगाना वय्धुंकूगु जूसां लिपा छुं नं मजुइक लनावन धकाः धयादिल । अथे हे, क्वाःगु च्या वाःगु इलय् आलु तानाः उकिया भोलं लुनाः उकिया झःने आलु तानाः तयाब्यबल्य याउँसे च्वंगु व फ्वमगासे लनाच्चंगु जानकारी बियादिल ।

घटना ७

बोक्सीं स्यंकूबल्य गुकथं उपचार याना धकाः स्थानीय अपर्णा प्रधानं धयादिल । वय्कलं धयादीकथं छम्ह मिसाया मचा बूबल्य थःछेपाखें न्हून्हुगु वसः, कापः तयाः मचाबू स्वःवल । मचा बूम्हेसिके बाबांलाःगु व न्हून्हुगु वसः खनाः अन छम्ह बोक्सीयात सह याय्मजिल । वयात नं उगु वसः काय्मास्तिवल । तर कर्कीया वसः गथे काय्गु, गय् काय्गु जुयाः चान्हय् वनाः व बोक्सीं मचा बूम्हेसित सास्ती याःवन । मचायात नं दुरु हे त्वंके मब्यू । न्हियान्हिथं चान्हय् जुल कि सास्ती याःवनीगु जुल । मचा बूम्ह मिसा ला गंसी जुयाः मफयावन । मचा नं ब्वलनीगुया पलेसा भन् प्याताहां च्वनावन । अले क्यंवंबल्य बोक्सीं



थ्व देगल्य् भैरा:घः त्वपुनातःगु दु । थुम्ह भैरा:घःया ख्वा:पाल्य् मिखा चूलाका: स्वल कि मनूत सी
धैगु लोक विश्वास दु ।

छंगु वसः बांलाः व यक्व दुगुलिं छन्त सास्ती याःवःगु खः । वयात वसः छजु
ब्यू धकाः धयाहल । थ्वलिपा छैय् वनाः छजु बांलाःगु वसः ल्ययाः वोक्सी (थः
हे मनू) यात वीयंकल । अले वं नं न्हिलाः न्हिलाः उगु वसः काल । थ्व लिपा
मचा व मांया उसांय् भिनावल ।

घटना ट

ह्याउँ मचायात पित यंकेवल्य् मामं हाकुगु सिन्हः तिकाः जक पित
यंकी धकाः स्थानीय कमला तुलाधर शाक्यं जानकारी बियादिल । वय्कलं थम्हं
छन्हु अथे मयासे मचायात पिने यंका हयावल्य् मचां दुरु जक ल्हवयाः ख्वाः
ह्याउँसे च्वंकाः मफय्कूगु थःगु अनुभव नं कनादिल । लिपा वय्कःयात थः
मामं मस्त्य् सुरक्षा याय्माःगुलिं हे हाकुसिन्हः तिकाः वा पालितःलेया सिन्हः
तिकाः पिने यंकीगु खः धकाः ध्वाथुइकाब्यूगु व अनलिपा थम्हेसिनं मामं धाःथें
यानावयाच्चनागु खँ वय्कलं कनादिल । अथे हे, वय्कलं मचात अर्द्धि चाइवल्य्
चिकं कुँ थंकेगु व कुँ थंकागु इताःयात हाचां गाय्कीगु खँ नं तनादिल ।

घटना ९

स्थानीय छम्ह बुरिम्ह अजिं थःपिसं न्हापा कपाः स्याइबल्य् सुथसिया ह्याउँ निभाःद्यःयात कःसिइ च्वनाः मत बीबल्य् कपाः स्याःगु लनावनी धयादिल । वय्कःया कथं ह्याउँ निभाःद्यवं स्याःगु कपाः लंकाबी । मेम्ह छम्ह अजिं थः चय्निदँ दतं नं आःतकं वा बुइबल्य् बुरुसं वा मबुसे दत्तिवन छ्यलाच्चनागु जानकारी बियादिल । प्याःगु दत्तिवन मदुसा गंगू जूसां छ्यलेगु अले ई दुबल्य् वयात निनाः धू यानाः तयाः उकिं वा चुलेगु जानकारी बियादिल । चय्दँ दुम्ह वय्कःया वा उतिकं हे बांलाः बल्लाः खनेदु ।

२. लोकोपचारया आधार

२.१ सफाई

नेवाःत सुथ न्हापां दनाः बसिबँ पुइमाः । सुथ न्हापां दनाः छेंछखां बँ पुइगु ज्यायात हे बसिबँ पुइगु धाइ । बसिबँ मपुसे छुं हे ज्या याय्मत्यः । छें सफा मजुइक छुं ज्या याय्गु धइगु खँ तसकं बांमलाःगु खँ खः ।

२.२ धर्म

त्यःमत्यः, भिमभिंया आधार्य् लोकविश्वास दयाच्चनी । द्यःयात जवय् लाकाः चाःहुलेमाः । ल्वहं, ठलोट, खाः आदिया द्यः दय्काः प्राणप्रतिष्ठा यानाः थ्व धात्थेंयाम्ह हे द्यः धकाः पुज्याइ । दक्वसिवें तःधंगु त्यःमत्यः ला पाल्पाया तःधंम्ह भैरःद्यःया ख्वाः स्वयाः मिखा चूलाके मत्यः धइगु दु । थ्व मनूया धार्मिक आस्था खः ।

२.३ व्यावहारिक

स्वाहाने हाचां गाय्मज्यू, थ्व विश्वासया आधार व्यावहारिक जू । पुलांगु स्वाहानय् धू पनेगु पौ तयातःगु दइमखु । धू फुक्क कुतुंवनाः क्वय् च्वंम्ह मनूयात लाइ । थ्व विश्वास पुलां पहलं दय्कातःगु सिँया स्वाहानय् जक जुइ । उकिं थौकन्हय्या ठलान छेंय् थ्व खँ विश्वास मयाय्धुंकल ।

२.४ मनोवैज्ञानिक

भाकल याय्गु, किसली अन्याय्गु, कलः वनेगु आदि चिजत थःगु मन

शान्त याना: जीवनयापन याय्त न्ह्यानाच्चनी । मन आनन्द जुल कि सकतां ठीक जुइ । अथे हे, तन्त्रमन्त्र याय्गु, भारफुक याय्गु इत्यादि ज्यां मनूतय्त छगू छाप लानाच्चनी । ‘याय्मा: धा:गु ज्या मयाना: जित: मजिल ला ? थत्थें द्य:मांया थाय् वा अजिया थाय् यंका: छक्व: फूफा: या:सा जी ला ?’ धयागु खँ मनय् वालाच्चनी । अथे हे मेगु उदाहरण स्वबाय् ल्वाकेमज्यू धयागु विश्वास आ:तकं दनि । यदि थथे जुल धा:सा नकिं छथु वांछवया: जूसां प्यबाय् लाका: मनयात शान्त यानाच्चनी ।

२.५ भौतिक

लोकविश्वासय् भौतिकवस्तुत नं छयलाच्चनी । हां न्यात धा:सा नँ चुला: पाय्गु, छा:किलं छाइबलय् चिकं मदुगु सँ बुलेगु । प्व: व:थाय् बजि न्ह्यया: पाय्गु ।

२.६ वनस्पति

मिखा तेल्लाकेत अँतलिचा तरकारी नय्गु । चिनी ल्वय् जुइबलय् ब्या:माया ह: नय्गु वा रस त्वनेगु । न्याँया कँ कथुइ थाइबलय् तकुस्वां (लालिगुराँस) नय्गु वा नां जक का:सां ज्यू धइगु लोकविश्वास दु ।

२.७ स्वास्थ्य

अष्टमी, एकादशी, पुन्हि, संलू वा मंगलबारया अपसं च्वनेमा: धयागु नं लोकविश्वास दु । न्हिया न्हिथं उलि हे नजक नयाच्चन धा:सा नं मनू म्हं मफइगु यक्व सम्भावना दु । न्हापा नयात:गु पचे मजुइक हाकनं नलधा:सा अपच जुइ । अले विभिन्न रोगत पिहांवइ । उकिं आवश्यकता अनुसार वा:या छन्हु, निन्हु अपसं च्वनेगु याइ । तर बार, तिथि वा संलू फुक्क मुंका: न्हियान्हिं अपसं च्वनधा:सा नं कमजोरी जुया: मनू म्हं फइमखु ।

२.८ वैज्ञानिक

उत्तरदिशाय् छयं लाका: द्यने मत्य: । भौगोलिक चुम्बकीय दिशानाप मिले मजुइ धका: थुज्व:गु लोकविश्वास छयलात:गु ख: ।

२.९ सुरक्षा

बहनी बाय् च्वनेत वःपिंत लितछ्वय् मत्यः । बहनी छँया धू पुयाः
वांछवय्मत्यः । देगल्य् द्यः जक याकःचा थ्यने मत्यः । पाल्याया मनूत शिक्षित
जुयावंगुलिं थन अन्धविश्वास खनेमदय्धुंकल । तर नं न्हूगु पुस्तां गुलिसिनं
कारण थुइकाः सा गुलिसिनं थकालिपिसं धाःगु धकाः व गुलिसिनं न्हापानिसें
यानावयाच्चंगु ज्या आः नं यानाबियाः छु हे स्यनी धकाः न्ह्याकाच्चंगु दु ।
अथे हे उपचारय् नं अजि, द्यःमां, धामी, भाँक्री, वैद्यपिनिगु वासः स्वयां आपाः
डाक्टरयाथाय् वनाः आलोपाथी वासः यानाच्चपिं यक्व दु । आयुर्वेदं नं क्वातुक्क
हे थाय् कयातःगु खनेदु ।

लिखँ

पाल्पाय् लोकोपचार अनया ज्याथःजिथिपिंके थःथःगु किसिमया अवधारणा
खनेदु । स्वनिगल्य् थें हे थन नं थःत माःगु उपयोगी जुइगु खःसा ज्यू मज्यू
त्यः मत्यः नं छछलाच्चंगु नं खनेमदुगु मखु । थनया छगू विशेष लोकविश्वास
धयागु भैराःद्यःया ख्वाःपालय् मिखा चूलाकाः स्वल कि मनूत सी । थ्व ला छगू
अन्धविश्वास खः । अथे जुयाः आःतक नं मनूतय्त व द्यः क्यनीमखु । सुचुका
हे तयातःगु दु । थथे त्रास दुगुलिं यानाः मनुखं स्वय्गु साहस नं मयाः । तर
गुकिया ल्यूने छगू गहन कारण दुगु जुयाच्चन । थ्व द्यः मुकुन्दसेन जुजु जूबलय्
स्वनिगल्य् आक्रमण यानाः त्याकेत स्वःबलय् छुं याय्मफुसेलिं व द्यः छम्ह
खुयायंकूगु जुयाच्चन । जुजुं खुयाहःम्ह द्यः न्ह्यःनेलाःथें क्यनेमज्यू, लिपा मछिनीगु
जुल । अले द्यः चूलाक स्वय्मज्यू धाःसा अःपुल । सुचुकातःगु नं धाइमखुत ।

अथे हे न्हियान्हिथंया व्यवहारय् पुलांपिं विशेष यानाः जिथिपिं दुगु छँ
स्वर्गया नरकयाया नामय्, पुनर्जन्मया नामय्, आत्माया नामय्, म्हगसया नामय्
नं छुं नं छुं ला अन्धविश्वासया ज्या नं यानावयाच्चंगु खनेदु । छाय्धाःसां मनु
व्वलंगु हे थज्याःगु अन्धविश्वास दुगु समाजय् खः । उकिं यानाः काचाक्क त्वःते
नं थाकु । तर थौकन्हय् नचापिं मनूतसैं थुपिं फुक्क वस्तुया धापूया वास्तविक खँ
व उकिया उद्देश्य नं थुइकाः उकियात अर्थपूर्ण याय्गु कुतः नं यानाच्चंगु खनेदु ।

छँया थकालीपिं पुलांपिं मनूतय्सं धयादीगु खँयात अनुभवया आधारय्
यानादीगु आवश्यकताया आधारय् यानादीगु, हनावना, सरसफाइवारे नं ज्ञां
बीत यानादीगु नियम व बन्धनया त्यः मत्यः, ज्यू मज्यू जूसा वयात आःतक

नं न्ह्याकाच्चंगु खनेदु । उसाँय् मदयधुंकाः वासः यानाः विरामी लंकीगु जक
बुद्धिमानी मखु । व स्वयां अप्वः बुद्धिमानी ला रोगं हे मथीकेगु खः । थुकिया
प्रयास ला भक्तु हे तःधं ।

लिधंसा

कसाः, शरद (नेसं ११३०) 'जातिया म्हसीका' लोकवार्ता । यलः नेपालभाषा केन्द्रीय विभाग,
पृ. २०-४५ ।

जोशी, रास (नेसं ११३०) 'अन्धविश्वास' लोकवार्ता । यलः नेपालभाषा केन्द्रीय विभाग, पृ.
२७२-२८१ ।

तुलाधर, प्रेमशान्ति (नेसं ११२०) नेपालभाषा साहित्यया इतिहास । यैः नेपालभाषा एकेदमि ।
श्रेष्ठ, ईश्वरीमैयाँ (नेसं ११३०) 'लोकोपचार' लोकवार्ता । यलः नेपालभाषा केन्द्रीय विभाग,
पृ. २६२-२७१ ।

श्रेष्ठ, तेजप्रकाश (नेसं ११३०) 'नेवाः लोकवार्ता' लोकवार्ता । यलः नेपालभाषा केन्द्रीय
विभाग, पृ. १-१९ ।

खँल्हाबल्हा

अपर्णा प्रधान (७० दँ), तानसेन, २०७३ फागुन ४

कमला तुलाधर शाक्य (४५), तानसेन, २०७३ फागुन ४

चन्द्रमाया श्रेष्ठ (८५), तानसेन, २०७३ फागुन ४

जीना श्रेष्ठ (५८), तानसेन, २०७३ फागुन ४

जेठा वैद्य (८६), तानसेन, २०७३ फागुन ४

नारां वैद्य (८५), तानसेन, २०७३ फागुन ४

निर्मल श्रेष्ठ (६२), बसन्तपुर तानसेन, २०७३ फागुन ४

बुरिम्ह अजि (८२), तानसेन, २०७३ फागुन ४

मंगललाल महर्जन (८०), तानसेन, २०७३ फागुन ४

रञ्जना श्रेष्ठ (४१), भीमसेन टोल तानसेन, २०७३ फागुन ४

राधिका प्रधान (६०), नगरपालिका लागा, तानसेन, २०७३ फागुन ४

विमला श्रेष्ठ (५६), भगवती टोल, तानसेन, २०७३ फागुन ४

वसला श्रेष्ठ (८०), तानसेन, २०७३ फागुन ४

सुशिला श्रेष्ठ (६०), बसपार्क, तानसेन, २०७३ फागुन ४

सुगत बज्राचार्य (६५), तानसेन, २०७३ फागुन ४

पाल्पाया अन्धविश्वास



राकेश महर्जन

मूति

नेवाःवस्ती दुथाय् नेवाःसंस्कार, संस्कृति, रीतिरिवाजलिसें लोकबाखं, लोकम्ये, लोकचिकित्सा अले लोकविश्वास व अन्धविश्वास नं थ्यनाच्चंगु दु । पाल्पाया नेवाःतय् दथुइ भूतप्रेत, ख्याः, भकुग्वारा, किचकन्या, बोक्सी, राँकेभूत, घोडाभूतया खँ श्रुति परम्पराकथं ल्यनाच्चंगु दनि ।

१. पृष्ठभूमि

लोकलिसे स्वाःगु व लोकय् न्यनाच्चंगु परम्परानापया विश्वास हे लोकविश्वास खः । लोकविश्वासदुने विश्वब्रह्माण्ड, प्रकृति, पशुपंक्षी, सिमा, न्हि, ला, म्हगस, सकुन आदियाबारे लोकं यानावयाच्चंगु विश्वास व भूतप्रेत, डाकिनी, बोक्सी, जादू, धामिभाँक्री आदि जनविश्वास अले उकी सम्बन्धित थीथी लोकव्यवहार लाइ (श्रेष्ठ, १९३०:६-७) । विश्वास व अन्धविश्वास मानव सभ्यतालिसे हे न्ह्यानावयाच्चंगु दु । अन्धविश्वास धैगु धार्मिक, सामाजिक वा भौगोलिक पुचलय् ल्यनाच्चंगु चरम विश्वास खः । गुकी छुं नं कथंया ज्ञान, अनभुव वा कारण दइमखु । मात्र थःथःगु पुचलय् थःसिबें न्ह्यःया विश्वासया निरन्तरता दयाच्चनी, गुगु श्रुति परम्पराया आधारय् न्ह्यानाच्चनी (जोशी, १९३०:२७२-२७३) । समाजय् ल्यनाच्चंगु भूत, प्रेम, ख्याः, किचकन्या आदि प्रतिया विश्वास नं छगू अन्धविश्वासकथं ल्यनाच्चंगु दु । थम्हं मखंसां, अनुभव मयाःसां उकियात न्यनागु भरय् श्रुति परम्पराकथं थ्व खँ ल्यनाच्चंगु दु । नेवाःत अध्यात्मय् विश्वास याइपिं खः । उकिं नेवाःतय्के जन्म न्ह्यः व मृत्यु लिपाया संस्कार ल्यनाच्चंगु दनि । मनूत सी । सीधुंकाः वं मेगु जुनी काइ । तर गुलिं मनू सिनां नं वं यानातःगु छुं पापया हुनिं मेगु

जुनीइ वनेफइमखु, अले अगति जुया: थ्व हे संसारय् चा:हिलाचवनी धैगु विश्वासं भूतप्रेतया जन्म जूगु खः । जब मनू ग्याइ, वया मन ग्याइ, वयात लाइगु मानसिक डर, त्रासया हुनिं वं थुज्वःगु भूतप्रेत खनीगु, अनुभव याइगु खः । वया अनुभव हे श्रुति परम्पराकथं न्ह्यानावनी, अले भूतप्रेत खनीगु, किचकन्या, बोक्सीं स्यंकीगु, ख्याकं त्यःवइगु आदि आदि खँ लोकविश्वास वा अन्धविश्वासकथं समाजय् ल्यनाचवनी ।

२. विषयवस्तु

पाल्पाय् चवनाच्वं पिं आपालं नेवाःतय्के भूतप्रेत, ख्याः - विशेषरूपं भकुंग्वारा ख्याः, किचकन्याथेंजाःपिनि खँ दु । पाल्पा जिल्ला, विशेष तानसेनया नगरपालिकाय् दुपिं नेवाःतय्सं थःपिसं प्रत्यक्ष हे मखंसां, अनुभव याय् मलंसां अजि, अजापिसं कनातःगु लिसें अन हे दुपिं छम्ह निम्हेसित जूगु घटनायात धाःसा थम्हं खं थें च्वंक धाय्गु याः ।

तानसेन बसन्तपुरय् मसलाया पसः तयाचवनादीम्ह आलोक शाक्यं (५२ दँ) नं थःपिसं तप्यंक भूतप्रेत, किचकन्या आदि मखनागु जानकारी बियादिल । थःपिसं प्रत्यक्ष मखंसां न्हापा न्हापा तानसेन बजारय् घोडाभूत वइगु खँ वय्कलं कनादिल । वय्कलं न्यनातःकथं थ्व खँ थनिं ६०-७० दँ न्ह्यःया खँ गुगु इलय् बसन्तपुर बजारय् च्याखा-भ्रिखां आपाः छें मदु । मनूत बहनिसिया ८ ताः ई जुइवं घोडाभूत वइगु ग्याःचिकुं ग्यानाः जुइ । शाक्ययाके तानसेनया जक मखु, तानसेनं वुटवल बजार वनेगु लँपु दथुइ लाःगु छगू दोभानया नं खँ दु । अन दोभानय् दुगु खुसियात भूतखुसि (भूतखोला) धाइगु व खुसि च्वय् छपु ताँ दु । न्यादँ ति जक न्ह्यः, उगु ताँय् चान्हसिया १२ ताः ई जुइवं राँके भूत (मिप्वाः च्याकाः वइम्ह भूत) अंगः अंगलय् मि च्याकाः वःगु खं धाःपिं दु धकाः शाक्यं कनादिल । वय्कलं थम्हं धाःसा प्रत्यक्ष मखनागु जानकारी बियादिल ।

अथे हे वय्कलं अन बसन्तपुरय् दुम्ह छम्ह माष्टर धनबहादुर मल्लं धाःसा थुज्वःगु भूतप्रेत खंगु खँ नं कनादिल । वय्कः माष्टर मल्ल थगुने तिति मदुगु जुल । शाक्यं धयादी कथं, माष्टर धनबहादुर मल्ल थम्हं हे खंगु धकाः तःधिम्ह भूतया खँ कनादिल । न्हापा न्हापा अन आपाः छें मदु । उगु त्वालय् भचा क्वय् छधाः ल्वहंहिति दु- निसां हिति (निशान हिति) । अनं

तःध्रिसे च्वंम्ह छम्ह भूत पिहांवःगु व उकियात माष्टर मल्लं थम्हं हे खनागु, भूत खनेवं म्हं हे पीसे च्वनाः बिस्सुं वनागु धकाः मल्लं कनादीगु खँ शाक्यं जानकारी बियादीगु दु ।

अथे हे, वय्कलं सिनरीडाँडाय् किचकन्या वःगु खँ नं कनादिल । छम्ह ब्रम्हूया मचाया उम्ह किचकन्या नाप मतिना जूगु, बहनी जुलकि व मचा उगु डाँडाय् वनीगु व लिपा वनाः उम्ह मचा सीगु खँ शाक्यं कनादिल । उम्ह मचाया नां वय्कलं धाय्मफुसां अनयापिं ईश्वरीप्रसाद दाजुकिजा खः धइगु थम्हं न्यनातयागु दु धकाः धयादिल । वय्कःया कथं उम्ह मचा सीन्त्यः तसकं गंसी जुयावंगु खः । किचकन्या गुज्वःम्ह जुइ धइगु न्ह्यसलय् थःपिंसं प्रत्यक्ष मखंसां न्यनाकथं तसकं बांलाःम्ह ल्यासेम्ह जुइगु तर वया ग्वालिन न्ह्यःने लाइगु खँ वय्कलं तनादिल ।

थुकथं शाक्यया कथं, तानसेन बजारय् घोडाभूत, लोहंहितिइ तःध्रिम्ह भूत, तानसेनं बुटवल वनीगु दोभानय् भूतखोला धइगु खुसिसिथय् राँके भूत व सिनरीडाँडाय् किचकन्या दुगु व थुज्वःगु खँ अन श्रुति परम्पराकथं न्यनावनाच्वंगु सीदु ।

भाजु आलोक शाक्यं न्ह्यथनादीम्ह माष्टर धनबहादुर मल्ल, गुम्हेसिनं तःध्रिम्ह भूत खंगु जुयाच्वन, वय्कःया जहान शान्ति अमात्य मल्ल (७८ दँ) या कथं न्हापा न्हापा जक थुज्वःगु भूतप्रेत खं धाइपिं दुगु खः । तर थौंकन्हय् थुकथं भूतप्रेत खं धाइपिं मदु । वय्कःया कथं बसन्तपुरया थः च्वनाच्वनागु छेंया ल्युने दुगु क्यबचाय् धाःसा न्हापा न्हापा किचकन्या वइगु व वय्कःया निनिपिंसं कनातःकथं उगु क्यबचाय् किचकन्या खनेदइगु खः ।

मनू मदयाः दच्छितक नं क्यंवयाच्वनीगु, सः वयाच्वनीगु सन्दर्भय् बसन्तपुरया हे बेनीकुमारी श्रेष्ठं (८० दँ) नं थम्हं उज्वःगु छुं अनुभव मयानागु खँ तनादिल । श्रेष्ठया कथं सीम्हेसिनं अथे क्यंवइगु, सः वइगु जक मखु, म्हगसय् तकं क्यंवइगु धयातःसां थम्हं अनुभव याय्मलंगु जानकारी बियादिल ।

भाजु आलोक शाक्यं हे न्ह्यथनादीगु निशां हिति बसन्तपुर त्वालं भचा क्वय् लाः । उगु हे त्वालय् छें दुम्ह पाल्पाया हनेबहःम्ह चिनियालाल बज्राचार्यजुं थुगु हिति स्वसःदँ न्ह्यः दय्कूगु जानकारी बियादिल । वय्कःया कथं पल्टन (निशान)तय्सं दय्कूगुलिं थुकियात निशान हिति धाःगु व



पाल्याया निसां हिति (निशान हिति)

नेवाःभासं निशां हिति जूगु खः । थुगु हिति दय्केत खुगू-न्हय्गू कोश तापाक्कं
ल्वहं कुबियाहःगु खःसा यँपाखें नेवाःकालिगढतय्त सःतूगु खः । थुगु हितिया
दुवातय् मनू सीबलय् छ्वासः वाय्गु चलन दु । थुगु ल्वहंहिति च्वय् छमा
सिमा दु । उगु सिमा हे थन दुम्ह ख्याःया बास खः धकाः वय्कलं कनादिल ।
हितिया मू लुखाय् भकुंग्वारा ख्याः दुगु व सिमाक्वय्या ह्वतं उम्ह भकुंग्वारा
ख्याः दुत-पित जुयाः सिँखानि तक थ्यंकः वनी धकाः नं वय्कलं धयादिल ।

खँल्हाबल्हाया भवलय् वय्कलं थुज्वःगु भूतप्रेतया खँ आः वयाः
अन्धविश्वास जुइधुंकूगु जानकारी बियादिल । मनूत शिक्षित जुयावःगुलिं
थुज्वःगु खँ मिखा तिसिनाः विश्वास मयाइगु जुल । न्हापा न्हापा मनूत शिक्षित
मजूगु, खःथें च्वंक धाःगु खँ पत्याः याइपिं जूगुलिं थुज्वःगु अन्धविश्वासया
खँ नं न्यनावंगु अनुमान वय्कलं यानादिल । लिसें थुज्वःगु खँय् कल्पना
व्यापक जुयाच्चनी धयादिसें वय्कलं थुकिया निंतिं योमरिया बाखंया दसू
बियादिल । वय्कःया कथं योमरि हे सइगु सिमा ला गनं मदु, तर सिमाय्
सइगु छुं नं सि योमरि थें माकु, चाकु जुइगुलिं उकियात योमरिया कल्पना

यानाः दय्कूगु धयादिल । उकिं थन दु धाःम्ह भकुंग्वारा ख्याः नं सुयां कल्पना जुइफु धयादिल । उकिं आः वयाः ख्याः धइपिं हे मदय्धुंकल । अथे खःसां द्यःमां, वैद्यथेंजाःपिं आः नं दनि धयादिसें वय्कलं थःगु छें लिक्कसं दुम्ह छम्ह द्यःमांबारे नं जानकारी बियादिल गुम्हेसिनं बिरामीतय्त लः, जाकिपाखें फूफा याइ, मनूतसें आःतकं वयात विश्वास यानाच्वंगु दनि धयादिल ।

पाल्पाया छम्ह नांजाःम्ह समाजसेवी एवं थीथी राष्ट्रिय दैनिकया स्तम्भकार भाजु निर्मल श्रेष्ठनाप भूतप्रेतया खँ कुलाबलय् भूतप्रेत, ख्याः, किचकन्याया खँय् कल्पना जक मखु, गनं गनं वैज्ञानिकता नं दयाचवनी, तर थुज्वःगु खँ गनं ल्यूने सुलाचवनीगुलिं उज्वःगु खँ नं माले फय्केमाः धयादिल । न्ह्यागु चिजयात नं विज्ञानसम्मत् स्वय्माः धयादीम्ह श्रेष्ठं दसूया निंतिं नं न्याइबलय् पिहां वनेमज्यू धइगु लोकविश्वासया ल्यूनेया खँ उलादिल । नं न्याइबलय् मलखं कय्फुगु अवस्था दुगुलिं मनूतय्त सुरक्षित याय्पा निंतिं थथे पिहां वनेमज्यू धयातःगु व लिपा वनाः थुकिइ धर्म, सम्प्रदायया खँ स्वानाः पाप, धर्मया खँ वःगु न्ह्यथनादिल । वय्कलं भकुंग्वारा ख्याःया खँय् थ्व छताजि तुति मदुम्ह प्राणी जुइमाः गुम्ह ग्वारातुला जुइ । थुज्वःपिं प्राणी हे लिपा वनाः भकुंग्वारा ख्याःया रुपय् विकसित जुइफुगु अनुमान दु धयादिल । वय्कलं न्हापा छुं नं घटना जुइ, लिपा जक उकी कल्पना तनाः उकिया व्याख्या जुइ धयादिल । वय्कलं मथुगु खँ, मस्यूगु खँप्रति मनूत भन् उत्सुक जुइगु व थुकियात रहस्यवादकथं नाली, धयादिल । थम्हं मथूगु, मस्यूगु जुल कि व पाखें ग्याइगु व ग्याय्वं उकियापाखें छुं अनिष्ट मजुइमाः धकाः पूजा यानातइ धकाः श्रेष्ठं थुकिया दसूया निंतिं थौकन्हय् मनूतय्सं ब्वनेमसःगु रञ्जना, प्रचलित लिपिया सफूत द्यः-कोथाय्, आगमय् पूजा यानातइगु दसू बियादिल । वय्कलं थुज्वःगु भूतप्रेत सम्बन्धय् पाल्पापाखें हे प्रकाशित ‘भूतप्रेतको कथा’ नांगु सफूबारे न्ह्यथनादिल ।

पाल्पाया नेवाःतय् दथुइ भकुंग्वारा ख्याःया खँ नं आपाः जू । पाल्पाया नेवाःत आपाः दुगु लागा भीमसेन त्वालय् ढाकाया पसः तयावयाचवनादीम्ह अजय शाक्यं नं भकुंग्वारा ख्याःया बारे कनादीगु दु । वय्कःया कथं पाल्पाया तिनिख्यलं भचा क्वय् छद्माः हिति दु । अनतक वनेत भचा पाखा कुहांवनेमाः । उगु पाखाय् आपाः धयाथें भकुंग्वारा ख्याकं मनूतय्त ख्याःवःगु धाःगु वय्कलं न्यनातयागु दु धयादिल । वय्कलं न्यनातःकथं सुथ न्हापां लः काय्त उगु

हिती वनीपिंत ग्वारा ग्वारा तुइक दय्काबीगु, तुति-तुती वया: जू वइगु ज्या उम्ह भकुंग्वारा ख्याकं यानाच्चंगु ख: । थुज्व:गु घटनात गुलिं ३०-४० वर्ष न्ह्य:या ख:सा गुलिं आ: दँबदँ न्ह्य:या नं दु धका: नं वय्कलं धयादिल ।

भीमसेन त्वा:या हे ४१ दँया मय्जु रञ्जना श्रेष्ठजु, गुम्ह अन छ्गू सिलाई पस: चाय्का च्वनादीगु ख:, वय्कलं नं थुज्व:गु भूतप्रेतया खँ थम्हं न्यनातयागु जानकारी बियादिल । वसन्तपुरय् घोडाभूतया बारे खँ जूगु ख:सा वय्कलं धा:सा तुयुम्ह सलया बारे धयादिल । वय्क:या कथं न्हापा न्हापा पात्पाय् मनू सिना: छपुच: मनूत क्रिया च्वनाच्वन । क्रिया च्वनेगु थासय् उगुंथुगुं गफ नापनापं तुयुम्ह सलबारे नं खँ जुयाच्वन । तुयुम्ह सलया खँ जुयाच्चंगु इलय् हे अन तक् तक् स: वय्क: धात्थेंयाम्ह छम्ह तुयुम्ह सल थ्यंक:वल । तुयुम्ह सलया खँ जूगु व धात्थें तुयुम्ह सल थ्यंक:व:गुलिं क्रियापुत्री च्वनाच्चंपिनि सात्तु वना: छग्वारा जुइक ग्यात । उबलय् हे जुद्धशमशेरया सिपाहींत वया: दरबारपाखें तुयुम्ह सल बिस्युं व:गु खं ला धका: न्यंवल खनि । उमिसं वल्ल सीकल कि व तुयुम्ह सल दरबारयाम्ह जुयाच्वन । श्रेष्ठया कथं उमिसं उगु इलय् तुयुम्ह सल धका: सुं घोडाभूतया खँ ल्हानाच्चंगु खय्फु गुकिं याना: अन तुयुम्ह सल खनेवं हे उपिं ग्या:गु जुइमा: । मखुसा सलया खँ जुयाच्चंगु इलय् सल थ्यंक:वय्वं ग्याय्मा:गु छुं खँ महु । क्रियापुत्री च्वनाच्चंपिंसं लिपा तुयुम्ह सलया खँ कल्पना तना: न्यंकाजूगु व लिपा थ्व हे न्यंकंवाखं जुयावंगु जुइमा: धइगु विचा: नं श्रेष्ठं प्वंकादिल । लुमंकेवह:जु, तानसेनय् तुयुम्ह सल, घोडाभूतया खँ नं आपालं न्यनेदु ।

अथे हे, बोक्सी व बोक्सीं स्यंकूगु विषयस नं स्थानीय मय्जु अपर्णा प्रधानं थ:के दुगु खँ न्यंकादीगु दु । वय्कलं धयादीकथं छम्ह बोक्सीविद्या स:म्हेसिनं छन्हु अन छम्ह मचाबूम्ह मिसाया छेंय् वया थ:छेंपाखें न्हून्हुगु वस: तया: मचाबू स्व:व:गु खंकल । न्हून्हुगु वस:ज्वलं खना: उम्ह बोक्सीविद्या स:म्ह मिसायात सह याय् हे मजिल । कर्पित ब्यूगु तप्यंक हचि धका: धाय् नं मछिन । अले थम्हं स:गु बोक्सीविद्यापाखें वं उम्ह ह्याउंमचाया मांम्हेसित स्यंकेंगु यानाहल । वया विद्याया हुनिं मां ला म्हां मफुत, मचां तकं दुरु त्वने मखनावन । न्हियान्हिथं सास्ती या:वनीगु जुल । मचा बूम्ह मिसा गंसी जुया: मफयावन । थ्व खना: छेंय् च्वंपिंसं स:स्यूम्ह क्यंवंबलय् छम्ह बोक्सीया विद्यां थथे जूगु धयाहल । लिसें वं वयाके दुगु न्हूगु वसतय् उम्ह

बोक्सीं मिखा तयाच्वंगुलिं छैय् वनाः वयात न्हूगु वसः छजु लःल्हानाबीगु सल्लाह नं बिल । वया सल्लाहकथं उम्ह बोक्सीविद्या सःम्हेसित न्हू वसः छजु बियाबिल । वसः काय्खनाः व बोक्सी विद्या सःम्ह नं लय्ताल । अले तितिनि मां व मचा स्वय् जियावल । उमि ल्वय् क्वलानावन ।

लिखँ

गन गन नेवाःबस्ती दु अन अन नेवाःतय् संस्कार, संस्कृति, रीतिरिवाजलिसें नेवाःतय् दथुइ व्याप्त लोकबाखं, लोकम्ये, लोकचिकित्सा अले लोकविश्वास व अन्धविश्वास नं थ्यनाच्वंगु दु । थ्वलिसें भूतप्रेत, ख्याः, किचकन्या आदिया खँ गथे स्तनिगःया नेवाःसमाजय् व्याप्त दु अथे हे पाल्पाया नेवाःसमाजय् नं थ्व खँ न्यनावनाच्वंगु दु । छगू थाय् त्वःताः मेगु थासय् वनेबलय् उगु थासय् दुगु न्हापायागु गुलिखे खँ नं अंगीकार जुयाः वनाच्वनी । उकिं पाल्पाय् नेवाःसमाजय् व्याप्त ख्याः, विशेषयानाः भकुंग्वारा ख्याः, किचकन्या, बोक्सी जक दुगु मखु, अन राँकेभूत लिसें घोडाभूत, तुयुम्ह सलया खँ नं दु । मिखा तिसिना याइगु विश्वास अन्धविश्वास खः । तर गुगुं नं विश्वास ल्यूने कल्पना नापं गनं गनं विज्ञान नं सुलाच्वंगु दइ । भूगोलकथं स्वयंगु खःसा पाल्पा छगू पहाडी जिल्ला खः । अझ पाल्पाया तानसेन छगू उज्वःगु थासय् लाः गन छगू त्वालं मेगु त्वालय् वनेत आपालं पाखा गय्माः, पाखां कुहां वनेमाः । तानसेनया वसन्तपुर त्वाः थजाःथाय् लाःसा भीमसेन त्वाः क्वजाःगु थासय् लाः । थुज्वःगु थासय् न्ह्यागुं वस्तु गुल्ते जुयाः वनी । थुज्वःगु भौगोलिक थासय् छगः ग्वल्लाःगु छुं नं वस्तु ग्वतुला वय्वं उकियात हे ख्याः भाःपीफइगु अनुमान याय्छिं । उकिं तानसेनय् भूतप्रेतया खँ मालेकुले यानाबलय् आपाःसिनं भकुंग्वारा ख्याः, गुम्ह ग्वतुलाः वइगु खः, या खँ न्यंकूगु दु । लिसें, पाल्पा राणाकालय् नं छगू प्रशासनिक थाय् जूगु पुष्टि जूगु दु । उबलय् थन आपालं जनरलपिसं प्रशासन न्ह्याकूगु दु । उकिं उपिं नापं थन सल दुहांवइगु जुल । उकिं थन घोडाभूत, तुयुम्ह सलथेंजाःगु खँ नं आपाः न्यनेदु । अथे हे, पाल्पा उगु लागाया जिल्ला मध्ये दकलय् अप्वः साक्षरता दर दुगु जिल्ला खः । शिक्षित जनतां थुज्वःगु भूतप्रेतया खँय् विश्वास याइगु ला मजुल । उकिं भूतप्रेतया खँ न्यनेकने यानाबलय् न्हूगु पुस्तां जक मखु, पुलापिं पुस्तां तकं थुज्वःगु खँय् विश्वास मयाःगु, थम्हं प्रत्यक्षरूपं उज्वःगु

खँ मखनागु, अनुभव मयानागु खँ धयादीगु दुसा उमिसं कंगु गुलिखे खँ मेपिं सुनां धाःगु, थम्हं न्यनागु खँ जक व्यक्त यानातःगु दु । न्ह्याथें जूसां नेवाःसमाज दुने व्याप्त भूतप्रेत, ख्याः, किचकन्या आदि खँ पाल्पाया नेवाःतय् दथुइ श्रुति परम्पराकथं ल्यनाच्चंगु दनि ।

लिधँसा

जोशी, रास, ने.सं. ११३०, 'अन्धविश्वास', लोकवार्ता । यलः नेपालभाषा केन्द्रीय विभाग, पृ. २७२-२८१ ।

श्रेष्ठ, तेजप्रकाश, ११३०, 'नेवाः लोकवार्ता', लोकवार्ता । यलः नेपालभाषा केन्द्रीय विभाग, पृ. ३-१९ ।

खँलहाबल्हा

अपर्णा प्रधान (७०), तिंख्यः, तानसेन, २०७३ फागुन ४,

थाय् : तिंख्यः, तानसेन नगरपालिका न्ह्यःने,

आलोक शाक्य (५२), बसन्तपुर, तानसेन, २०७३ फागुन ४,

थाय् : बसन्तपुर, तानसेन

चिनियालाल बज्राचार्य (८५), निंशाहिति, तानसेन, २०७३ फागुन ४,

थाय् : निशां हिति परिसर

निर्मल श्रेष्ठ (६२), बसन्तपुर, तानसेन, २०७३ फागुन ४,

थाय् : निर्मल श्रेष्ठया थःगु छें, बसन्तपुर

बेनीकुमारी श्रेष्ठ (८०), बसन्तपुर, तानसेन, २०७३ फागुन ४,

थाय् : बेनीकुमारीया थःगु छेंय

रञ्जना श्रेष्ठ (४१), भीमसेनटोल, तानसेन, २०७३ फागुन ५,

थाय् : भीमसेनटोलस्थित श्रेष्ठया सिलाई पसः

पाल्पाया

अमरनारायण देगः



रानीशोभा महर्जन

मूति

धार्मिक सहिष्णुताया छद्गू ताःहाकःगु इतिहास नेपालय् दु । थन शैव, वैष्णव व बौद्ध मतयात आदर जक मयासे हरेक धर्मयात सकसिनं श्रद्धां आत्मसात यानाच्चंगु दु । थ्व नेपाःमितय्गु तःधंगु समझदारी व विशेषता खः । पाल्पा जिल्लाया सदरमुकाम तानसेनय् नं थीथी मतावलम्बीतय्गु बसोबास दु । थनया हरेक धर्मावलम्बीं मेमेगु धर्मयात उलि हे सम्मान याः । उकिं पाल्पाय् धस्वानाच्चंगु प्राचीन सम्पदा थौतकं पुज्यनीय जुयाः संरक्षित जुयाच्चंगु दु ।

१. पाल्पाया अमरनारायण देगः

अमरनारायण देगः नेपाःया लुम्बिनी अञ्चलया पाल्पा जिल्ला तानसेन अवस्थित विष्णु देगः खः । अमरसिंह थापां वि.सं. १८६३ स वार्षिक खर्च चले याय्त माडी फाँटय् हजार मुरी चा गुथिया व्यवस्था यानाः थ्व देगः दय्केब्यूगु खः । थ्व देगः दय्केत येँयापिं नेवाःकालिगढपिं यंकूगु खः । थुकिं यानाः तानसेनय् नं येँ देय्या थें असं, तिख्यः, मखं आदि नांया थाय्त दुगु जुल । थुगु देगः प्यागोडा शैलीया खः ।

जुजु पृथ्वीपाल सेन (सेन वंशया लिपांम्ह शासक)या इलय् काजि वीरभद्र थापा^१या चीधिकम्ह काय् काजि अमरसिंह थापां^२ पाल्पायात कब्जा यानाः थनया प्रशासक जुयाच्चंगु इलय् थुगु अमरनारायण देगः दय्केगु खः । नेपाः एकीकरणया भूवलय् दकले लिपा जक त्याकाकाःगु पाल्पा राज्यया प्रशासन

- १ काजि वीरभद्र थापाया जीवन थापा, वंशराज थापा, अमरसिंह थापा (सानु) स्वम्ह कार्यापिं दु ।
- २ अमरसिंह थापाया जन्म वि.सं. १८०८ स गोर्खा जिल्लाय् जूगु खःसा रसुवा जिल्लाया गोसाईकुण्डय् वय्कः मदुगु खः । आइलो-नेपाल युद्धय् सक्रिय रुपय् ब्वति काःम्ह अमरसिंह थापाया जीवन युद्धय् हे बिते जूगु खः ।

न्ह्याकेत वडा हाकिमया रुपय् जनरल अमरसिंह थापा पाल्पा वःगु खः । वि.सं. १८६३ स विष्णुया भक्त अमरसिंह थापां मनमोहक बगैचा व मदिकक न्ह्याइगु लःया मुहान लिक्क दय्कूगु कलात्मक देगः हे अमरनारायण देगः खः । थुगु देगःनापं मेगु स्वंगः देगः नं दय्कूगु खः । गुगू थथे दु -नारायण देगःया लिक्क दक्षिणपाखे नित्तँजाःगु महाद्यःया देगः, अमरगञ्ज दुथाय् भैरव मन्दिर लिक्क उत्तर दिशाय् दय्कातःगु स्वतँजाःया प्यागोडा शैलीया गणेशःया देगः व तानसेनया दथुइ लाःगु श्री उजेश्वरी भगवतीया देगः लिक्क आग्नेय दिशापाखे दय्कातःगु आँय्पौया तहबिल गणेशःया देगः ।

अमरनारायण देगः नापंया सतः, फल्चा दय्कातःगु दु । अमरगञ्जय् दय्कातःगु स्वतँजाःगु आँय्पा पल्लिं चिनातःगु सतः, गुगु थासय् थौंकन्हय् सेन माध्यमिक विद्यालय संचालनय् दुसा नारायण देगःनापं निगू चिचीधंगु सतः नं दय्केब्यूगु खः । देगःलिसें थनया फुक्क सतः, फल्चा दय्केत जक १६ दँ ब्यूगु खँ स्थानीय ज्याथःजिथिपिनि धापु दु । थौं नं नारायण देगः स्थापित व निर्माणसम्बन्धी च्यातःगु सिजःपौया अभिलेख यथावत सुरक्षित दनि ।

१.२ भौतिक संरचना

लक्ष्मीनारायणया देगः भचा तःजाःथाय् दय्कातःगु दु, लिसें देगःया लागा नं तःचाः जू । चाक्ला, चप्लेटी ल्वहंया भव्य तःधंगु पःखाःदुने थ्व देगःया लागा सुरक्षित यानातःगु दु । तःधंगु लागा दुगु जग्गाय् स्वांक्यबया निंतिं जग्गा फ्यानातःगु दु । न्हापा थन न्हिथं सुथय् बहनी नारायण, शिव, गणेश आदि द्यःपिनि पूजाआजाया लागि फलफूल सय्केगु, थुकिया संरक्षण याकेगु व्यवस्था दुगु खः । थ्व ज्याया निंतिं खान्की बियाः गथुत समेत नियुक्त यानातःगु खः । थौंकन्हय् धाःसा थ्व जग्गाया सरसफाइ, रेखदेख, संरक्षण, सम्बर्द्धन याय्मफयाः थ्व जग्गाया छुं ब्व तत्कालीन नगरपंचायतया हाट बजाः तय्त अले रेडक्रस भवन दय्केत अमरसिंह थापाया सन्तान बोर्लाङ्गे काजिपिंपाखें ब्यूगु जुल ।

प्यागोडा शैलीं दय्कातःगु थ्व देगः स्वतँ जाः । दकले च्वय्या तल्लाय् म्हासुगु लीया पातां भुनातःगु दु । थुकिया दथुइ लुं सियातःगु गजू दु । दथुइ व दकले क्वय्या तँय् आँय्पाया पौ दु । थ्व देगःया दकले च्वय्या तल्लाय् प्रत्येक मोहडाया छपाः छपाः चिचीपाःगु कलापूर्ण भ्याः व भिंनिताजि थीथी द्यःपिं क्रियातःगु त्वानासिँ दु । अथे हे दथु व क्वय्या तल्लाय् प्रत्येक मोहडा,

अंगलय् स्वपाः स्वपाःया दरं तपाः चिपाःगु यानाः जम्मा २४ पाः कलात्मक भ्याः दु । थुगु निगुलिं तल्लाय् २०/२० गू त्वानासिं षडबाहु द्यःपिनिगु व नरनारीया किपा कियातःगु दु । देगःया त्वानासिं थीथी आसनया कामक्रिडाया किपा नं कियातःगु दु । कामक्रिडाया आसन कियातय्माःगु विषयस स्रोत खुले मजूगु व छगू धापूकथं थुकिं मलः मजुइगु मान्यता दु । देगःया स्वंगू हे पल्लिया सिथय् सलंसः चिचीग्वःगु गं यख्खानातःगु दु । देगःयात १२ गः ततःधंगु सिँया थामं थामय् यानातःगु दु । उगु ततःधंगु थामय् थीथी भंगः पंक्षी, लहरा स्वां, हः कियातःगु दु । गनं सिंह व धुँया छचं कियातःगु दुसा गनं सा, द्रहं, खिचा, नवःचा, मायबिलि, म्हय्खा, डाँफे, मुनाल आदि भंगःपंक्षीतय् सजीव चित्र कियातःगु दु । सिँया कान्दनी, नश, मुसी धलिंयात नागं हिनातःगु दु व प्रत्येक नागया म्हुतुइ मिसाम्ह नागया मूर्ति तसकं बांलाक कियातःगु दु ।

दकले क्वय्या तल्लाय् प्रत्येक अंगलय् प्यंगुलिं दिशाय् ततःपाःगु सिँया खापा तयातःगु दु । थुकी कलात्मक बुद्धा कियातःगु दु । उकीमध्ये पूर्व, उत्तरदक्षिण पाखेया खापा न्ह्यावलें तिनातइ । पश्चिमपाखेया खापा धाःसा सुथ, बहनी आरती पूजाया निंतिं चाय्की । थ्व पश्चिमपाखे स्वःगु खापाया चौकोस खापा लीयागु पाताय् कलापूर्ण देवदेवी, नागनागीन आदि बुद्धा कियातःगु दु । थ्व देगःया मेगु विशेषता छु धाःसा थाय्थासय् तयातःगु सिँया नश, निराल, धरान, धलिमय् तकं तान्त्रिक विधिइ कियातःगु चिचीधंगु प्यकुंलाःगु सिँया कच्चेराय् गनं शंख, गनं चक्र, गनं पद्म, गनं स्वां, गनं किरिमिरि बुद्धा, गनं पान बुद्धा, गनं चिचीधंगु वर्गाकार बुद्धा, गनं चिढाइ बुद्धा आदि कियातःगु दु । थ्व देगःया मेगु विशेषता नं दु, व खः देगः अंगलय् नीस्वनातःगु अप्पात साधारण मजूसे चुल्लुसे व ह्याउँसे च्वंगु चिकं अप्पां दय्कातःगु दु । अंगः फुक्क ल्वहतं दनातःगु दु । अप्पा साधारण मजूसे थासय्थासय् बुद्धेदार जुयाच्चंगु दु । गुज्वःगु थासय् गुज्वःगु अप्पा माः व हे कथं बुद्धां जाःगु अप्पा छचलातःगु दु । थुकिं यानाः देगःया शोभा भन् अज्वःगु दु । देगःलिक्क पश्चिम दिशापाखे जःखः मिले यानाः खुगः गं तयातःगु दु । उकीमध्ये तग्वःगु प्यंगः गं दु । तर छगः गं तज्यानाच्चंगु दु ।

देगःदुने लुँया जलप दुगु लक्ष्मी व नारायणया मूर्ति बाँसिबें २ फिट च्वय् थकयातःगु आसनया दथुइ पलिस्था यानातःगु दु । मूर्तिया जवय् गोपाल व गणेशःया मूर्ति दुसा खवय् तुयुगु संगमरमरया हनुमानया मूर्ति व न्ह्यःने बालगोपालया मूर्ति तयातःगु दु । क्वय् बाँय् ढलौटं दय्कातःगु गरुडया मूर्ति



पाल्पाया अमरनारायण देगः

दथुइ थापना यानातःगु दु । देगःया लिक्क पिने पश्चिम दिशाया नं बांलाःगु तःधंगु गरुडया मूर्ति व छगू चीधंगु बालगोपालया मूर्ति बाँया सतहसिवें ५-६ फिट च्वय् बज्र प्लाष्टर यानातःगु ल्वहंया अंगलय् थापना यानातःगु दु । अले मूर्तिया क्वसं निगू ग्वाखंचा दुने लक्ष्मीनारायणयात ल्हाः जोडे यानाः दनाः, फ्यतुनाच्चापिं भक्तजनपिनि धातुया मूर्ति नं तयातःगु दु । शायद थुगु मूर्तित अमरसिंह थापाया परिवारजनया मूर्ति जुइफु ।

देगःया उत्तर दिशाया पुजारी च्वनेगु छें दय्कातःगु दु । देगःया ठीक पश्चिमपाखे आँया पौ दुगु व उत्तर दक्षिणपाखे ताःहाकःगु छतँजाःगु फल्चा दु । उकिया दथुइ कलापूर्ण देगःदुने वय्गु ध्वाखा दु । जवय् पाखे भजन, चतुर्मास पूजा पुराणया लागि च्वनेगु थाय् अले खवय् नगरा, तुरही, सहनाइ आदि बाजा थाय् दमाइ, कुश्लेतय् च्वनेत थाय् नं दय्कातःगु दु । अन हे छगू चीधंगु रथ नं सुरक्षित यानातःगु दु । देगःया दक्षिणपाखे निगू फल्चा, पौवा व छगू शिवमन्दिर दय्कातःगु दु । नारायण देगःया पूर्व दिशापाखे फूलबारी लागा दुने गोचैची, खुल्लक, अं, राँगभाँग, चिलाउने आदि सिमा पिनातःगु दु । न्हापा ला थ्व थासय् तःधंगु जंगल दुगु व थन चिकंलापा च्वनीगु खः । न्हापा थन चितुवा

नं वः । आः अन पार्क दय्कातःगु दु । महादेवस्थानया लिक्क पूर्व दिशापाखे छगू तःधंगु पुखू नं दु । थाय्या नां नारायणथान जूगुलिं पुखूया नां नं नारायणथान पुखू धाय्गु यानावयाच्चंगु दु ।

१.३ गुथि

नियमित पूजाआजा, न्हियान्हिथं चःपित बाल-भोग, खतजात्रा, पुराण न्यंकेज्या, भण्डारा, कर्मचारीपिनिगु खान्कीया लागि द्वाछि मुरि बँ, माक्व पाखो-जग्गा तकं तयाव्यूगु दु । अमरनारायण लालमोहर दानपत्रय् न्ह्यथनातःकथं दँय् प्यकः - चैत महिनाया रामनवमी, भदौ महिनाया नारायण रथ जात्रा, मोहनी (नवदुर्गा)या द्वादशी तिथि व कार्तिक पुन्हिखुन्हु दँय्दसं नियमित भण्डारा लगे याइ । उगु भण्डाराया इलय् सेलरोटी, माल्पा प्रशस्त छुइ । अले सम्बन्धित पूजारी, गुथि कर्मचारी, सन्त, महन्त, फकीर, जोगीतय्त इनाबी । उगु भण्डाराया निंतिं २४ मुरी वा, १२ टिन घ्यः, छधार्नी मलय्, १६ धार्नी चाकु (गुँड) लिसें चिनी, छवचुँ, अलैची आदि निश्चित परिमाणय् खर्च याय्त दानपत्रय् न्ह्यथनातःकथं यानावयाच्चंगु दु । सेलया आकार नापं ल्वहतय् कियातःगु यानाः अमरगञ्ज पौवा न्ह्यःने दर्शन यानातःगु आःतकं यथावत दनि । तर बेसाःभाः थिके जुयावलिसें छुं नं आकार प्रकार दानपत्रय् न्ह्यथनातःकथं मजुइ धुंकल । न्ह्याथें जूसां थुज्वःगु बांलाःगु बन्दोबस्त, आयस्रोत दुगु गुथि मेगु देवालयस दइगु दुर्लभ हे जुइ । थन पुजारीया खान्की जक ४० मुरी व १० मुरी पूजाआजा खर्चया लागि धकाः मुक्कं ५० मुरी वा बीगु व्यवस्था दु । काजिपिनिगु प्रतिनिधित्व याइम्ह छम्ह गुथियारं ४० मुरी वा खान्कीस्वरूप काय्खनी । ताःहाकःगु ईतक श्री दधिराम पौडेल गुथियार पदय् कार्यरत जुल । थौकन्हय् छगू निगू वर्ष थुखे मदन पोखरा ग्रामनिवासी श्री कमल राणा मगर गुथियार पदय् नियुक्त जुयादीगु दु । मेपिं कर्मचारी नं ज्या व पदकथं खान्की नकातःगु दु । कर्मचारीत मध्ये मुखिया, चेकवाला, माली, मलि हुइम्ह, वाजं थाइम्ह, लिपपोत याइम्ह, बँ पुइम्ह आदि दरबन्दीकथं खान्की नकाः तयातःगु दु ।

छुं दँ न्ह्यः रुरु लाग्ना, मुक्तिनाथ तीर्थय् वइ-वनीपिं साधु, सन्त, महन्त, फकीर, जोगीतय्त थ्व हे गुथिं जनही निमना जाकि, व हे कथं कै, घ्यः, चि, हलू, तरकारी आदि पूर्णपात्रकथं सिधा बीगु व्यवस्था दुगु खः । दानपत्रय् न्ह्यथनातःकथं सिधा सदावर्तकाया लागि वा आपालं छुटे याय्माःगु नियम

बन्देज दु । तर थौकन्हय् पूर्णपात्र मव्युसे जनही नितका बियाः भारा टारे याय्गु चलन न्ह्यानाच्वंगु दु । नित्य भगवानयात छाङ्गु बाल-भोगया लागि नं छुं मुरी वा पुजारीयात वीगु व्यवस्था नं बन्देजय् लाःगु खँ न्यनेदु । अथे हे चतुर्मास जःछि देगःया पेटी अर्थात् देगःया पश्चिमपाखेया फल्चाय् पुराण कनीगु व्यवस्था दु । पुराण न्यंकीम्ह पण्डितयात पारिश्रमिक कथं १२ मुरी वा गुथिं वीगु व्यवस्था दु । न्हापा गुथिया व्यवस्था व बन्दोबस्त जूकथं बखुं, पुखुली लहिनातःपिं न्याँतय्त, देगःन्यंकं सफासुगधर याइपिंत, देगःया फल्चाय् बुट्टेदार थां, चौकोस, खापा, त्वानासिँ आदि सिँइ चिकं पालिशयात तक नं खर्च छुटे यानातःगु खः । अथे यानाः ज्या सुव्यवस्थित तरिकां चले जुयाच्वंगु जुल । तर थौकन्हय् गुलिखे ज्या तनावने धुंकूगु दु । थुगु ज्याय् खर्च याय्माःगु तःधंगु ध्येवा गन ज्याय् छचलाच्वंगु दु सुनां नं मस्यू । इलय् ब्यलय् चिकं पालिसया अभावं निभालं, लखं सिँया अमूल्य थां, त्वानासिँ, भ्याः, लुखाया चौकोस, खापाया बांलाःगु बुट्टा तज्यानाः संबायाः वनीगु अवस्थाय् दु । २०३६ सालपाखेगःया जिर्णोद्धार, मर्मतया अभावय् उत्तरपाखेया क्वय्या निगू ब्वः दुनावय् धुंकूगु खः । वर्षाया वां दायाः देगः दुनावइगु अवस्था तकं थ्यनेधुंकूगु खः । छुं ला लिपा गुथि संस्था व पुरातत्व विभागया कुतलं ५५,००० तका लागतय् देगःया मर्मत व जिर्णोद्धार जुल । थथे इलय् हे संरक्षण याय्फुगुलिं थौं ध्व देगःया रुप कायम जुयाच्वनेफुगु खः ।

१.४ धार्मिक आस्था

श्रीलक्ष्मीनारायण भगवान्प्रति आस्था तइपिं भक्तजन दर्शनार्थ नित्य सुथय् वय्गु याइ । विशेषयानाः एकादशी, उकिसनं हरिशयनी, हरिबोधनीया दिन पुराण न्यनेत, भगवानया दर्शन याय्त सुथय् बहनी आपालं मनूत थ्यंकवइ । रामनवमी, अक्षयतृतीया, श्रीकृष्ण जन्माष्टमी (थुगु दिं नारायणया वार्षिक अधिवेशन जाग्राम हनी), लक्ष्मीपूजा, चतुर्मास, पुरुषोत्तम मास, कार्तिक महिना जःछि पूजाभुइ चन्दन, जाकि, फलफूल, नैवेद्य तयाः भगवानया दर्शन याःवइपिं मिजं मिसात आपालं दु । भदौ महिना जःछि लाइगु श्रीकृष्ण जन्माष्टमीया कन्हय् खुन्हु रोहिणी नक्षत्र लाःगु इलय् नारायण (बालगोपाल)या रथजात्रा याय्गु चलन दु । चीधंगु खट (रथ) दुने गोपालजीया मूर्ति तयाः बन्दुकया (तोपया) बधाइ बियाः संकेत याय्धुंकाः रथयात समाः यानाः मृदङ्ग, भ्याली, खैजडीया तालय् भजन

हालाः रथयात भल्लरी कुसां कुइकाः चमरं गायकाः हलू ल्वाकछ्यानातःगु धलिं लँदुच्छ हाः यानाः पवित्र यानाः देय् चाःहिइकी । अप्वः धयाथें नारायणया रथ जात्रा, तानसेनया प्रख्यात 'श्री उज्जरणेश्वरी भगवती'या रथजात्रा याइगु दिनय् हे लाइ तर छुं सालय् धाःसा एकाध दिं न्ह्यःने ल्यूने जुयाच्चंगु दु । रथजात्रा विसर्जन याय्धुंकाः भण्डारा (सेलरोटी व माल्या) प्रसादया रुपय् इनेगु याइ । उगु दिन प्रसाद नय्त मस्त, ल्याय्म्ह, ल्यासे, बुराबुरित, साधुसन्त, महन्ततय् भीड जुइ । चतुर्मासयंकं (आषाढशुक्ल पूर्णिमानिसें कार्तिकशुक्ल पूर्णिमातक) देगःया पेटी अर्थात् देगःया पश्चिमपाखेया पौवाय् पुराण कंकेगु व्यवस्था नं दु । गुलिं मनूतय् थम्हं मनंतुना थें पूवनधाःसा नारांघःथाय् बां स्याय्गु धकाः भाकल नं याइ । तर नारायणघःथाय् छुं बां स्याय्गु मयाः । अथे हे थन नेवाःत सिवें खँय्बर्मूत आपालं वनेगु याः ।

लिखें

स्वनिगःया आदिवासी नेवाःत थीथी इलय् थीथी हुनिं यानाः स्वनिगलं पिने बाय् हिलावंगु खनेदु । गन गन नेवाःत वन अन अन उमिसं थःलिसें थःगु शीप, कलाकौशल नं ज्वनावंगु दु । स्वनिगलं पिने आपालं बजार लागाय् आः नं नेवाःतय् बस्ती दुगु व थुकिया स्पष्ट प्रमाण उपिं च्वनाच्चंगु थासय् उमिसं व्वयाच्चंगु संस्कृति, कलाकौशल खः । छगू हे थासय् गुच्चमुच्च छें दनाः च्वनेगु लिसें थःगु त्वाल्य् थीथी घः, देवीया देगः दनेगु, सतः, फल्वा दय्केगु संस्कृति नेवाःतय् दुगुलिं स्वनिगलं पिनेया नेवाःसमाजय् आः नं थुज्वःगु चिं ल्यंदनि । पाल्पाया तानसेनय् दुगु नेवाःबस्ती म्हसीकेगु छगू आधार नं थुज्वःगु हे संस्कृति खः । सेनवंशया कालनिसें खनेदुपिं नेवाःत लिसें शाहकालय् बाय् हिलावंपिं व कालिगढकथं अन थ्यपिं नेवाःतय्सं अन नं आपालं नेवाःशैलीया भौतिक सम्पदा दय्काथकूगु दु । थुपिं मध्ये तानसेनया अमरनारायणया देगः नं छगू ज्वलन्त उदाहरण खः । खय्तला शाहकालय् काजि अमरसिंह थापां दय्के व्यूगु जूसां स्वनिगःपाखें नेवाः कालिगढत सःताः दय्केव्यूगुलिं थ्व देगः नेवाः कालिगढीया छगू बांलाःगु नमूनाकथं ल्यनाच्चंगु दु ।

नेवाः देगःया छगू विशिष्ट शैली धयागु प्यागोडा शैली खः । थ्व हे शैली छ्यलाः दय्कातःगु थ्व देगःया वास्तुशास्त्र, थुकी छ्यलातःगु भ्याः, त्वानासिं, लुखा, खापा आदिइ कियातःगु काष्ठकलां नेवाःतय् कालिगढी न्ह्यव्वयाच्चंगु दु ।

स्वनिगःया लोकह्वाःगु देगःलिसे ज्वःलाःगु थुगु अमरनारायण देगः दनेव्यूगुया छगू हुनि राजनीतिक रुपं नेवाःतय्त थःगु ल्हातय् काय्गु रणनीति नं जुइफु । देगः नीस्वनाः थुकी पूजाआजानिसें मर्मतसम्भार, रेखदेख व सफासुगधरया निंतिं तकं काजि अमरसिंह थापां आपालं बुँ, जग्गा गुथिकथं नीस्वनाथकूगु सीदु । तर आःवयाः उज्वःगु गुथिया जग्गा जक मखसे देगःया हे आपालं व्व सरकारी ज्याखँया निंतिं काय्धुंकल । थुकिं यानाः माःकथंया आयस्ता प्राप्त मजुइगु लिसें थौंकन्हय्या बेसाःभाः नाप न्ह्याःवनाः ज्या न्ह्याकेमफु । न्हापा निमना जाकि बीत धयावंगु खँय् लिपा नितका दामं ज्या क्वचाय्केगु धयागु क्यनेगु निंतिं जक जुयाच्वंगु वाःचाय्केफु । अथे हे, गुथिया आयस्तालिसें देगःसम्बन्धी आपालं ज्याया जिम्मेवारी सुनां कयाच्वंगु दु, सम्बन्धित मनू सु खः धयागु तकं सीके थाकगु अवस्थां यानाः नं थुखेपाखे सम्बन्धित ख्यलं विचाः याय्माःगु हथाय् जुइधुंकूगु दु । मखुसा लिपा वनाः गुथिया जग्गा जक म्हासे जुयावनीगु मखसे देगःया लागा तकं अतिक्रमण जुयाः म्हो जुयावनेफुगु खँय् शंका मदु ।

लिधंसा

तुलाधर, प्रेमशान्ति (ने.सं. १९२०) *नेपालभाषा साहित्यया इतिहास* । यैः नेपालभाषा एकेदमि । श्रेष्ठ, तेजप्रकाश (ने.सं. १९३०) *लोकवार्ता* । यल, नेपालभाषा केन्द्रीय विभाग । सिंह, दशरथमान वि.सं. २०७३) *त्यो समय, त्यो परिवेश : मेरो जीवनयात्राको संस्मरण* । काठमाडौं : न्हूजः गुथि ।

खँल्हाबल्हा

उमाशंकर पोखरेल (३४ दँ), तानसेन ।
दिलबहादुर शाक्य (६५ दँ), टक्सार, तानसेन ।
सञ्जय प्रधान (४३ दँ), असन टोल, तानसेन ।

पाल्पाया नेवाः संस्कार



उमेश्वरमान प्रधान

मूति

संस्कार धाय्वलय् न्हिन्हिया जीवनपद्धति खः । सुथय् न्हापां दनाः वसिवं पुइगु, पिखालखुइ वं इलेगु, द्यः पुज्यायगु, थकालिपिन्त भागि यायगु आदि आदि न्हिन्हिया संस्कार खः । अथे हे संस्कार धैगु मचा बुसानिसें सीधुंकाः तक याइगु कर्मकाण्ड नं खः । थीथी श्रुति स्मृतिशास्त्रय् गनं गनं १६ संस्कार, गनं १० संस्कार धयातःगु दु । नेवाःतय्सं हनाः वयाच्वंगु संस्कारया लिधंसा वेद श्रुतिस्मृति हे खःसां नेवाःतय्सं नेवाःकथं हे हनाः वयाच्वंगु दु । नेवाःसंस्कार १६ संस्कार व १० संस्कार दुने मलाः । इही यायगु, बाह्राःतयगु, ज्याजंको यायगु नेवाःतयगु मौलिक संस्कार खः ।

१. पाल्पाय् नेवाः संस्कार

पाल्पा वजारय् नं यक्व न्ह्यःनिसें नेवाःत वसोवास यानावयाच्वंगु दु । पाल्पाय् च्वपिं नेवाःत स्वनिगलं हे वनाच्वपिं जुगुलिं इमिगु संस्कार उलि पाःगु खनेमदु । पाल्पाया नेवाःतय्सं हनाः वयाच्वंगु कर्मकाण्ड संस्कार क्वय् न्ह्यथनाकथं दु ।

१.१ जन्म संस्कार :

गर्भाधान पुंसवन धौबजि नकेगु जन्म संस्कार पि ध्येनेगु, छ्वासय् वायगु, सिसापालु थःछें कंके छवयगु । मचाबू ब्यंकेवलय् वं इलेगु छें शुद्ध यायगु, लुसि थीकेगु, म्वःल्हुइगु । भव्य सःताः नकेगु ।

१.२ नामकरण :

जन्म नक्षत्र, जन्म राशि पाय्छि जुइक मचा नामकरण यायगु ।



पाल्याय् मचाजंकुया व्व

छैठी खुन्हु खुनु मंगल उत्सव याय्गु । दीपमाला मत च्याका: द्यःतय्गु भजन हाय्का हरिकीर्तन याय्गु । थुखुन्हु ब्रम्हाजीं मचाया कपालय् भाग्य च्वःवइगु विश्वासकथं उत्सव मानेयाइ ।

१.३ मचा जंको :

लुसि ध्यनेगु वं इलेगु छै शुध्द याय्गु । मचाया पाजुं मचायात जा नकेगु । थुकी विशेषयाना: इनायद्यःया पुजा याय्गु ज्या जुइ । विभिन्न प्रकारया अन्न, फलफुल, तिसा, किताव, कलम, ध्येबा मचायात काय्के वीगु ।

१.४ इही याय्गु :

मिसामचायात ७ दँ दतकि कन्यादान वीमा:गु वैदिक परंपरा खः । थौंकन्हय् मिसामस्त ८, ९ दँ जुलकि व्या: छगःयात सुवर्ण कुमार धका: कन्यादान वी । थौंकन्हय् थ्व परंपरा पाय्छि मजुगुलिं कर्म जक खंकेगु ल्याखं सामुहिक ५०, १०० मस्त मुंका: छकलं हे यज्ञकुण्ड दय्का इही संस्कार व्वचाय्की ।

१.५ ब्रतबन्ध :

गुरुया आश्रमय् वनाः विद्या आर्जन याय्गु सस्कार हे ब्रतबन्ध (कय्ता पुजा) खः । आः मचा मखुत धैगु संकेत कथं मिजंमचायात याइगु थुगु कय्ता पुजायात बौद्ध मार्गीतय्सं बरे छुइगु धाइ ।

१.६ बान्हाः :

मिसामचायात थीमजीगु उमेर जुलकि ११न्हु तक कोथां पिहाँ वय्मज्यु धकाः व्दादशादेवीया पुजा याय्गु चलन दु । ११न्हु पूर्वका सुर्चो दर्शन याकाः थ्व संस्कार क्वचाय्की । मिसामचायात जीवनय् वइगु फुक्ककथंया संघर्षयात गुकथं समाधान याय्गु धैगु शिक्षा बीगु उद्देश्यं बान्हाः संस्कार याइगु खः ।

१.७ इहिपा :

मचाबलय् इही यानाः सांकेतिक रुपय् इहिपा विधि पूर्वनेधुंकुसां लिपा उमेर दय्काः व्यावहारिककथं मनूलिसे हे इहिपा याइ । ग्वय् बीगु, लाखा बीगु, जन्ति वनेगु, भमचा लसकुश यानाः दुकाय्गु, थाय्भू नकेगु आदि ज्या पूर्वकाः थःथिति, पासापिं सकसित पाहां सःताः भ्वय् नकेगु चलन दु ।

१.८ ज्याजंको :

मनूया उमेर ७७ दँ ७ला, ७ दिन ७ पलाः थ्यनकि न्हापांगु, ८३ दँ, ४ला थ्यनकि निक्वःगु, ८८ दँ, ८ ला, ८ दिन, ८ पलाः थ्यनकि स्वकःगु, ९९ दँ, ९ ला, ९ दिन, ९ पलाः थ्यनकि प्यक्वःगु ज्याजंको याय्गु चलन दु ।

१.९ मृत्यु संस्कार :

जीवनया अन्तिम इलय् दशदान, बैतरणीदान याकाः इश्वर लुमंकाः प्राण त्वःते धुंकाः म्हुति पंचरत्न, नवरत्न तयाः कपालय् जातः तयाः स्वांमाः क्वखाय्काः पंयागु बिमान रुपी कूतालय् थ्यनाः बाजं थानाः जात्रा यानाः सिथं यंकेमाः । मसान थ्यंकाः सकसिनं सीम्हेसित चाःहिला लः त्वंकाः भागि यानाः स्वर्गय् हुं धकाः बिदा बी । अले अन्तय् क्रियापुत्रं लः त्वंकाः भागि यानाः भाजनय् तयातःगु मि तयाः ईश्वरय् लीन जुल धकाः मनय् तयाः घ्यः, श्रीखण्ड, कपूया आहुति बी । शरीर भष्म जुइ धुंकाः नौयात मनूया आकार दय्काः कौया म्हुत,

हथंया मिखा तयाः पुजा यानाः आः स्वर्गय् हुं धकाः नौ गगाय् चुइकी । छैय् लिहाँवय् न्ह्यः भूत, प्रेत नं नापनापं वइ धकाः इका पःका मिइ तयाः नं छकु ज्वना पालु बजि लिउने वान्छोया भूत प्रेतयात सन्तोष यानाः छैय् लिहाँवइ ।

दीपं छैय् वयाः मि च्याका ज्वरे यानाः नय्मज्यू । म्हाय्मस्तय्सं अथवा जःलाखःलापिन्सं बजि, तरकारी, मरि घयः, चिनि, पालु, लै दुःखं च्वपिन्त नकेहइ । न्हय्नुमा तक म्हाय्मस्तय्सं नकेगु याइ ।

भिंछन्हु तक सुं मथ्युसे अलग्ग च्वनाः ईश्वर लुमंकाः फुकं सुख त्याग यानाः छछाः जक नयाच्वनी । परिवारया फुकं दुजःत दुःखं च्वनेमाः, पिने भव्य वनेमज्यू, पुजा याय्मज्यु, छुं नं असुद्ध नय् त्वने मज्यू । म्हाय्मस्तय्सं व थःथितिपिंसं बजि, तरकारी, धौ, फलफूल तयाः दुःखं च्वपिन्त व्या हइ । थथे म्हाय्मस्त व थःथिति बिचाः वइबलय् पिनेनिसं ख्वयाः छैय् दुहाँ वइ । थथे दुःखं च्वनीपिन्त गरुडपुराण कनेगु नं चलन दु । म्हाय्मस्तपाखें न्हय्नुमा याइ । लिपा लय् लय् पतिकं दच्छियंक श्राद्ध याइ । लिपा दैय् छकः मदुगु तिथिइ श्राद्ध यानाः मृतकयात लुमंकी ।

लिखें

पाल्पाय् न्हूगु पुस्तां नेपालभाषाय् उलि च्यूताः तःगु खनेमदुसां नेवाःसंस्कार संस्कृतिइ धाःसा आपालं च्यूतातःगु खनेदु । परम्परानिसं वयाच्वंगु नेवाःसंस्कारयात ईव्यःकथं छुं छुं ह्यूपा हय्गु कुतः जुयाच्वंगु स्पष्ट जू । पाल्पाय् नं हिन्दू व बौद्ध नेवाःत दु । इमिसं हनावयाच्वंगु नेवाःसंस्कारया विधिविधानय् छुं भित्तिचा पाःगु खनेदुसां उकिया दर्शन पक्ष धाःसा छता हे खः ।

लिधँसा

सहलह : अर्चना देवी शाक्य, तानसेन बिहार
कृष्णप्रसाद शाक्य, तानसेन बिहार
चतुरमान शाक्य, तानसेन बिहार
मदनलाल श्रेष्ठ, अध्यक्ष, देउराली सास्कृतिक प्रतिस्थान

तिसा मालेगु जात्रा



वीरमाया महर्जन

मूति

नेपाल विविध कला, संस्कृति व परम्परा दुगु मुलुक खः । थ्व मुलुकया थीथी थासय् थीथकथंया संस्कृति व परम्पराकथं जात्रा न्याय्की । काठमाण्डौ महानगरपालिकाया पूर्वी लागाय् लाःगु हाँडीगां संस्कृति व धार्मिक दृष्टिकोणं महत्वं जाःगु थाय् खः । गनं मदुगु जात्रा न्याय्कीगु थाय्कथं म्हस्यूगु हाँडीगांयात नरःदेय् नं धाइ । थन दैय्दसं नेपाल सम्वत्कथं चौलागाः पारुखुन्हु त्वलंचः (टुँडालदेवी, वैष्णवी) या तिसा मालेगु जात्रा नं नां जाः । थुगु जात्रा पारुखुन्हु छुन्हुं क्वचाइगु मखु, वाःछितक न्ह्याइ ।

१. तिसा मालेगु जात्राया विधि

जात्राया न्हापांगु दिं चौलाथ्व अष्टमी खः । थुखुन्हु हाँडीगाँया दबुली व भुसलय् यःसिं थनी । दबुली यःसिं थनेत यःसिं गुथि हे दय्कातःगु दु । थुगु गुथिइ खुम्ह गुथियारत दु । यःसिं थनीबलय् थ्व गुथिं यःसिंया पुजा याइ, यःसिं थनेत ग्वाहालि याःवःपिं त्वाःयापिन्त दुरुइ आखे फ्वयाः प्रसाद इनी ।

सुथय् यःसिं थनेधुंकाः सनिलय् नाय्खिं च्वय्के धुंकल कि हाँडीगामय् च्वपिन्सं छंयगू लाकां न्ह्याय् मज्यू, परदेश वनाः बाय् च्वने मज्यू, देसी कुसां कुइ मज्यू व मेमेगु चःथाय् वा तीर्थय् मेला भरे याःवने मज्यूगु नियम दु ।

थथे अष्टमीखुन्हु यःसिं थनाः नाय्खिं च्वय्के धुंकाः द्वादशीखुन्हु आचाजु व दंगूत पीगनय् वनाः त्वलंचःयात चिकं बुकः वनी । जात्राया भूवल्य त्रयोदशीखुन्हु पीगनय् होम पुजा यानाः मेय् बली बी । थथे बलि ब्यूम्ह मेय्या हि पीगंया चःलायात चःया फुसय् तयाः त्वंकी । उम्ह मेय्या ला होमय् दुइ । थन बलि ब्यूम्ह मेय्या लाफः प्यफः थलाः खः नायःतय्सं कुबियाः पुजारीया थाय् तय्



काठमाण्डौ महानगरपालिकाया पूर्वी लागाय् ला:गु हाँडीगांया तिसा मालेगु जात्रा ।

हइसा नायः समुदायं छयं कुवियाहइ । थुबले सीबाजं थानाः जात्रा याइ । छु यं तुंछैय् तयाः पुजा याइ । छयं दिके धुंकल कि थुखुन्हुया जात्रा क्वचाइ । होम पुजा सिधय्काः समय् नयाः जात्राया नितिं लँ ल्त्ववनी । लँ ल्त्वनेगु धैगु स्यनाच्वंगुयात भिंकः वनेगु खः । थुखुनु दीप नं ल्त्वनी ।

नेवाःजात्रा पर्व संस्कृति खुसिलिसे नं सत्तिक स्वानाच्वंगु दु । त्वलंघःया जात्रालिसे नं खुसि स्वानाच्वंगु दु । त्वलंघःया पीगं लिक्कच्वंगु तुकुचा (इच्छुमती) खुसी थ्व जात्रालिसे स्वानाच्वंगु दु । न्हापा न्हापा थ्व जात्राया इलय् भक्तजनपिनि नीसी याय्त तुकुचाय् म्वः ल्हुइगु याइगु खः । थुकिया नितिं त्रयोदशी खुन्हु हे तुकुचाय् बँ पनेगु चलन दुगु खः । बँ पनेगु धैगु लः बाःमवनेमा धकाः पनेगु खः । तर थौंकन्हय् खुसीया दुरावस्था छखे दुसा मेख खुसी घःने स्लाय्व तयाः त्वपुया ब्यूगुलिं थ्व चलन तने धुंकल ।

जात्राया भूवलय् चतुर्दशीखुन्हु जालुघः दय्काः पुजा याइ । जालुघः दय्केत भिनिमुरी जाकीया जा थुइ । थ्व जां भिनिमह घः दय्की । घः दय्केत खुइप्यम्ह कुमाःतय्सं जा न्हाःवइ । हाँडीगाउँया कुमा नायः पूर्णकुमार प्रजापतिं बियादीगु जानकारीकथं थुबलय् नायः, नकिं, सिंह, म्हय्ख, स्वपतिं, न्यापतिं,

त्रिशुल, ज्वलान्हायकं, गजू, स्वंगः छयं, गदा व भाला यानाः भिनिम्ह द्यः दय्की ।

थथे जालुद्यः दय्केत जा थुइगु ज्या धाःसा नक्साःया मांखः खलःया दंगूतय्सं याइ । दंगूतय्सं जा थुइबलय् द्यालाना थुइमाः । जा थुइगु भ्वलय् दंगू खलःयापिसं निकः पालं यानाः ब्रत फुकेयाइ । न्ह्यखुनु बलि ब्यूम्ह मेय्या भुटन नायःसमुदायपिन्सं तानाः दय्केगु निंतिं दंगूतय्त बी हइ ।

थुखुन्हु त्वलंघःया मुस्या खः (चीधंगु खः), तुन्छे खः व भान्छे खः दबुली दिकातइ । दबुली नक्साःया मांख थ्यंकेहलकि दबुली च्वंगु स्वंगुलिं खः थनी । मा खतं त्वलंघः थनेधुंकाः हाँडीगाँया प्यता खलं पुंगा यंकी । त्वलंघः व मेमेपिं द्यः पीगनय् गमय् तय् यंकी । पीगनय् तय् यंकीगु भ्वलय् त्वलंघः हाँडीगाँया थतु, दथु व कोताः त्वालय् स्वरु लिरु थिरु याइ । हाँडीगाँया थतुत्वाःया नायःया पुजा कयाः त्वलंघःयात विदा बी । हाँडीगाँया भिंघःया थाय् नं पोंगा न्यंकी । थनं माचपाः (विशालनगर), सम्जलय् छेंय् छेंय् पुजा कयाः विशालनगरया कुमारी द्यःया थाय् न्ह्यःने खः दिकाः कौला याइ । अन खः थना तुकुचा जुयाः पीगनय् द्यः दिकी । पीगनय् द्यः थ्यने धुंकाः खतं द्यः क्वकयाः देगलय् थापना याइ । दंगू पुजारीं चाकिला पुजा याइ । थुगु पुजा क्वचालकि मेपिं भक्तजनपिंत पुजा याकेवी ।

चर्तुदशीखुन्हु सुथय् हे मोपताः द्यः देगलं पिकाइ । पुंतय्सं द्यःयात लुंपुलि छाइ । मोपताः द्यः यात सन्ध्या इलय् त्वलंघःया पीगनय् थ्यंकेहइ । त्वलंघःयात मोपताः द्यःया मां धाय्गु याःसा मोपताः द्यः पीगनय् हइगु धैगु थः छेंय् वःगु धाइ ।

पुन्हीखुनु चाकिला पुजा सिधय्काः समय् नयाः मतू ज्वना वयाः आचाःया छेंय् वनी । खः नायः तय्सं त्वलंघः पीगनं थन हयाः भिंघःत्वाःया माहांकाःद्यःयाथाय् दिकेहइ । थन हे पुन्हीखुन्हु सन्ध्या इलय् त्वलंघःयात तःधंगु खः हयाः द्यः सोर याइ । पुन्हीखुन्हु द्यः चच्छि हे अन तइ । थुबले दंगूत द्यःपाः च्वनी ।

पारुखुन्हु सुथय् न्हापां खः छायेपी । थुखुन्हु द्यः ल्ह्वनेन्ह्यः गुथि संस्थानपाखें सरकारी पुजा छवयाहइ । थुगु पुजा मकाय्कं द्यः ल्ह्वनी मखु । सरकारी पुजा धुंकाः पँय्ताः खलकं विधिवत पोंगा न्यंकी । पोंगा न्यंकल कि जात्रा न्ह्याःगु ताय्की । थुबले थतु त्वालं पुजा काकां हाँडीगाँया ठोकाबहाः, दथु त्वाः, दबुली, कोताःत्वाः थ्यंकी । कोताः त्वालय् पुजा सिधय्काः धौ बजी बी । अन लिपा स्वकः हाकाः कोताः त्वालं भगवती बहाः न्यात्म जुजुं तिसा

पुखली थ्यंकी । तिसा पुखुली द्यः दुत यंकाः छःचाः चाःहिकाः लखं थत हय्गु चलन न्हापा न्हापा दुगु खःसा थौकन्हय् धाःसा स्वचाः चाःहिकेगु चलन दु । थथे याःगुया कारण जात्रा स्वःवइपिं सकसिया नं जात्रा बांलाक स्वय् खनेमा धकाः खः । तिसा पुखुली म्वः ल्हूबले वैष्णवीया तिसा कुतुं वनाः तंगुलिं उगु तिसा मालेकथं थथे पुखली द्यः दुत यंकीगु धापू दु । पुखली त्वलंछः चाहिका च्वनीबलय् पुखुपिने धाःसा नक्साःया मांखः चाहिकाच्वनी । तिसा पुखुली द्यः थहाँ बिज्याकाः न्याल्म त्वाः जुयाः पुजा काकां लिहावइ । दबुलीइ थ्यनकी द्यःखः दिदी । थुखुन्हुया जात्रा क्वचाइ ।

थुगु जात्राय् हाँडीगामय् दुगु सकतां कथंया बाजं खलःया ब्वति दइ । थुकी प्रत्यक्ष अप्रत्यक्ष रुपय् थीथी समुदायया प्रतिनिधि जुयाच्वंगु दु । दबुली खः दिके धुंकाः तृतियाखुन्हु तक हाँडीगाँया स्वंगुली त्वाःया दाफा खलःत मोपताःद्यः व त्वलंछःया थाय् दाफा थाःवनी । तृतियाखुन्हु त्वलंछःया केपु जात्रा जुइ । थुकियात सिन्हः जात्रा नं धाइ । थुखुन्हु द्यःयात मोपताः द्यःथाय्तक यंकाः अन सकलें मुनाः पुजा यानाः मोपताः द्यःयाथासं तप्यंक थतु, दथु जुयाः दबुली पुजा यानाः चान्हय् द्यः ल्वाकी । थुखुन्हु द्यः जात्रा क्वचाय्काः द्यःछेंय् दुत यंकी । अन खतय् हे द्यः तयातइसा चौलागा अष्टमीखुन्हु दक्व टोलवासीपिं जानाः द्यः छेंय् तइ । यःसिं क्वःथलाः थुगु दँया जात्रा विधिवत रुपं क्वचाय्की ।

लिखँ

जात्रा पर्व धैगु भीगु सामाजिक विधि व्यवहारलिसे स्वानाच्वंगु दु । नैतिक शिक्षा बीगु माध्यम खः । थ्व केवल न्ह्याइपुकेगु लागि जक मखु । दुवालाः स्वल्धाःसा जात्रापर्व दुने जीवनया सूक्ष्म विश्लेषण न्ह्यब्वयातःगु दइ । हाँडीगाँया तिसा माय्केगु जात्राय् नं सामाजिक सद्भाव अले जीवनया विविध पक्षयात न्ह्यब्वयातःगु खनेदु ।

लिधँसा

खँल्हाबल्हा

कुलनारायण डंगोल, हाँडीगाँ, थतु त्वाः, काठमाण्डौ, नायः थतु त्वाः
रमेश प्रजापति, हाँडीगाँ, मेस्यागाहा(रमाइलो चोक) त्वाः, काठमाण्डौ
राम प्रजापति, हाँडीगाँ, दथु त्वाः, काठमाण्डौ, नायः, दथु त्वा बाजं समिति
हरिनारायण डंगोल, हाँडीगाँ, थतु त्वाः, काठमाण्डौ, न्वकु रुद्रमती उपभोक्ता समिति

बोडेय् मेय् प्वाःखनेगु जात्रा



पूर्ण मानन्धर

मूति

नेवाःतय् छगू पहिचान इमिसं हनीगु मौलिक जात्रा, पर्व खः । नेवाःतय्सं नेवाःवस्तीकथं थीथी छःया जात्रा याइ । विशेषत जात्रा धइगु छःया जात्रा थुइकी । गुलि नं जात्रात दु छःया नामय् हे जुयाच्चंगु नं दु । छयात हे जात्रा याइ । तर स्वनिगःया छगू थज्याःगु वस्ती दु गन मनूया मेय् प्वाःखना जात्रा याइ । थुकियात हे मेय् प्वाःखनेगु जात्रा धाइ ।

१. मेय् प्वाःखनेगु जात्रा

ख्वपःया प्रसिद्ध जात्रा विस्काजात्रा खः । हरेक दँया चैत्रमसान्तं शुरु जुयाः विसंया न्हूदँ वैशाखया न्हापांगु वाः तक न्ह्याइगु थ्व विस्काजात्राया छगू मेगु जात्रा मेय् प्वाःखनेगु जात्रा खः । बैशाख २ गते थ्व जात्रा जुइ । मध्यपुर थिमिया विस्का जात्रा २ गते सुर्थासिया जात्रा धाइ । थिमिया बालकुमारीइ सुथय् ७ बजेनिसें थ्व जात्रा सुरु जुइ । थ्व सुर्थासिया जात्रा क्वचालकि बोडेया मेय् प्वाःखनेगु जात्रा शुरु याइ । नगरपालिकाया वडा नं. ८, बोडेया पाचो त्वालं थ्व जात्रा जुइ, अले बोडेया थीथी देवी देवताया परिक्रमा याइ ।

बोडेया दक्वं छः परिक्रमा याय्धुंकाः महालक्ष्मी छःया न्ह्यःने मेय् प्वाःखंगु मुलु लिकाइ । अले व मुलु महालक्ष्मी छःया दुने लथाय् ताइ । थ्व तानातगु मुलुं ग्वःकः प्वाः खनेगु जात्रा न्ह्यात धैगु प्रमाण बी । थुकथं जात्रा क्वचाइ ।

२. किंवदन्ती

बोडेया मेय् प्वाःखनेगु जात्रा लिच्छविकालनिसें शुरु जूगु मान्यता दु । प्राचीनकालय् बोडेया निलबाराही छःया जंगलय् च्वनीपिं भूत पिचासतय्सं



बोडेय् मेय् प्वाःखनेगु जात्रा

बोडेया वासिन्दातय्त दुःख बीगु मत्वःतुगुलिं तन्त्रमन्त्रं व पिचासयात बसे काल । अले गुम्हसैं सँ चानाबिल, गुम्हसैं मेय् मुलुं तियाबिल । थ्व दुःख वेदना सहयाय् मफयाः पिचासं थ्व कष्टं मुक्त यानाबिलधाःसा न्ह्यागु नं ज्या पूरा याय्गु वचं बिल । अले न्हय्दँ तक मेय् प्वाः खनेगु, छुं महामारी, अनिष्ट, अनिकाल, अनावृष्टि, अतिवृष्टि मजुइगु वाचा याकल । वचं अनुसार न्हय्दँ तक पिचासं मेय् प्वाःखन । लिपा बोडेया सुं छम्हसिगु मेय् प्वाःखना थुकियात निरन्तरता बिल । अले थ्व छगू परम्पराकथं विकास जुल । थौतक यक्वसिनं मेय् प्वाःखने धुंकल । तर १३ म्हेसिया नां जक लिखित प्रमाण दु । मेय् प्वाःखनिबलय् हि वइमखु । छुं अशुभ जुलधासा जक हि खनेदइ धैगु जनविश्वास दु ।

३. विधि

मेय् प्वाःखनिम्ह मनुखं प्यन्हु तक अन्न वा मेगु नसा नय्मज्यू । खालि लः जक त्वनी । अले परिवारया मिसात नापं थीके मज्यू । जन्तु, जनावर नं मज्यू । मेय् प्वाःखनिगु करिब एक फिट ताःहाकःगु मुलु नं प्यन्हु तक तुं चिकनय्

थुनातइ । वहे मुलुं मेय् प्वाःखनिगु खः । व मुलु नेवाःजातिया नकमीं दय्कीसा सिकमीया नाइकें मेय् प्वाः खनी । मेय् प्वाःखने धुंकाः मेय् प्वाःखंम्हेसिनं थःगु ब्वहल्य् तयाः ज्वनिगुयात भेय् धाइ । नगर परिक्रमा याइबल्य् व भेय्ल्य् मत च्याकाः परिक्रमा याइ ।

लिखँ

मध्यपुर थिमि, बोडेया मेय् प्वाःखनेगु जात्रा छगू बोडेया नेवाःपरम्पराकथं न्ह्यानाः वयाच्चंगु दु । नेवाःतय्सं छुं जात्रा, पर्व, नखःचखः हनिबल्य् तिथि मितिकथं हनाः वयाच्चंगु दु । तर थ्व मेय् प्वाःखनेगु जात्रा बिक्रम सम्बतया न्हूदया बैशाख २ गते हे जुइ । थ्व छगू गतेकथं हनिगु नखःया रुपय् माने याय्फु । नेवाःसंस्कृतिया छुंछुं जात्रा पर्व बिस्तारं तनावनेधुंकल । तर मेय् प्वाःखनेगु जात्रा बोडेया मनूतय्सं निरन्तररुपं हनावयाच्चंगु दु । छम्ह हे मनुखं भिंस्वकः तक मेय् प्वाःखना थ्व जात्रायात म्वाकातःगु दु । आर्थिकरुपं नं थ्व जात्रा न्ह्याकेत থাকू । करिब ८० हजार निसैं १ लाख तक खर्च जुइगु थ्व जात्राय् मेय् प्वाःखनिम्ह मनुखं बच्छिसिवे अप्वः खर्च याय्माः । थुकथं परम्परायात सकुशल न्ह्याकातय्माः, तर आर्थिक भारं यानाः मेय् प्वाःखनिपिं लिलिज्याःगु खनेदु । नेवाःपहिचान ल्यंकातय्त्त स्थानिय जनस्तरं न्ह्यागु हे समस्या दुसां थुगु जात्रायात निरन्तर रुपं न्ह्याकाच्चंगु दु ।

पचली भैरवया बाखं



श्रृजना महर्जन

मूति

जनश्रुति, लोकबाखंदुने पचली भैरवया बाखं येँया नेवाःसमाजय् व्याप्त दु । पचली भैरवलिसें सिकाली अजिमा, नैअजिमा, मुसुकाः गणेद्यः, द्योसिं व थुमिनाप स्वानाच्चंगु बाखं व बाखलिसे स्वानाच्चंगु थीथी थाय्, देगः, फल्चा आः नं जीवन्त रुपं ल्यनाच्चंगु दनि ।

१. पृष्ठभूमि

मौखिक रुपं छगू पुस्तां मेगु पुस्तायात कनाः वयाच्चंगु थीथी बाखंत लोकबाखं खः । नेवाः लोकबाखं गुलिं कल्पनां जाःगु दुसा गुलिखे लोकबाखनय् समाजं हनावयाच्चपिं द्यः, आजु, अजिमापिनि जीवननाप स्वापू दुगु खँ दु । मनूया सभ्यता न्ह्यासानिसें बाखं कनेगु चलन न्ह्याःगु धाय्फु । धर्म, संस्कृति, परम्परागत विश्वास, आचारविचार, अन्धविश्वास, तन्त्रमन्त्र, टुनामुना एवं जीवनया हर्षविस्मात् लोकबाखनय् सुरक्षित जुयाच्चंगु दु । लोकबाखं दुने पौराणिक बाखं वा मिथक, दन्त्य कथा वा जनश्रुति, नीतिकथा, परिकथा दक्वं दुथ्याइ (शाक्य, १९३०:१५४-१५५) ।


भैरव धयाम्ह महाद्यःया ग्यानापुगु रुपय् कयातःम्ह खः । पचली भैरव येँया दक्षिणपाखे टेकुइ दु । पचली भैलःआजु द्यःयात पीठया रुपय् कयातःगु दु । थन १२ दँय् छकः मोहनीया पचिमद्वःखुनु देया जुजु वयाः खड्ग हिली । थ्व हे दिनय् पचली भैरवया रुपय् तयातःगु त्यपयात जात्रा यानाः हनुमानध्वाखाय् पूजा बीगु चलन दु ।

२. विषयवस्तु

पचली भैलः आजुया छें पचली मखु, चन्द्रागिरी पहाड पारी चित्लाङ्गय्

खः । चित्ताङ्ग्य पचली भैरवयात स्वच्छन्द भैलः धाड । फंपियापिंसं तःधंगु
सम्मान बियाः जुजु थें हनीगु जूगुलिं पचली भैरवयात फंपीयाम्ह जुजु धाय्गु
याः (जोशी, ११३६:३६) । किम्बदन्तीकथं पचली भैरव सुथय् टेकु दोभानय् वयाः
ख्याः सिलाः राजतीर्थ वनाः न्हय्गं (जप) यानाः हाकनं फर्पिङ्गय् लिहां वनीम्ह
जुयाच्वन । बहनी जुल कि हाकनं पुखुसी त्वाःयाम्ह घोसियात त्वाय् नालाः
अन चाःह्यू वइम्ह खः । खोल्चा पाखाय् दुगु नसात्वंसा पसलय् पचली भैरव
नय्त्वने याःवनीम्ह खः । उगु पसः भ्वँत देय्या नैअजिमा (रुद्रमति)या जुयाच्वन ।
न्हिन्हं नय्त्वने याःवनीगु भवलय् पचली भैरव व नैअजिमाया यःत्यः जुल ।
यःत्यःया ताः ईलिपा नैअजिमाया प्वाथय् दत । त्वाल्य हुइनाभुइना, खँ जुल ।
थ्व हुइनाभुइना नैअजिमाया मां-अबुं नं थुल । पयनं मबियाम्ह म्थ्याय् प्वाथय्
दुगु खँ सियाः मां-अबुं नैअजिमायात मचा सुयाम्ह, गन च्वंहेसिया खः धकाः
कुत्तुकुलाः न्यन । लिसलय् नैअजिमां वयाबारे आपाः खँ मस्यूगु लिसः बिल ।
मांअबुं हनिचा द्यः बाय् वइबलय् न्यँ धकाः नैअजिमायात धाल । धया थें बहनी
द्यः बाय् वःम्ह पचली भैरवयात 'छि सु, गन च्वनादीम्ह' धकाः नैअजिमां न्यन ।
न्हापा भैरवं छुं लिसः मव्यू । तःकःमछि हे न्यँसेलिं पचली भैरवं जि मनूया रुपय्
वयाच्वनाम्ह भैरव जूगु खँ धयाबिल । नैअजिमां थ्व खँय् पत्याः मयात । भैरव
रुप छकः स्वय् धकाः नैअजिमां जिद्दी यात । जिं थःगु रुप क्यन कि छु याय्गु
धकाः पचली भैरवं न्यँबलय् 'जिगु नुगःस्यें (मुटु) द्यःछाना बी' धकाः नैअजिमां
लिसः बिल । व हे वचकथं पचिमहःया छन्हु न्त्यः चौथिकुन्हु अजिमाया प्रतीक
फायात बलि बियाः वया नुगःस्यें भैलःद्यःयात छाय्गु चलन आः नं दनि । पचली
भैरवं जाकि भचा नैअजिमायात बियाः धाल, 'छं जितः जाकिं कय्की, जि भैरवया
रुपय् वय् । स्वय् गात कि हाकनं जाकिं कय्की, जि हाकनं मनूया रुपय् वय् ।'
नैअजिमां जाकिं कय्केवं भयंकर रुपया भैरव प्रकट जुल । नैअजिमा थारा न्हुल ।
ग्यानाः नैअजिमा बिस्सुं वन । पचली भैरवं जितः जाकिं कय्की, मनूया रुपय्
हजि धकाः लिनायंकल । लिनाहःगु खनाः नैअजिमा भं भं बिस्सुं वन । बिस्सुं
ववं नैअजिमाया लँ दथुइ व्यथा जुयाः मचा बुल । मचा गन तय् जुल । ब्वाँय्
वनाः थःछेंय्, बाजंया द्यःने तयाः हाकनं दक्षिणपाखे स्वयाः नैअजिमा बिस्सुं वन ।
नैअजिमां बाजनय् त्वःतावंम्ह मचा रुद्रविनायक जुल ।

बिस्सुं ववं नैअजिमा सी उइगु दोभानय् थ्यन । अन थ्यनेवं न्त्यखा हाल ।
न्त्यखा हाल कि मनूत पिहां वइ धकाः नैअजिमा अनं अलप जुयाबिल ।



पचली भैरवः, नैऋजिमा चः व सिकाली अजिमा चः ।

लिनाहयाच्चंम्ह पचली भैरवं आः जितः नं मनूतयसं म्हसीकेफु धकाः ग्यानाः स्वांमाया दथुइ ध्वं स्यानाः सी त्वपुङ्गु पुलं त्वपुयाः सुल । पुलं म्ह छम्हं त्वपुसां प्यंपाः छपाः त्वःमपुगु जुयाच्चन । मनूत वयाः प्यंपाः खःबलय् पचली भैरवया भयंकर रुप नं खन । अर्नालिपा भैरवया रुपबारे मनूतयसं थुल । अले भैरवया पूजा सुरु जुल ।

पचली भैरवलसे स्वानाः सिकाली अजिमाया नं बाखं दु । सिकाली अजिमा पचली भैरवया न्हापांम्ह कलाः खः । सिकाली अजिमाया थःछें, येंया न्ह्यमून्ह्यः त्वाल्य् खः । पचली भैरव व सिकाली अजिमापाखें तःम्ह हे मस्त दु । पचली भैरवया मेम्हनाप यःत्यः जूगु सिकाली अजिमां सीकाः साःप दुःख ताय्कल । गुलि ह्यय्कलं पचली भैरव म्हायःम्ह जुल । थः काय् गणेशयात अबुया लँ स्वकेछवल । 'गुबले छिमि बाः वइ, नापं ब्वना हजि' धकाः थःपिं दक्षिणपाखे स्वयाः वन । वँवं खोकनाय् थ्यन । अन किसान ज्या यानाच्चंम्ह छम्ह ज्यापुं ख्वख्वं वःम्ह सिकाली अजिमायाके न्यनेकने यात । सिकाली अजिमां थःत जूगु खँ कन । किसानं अजिमायात थःथाय् चनेत थाय् बिल । सिकाली अजिमा अन हे

चवन । कन्हय् कुन्हु सुथय् खाया सः ताय्वं अजिमा द्यः पिहां वयाः अन हे सिद्ध जुयाबिल । उकिं आः नं खोकनायापिसं सिकाली अजिमाया पूजा यानाच्वंगु दु । सुथय् खा हालेवं अजिमा सिद्ध जुयावंगुलिं खा बलि बीगु मयाःसा खाया ला नं मनः ।

सिकाली अजिमा व पचली भैरवया तःधिकम्ह काय् मुसुकाः गणेश खः । सिकाली अजिमां कंगु दुःख न्यनाः गणेशं थः अबुयात ख्याय् धकाः लँ सीकाः पा ज्वनाः चल्बु पाखाय् पियाचवन । उखुन्हु हे बहनी नैअजिमायाथाय् वनेत पचली भैरव अन थ्यंबलय् थः काय् गणेश पा ज्वनाः पियाच्वंगु खन । पचली भैरवयात लिहांवने वा न्थ्यावने छु याय् छु याय् जुल । थः अबुया उज्वःगु पहः खनाः गणेशयात न्हिले मास्तिवल, अले मुसुहुं न्हिल । मुसुहुं न्हिउगुलिं गणेशया नां हे 'मुस्काः गणेश' जूवन ।

मेगु बाखंकथं सिकाली अजिमां थः तःधिम्ह काय् गणेशयात पचली भैलःआजुयात नापं व्वना हजि धकाः चल्बु पाखाय् त्वःताः थकल । भचालिपा नैअजिमा न्त्यः न्त्यः व पचली भैलःआजु ल्यू ल्यू वयाच्वंगु गणेशवं खन । थः अबुया थुज्वःगु पहः खनाः वयात न्हिलेवःगु जुयाः मुसुकाः गणेशः धयातःगु खः । थुम्ह गणेशःया देगः आः नं चल्बु पाखा क्वय् दनि ।

टेकु मचलीं थहां वयेवं देपापाखे छगू फल्वा दु । गुकियात द्योसिं फल्वा नां वियातःगु दु । थुगु फल्वा थ्यंमथ्यं ८००-९०० दँ न्त्यः दय्कूगु अनुमान दु । तर थुगु फल्वाय् ने.सं. ८४६ या ल्वहंपौ लुयावःगु दु । जनश्रुतिकथं पचली भैरवया त्वाय् द्योसियात पचली भैरवं मनूया रुपय् सःतः वइगु इलय् द्योसिं जा नय्त्यंगु पाःलाइ सा गुबलें जा नयाच्वंगु पाःलाइ । अले, सःतः वय्वं जा हे मनसें द्योसिं दनावनीम्ह जुयाचवन । थ्व पहः खनाः द्योसिया छेजःपनि तंवल । पचली भैरव थहां वयाः पियामवीम्ह जूगुलिं भैरवयात पीकातय्त प्यंगः थां धंकाः थ्व फल्वा दय्काब्यूगु किम्बदन्ती दु । तर अन ल्वहंपौ कथं जुगुचर महजनया नामं वया काय्पिं धम्मचर, पद्रचर व जयचरपनि नां तयाः थुगु फल्वा दय्कातःगु खनेदु ।

द्योसिं फल्वाय् लुयावःगु ल्वहंपौ व उकिया भाय्हिला थुकथं दु -

, श्री ३ दक्षिणभैरव प्रीतिं पतिमाद्यः बोययात दयका सम्बत् ८४६ चैत्रमास कृष्णपक्ष त्रयोशी तिथौ रेवति नक्षत्र प्रिति जोग्य अंगवासरे मेषरासि गते मीन रासि गते रिसचदमसि, दानपति ब्रम्हनतोर पुखुसि यंताछे महजन जुगीचरया नामन दयका पुत्र धर्मचरस्य पुत्र, पदुचरस्यपुत्र जयचर थ्वति सम्पूण (धर्म) चित्त उत्पत्ति जुयाव थ्व फर दयका जुरो, शुभ ॥

ब्रम्हत्वाः पुखुसि यंताछैय् च्वंम्ह दानपति जुगीचर महजनया नामय् काय्पिं धर्मचर,
पदुचर व जयचरपिनि धर्मचित्त उत्पत्ति जुयाः ने.सं. ८४६ चैत्रमास कृष्णपक्ष
त्रयोदशी तिथिस रेवतिनक्षत्र प्रितिजोग्य मंगलवार मेष राशि गते मीन राशि गतेखुन्ह
दक्षिण भैरव मःद्यः व्वयत् थ्व फल्चा दय्कूगु जुल ।

लिखँ

नेवाःतय्सं हनावयाच्चपिं द्यः आजु-अजिमापिं खः । थुपिं गुगुं इलय् मनू खः ।
थःगु कृतिं यानाः द्यः जुयावीपिं खः । उकिं नेवाः समाज थः हे द्यः जुयावनेफुगु
समाज खः धाइ । गुकिया दसिकथं भीसं पूजा यानावयाच्चनापिं आजुअजिमापिनि
लोकबाखनय् उमित द्यःपिं कथं जक मखसे साधारण मानवकथं न्ह्यव्वयातःगु दु ।
उमिसं साधारण मानवकथं यःत्यः याइगु, ग्याइगु, न्हिलीगु, विस्युं वनीगु, सुलीगु,
त्वापु याइगु आदि घटनाक्रमं क्यनाच्चंगु दु । पचली भैरवया बाखनय् भैरव लिसें
वया न्हापांम्ह कलाः सिकाली अजिमाया बाखं नं स्वानाच्चंगु दु । सिकाली अजिमाया
बाखं नापनापं थुकिया स्वापू खोकनातक थ्यंगु खंकेफु । खोकनाय् गुकथं सिकाली
अजिमा सिद्ध जुल, खोकनामिपिसं छाया खाया ला मनल आदि न्ह्यसःया लिसःत
थुज्वःगु जनश्रुतिं बियाच्चंगु दु । अथे हे जनश्रुतिं थौकन्हया नखःचखः छाया न्यायका
वयाच्चन, नखःचखः न्यायकेबलय् छु विशेष ज्याखँ छाया यानावयाच्चन धयागु न्ह्यसःया
लिसः नं बियाच्चंगु दु । गथे पचली भैरवया बाखनय् पचिमहःबलय् भैलःआजु लिसें
नैअजिमा छाया पितव्वल, वया नं जात्रा छाया याय्माल, भैलःआजुयात फाया बलि बियाः
वया नुगःस्ये छाया छायाय्माल आदि आदि न्ह्यसःया लिसः लुयाच्चंगु दु । जनश्रुतिया
लिधंसाय् छु नं नखःचखः छाया हनावयाच्चन, उकिया ल्यूने कारण बारे थप सोधखोज
याय्गु व उकिया ल्यूनेया वैज्ञानिक आधार माले नं अःपुइकावीगु भलसा काय्छिं ।

लिधंसा

जोशी, सुन्दरकृष्ण (ने.सं. १९३०) *तिकिभ्यालं* । लुँहिति, यल : शर्मिष्ठा जोशी ।
शाक्य, रवि (ने.सं. १९३०) 'लोकबाखं' *लोकवार्ता* । यलः नेपालभाषा केन्द्रीय विभाग, पृ. १५४-१७ ।

खँल्हाबल्हा : दशनारायण महर्जन (१५), पुखुसी, यें ।

नवीन सिंह डंगोल (४०), टेकु, यें ।

महेन्द्र महर्जन (४७), पुखुसी, यें ।

रामबहादुर खड्गी (९२), पुखुसी, यें ।

हरिनारायण डंगोल (८२), टेकु, यें ।

बुलु गांया सीसंस्कार



सुजल वज्राचार्य

मूति

मनूया मरण जुइगु बखतय् मदुम्ह मनूया आत्माया सुखावास जुइमा अले मेगु जन्म बांलाथाय् लाय्मा: धका वया परिवार, फुकितय्सं याइगु संस्कार हे सीबलय् याइगु संस्कार ख: । नेवा:तय् दथुइ जुइगु मृत्यु संस्कार यक्व धयाथें ज्व:ला:सां गनं गनं पा: । मस्तय्त याइगु व त:धिकपिंत याइगु सीसंस्कार भतिचा पा: । बुलु गामय् जुइगु मृत्यु संस्कारय् छु छु याइगु अले छु छु याय्मा: धइगु छसिकथं सिका यंके ।

१. सीसंस्कार

१.१ थलाय् कुलाय् वाय्गु

वीणा महर्जनजुया धापूकथं मनू मन्त धइगु खँ सीधुंका: दकले न्हापां छयली सौबँ इली । अले मनू गन मदुगु ख: वयात ल्हवनाहया: सौबँ इलात:गु थासय् तय्हइ । सीम्हेसित न्हापां खा: सीकी, सिन्हं तिकी, लुं छकुचा म्हुतिइ तय्की, खलचा छग: नं म्हुतुइ भ्वसुकावी । अले सीम्हेसिया म्हय् मुलुं सुइ । थ्व ज्या दाजुकिजाय् दकले थकलिं याइ अथवा व छेंया मूल मनुखं याइ ।

१.२ छ्वासलय् वाय्गु

छ्वासलय् वाय्गु ज्या छेंया थकाली मिसां याइ । थलाय्कुलाय् याइम्हसिया जहान दुसा वं याइ मदुसा परिवारय् न्ह्याम्हेसियां या:सां ज्यू । मदुम्ह सिथं यंकिबलय् छ्वासलय् वाइम्ह ल्यू ल्यू वना: छ्वासलय् वाय्गु याइ । न्हापा न्हापा मृत्यु दर्ताया रुपय् छ्वासलय् वाय्गु चलन दुगु ख: । छ्वासलय् वाय्गु धइगु थ्व गामय् छम्ह मनू पा: जुल धका: गामय् च्वपिं मनूतय्त सुचं बीगु ज्या नं ख: ।

१.३ पाखाकू थनेगु

थ्व छें हे याइगु ज्या खः । हलचाय् सौपा तयातगुयात कयाः पाल्वा च्याकी । थ्व ज्या थकालिम्ह म्थ्याय्मचां याय्माः ।

१.४ सिथं यंकेगु

गामय् सिथं यंकेगु लँपु बिस्कं दु, सिथं यंकीगु लँपु थुगु गांया पश्चिम दिशाय् लाःगु लँपु खः । सिथं यंकिबलय् काँ बाजं छगू अनिवार्य माः । सीम्हेसिया परिवारपिं भजनय् वनाच्चपिं जुसा 'हरे राम' हाला यंकी । सिथं यंकिबलय् दकले न्हापां काँ बाजं पुइपिं जुइ । अनं ल्यू वँ पुइपिं अनं ल्यू वा ह्वलीपिं, अनं अपाः, सु, पुज्वः ज्वना वनीपिं, अनं ल्यू सीम्ह मनूयात रथय् तयाः प्यम्हसिनं कुबिया यंकी, अनं ल्यू परिवारपिं, थःथितिपिं मलामि वनी ।

१.५ बुलुमीतय्गु दिप दिपय् याइगु ज्याखँ

हेरामाया महर्जनजुया धापू कथं बुलु गांया मनूतय्गु दिप बज्रबाराही जंगल दुने लाः । न्हापा न्हापा बज्रबाराही देगः न्ह्यने हे बुलुमीतय्गु दिप खः । दिपं याना देगः फोहर जुल धकाः देगःपाखें भतिचा तापाक्क सारे याःगु खः ।

१.६ दिपय् याइगु ज्याखँ

दिपय् थ्यंकाः मदुम्हेसित दिपय् स्वचाः चाहीकातइ । ख्वयाः वंपि म्थ्यामस्तय्सं नं वा ह्वह्वं दिपयात स्वकः चाःहिली । दिपय् तय्धुंकाः न्हापां ख्वयाःवीपिं वा ह्वलावःपिं मिसातय्सं लः त्वंकी अनं लिपा गुथियारपिंसं त्वंकी । सुनां मि तइगु खः वं दकले लिपा त्वंकी । बौम्ह जूसा थकालीम्ह काय्मचां मि तइ, मांम्ह जूसा क्वकालिम्ह काय्मचां मि तइ । मि तय्धुंकाः गुथियारत बाहेक दक्व लिहां वइ । लिहां वइगु इलय् बुलु गामय् पूर्वपाखे दुगु शिव पुखू (ल्वहंपुखू)या लखं ख्वाः सिलाः छ्यनय् हा यानाः तिनि छेंय् दुहाँ वय्माः धइगु चलन दु । बुलु गां लिक्क खुसि मदुगु जुयाः थ्व पुखूया लखं थःत चोखो याना तिनि दुहांवय्मा । कृष्णगोपालया कथं यदि अथे याना मवल धासा दिपया बांमलाःगु प्रभाव अथवा दिपय् सुं आत्मा थःत थियाहगु दुसा छें भिनि मखु । सिथं यंकेगु अले दिपय् याय्माःगु ज्या फुक्क गुथियारपिन्सं याइ । दिपय्या ज्या सिधल धाःसा ज्या सिधल धकाः छें सुचं ब्यू वइ ।

१.७ दिपं लिहां वय् धुंकाः याइगु ज्याखँ

दिपं लिहां वय् धुंकाः छैय् दुहांवइवलय् दाजुकिजापिन्सं पालु छक्कु छ्यानाः बजि निगःचा ज्वनावइ, दकसिगु नं ल्वाकःब्वाकः यानाः खिचायात भाग बियाः नकाः बारे याय्माःपिं, सकल फुकिपिंत इनाः चिपं थीकि । यदि थ्व चिपं थ्यू मवल धाःसा बाया वन धकाः सीका काइ । दिपं लिहां वय् धुंकाः छैय् च्वंगु न्हाय्कं दक्व त्वपुइगु चलन दु । घःसूः मतःतले छैया दक्व न्हाय्कं त्वपुइगु याइ । दुखं च्वनेमाःगु जुयाः समाः याय्पापाखें लिचिलेत नं न्हाय्कं त्वपुइगु खः, घःसू तय्गु दिंया ल्याखं भिनिन्हु तक न्हाय्कं त्वःपुइगु चलन दु ।

१.८ बिचाः वय्गु

छैया दुजः मदुगु शोकं च्वनाच्चपिं परिवारपिंत थःथिति जःलाखःलपिंसं वयाः बिचाः याः वइ । शोकं कःपिंत नकेगु नितिं सिसाबुसा, मरि, बजि आदि ज्वना थःथितिपिं बिचाः याःवइ । अथेहे यक्व दुखं ताय्का च्वने मज्यू धकाः सान्त्वना बियावनी ।

१.९ लोचाः

खुनु दुखुनु सीम्हेसिया म्हाय्मचातय्सं बारे यानाच्चपिं वा दुखं च्वपिंत, फुकिपिंत नँसात्वंसा जोरे यानाः नके हय्गु याइ । म्हाय्मचा मदुसा पिनेच्चपिं न्हाय्महेसिनं जूसां जोरे यानाः हइ ।

१.१० पाखाजा

थ्व मिसातय्सं याइगु ज्याखँ खः । न्हापालाक्क जा थुइ, भ्यगतय् बांलाक जा न्हापां पाखाय् तयाः खैय् छगः दथुइ तइ । चाकहिक न्हय्ता ल्वसा तयाः सीम्हेसिया कोथाय् तइ । मिजंत खुसिइ वनी, खुसि वनावःपिं मिजंतय्सं पाखाजा स्वय्मज्यू । मिजंतय्सं पाखाजा खनी धकाः मिजंतय् त पाखाजा तय् मसिधतल्ले छै पिने पीकाः तइ । सीम्ह वयाः पाखाजा नया तः कि मतः धइगु खः चान्हय् वनाः म्हाय्मचां स्वःवनी । सीम्ह वयाः नया तः-मतः स्वइ अले उकियात त्वपुयाः पाखाय् तय्यंकी । कन्हय् सुथय् नं नया तः-मतः स्वयाः छ्वास वाय्थाय् तय्यंकी ।



बुलु गांया शिवपुखू, छ्वास वांछवय्गु थाय् व बज्रवाराही जंगल दुने बुलुमितय्गु दिप ।

१.११ दूब्यकेंगु

भिन्हु दुखुनु दक्व दाजुकिजापिनि थःथगु छेंय् वँ इलाः, भाडाभिडा दक्व सिली । अनं लिपा मिस्त मदुगु छें वइ, छखा छें छम्ह मिसा जक वंसां गाः । मिजंत चुं तयाः हल्वा छगः, चिकं, दुरु ज्वनाः खुसिइ वनाच्चनी, मिस्त चाहिं लिपा खयावनी । अन मिजंतय्सं थःत शुद्ध याय्या नितिं म्वःल्हुइ, सँ खाइ, नौ नं लुसि थीकाः शुद्ध यानाबी । बारे याय्माःपिं परिवारपिसं सादुरु जक हाः याना वइ सा बारे याय्म्वाःपिन्सं चिकं कयाः वइ । थ्वहे दिननिसं सीम्हेसिया काय्पिसं बर्खि वसः पुनी ।

१.१२ घःसू

भिनन्हुखुनु गुर्जुयात छेंय् निमन्त्रणा यानाः कचिगु अपाः न्यापा तयाः होम याकी । छें छखां कुँ वय्काः लुखाय् स्वपु नकी ताइ । कृष्णगोपाल महर्जनजुया धापू कथं थ्व यात कि सीम्ह मनूया आत्मा दुहाँ वयाः छुं हानी याइ मखु धइगु लोक विश्वास दु । अथेहे घःसू याइ बले गं नं थाइ, व गंया सः न्यनाः सीम्हेसियां जि सित धकाः महसुस याइ धइगु लोकधारणा दु ।

१.१३ क्रिया च्वनेगु

पुनकेशरी महर्जनजुया धापू कथं थुगु गांया महर्जनतय् क्रिया च्वनेगु चलन मदु । तर श्रेष्ठ, ब्रह्मूतय् क्रिया च्वनेगु चलन दु । क्रिया च्वना: बालाक पालना या:पिं भिनिन्हुतक बांलाक खँ नं ल्हाइ मखु । तर सन्ध्या इलय् दाजुकिजापिं वया: खँ ल्हाना: आ: गथे याना: परिवार न्ह्याकेगु धइगु छलफल याइ ।

१.१४ लत्या

लत्या स्वयां न्ह्य: च्यान्हइ छक: छक: मदुगु बारय् जावा नकेगु चलन दु । छँ बँ इला: सुथय् पिखालखुइ नसा:त्वसा तया: खिचातय्त नकी । न्याक:तक थथे नके मा:गु ख:सा प्यक: जा हे नकी सा छक: बजि तया: नकी । अनं लिपा लत्याबलय् सीम्हेसित तरे याय्या नितिं पिण्ड थना: सीम्हेसिया वस:, लाकां, अलय् सीम्हेसित य:गु चिजवस्तुत गुर्जुयात दान याइ । थ:थितिपिंत भव्य् नं नकी । यदि दाजुकिजापिनि लत्या दुने छुं ज्याखँ पन धा:सा थ्व ज्या भिंस्वन्हुखुनु याय्गु नं चलन दु ।

१.१५ खुला

खुलाबलय् गुर्जुयात छँय् निमन्त्रणा याना: कुसा, लाकां, वस:, तुतां आदि दान याय्गु याइ ।

१.१६ दच्छिन्यकं ला-ला पतिकं याइगु ज्या

मदुगु तिथियात कया: लच्छि छक: छक: गुर्जु थाय् वना: निसला काय्गु ज्या याइ । थ:गु गच्छे अनुसारं दान नं बीगु ज्या याइ । मि त:म्हेसियां ला पत्तिकं सँ खाय्मा: ।

१.१७ दकिला :

मदुम्हसिया आत्मा शान्तिया लागि मदुगु छगू दँ दुगु तिथिइ गुर्जु स:ता श्राद्ध याइ । थ्व दिनय् दुखं च्वनागु इलय् बिचा व:पिं व ज:लाख:लापिं सकसित नं स:ता: भव्य् नकी । थ्व हे दिनय् बर्खी वस: नं त्व:ती ।

मदनकुमारी महर्जनजुया धापू कथं यदि छुं जुया: थुगु गामय् कय्ता पुजा याय् न्ह्य: हे सुं मस्त मन्त धा:सा सीम्हेसित सिथं यंकेगुनिसें फुकक साधारण मनूत मदइबले थें हे याइगु ख: तर साधारण मनूतय्त मि तइगु दिपय् मि

मतसे बज्रबाराही चः ल्यूने छगू दिप दु अन मि तय्गु याइ । तर व दिप गन ला धकाः सीके थाकु, गुथियारपिसं जक हे मालेफु ।

मदनकुमारी महर्जनजुया धापू कथं यदि छुं जुयाः मचा बुयाः निला मदय्कं मचा मन्त धाःसा मदुम्ह मचायात बुयाः सिथं यंकी । अले व मदुम्हेसित मि मतसे बज्रबाराही जंगलया पिनेसं गाः म्हुयाः ल्हाकाः छवइ । गुगु थाय् थौकन्हय् माइक्रोबसपार्क जुयाच्चंगु दु ।

मिसा मचायात बाह्वा तय्गु छगू नेवाः संस्कार खः । मदनकुमारी महर्जनया धापू कथं यदी बाह्वा तइगु इलय् मचा मन्त धाःसा गन मदुगु खः उकिया थ्याक्क क्वय् छयली गाः म्हुइ । अले सीम्हेसित मथ्यूसे धलिं चानाः धलिं नापं गालय् क्वफानाः ल्हाकी । बाह्वा तइगु इलय् मदुम्हेसित सुनानं थीमज्यू धइगु लोकविश्वास दु ।

लिखँ

बुलु गांया बुसानिसें सीबलेतक याय्माःगु थी थी संस्कार मध्ये सी संस्कारयात कयाः अध्ययन यानागु खः । आःया इलय् नेवाः संस्कार संस्कृतिइ विदेशी प्रभाव लानाः ह्यूपाः वयाच्चंगुया प्रभाव थ्व गामय् नं लानाच्चंगु दु । थी थी विदेशी रहनसहन अले विदेशी संस्कारं यानाः धर्म परिवर्तन यानाः नेवाःत नेवाः संस्कारयात त्वःताः देसपिनेया संस्कार नालाच्चंगु खनेदु । थुगु गामय् नेवाः संस्कारयात म्हसीकेगु कथं, नेवाः संस्कारया महत्व व थुकियात ल्यंका तय्माः धइगु ज्ञानमूलक शिक्षा बी कथं थी थी नेवाः ज्याभ्वःत न्ह्याका यंकेमाःगु खनेदु । अथे मजुल धइगु खःसा नेवाःतय्सं न्ह्याकाः वयाच्चंगु सी संस्कारय् नं याकनं ह्यूपा वइगु स्थिति खनेदु ।

लिधंसा

सहलह

- कृष्णगोपाल महर्जन, (७५) बुलु, विसं २०७४-०२-०४ ।
दातीमाया महर्जन, (७१) बुलु, विसं २०७४-०२-०४ ।
पुनकेशरी महर्जन, (६४) बुलु, विसं २०७४-०२-०४ ।
मदनकुमारी महर्जन, (७०) बुलु, विसं २०७४-०२-०४ ।
वीणा महर्जन, (४२) बुलु, विसं २०७४-०२-०४ ।
हेरामाया महर्जन, (५९) बुलु, विसं २०७४-०२-०४ ।

नेपालभाषा केन्द्रीय बिभाग,

त्रिभुवन बिश्वविद्यालयपाखें प्राप्त जूगु विवरण कथं एम ए ब्वंषिं बिद्यार्थी तय्गु नां धलः

२०३८ सालया पुचः

मल्ल के. सुन्दर, ९८४१२५५७०१
भुषण प्रसाद श्रेष्ठ, ९८४१४६४०७२
अमृत तुलाधर
माधव लाल प्रधान
सानु काजी महर्जन
सर्मिस्था जोशी
कमला नेवाः
बुद्ध रत्न शाक्य
मंजु मास्के मल्ल ९८४१५८४२१६
पदमा सुन्दरी श्रेष्ठ

२०३९ सालया पुचः

तिमिला रञ्जित, यंगाः, ४२५४८१४
शान्तिमान जोशी
सरस्वती लक्ष्मी रञ्जित, ४३५९६९६
प्रेमनारायण मानन्धर
सुधा प्रधान
मंगला कारञ्जित ५५२५६८९
मनमोहन मास्के
सरीता तुलाधर
केशरी देवी बज्राचार्य
तारादेवी शाक्य
डिल्ली प्रसाद जोशी
प्रवीण ज्वालानन्द शुक्ला
सूर्य बहादुर मुल्मी
विन्दु बज्राचार्य
सरोजिनी लता अमात्य
चन्द्रमान बज्राचार्य
रामेश्वर मान श्रेष्ठ
कमला वैद्य
उद्वव बहादुर श्रेष्ठ
हरिमोहन बनिया

मनोहरी बनिया
चन्द्रप्रभा अमात्य
प्रेमहीरा तुलाधर, ९८४१२६९१११
केशावती ताम्राकार, ४२६१०११
दुर्गासिद्धि बज्राचार्य
पूर्णदेवी श्रेष्ठ, ४२५१३१९
महेन्द्र ध्वज जोशी
इन्दिरा प्रधान, ४३३०४३७

२०४१ सालया पुचः

राम मंगल जोशी
मोहनलाल श्रेष्ठ
भवानी तुलाधर
विष्णु प्रसाद श्रेष्ठ
हरिमान जोशी
निर्मला कायस्थ
अनागतरत्न कंसाकार
किरण प्रभा तुलाधर
फरिन शाक्य
प्रेमशान्ति तुलाधर, ९८४१२४८५७६
रामदेवी श्रेष्ठ
मंगलमान शाक्य
सुजाता मानन्धर
अपर्णा प्रधान
नारद बज्राचार्य, ४२७९८०१
मनोरमा तुलाधर

२०४२ सालया पुचः

श्रीधर दास श्रेष्ठ
न्हुच्छे बहादुर महर्जन
मंगलदास महर्जन
रतीदेवी जोशी
बुद्धलक्ष्मी शाक्य

सहाना प्रधान (श्रेष्ठ)

दयारत्न शाक्य

२०८३ सालया पुचः

अगनावादे श्रेष्ठ

बुद्धरत्न शाक्य

प्रतिसरा मानन्धर, ४२६३७६९

रविन्द्रराज राजकर्णिकार

कोकिला धाखा, ४७२९९०८

२०८४ सालया पुचः

अभयरत्न कंसाकार

जयन्त श्रेष्ठ

ओमकारेश्वर श्रेष्ठ, ९८४९३२७९१४

सरला प्रधानाङ्ग

भावना बज्राचार्य

उत्तम बहादुर बज्राचार्य

रामेश्वर श्रेष्ठ

मोतिदेवी शाक्य

२०८५ सालया पुचः

बाबुरत्न नापित

वासुदेव श्रेष्ठ

सुजाता शाक्य

शान्ति मानन्धर

सरला मानन्धर

सूर्यबदन प्रधान

पद्मलक्ष्मी राजभण्डारी

२०८६ सालया पुचः

सन मानन्धर

अमृतहिरा तुलाधर

उषा जोशी

किरण राजभण्डारी

समीता श्रेष्ठ

शिवलाल श्रेष्ठ

प्रद्युम्न कृष्ण श्रेष्ठ

प्रचण्ड रञ्जित

सुरेन्द्रमान शाक्य

सुरेन्द्र नारायण मुनकःमि

लक्ष्मी भक्त श्रेष्ठ

कृष्ण मोहन जोशी

इला वैद्य

भावना बज्राचार्य

रामेश्वर श्रेष्ठ

विजया जोशी

राजेशरत्न बज्राचार्य

कृष्ण भक्त दली

युवानन्द बज्राचार्य

मिला कंसाकार

गोकुल मानन्धर

अमर बहादुर श्रेष्ठ

२०८८ सालया पुचः

सरीता महर्जन

चन्द्रादेवी मानन्धर

पद्म हीरा तुलाधर

नजुमा राजभण्डारी

किरणचन्द्र राजभण्डारी

हरि अवाले

तेजशोभा शाक्य

सीता बज्राचार्य

राधा कारञ्जित

द्वारिकामान श्रेष्ठ, ४७८३६९३

श्रीलक्ष्मी श्रेष्ठ

शरदवीर कंसाकार, ४२४२२६६

२०८९ सालया पुचः

हरिबहादुर अवाले

सरीता अमात्य

दीपाराज श्रेष्ठ

बीना देवी गोर्खाली

लक्ष्मी देवी शाक्य, ५५४३८७७
प्रमीला ताम्राकार, ९८४१४६४२१५
रोहिणी श्रेष्ठ
नेमराज बज्राचार्य
इन्दीरा प्रधान
कल्पना श्रेष्ठ
गुणलक्ष्मी बज्राचार्य, ५५३३६६९
नजुमा राजभण्डारी, ५५३३८८५
दीलिप कुमार जोशी, ९८४१३३३११४
नीलम शाक्य

२०५० सालया पुवः

ईश्वरी मैया श्रेष्ठ, ५५३८८०८
रत्नकाजी महर्जन
सुमनदेवी रञ्जित
सावित्री देवी श्रेष्ठ, ४२१२१४४
कमला मानन्धर, ४२६४६५१
भूमहेश जोशी
सुमन ताम्राकार
अनिता कंसाकार
आशाकुमार चिकंवंजाः
रत्नकाजी महर्जन
हर्क बहादुर शाक्य
किरण चन्द्र राजभण्डारी

२०५१ सालया पुवः

कदमलाल महर्जन, ५५४३०३३
सुदर्शना दर्शनधारी, ४२८३३७३
लोकेन्द्रमान बज्राचार्य, ६६१४२३३
मीनर्वा बज्राचार्य

२०५२ सालया पुवः

बन्दना शर्मा
शोभा महर्जन
सुधा प्रधानाङ्ग
सुरेश राजभण्डारी
मीन बहादुर जोशी

२०५३ सालया पुवः

मंगलमान शाक्य
राजेन्द्र शाक्य
दिलेन्द्रराज श्रेष्ठ
बबिता मानन्धर
पुनम मानन्धर
इन्दु अमात्य
रत्नवीर शाक्य
बन्दना शर्मा
केशवलाल महर्जन
तेजमान महर्जन
सुलोचना धिताल, ४४२२५८८
माणिकरत्न शाक्य
सृजना हाडा

२०५४ सालया पुवः

सुनिल कुमार बाराही
रुपा बज्राचार्य
संगीता धाखा
हरिकृष्ण डंगोल
न्हुच्छेलाल महर्जन
राजेन्द्र मानन्धर
अनिलविलास बज्राचार्य
निर्मला श्रेष्ठ
प्रयागमान प्रधान
अनुप सिं सुवाल, ४२७८१०१
अमरमान शाक्य
सुनीता बज्राचार्य
हिराबहादुर महर्जन
कमलेश महर्जन
रत्न महर्जन
बबिता मानन्धर

२०५५ सालया पुवः

मेरिना सिखाकार
तुलसी बहादुर नेमकुल

लक्ष्मी केशरी शाक्य
 अनिलविलास बज्राचार्य
 रेखा शाक्य
 जयराम महर्जन
 श्याम अवाले
 कल्पना श्रेष्ठ
 चन्द्रकृष्ण अवाल
 रीता राजभण्डारी, ४२३२८०१
 रामकाजी महर्जन
 गौरी श्रेष्ठ
 आशामाया प्रजापति
 रीता स्थापित
 लक्ष्मण श्रेष्ठ ९८४१२७६२२४
 अमिता शोभा शाक्य, ५५३४९५३
 राधा श्रेष्ठ
 अष्टराज श्रेष्ठ, ५५४४६२४

२०५६ सालया पुचः

प्रद्युम्न कृष्ण श्रेष्ठ, ५५३५४२१
 मञ्जुतारा शाक्य, ५५३८६०२
 रविशान शाक्य, ५५३३८०४
 शरदवीर सिं कंसाकार, ९८५१०८३२४३
 चन्द्रलक्ष्मी बज्राचार्य, ४२५००७५
 मिला श्रेष्ठ
 देवरत्न शाक्य, ५५३७८८७
 प्रकाशमान शाक्य, ४२२६७०२
 जीवन कुमार महर्जन, ४३३४११४
 राजनलाल जोशी, ९८५१०९४६८२
 विन्दुबाबा जोशी, ५५३३४३२
 राजेन्द्रकुमार महर्जन, ४३३१७७६
 सृजना शाक्य, ६६३१७०२
 शान्ति श्रेष्ठ, ४३५३२३१
 लेलिन शाक्य, ४२४७८४३
 योगेन्द्र राजकर्णिकार, ४२५३५३५
 राजित बहादुर श्रेष्ठ, ५५३७४७१
 नरेशवीर शाक्य, ४२२२९९७

२०५७ सालया पुचः

सुदीप महर्जन, ४३३४११४
 राम बहादुर श्रेष्ठ
 पूर्णिमा डंगोल, ४२६२९७४
 ज्ञान बहादुर महर्जन, ४३३१५५०
 ललिता मानन्धर, ४२५००४३
 बेविका मास्के, ४२५१८५७
 स्वस्ति जोशी, ९८४१३९००२०
 योगेन्द्र प्रसाद श्रेष्ठ
 राजित बहादुर श्रेष्ठ, ९८४१२७४७०९
 सूर्यमान राजभण्डारी, ६६१३४०१
 अन्नपूर्ण दर्शनधारी, ४२८१९६१

२०५८ सालया पुचः

युकी सिराइ, ५४२०७२५
 दीपक मास्के, ६६१४२७५
 महेन्द्र श्रेष्ठ, ६६१०१६४
 रत्न मेहर श्रेष्ठ, ४२५८३२८
 ईश्वरमान श्रेष्ठ, ५५३३९८२
 बिनोद कुमार श्रेष्ठ, ५५२०२३७
 सुरेश राजभण्डारी
 अमीर रत्न ताम्राकार, ४२६१०७३
 कमल रत्न तुलाधर
 सर्वज्ञ रत्न तुलाधर, ४२५३१७४
 स्वयम्भूराज शाक्य, धलायचा, यल
 श्याम सुन्दर राजवंशी, ४२५९१८९
 त्रिप्रसाद धौभडेल, ५५२०२३७
 पूर्णिमा डंगोल, ५५३५००५

२०५९ सालया पुचः

वीरेन्द्र प्रसाद श्रेष्ठ, ४४५०७६९
 रवि महर्जन, ४३३१६४६
 हेमराज शाक्य, ५५२६१६९
 रीना बज्राचार्य, ५५२४३५५
 सुभाषराम प्रजापति, ९८४१३५८१११
 रमेश महर्जन, ४३३१७९४

मदन तण्डुकार, ४२४७९७६
राजेन्द्र श्रेष्ठ, ६६३३२०४
पुष्कर भक्त माथेमा
राजन महर्जन, ४३११७२४
राजेश डंगोल, ४४८६५४७
सुविन्द्र महर्जन
देवरत्न शाक्य, ५५५७८८७

२०६० सालया पुचः

सुनीता मानन्धर, ४२८५९४८
सुरेन्द्रमान शाक्य, ५५३०९२०
सुशिला शाक्य, ५५३०९२०
काजीमान डंगोल, ५५२०७८९
पूर्णलक्ष्मी शाक्य, ५५४०८८९
हेराकाजी महर्जन, ९८४१३६३९०२
विजय बहादुर शाक्य, ४२५६११८
किरण शाक्य, ५५३४९९२
राजु कपाली, ५५३३९१५
जुजुमान महर्जन, ४२५६६६३

२०६१ सालया पुचः

पूर्ण बहादुर महर्जन, ५५४९२१०
ज्ञानी मैया महर्जन, ९८४१३७३६३५
पुष्कर विक्रम प्रजापति, ६६३२५६८
शारदा शाक्य, ५५४२१७९
रवि शाक्य, ५५४३९७५
रश्मि मानन्धर, ४२६६९०९
सुरेन्द्र केशर अमात्य, ५५३३३२२
सुधा देवी प्रधान, ४२२८००२

२०६२ सालया पुचः

मणिक लक्ष्मी शाक्य, ५५३७६५८
बदन शर्मा, ५५३५६२६
शैलेश बहादुर प्रधान, ५५४२(४८
गौतम तिमिला, ६६१४६९१
हरिकृष्ण डंगोल, ४२५(६(६
प्रयागमान श्रेष्ठ, ४२७३१३१

अरुण श्रेष्ठ, ४२५४६३७
श्रीति शाक्य, ४२६८७७५
प्रीति शाक्य, ४२२२३९१
राजन तण्डुकार
रविन्द्र महर्जन
गुणिन्द्र रत्न बज्राचार्य, ४२२९२९५
धर्म गोविन्द, ५५३५३४६
माणिकमान शाक्य, ४२५२९१६
जुनकृष्ण जोशी, ५५३४८१८
अनिता, ९८४१४१२१०६
कपिला श्रेष्ठ
शोभा, ९१६२०८२०२
विजयरत्न तुलाधर, ४२२७१३९
केदारलाल श्रेष्ठ, ४४६८९४१
कोण्डन्य स्थविर, ९८३२०७४८२४
निर्मल बज्राचार्य, ४२३१६८१

२०६३/६४ सालया पुचः

सम्भना महर्जन
सानुराजा शाक्य
सञ्जुमैया श्रेष्ठ
अमृता महर्जन
रमेश त्वी त्वी
प्रकाश चन्द्र प्रधान
अमृतमान शाक्य
इन्दिरा जोशी
सुरेशमान लाखे
ईश्वरमान श्रेष्ठ
मिलन शाक्य
राधिका श्रेष्ठ, ४२२९२९५
विमल ताम्राकार, ५५३५३४६
श्रीमिला सुवाल, ४२५२९१६
हरिमाया प्रधान, ५५३४८१८
प्रजला प्रधान, ९८४१४१२१०६
तारा देवी प्रधान, ४२२४६(८

२०६४/०६५ सालया पुचः

राजेन्द्रमान वज्राचार्य

यज्ञमान ताम्राकार

हिराबहादुर महर्जन

रश्मी महर्जन

राजेन्द्र शाक्य

न्हुछेलाल महर्जन

धर्मकृष्ण श्रेष्ठ

विनीता श्रेष्ठ

मोहनकृष्ण श्रेष्ठ

सज्जन प्रधान

नम्रता प्रधान

ईश्वरबहादुर श्रेष्ठ, ४२२९२९५

माधवराज श्रेष्ठ, ५५३५३४६

गोपाल तण्डुकार, ४२५२९९६

शीलाकुमारी महर्जन, ५५३४८९८

शान्ति महर्जन

माहिला महर्जन, ९८४१४१२१०६

रवि महर्जन, ४२२४६९८

त्रैलोक्यमान वनेपाली

सोनी श्रेष्ठ

माधवप्रसाद धिताल

कीर्तिबहादुर जोशी

२०६५/०६६ सालया पुचः

शान्ति महर्जन, ९८४९१३४४९९

सुरेश सुरस श्रेष्ठ, ९८४९३९३८३५

विमलप्रभा वज्राचार्य, ९८४९४५९८९३

उमेश महर्जन, ९८४९३०९९५९

नानीमैया श्रेष्ठ, ९८४९१३४०७८

अमिता डंगोल, ९८४९३४४९९७

सुनियालता जोशी, ९८४९४२८६३९

लसता सिं, ९८४९२४९३७७

नवराज नकर्म, ९७५१०९७९१०

सुलोचना सैज' जोशी, ९८४९३९५१४५

पुष्पशोभा तुलाधर, ९८४९३५२२३७

प्रकाश शाक्य, ९८४९२०५३५३

दिव्या ताम्राकार, ९८४९८७०३०५

अमिरमैया रञ्जित, ९८४९३३९७७३

समुन्द्रदेवी ताम्राकार, ९८४९५९८३०८

उर्मिला महर्जन, ९८४९५३४०२७

सूर्यमान प्रधान

अष्टमान महर्जन, ९८४९४२९२९२

प्रेमरत्न वज्राचार्य, ९८४९७४७३०८

काशीराम प्रजापति, ९८४९३९४४३७

सविन्द्र महर्जन, ९८४९३९२६५६

२०६६/०६७ सालया पुचः

अश्वेनवीरसिं ताम्राकार, ९८४९१९३५३४

जीवन महर्जन, ९८५१०९३६३३

त्रैलोक्यमान वनेपाली, ९८४९३७९६६३

पतमकेशरी वज्राचार्य, ४३३३७५२

सुनिता राजभण्डारी, ९८४९२६९४७७

रमेश महर्जन, ९८५१०५०६०६

रविन्द्रराज ताम्राकार, ९८४९१७३३३०

रमालक्ष्मी कर्णजीत, ९८४९५४०७२९

गोविन्दहरि श्रेष्ठ, ९८९३२१०२९५

प्रकाश डंगोल, ९८४९५४४९८७

किसोर नेपाली, ४२९५८३५

रविनाराज कर्णजीत, ९८०३३२६७३७

विमलकेशरी अमात्य, ९८४९४५३९१९

गंगा वज्राचार्य, ९८४३९२८९६२

रुविन शाक्य, ९८४९६३५८३

पूर्णकुमार श्रेष्ठ, ९८४९२३९६७६

२०६७/०६८ सालया पुचः

तुलसीकृष्ण प्रजापति, ९८४९०४२५४९

सानुशोभा शाक्य, ९८४९७००८५४

देवेन्द्र महर्जन, ९८४९३६६४५७

गंगादेवी महर्जन, ४३३३७५२

लक्ष्मी महर्जन, ९८४९८८९५५२

माया तुलाधर, ९८४९५९२५७४

कृष्ण गोपाल वैदार, ९८४९२०४६०४

२०६८/०६८ सालया पुचः

समिना श्रेष्ठ, ९८१३२९३६७६
 रीजा शाक्य, ९८४१४५७४५८
 अञ्जना सिं, ९८४१३३५८१५
 सरस्वती महर्जन, ९८५१०९६३२६
 लक्ष्मी देवी महर्जन, ९८४१३०२८४३
 सविना शाक्य, ९८४१२१३६७२
 वावुराजा महर्जन, ९८४१३३६०३३ 'ए'
 जानुका श्रेष्ठ, ९८४१२८१०८५
 विराजकाजी शर्मा राजोपाध्याय, ९८४१२५७०५१
 सरिता महर्जन, ९८४१३५९४४३
 मृगेन्द्रराज सुवेदी, ९८४१०१९५०९
 नजुमा राजभण्डारी, ५५३३८८५
 विष्णुहरि महर्जन, ९८४१३६८३९९
 दिपना शर्मा, ९७४११०३८११
 शर्मिला महर्जन, ९८४९३२८४५७
 वावुराजा महर्जन, ९८५१०९५४९८'बी'
 शर्मिला सुवाल(डंगोल)
 आनन्दकृष्ण ताम्राकार ९८४१२९९९०७
 श्यामलाल व्यञ्जनकार, ९८४१३७३८४५
 रविना महर्जन, ९८४९३६०५७३
 विजय शर्मा, ९८४१४३५३०६
 अशोकरत्न शाक्य, ४१०१७१
 लक्ष्मीशोभा नापित, ९८४१६१४६२७
 दिलकुमारी महर्जन, ९८४१५४७६९७
 दिपक महर्जन, ९८४१२९८६७२
 एलिना महर्जन, ९८४१७२६८९८
 न्हुछेमान महर्जन, ९८४१२४७४७७
 सूर्यलक्ष्मी महर्जन, ९८४९१५१४०४
 पुष्परत्न महर्जन, ९८४१२४७०६७
 दयाराम श्रेष्ठ, ९८४१९७९४५५
 तेजवती जोशी, ९८४९१६८७५१
 दुर्गादेवी राजभण्डारी, ९८४१६५२५७३
 दीपा महर्जन, ९८४९२२०५५६
 रामबहादुर श्रेष्ठ, ९८४१३६३८७४
 राजकुमार महर्जन, ९८४१६७९२६५
 राम महर्जन, ९८४१३५३५११

२०६८/०७० सालया पुचः

सविना महर्जन, ९८५१००७५६१
 सृष्टि श्रेष्ठ, ९८४१३८५८४९
 रश्मीरा शाक्य, ९८४१३३६६०८
 रामेश्वर श्रेष्ठ, ९८४१७४२०१०
 संजय महर्जन, ९८४११८२५३२
 सुरेश मानन्धर, ९८४१२९५५०२
 राजा शाक्य, ९८५१०४७९६
 राजु कपाली, ९८४९७०७९३९
 हरिकृष्ण महर्जन, ९८४१४४९३६३
 आशिष दुलाल, ९८४१११५५१५
 मोहनदेवी प्रजापति महर्जन, ९८४१७७६५७७
 सुमा श्रेष्ठ, ९८४१७५५४८९
 रामेश्वर भुजु, ९८५१०६९८२०
 अमृतमान महर्जन
 विजयराम कर्माचार्य, ९८५१०३२८४८
 सचिन शाक्य, ९८४१४४६५६२
 भरत महर्जन, ९८६१०७२१५३
 तारा प्रधान, ९८४९७०७९३९
 अन्जु कायस्थ, ९८४१२१३९११
 रिजु श्रेष्ठ, ९८४९०८५०३५
 कल्पना प्रधान, ९८४३०५०६४२
 पूर्णमा डंगोल, ९८४१४१०१३२
 सुजिता जोशी
 मञ्जु श्रेष्ठ, ९८४१४९४५७९
 नानीहिरा प्रजापति, ९८४१४५८१६७
 सुरेन्द्रराज अवाले, ९८४१२२४४८०
 इश्वर श्रेष्ठ, ९८४१३६५८४०
 गोपालकृष्ण नकर्मि, ९८४९४७९५५५
 इश्वर व्यञ्जनकार, ९८४९४१५३८१
 बाबुकृष्ण व्यञ्जनकार, ९८५१०६६७६८
 सुरेन्द्र अवाले, ५५५२६२१
 रोशनराज कर्णजीत

२०७०/०७१ सालया पुचः

निरनज्वालानन्द राजोपाध्याय, ९८४१३०३२४९
प्रेमतारा शाक्य, ९८४१६१५२५१
सुप्रभा शाक्य, ९८४१७०१८७६
विमला मानन्धर, ९८४१३२८०७५
पवित्रकृष्ण श्रेष्ठ, ९८४१२०४८७२
शैलेसबहादुर प्रधान, ९८४१३८४४८९
पदमावति प्रधान, ९८४१७६१९२३
नानीमैया श्रेष्ठ, ९८०८००६५७८
न्हुछे बहादुर महर्जन, ९८४१४५७४६३
धिरजकुमार महर्जन, ९८०३४७९२०५
रचना शर्मा, ९८०८२२९६३१
अन्जिता खड्गी, ९८४११६२४१०
रविन श्रेष्ठ, ९८४१२३८९४६
रेनु श्रेष्ठ, ९८४१२०६०४१
अञ्जन शर्मा, ९८४३७५११७७
रविन डंगोल, ९८४३६८६७५
रमेशलाल न्याछ्यो, ९८४(२२६४६४
सुरेशराज शर्मा, ९८४१७८३६१६
चन्दन राज शर्मा, ९८४९१३०२०९
कान्छाभाई महर्जन, ९८४१३५२७७१
सुशिला श्रेष्ठ, ९८४९६८८६६८
श्रीनु न्याछ्यो, ९८४१३२९८९६
मेरिना सिखाकार, ९८४३१९७९३९
पंकज नकर्मि, ९८४१७३१७६२
राजन महर्जन, ९८३०३०६७००
सुरज महर्जन, ९८४१६३९२११
तेजमाया महर्जन, ९८४९८८५३९९
बिना महर्जन, ९८०३३४६२८३
रत्नकाजी महर्जन, ९८४१२१५२५०
लिना प्रधान, ९८४१४२२१४१
अमिनराज शाक्य, ९८४१४२८५९९
बाबुराजा अवाले, ९८४१२६४००५
राजेन्द्र शाक्य, ९८४९३६४३६९
रामेश्वर श्रेष्ठ, ९८६०१२९७५
अमिर मसाल, ९८४१२०५७९३

२०७१/०७२ सालया पुचः

बाबुशरण महर्जन, ९८५१२१२८०६
विजयकृष्ण दसवाल, ९८४३४२१६३९
न्हुछेबहादुर महर्जन, ९८४१४५७४६३
विमला मानन्धर, ९८४१३२८०७५

२०७२/०७३ सालया पुचः

अमिर महर्जन, ९८४१५७२६३९
राकेश महर्जन, ९८४१९७२९८४
श्रृजना महर्जन, ९८४१३१७४३१
बीना महर्जन, ९८४००६९१३८
दर्शनवीर शाक्य, ९८४१२२७९६०
अबिन्द्रमान सिं, ९८४१२०४९५५
रानीशोभा महर्जन, ९८४१३६०३६७
विजयराज वज्राचार्य, ९८०२०६३५३५
वीरमाया महर्जन, ९८४१५०२४७६
दुर्गा देवी राजभण्डारी, ९८४१६५२२७३
हरिकृष्ण दुवाल, ९८४९१२५५४८
उमेश्वरमान प्रधान, ९८४३९३८८००
केशरीमैया प्रधान श्रेष्ठ
जसना राजभण्डारी, ९८४९२०९७१०
आरीकमाला अमात्य प्रधान, ९८६९३६३८४१
सुजल वज्राचार्य, ९८०३९८०५५०
रुपा महर्जन, ९८४१६२६४३७
रामेश्वर श्रेष्ठ, ९८४१४९३४४९
पूर्णकुमार मानन्धर, ९८४१३६७०९१
हिराबहादुर महर्जन, ९८४१३०२३७६

समेस्टर प्रणालि २०७३ पुचः

किरण केन रंजित, ९६१९४३७०१५
सिल्मा प्रधान, ९८४१२६५००५
हरिशंकर मानन्धर, ९८४१३५५३१५
पुष्पनारायण श्रेष्ठ, ९८५१०७५२३९
संजिवमान वैद्य, ९८४१२०३६३८
श्रीधर डाखुसी, ९८५१०५७१०१
कविन श्रेष्ठ, ९८५११९८४०६

कविना नेपाली, ९८४३११५७५५
करुणा प्रधान, ९८४१६३२३७८

समेस्तर प्रणालि २०७५ पुचः

१. छोरीमैयाँ श्रेष्ठ
२. रविन्द्र बज्राचार्य
३. विकास महर्जन
४. शान्त महर्जन
५. राजेश महर्जन
६. राजेन्द्र खड्गी
७. विशाल राजभण्डारी
८. निर्मला डंगोल
९. अमृतरत्न ताम्राकार
१०. तीर्थकेशरी गोपाली
११. प्रजीत शाक्य
१२. कृष्णप्यारी श्रेष्ठ
१३. नवीनप्रकाश श्रेष्ठ

लुमन्ति दबूया ग्वसालय् पिदनेत्यंगु

“लुमन्ति दबू ल्याः ७”

सुथालाक्क पिदनेमा धकाः भिन्तुना देछानाच्चवना ।



Padam Lal Tamang

Chairman

9851001789

जगदम्बा बचत तथा ऋण सहकारी संस्था लिमिटेड
Jagadamba Saving & Credit Co-operative Limited

☎ +977-9841275058, 9860566035

☎ +977-1-6613728, 6611420

✉ jagadambacooperative@gmail.com

✉ plt_23virgo@yahoo.com

📍 Suryabinayak Chowk, Bhaktapur



नेवारहरूको साहित्य, कला, संस्कृतिको

ऐतिहासिकता भल्कने संगालो

“लुमन्ति दबू” वार्षिक पत्रिका

प्रकाशन गर्नु भएकोमा यसको निरन्तरता र

उत्तरोत्तर प्रगतिको कामना गर्दछ ।

उत्तर कुमार तामाङ्ग

अध्यक्ष

लागीगुरांस बचत तथा ऋण सहकारी संस्था लि.

LALIGURANS SAVING & CREDIT CO-OPERATIVE LTD.

गढाघर, भक्तपुर ।

...dots
Printing House

Bishnu Hari Maharjan
Cell 9841368399

Dots Printing House

Unique Printing Press

Pinchhen - 7, Gwarko, Lalitpur.

Tel. 977-1-5524490

E-mail : dotsprinting@gmail.com



"Compleat solution for printing jobs"

लुमन्ति दबूया गवसालय् पिदनेत्यंगु

“लुमन्ति दबू ल्याः ७”

सुथालाक्क पिदनेमा धकाः भिन्तुना देछानाच्चवना ।

बुलेट एक्सप्रेस ट्रान्सपोर्ट सर्विस प्रा. लि.

भक्तपुर, नेपाल

सत्यराम न्हेमाफुकि
संचालक



नेवारहरूको साहित्य, कला, संस्कृतिको ऐतिहासिकता झल्कने संगालो

“लुमन्ति दबू ल्याः ७”

प्रकाशन गर्नु भएकोमा यसको निरन्तरता र
उत्तरोत्तर प्रगतिको कामना गर्दछ ।

Roshan Voyadhyo

Managing Director

ESTATE GURU

PROPERTIES MANAGEMENT COMPANY

Barahi, Bhaktapur.

नेवारहरूको साहित्य, कला, संस्कृतिको ऐतिहासिकता झल्कने संगालो

“लुमन्ति दबू” वार्षिक पत्रिका

प्रकाशन गर्नु भएकोमा यसको निरन्तरता र उत्तरोत्तर प्रगतिको
कामना गर्दछ ।

राजु थापा

प्रबन्ध निर्देशक

अनमोल बचत तथा ऋण सहकारी संस्था लि.

ANMOL SAVING & CREDIT CO-OPERATIVE LTD.

सूर्य विनायक, भक्तपुर ।



Travel with us!
air zone travel

Great Service. Best Price.

info@airzonetravel.com
www.airzonetravel.com

GUARANTEED

We offer lowest air fare Tickets from Nepal to USA

Featuring:

- Air Ticketing
- Hotel Reservation
- Trekking & Tour Packages
- Travel Insurance
- Insurance (Life & Non Life)



Reservations:
Rajesh L. Shrestha (M.D.)
Washington,
DC Metro: 301.979.7397
Email: Rajesh@airzonetravel.com



Reservations:
Kavita Shrestha (M.D.)
Kupondole-10, Jwagal, Lalitpur
Nepal: +977-1-5546766
Email: kavita@airzonetravel.com

Guru Padmasambhava 155 feet tall repousse statue
Takela, Lhulshe Dzong Bhutan



Artist Rajkumar Shakya created this sculpture with his vision, leadership teamwork and the effort of almost 4 years.



ON METAL
ARTS & CRAFTS
Specialized in Immense Nepali and
Tibetan Metal Crafts

☎ 977-1-5531282 Res / 5251373 Workshop
☎ 9841209588 / 9843516111
📍 Hattiban, Dhapakhel-1, Lalitpur, Nepal

✉ onmetal@live.com
🌐 www.onmetalart.com
📘 www.facebook.com/onmetal



वर्ल्ड नेवा: अर्गनाइजेशनया नाय: भाजु सिजन श्रेष्ठयात
नेपालभाषा केन्द्रीय विभागपाखें हनेज्या: ज्याइव:



लुमन्ति दबूया ग्वसालय्
चित्लाङ्ग - टिष्टुङ्ग - पालुङ्ग शैक्षिक भ्रमण



लुमन्ति दबूपाखें सफू ब्वज्याः



लुमन्ति दबूया ग्वसालय् जूगु शैक्षिक भ्रमण - कुलेखानी



अभिलेख विज्ञान अध्ययनया इवल्य मानदेवया शिलालेखया
प्रतिलिपि नेपाली भवतय - टिष्टुङ्ग



लुमन्ति दबूया ग्वसालय्
चित्लाङ्ग - टिष्टुङ्ग - पालुङ्ग शैक्षिक भ्रमण



नेपालभाषा एम.ए. ब्वपिं पुचःपाखें पिथंगु
मूति सफूया विमोचन



मूति सफूया विमोचन ज्याइवःस
नेवाः अर्गनाइजेशन अफ अमेरिकाया नायः मय्जु वविता प्रधान नाप

नेवा: अर्गनाइजेसन अफ अमेरिकाया नेपा: देय् प्रतिनिधि
व लुमन्ति दबूया नाय: भाजु किरण केन रंजितया अध्यक्षताय् पिदनेत्यंगु
“लुमन्ति दबू ल्या: ७”
सुथांलाक्क पिदनेमा धका: मिन्तुना देखानाच्वना ।



Mr. JAYAMBU RANJIT

Treasurer, World Newah Organization (WNO)
Past Executive Member, Newah Organization of America (NOA)
65 Travis Court, Gaithersburg
Maryland, 20879, USA



CLASSIC
DIAMOND JEWELLERS

*"Experience the Sparkle of our very Fine and
International Quality Diamond Gems Stone Jewellery"*



Visit Our

'NEW SHOWROOM'

at Photo Concern Building, Newroad, Kathmandu

Classic Diamond Jewellers

Classic Building, Harihar Bhawan, Pulchowk (Opp. UN House), Lalitpur, Nepal
Tel: 5546462, 5546463, 5546464, Fax: 5529374, Email: classicdj@ntc.net.np